



『永樂北藏』整理委員會

永樂北藏

綫裝書局

御製

天清地寧  
風雨調均  
烽警不作  
化醇俗厚  
外順內安  
善際光明  
大正統五  
年十一月  
十  
陰陽和順  
百穀常豐  
禮教興行  
一人皆慈  
一統皆善  
既往未  
俱登正覺  
七政明朗  
萬類咸暢  
子孝臣忠  
物靡害災  
九幽六道  
日登正覺

永樂北藏第一六九冊目錄

○大方廣佛華嚴經疏 六十卷 唐澄觀述 (本冊卷第一至卷第二十七 用一—最七)……………



大方廣佛華嚴經疏卷第一并序

用一

唐清涼山大華嚴寺沙門 澄觀撰

往復無際動靜一源含衆妙而有餘超言思  
而迥出者其唯法界歟剖裂玄微昭廓心境  
窮理盡性徹果該因汪洋沖融廣大悉備者  
其唯大方廣佛華嚴經焉故我世尊十身初  
滿正覺始成乘願行以彌綸混虛空爲體性  
富有萬德蕩無纖塵湛智海之澄波虛含萬  
象瞰性空之滿月頓落百川不起樹王羅七  
處於法界無違後際暢九會於初成盡宏廓

之幽宗被難思之海會圓音落落該十刹而  
頓周主伴重重極十方而齊唱雖空空絕跡  
而義天之星象燦然湛湛亡言而教海之波  
瀾浩瀚若乃千門潛注與衆典爲洪源萬德  
交歸攝羣經爲眷屬其爲旨也冥真體於萬  
化之域顯德相於重玄之門用繁興以恒如  
智周鑑而常靜真妄交徹即凡心而見佛心  
事理雙修依本智而求佛智理隨事變則一  
多緣起之無邊事得理融則千差涉入而無  
礙故得十身歷然而相作六位不亂而更收

廣大即入於無間塵毛包納而無外炳然齊現猶彼芥瓶具足同時方之海滴一多無礙等虛室之千燈隱顯俱成似秋空之片月重重交映若帝網之垂珠念念圓融類夕夢之經世法門重疊若雲起長空萬行芬坡比華開錦上若夫高不可仰則積行菩薩暴腮鱗於龍門深不可闕則上德聲聞杜視聽於嘉會見聞爲種八難超十地之階解行在躬一生圓曠劫之果師子奮迅衆海頓證於林中象王迴旋六千道成於言下啓明東廟智滿

不異於初心寄位南求因圓不逾於毛孔剖微塵之經卷則念念果成盡衆生之願門則塵塵行滿真可謂常恒之妙說通方之洪規稱性之極談一乘之要軌也尋斯玄旨却覽餘經其猶杲日麗天奪衆景之耀須彌橫海落羣峯之高是以菩薩搜祕於龍宮大賢闡揚於東夏顧惟正法之代尚匿清輝幸哉像季之時偶斯玄化況逢

聖主得在靈山竭思幽宗豈無慶躍題稱大方廣佛華嚴經者即無盡修多羅之總名世

主妙嚴品第一者即衆篇義類之別目大以曠兼無際方以正法自持廣則稱體而周佛謂覺斯玄妙華喻功德萬行嚴謂飾法成人經乃注無竭之涌泉貫玄凝之妙義攝無邊之海會作終古之常規佛及諸王並稱世王法門依正俱曰妙嚴分義類以彰品名冠羣篇而稱第一斯經有三十九品此品建初故云大方廣佛華嚴經

世主妙嚴品第一

歸命十方極三際

塵刹圓明調御師

永樂北藏

大方廣佛華嚴經疏

第一六九册

法界功德大悲雲 毗盧遮那大智海  
所住甚深真法性 所流圓滿修多羅  
一一塵方佛會中 普賢文殊諸大士  
我今欲以一毛智 測量無邊法界空  
願承三寶同體慈 句句冥符諸佛意  
俾令法眼常無缺 盡衆生界如普賢  
迴茲勝善洽羣生 速證菩提常樂果  
將釋經義總啓十門一教起因緣二藏教所攝三義理分齊四教所被機五教體淺深六宗趣通局十部類品會八傳譯感通九總釋

經題十別解文義

初因緣者夫聖人設教必有由致若須彌巨海大因方爲傾搖今搖如來融金之德山動深廣之智海非小緣矣故下經云非以一緣非以一事如來出現而得成就出現本爲大華嚴故先因後緣各開十義以顯無盡因十義者一法應爾故二酬宿因故三順機感故四爲教本故五顯果德故六彰地位故七說勝行故八示真法故九開因性故十利今後故言法爾者夫王道坦坦千古同規一乘玄

門諸佛齊證故一切佛法爾皆於無盡世界常轉如是無盡法輪令諸衆生反本還源窮未來際無有休息故不思議品中明一切諸佛能於一身化現不可說不可說佛刹微塵數頭一一頭化爾所舌一一舌出爾所音聲乃至文字句義一一充滿一切法界無有窮盡斯則處以毛端橫該法界時以刹那豎窮劫海處則頓起時則常起不待別因但隨見聞說有初成九會之別諸慈悲者於無盡中略此流傳令尋於此見無邊法如觀牖隙見

無際空而此時處即同無盡以一處即一切處一時即一切時故二酬宿因者何以法爾如是轉耶宿因深故夫根深則果茂源遠則流長宿因既深教起亦大深大云何我佛世尊創躡玄蹤棲神妙寂悲智雙運行願齊周是以妄想弗翦而廓徹性空靈鑑匪磨而頓朗萬法乃以無障礙解脫闡斯妙門宿因雖多略有二種一者大願力故現相品云毗盧遮那佛願力周法界一切國土中恒轉無上輪兜率偈云如來不出世亦無有涅槃以本

大願力示現自在法諸會佛加皆言願力及餘諸文成證非一二者昔行力故謂無量劫依願起行行成得果方能頓演故主山神偈云往修勝行無有邊今獲神通亦無量法門廣闡如塵數悉使衆生深悟喜三順機感者謂昔因法爾雖能常徧約可流傳皆由機感離機說法無所用故其猶上有白月下資澄潭潭清影現機感應生故兜率偈云見佛亦復然必假衆善業十方諸佛告功德林言及諸菩薩衆善根力故解脫月云此衆無諸垢

志解悉明潔等皆是機感廣顯機感如第四  
教所被機中然此機感通於現未諸會當機  
即是現在今之聞者是未來機四為教本者  
謂非海無以潛流非本無以垂末將欲逐機  
漸施末教先示本法頓演此經然亦有二一  
為開漸之本出現品云如日初出先照高山<sup>用一</sup>  
故二為攝末之本如日沒時還照高山故無<sup>五</sup>  
不從此法界流無不還歸此法界故法華亦  
云始見我身聞我所說即皆信受入如來慧  
此漸本也次云除先修習學小乘者即開漸

也又云我今亦令得聞是經入於佛慧即攝  
末歸本也斯則法華亦指此經以為本矣五  
顯果德者謂此本法中顯佛勝德令諸菩薩  
信向證故不識寶玉不得其用不知此德安  
能仰求然果德有二一依果謂華藏世界海  
等二正果如來十身等此二無礙以為佛德  
然依正無礙通有六句一依內現依如塵中  
刹海二正內現正如毛孔現佛三正內現依  
四依內現正五依內現依正六正內現正依  
其文非一又有四句一或唯依佛即刹故二



或唯正刹即佛故三俱四泯思之可知隨舉一門則攝一切並如下說六彰地位者爲顯菩薩修行佛因一道至果有階差故夫聖人之大寶曰位若無此位行無成故此亦二種一行布門立位差別故二圓融門一位即攝一切位故一位滿即至佛故初地云一地之中具攝一切諸地功德信該果海初發心時便成正覺等然此二無礙以行布是教相施設圓融是理性德用相是即性之相故行布不礙圓融性是即相之性故圓融不礙

行布圓融不礙行布故一爲無量行布不礙圓融故無量爲一無量爲一故融通隱隱一爲無量故涉人重重故世親以六相圓融上下之文非一七說勝行者欲登妙位非行不階故君子不患無位患已不立行亦二種一頓成諸行一行用一一切行故十佳品云一即是多多即一等普賢行品說一斷一切斷等故二徧成諸行此即行布謂自大菩提心體相功德乃至等覺中行此二無礙例如位說八示真法者欲成行位須解法理不體理事

行亦非真故兜率偈云不了真實法諸佛故  
興世此亦二種一顯事理無礙法二顯事事  
無礙法並如義分齊說九開因性者謂上因  
果理事皆由衆生性有若性非金玉雖琢不  
成寶器良以衆生包性德而爲體依智海以  
爲源但相變體殊情生智隔今令知心合體  
達本情亡故談斯經以爲顯示亦有二種一  
以言顯示令其知有二使其修行悟入顯現  
如下破塵出經卷等亦如法華云唯以一大  
事因緣故出現於世所謂開示悟入佛之知

見衆生等有故言唯一十利今後者既等有  
其分故廣利無邊此亦二種一利今即佛在  
當機二利後即今之見聞發心品云我等諸  
佛護持此法令未來世一切菩薩未曾聞者  
皆悉得聞此益復二一令得見聞爲堅種故  
出現品云如人食少金剛終竟不消等二令  
起行成證入故出現又云設有菩薩無量百  
千億那由他劫行六波羅蜜修習種種菩提  
分法若未聞此如來不思議大威德法門或  
時聞已不信不解不順不入不得名爲真實

菩薩以不能生如來家故若聞此法信解隨  
順悟入當知此人生如來家乃至深入如來  
無量境界良以有作之修多劫終成敗壞無  
心體極一念便契佛家賢首品云十刹塵數  
如來所悉皆承事盡一劫若於此品能誦持  
其福最勝過於彼等又此利益別對前九成  
十種益謂一聞法爾則知常徧成見聞益二  
聞本行願學佛發興成發心益三聞機感知  
法由善起成造修益四聞爲本知其義圓成  
頓得益五聞果德則信樂願齊成滅障益六

聞位期心證入成攝位益七聞行發意修行  
成起行益八聞法決須解了成稱性益九聞  
因知一切皆同成轉利益十總具前九成速  
證益故前九因皆爲今益亦可前一門皆  
成十益可以意得因上十義故此教興發心  
品中有十所因彼云以佛神力故世尊本願  
力故等因緣相叅對會因緣可以意得二明  
說經緣者一切經首說時方人等皆是緣起  
今有十緣一依時二依處三依主四依三昧  
五依現相六依說者七依聽者八依德本九

依請者十依加者今初依時夫心冥至道則混一古今法界無生本亡時分下經偈云諸佛得菩提實不計於日況無涯之說念劫圓融哉今以無時之時略顯十重時別初唯一念二盡七日三徧三際四攝同類劫五收異類劫六以念攝劫七劫念重收八異類界時九彼此相入十以本收末謂以非劫爲劫故於前十時恒演此經又此十種隨一圓收依此說時則無終始亦隨見聞說初成等如前法爾中辯若依此時則迥異餘教而餘教時

不出於此或說三七六七等隨見聞故廣如旨歸第二依處者夫智窮真際能所兩亡假說依真而非國土況剎塵即入染淨叅融圓滿熬之普周難以分其處別然真非事外不壞所依以上無時之時徧非處之處然有言此經在穢土說居摩竭等故有云處淨土說在華藏故有云如實義者二種身土無定異處即於一處見聞異故上之三義後一近宗然說此經處淨穢無礙通局交徹各二四句初淨穢中謂或唯染或唯淨如前二義或俱

華藏內娑婆故或泯染淨相盡同一法界故  
又或唯染摩竭等覆淨相故或唯淨其地金  
剛染相盡故或俱隱顯無礙故或俱非各相  
形奪二相盡故次明通局交徹二四句者謂  
或局此一界故或通該十方故或俱即此即  
徧故或泯二相盡故又或局此界攝一切故  
或通此入一切故或俱即攝即入故或泯形  
奪相盡故又以一塵例刹亦有四句可知若  
從陋至寬略顯十處初此閻浮七處九會而  
周法界如升須彌品二周百億同類一界亦

徧法界如光明覺品三徧異類樹形等刹四  
徧刹種五徧華藏六徧餘刹海若種若刹七  
徧前六類刹塵皆有同異類刹八盡虛空界  
容一一毛端之處各有無邊刹海九猶帝網  
十餘佛同然上十類一一各徧法界而前九  
正是遮那說法之處然說十住等處雖復各  
徧法界乃至塵毛為門不同亦無雜亂若約  
十住與十行等全位相攝則彼此互無各徧  
法界若約諸位相資則此彼互有同徧法界  
一一品會準此知之十餘佛同者此佛既爾

餘佛亦然故諸會結通皆云我等諸佛亦是說然主主不相見伴伴不相見主伴伴主則互相見若互不相見即各徧法界互相見故同徧法界亦無雜亂亦無障礙又上十處共為緣起舉一全收以一處稱法性故而隨前一一時皆佛此諸處又隨一一處皆具前時頓說此經此猶約器世間說若約智正覺及衆生世間即一一佛身支節毛孔皆攝無盡重重之刹普賢衆生一一皆爾並是遮那說經之處第三依主者夫真身寥廓與法

界合其體包羅無外與萬化齊其用窮源莫二執跡多端一身多身經論異說今說此經佛為真為應為一為多若言真者何名釋迦居娑婆界人天同見若云應者那言遮那處蓮華藏大菩薩見見佛法身若云一者何以多處別現若云異者何以復言而不分身故說此經佛並非前說即是法界無盡身雲真應相融一多無礙即盧遮那是釋迦故常在此處即他處故遠在他方恒住此故身不分異亦非一故同時異處一身圓滿皆全現故



一切菩薩不能思故今先明十身後彰無礙  
言十身者自有二義一約融三世間爲十者  
一衆生身二國土身三業報身四聲聞身五  
緣覺身六菩薩身七如來身八智身九法身  
十虛空身二就佛上自有十身一菩提身二  
願身三化身四力持身五相好莊嚴身六成  
勢身七意生身八福德身九法身十智身廣  
顯其相如第八地及離世間品辯言無礙者  
略有十義一用周無礙謂於上念劫剎塵等  
處遮那佛現法界身雲業用無邊悉周徧故

經云如於此處見佛坐一切塵中亦如是等  
其文非一二相徧無礙謂於上差別用中各  
攝一切業用故三寂用無礙無私成故四依  
起無礙無心頓現海印力故五真應無礙應  
即同法一味平等故六分圓無礙一身分  
即具全身故七因果無礙不礙現用上因故八依  
正無礙不礙現依故九潛入無礙入衆生界  
如如來藏雖作衆生不失自性故故出現品  
云佛智潛入衆生心又云衆生心中有佛成  
正覺等又亦攝一切衆生在一毛孔善化天

王云汝應觀佛一毛孔一切衆生悉在中等  
十圓通無礙謂此佛身即理即事即一即多  
即依即正即人即法即此即彼即情即非情  
即深即廣即因即果即三身即十身同一無  
礙法界身雲以此身雲徧前時處常說華嚴  
是知或說報身在色究竟約攝報說或說報  
身在餘淨土約引攝說或說舍那坐千葉華  
攝二地說或說登地方見約勝機說或分三  
異從體相用說俱非此經真實之義設分三  
十不同亦權實對說若不融前義亦失經宗

第四依三昧者夫動靜唯物聖豈然乎示軌  
後徒明將有說必須靜鑑前理受諸佛加從  
定起而發言言必真當言必真當故受者之  
心自然篤矣故於諸會多明入定爲說經緣  
有不入者至文當說其所入定皆盡法源業  
用難思第五依現相者謂法性寂寥雖無諸  
相無相之相不礙繁興起教多端相非一準  
或放光動刹或華雨香雲皆爲發起故諸會  
之內將欲說法多光放光通表智光以被物  
故然有二種一不壞次第光隨位增微故二

圓通無礙光隨一一光皆結通故隨處放異  
總有十光谷有所表至文當知其動地等多  
在說後則無是慶聞如十地中雖是慶前義  
兼起後則是教緣第六依說人者法無廢興  
弘之由人下文云佛法無人說雖慧莫能了  
今此能說通三世間開即為五謂佛菩薩聲  
聞衆生及器更開為十謂加三世微塵毛孔  
器及有情各有分圓故毛孔微塵即是分說  
此上諸說通三世故普賢行品云佛說衆  
生說及以國土說三世如是說等後則無量

法界品中類非一故如僧祇隨好即是佛說  
餘會多菩薩說法界品初有聲聞說諸善友  
等多菩薩說亦名衆生說菩提樹等即器界  
說至文當知其能說人用法不同或用音聲  
或用妙色等如教體中辯第七依聽人者子  
期云喪百牙輟絃若無聽者終無有說即下  
諸衆略有十類至文當明除當機衆餘皆是  
緣第八依德本者川有珠而不枯山有玉而  
增潤內無德本外豈能談然唯約說者前人  
此法故略有二類一者智慧最為首故十方

諸佛告金剛幢言及由汝智慧清淨故告金剛藏言亦是汝勝智力故二者餘行願力十方諸佛告普賢言亦以汝修一切諸行願力故十方諸佛告法慧言及汝所修諸善根力令汝入是三昧而演說法若感者善根若化主行願皆屬說用一因第九依請人者若約慈悲十三深厚亦有無問自談若約敬法重人要須誠請後說初心識昧未解諮求上智慈悲騰疑啓請然有二類一者言請二者念請諸會有無現相品當辯第十依能加者夫聖無常應

應于克誠心冥至極故得佛加然若佛自說則不俟加如第九會因人有說要假上加其第八會行依法修不異前故略無有加二七不入定故無有加餘皆具有所以加者欲顯諸佛同加即同說故一說一切說故亦顯果海無言因相可說故若爾僧祇隨好應非一切表微細難知故超出因果故然施設不同不應一準加有二種一者顯加具於三業二者冥加但與智令說普光法界無顯有冥餘皆具二顯必有冥故餘至下明教起因緣竟

第二藏教所攝中二先藏攝後教攝前中亦  
二先藏後攝今初藏謂三藏二藏通稱藏者  
以含攝故世親攝論第一莊嚴論第四皆云  
彼三及二云何名藏答云由攝故謂攝一切  
所應知義攝即包含言三藏者一修多羅藏  
二毗柰耶藏三阿毗達磨藏初中先辯名後  
顯相今初亦名修妬路亦名素怛纜此皆梵  
音梵夏古譯為契經智論之中名為經藏契  
謂契理契機經謂貫穿攝化即契理合機之  
經依主受名契經即藏持業釋也復云正翻

名線綿能貫華經能持緯此方不貴線稱故  
存於經有云按五印度呼線席經并索聖教  
皆曰修多羅則經正是敵對斥於古德經非  
敵對今更詳之若一名四實皆為敵對則古  
如所破若兼順義經自屬於席經敵對應名  
聖教故梁攝論用一譯為聖教彼論云有阿毗達  
磨非是聖教為成聖教故加修多羅名古德  
見此儒墨皆稱為經遂借彼席經以目聖教  
則雙含二義俱順兩方借義助名更加契字  
揀異席經甚為允當二顯相者西域四名所

目雖殊意義相似故同稱修多羅而聖教多  
含具上三義故雜心云經有五義一曰涌泉  
二曰出生三曰顯示四曰繩墨五曰結髮涌  
泉則注而無竭出生則展轉滋多義同井索  
有汲引故顯示正是聖教顯事理故繩墨則  
指定正邪亦是繩之為經能持於緯同帝經  
義結髮同線線能貫華結成髮故總上五義  
不出貫攝故佛地論第一云能貫能攝故名  
為經以佛聖教貫穿攝持所應說義所化生  
故此或貫攝通所說所化或貫穿法相攝持

所化又世親攝論釋貫穿云謂能貫穿依故  
相故法故義故依者謂於是處由此為此而  
有所說相者謂世俗諦相勝義諦相法者謂  
蘊界處緣起諦食靜慮無量無色解脫勝處  
徧處菩提分無礙解無諍等義者隨順密意  
說等瑜伽二十五顯揚二十大十五同此說餘義  
至十二分中當明第二毗柰耶藏初名後相  
前中亦名毗尼梵言之略耳此翻為調伏謂  
調練三業制伏過非調練通於止作制伏唯  
明止惡就所詮之行彰名即調伏之藏或能



詮藏有調伏之能即有財釋契經藏中類有  
此釋毗尼或翻爲滅滅有三義一滅業非二  
滅煩惱三得滅果或名尸羅具云翅怛羅此  
云清涼離熱惱因得清涼果故亦名波羅提  
木又此云別解脫此就因得名然有二義一  
揀異定道名之爲別二三業七支各各防非  
故名爲別亦翻爲隨順解脫此據果主隨順  
有爲無爲二種解脫果故亦名性善如十誦  
律亦名守信如昔所受實能持故後顯相者  
前名之中已含止作即毗尼相若別說者世

親攝論云毗柰耶有四義謂犯罪故等起故  
還淨故出離故廣如彼論第三阿毗達磨藏  
阿毗名對達磨云法法有二種一勝義法謂  
即涅槃是善是常故名爲勝二法相法通四  
聖諦相者性也狀也二俱名相法既有二對  
亦二義一者對向謂向前涅槃二者對觀觀  
前四諦其能對者皆無漏淨慧及相應心所  
等由對果對境分二對名故慧但是對而非  
是法非所對故言對法者法之對故對法  
藏特名慧論舊譯爲無比法以詮慧勝故世

親攝論云阿毗達磨有四義謂對故數故伏故通故對義同前數者於一一法數數宣說訓釋言辭自共相等無量差別故伏者由此具足論處所等能勝伏他論故通者此能通釋素怛纜義故亦名優婆提舍此云論義亦名磨怛理迦用一此云本母謂以教與義十六為本為母亦云依藏生解藏為解母本即是母亦名摩夷此云行母依藏成行故行之母故然此三藏約其所詮略有二門一者剋性則經詮三學戒唯戒心二學論唯慧學如攝論說二

約兼正別三藏之中經正詮定毗尼詮戒論詮於慧兼各通三第二明二藏者一聲聞藏二菩薩藏即由前三藏詮示聲聞理行果故名聲聞藏詮示菩薩理行果故名菩薩藏故莊嚴論第四云此三藏由上下乘差別故復為聲聞藏及菩薩藏攝大乘同此此就二乘理果同故合之若約教行別故即開三乘以為三藏如普超等經又由緣覺多不籍教出無佛世佛在世時攝屬聲聞故但分為二即是大小半滿不同第二明所攝者此經三藏

之中正唯修多羅攝兼詮餘二十藏等品廣顯戒故問明等品顯論義故若就修多羅中以義揀教則唯十藏攝具足主伴顯無盡故教義融故二藏之中唯菩薩藏若分權實但菩薩藏一分所攝權不攝故若約此攝乃至聲聞亦此經攝用一此能包含無量乘十七故揀於權實至下立教中明已辯藏攝第二明教攝者教有二種一者通相十二分教亦分大小至下十藏品辯二者諸宗立教不同今當略釋夫教海沖深法雲彌漫智光無際妙辯巨窮

以無言之言詮言絕之理以無變之變應無窮之機極位所承凡情難挹今乘理教之力略啓四門一大意合離二今古違順三分宗立教四總相會通今初且西域東夏弘闡之流於一代聖言或開宗分教或直釋經文以皆含得失故耳且不分之意略有五焉一則理本一味殊塗同歸故不可分也二一音普應一雨普滋故三原聖本意爲一事故四隨一一文衆解不同故五多種說法成枝流故以斯五義故不可分分之乃令情構異端是

非競作故以不分爲得其分教者亦有多義  
一理雖一味詮有淺深故須分之使知權實  
二約佛雖則一音就機差而教別三本意未  
申隨他意語而有異故四言有通別就顯說  
故五雖分權實須善會佛意有開顯故又王  
之密語所爲別故不識權實以深爲淺失於  
大利以淺爲深虛其功故莊嚴聖教令深廣  
故諸聖教中自有分故諸大菩薩亦開教故  
以斯多義開則得多而失少合則得少而失  
多但能虛已求宗不可分而分之亦何爽於

大旨故今分之第二古今違順曲分爲二先  
叙此方後明西域今初諸釋雖衆略叙數家  
勒爲五門一立一音教謂如來一代之教不  
離一音然有二師一後魏菩提流支云如來  
一音同時報萬大小並陳二姚秦羅什法師  
云佛一圓音平等無二無思普應用一機聞自殊  
非謂言音本陳大小故維摩經云佛以一音  
演說法衆生各各隨所解上之二師初則佛  
音具異後則異自在機各得圓音一義然並  
爲教本不分之意耳第二立二種教自有四

家一西秦曇牟識三藏立半滿教即聲聞藏  
爲半字教菩薩藏爲滿字教隋遠法師亦同  
此立斯則文據涅槃蓋是對小顯大通相之  
意未於大中顯有權實亦含半滿二隋遠法  
師立漸頓二教謂約漸悟機大由小起所設  
具有三乘故名爲漸若約頓機直往於大不  
由於小名之爲頓此雖約機說有漸頓而所  
說法不出半滿三唐初印法師亦立二教一  
屈曲教謂釋迦經以逐機性隨計破著故如  
涅槃等二平道教謂舍那經以逐法性自在

說故如華嚴經又此二教略有四異一生異  
謂釋迦化身與盧舍那十身異故二處異謂  
娑婆界木樹草座與華藏界中寶樹寶座等  
異故三衆異謂爲聲聞及菩薩說與唯菩薩  
及極位同說異故四說異謂局處之說與該  
通十方之說異故比約化儀以判然華嚴雖  
有隨諸衆生各別謂伏皆是稱性善巧一時  
頓演涅槃等雖說一極或對權顯實或會異  
歸同一切如來或說不說故云屈曲約釋迦  
爲主則未顯十身十身爲主必具釋迦娑婆

之處未融華藏華藏之處必融娑婆略云四異其實有多誠如所判但以屈曲之內未顯法之權實耳四齊朝隱士劉虬亦立漸頓二教謂華嚴經名爲頓教餘皆名漸始自鹿苑終於雙林從小之大故然此經如日初出先照高山即是頓義慈龍降雨以證漸義於理可然漸約五時次下當辯第三立三種教亦有三家一南中諸師同立三教謂於前漸頓加不定教由漸中先小後大而央掘經六年之內即說爲遮此難故立不定謂別有一經

雖非頓攝而明佛性常住即勝鬘金光明等是爲偏方不定教也漸中開合諸師不同或但分爲二即是半滿或分爲三即武丘山岌法師謂十二年前見有得道名有相教十二年後齊至法華見空得道名無相教最後雙照一切衆生佛性闡提作佛名常住教此與唐三藏三時之教大同至叙西域中說真諦三藏依金堯明立轉照持三輪之教亦大同此而時節小異謂七年前說四諦名轉法輪七年後說般若具轉照二輪以空照有故三



十年後具轉照持以雙照空有持前二故或  
分爲四即宋朝法法師謂於前三時無相之  
後常住之前指法華經爲同歸教以會三歸  
一萬善悉向菩提故或開爲五然有二家一  
道場慧觀等於無相之後同歸之前指淨名  
思益等爲抑揚教二者即前劉公用不開抑揚  
而有教之初取提冒經爲人天教上來諸師  
皆於漸中約時開異若不加不定之教則招  
難尤多以初有大故雖加不定猶有妨難略  
顯五時之妨餘可例知初明十二年前爲有

相者自違成論成論云我今正明三藏中實  
義實義即空又阿含中云無是老死即法空  
也無誰老死即生空也又智論云三藏中明  
法空爲大空摩訶衍中明十方空爲大空皆  
顯小乘已有二空若云第二時說空者十二  
年後方制廣戒豈唯說空又智論云從得道  
夜乃至涅槃常說般若豈前不說空若云第  
二時中未顯常住者實相般若豈無常耶涅  
槃亦說佛性亦名般若若是知實相般若即是  
正因佛性觀照即爲了因又般若離四句何

曾存空般若不壞四句豈無妙有是知小大各有四門而但言初有次空者各得一門之意耳若云第三時中但名抑揚亦非常者淨名云佛身無為不墮諸數觀身實相觀佛亦然豈無常耶般若亦云二乘智慧猶如螢光菩薩一日學智如日之照豈非抑揚若云第四時中但顯同歸亦未明常者壽量品云常住不滅又方便品云世間相常住等豈無常耶五以涅槃為常住者當教可爾而涅槃之時亦有小乘之見如阿含中說如來涅槃之

相故若以人天為初者提胃雖說戒善得道皆通三乘故彼經云提胃得不起法忍又違密跡經中第二七日說三乘故然上五時等皆以約時剋定則有所乖揀去不定從多分說亦有理在二後魏光統律師承習佛陀三藏亦立三教謂漸頓圓初為根未熟者先說無常後方說常先空後不空等如是漸次故名為漸二為根熟之輩於一法門具足演說常無常空不空等一切具說更無由漸故名為頓三為於上達分階佛境之者說於如來

無礙解，脫究竟果德圓滿秘密自在法門故名爲圓此亦約化儀說有前後耳意明今時堪受頓者必昔曾受化故云根熟上達之言義兼地前分階佛境即謂地上於理亦通三隋末唐初吉藏法師依法華第五立三種法輪一始見我身聞我所說即皆信受入如來慧即根本法輪二除先修習學小乘者即枝末法輪三我今亦令得聞是經入於佛慧即攝末歸本法輪此判全約化儀據法但有大小然法華爲於一類開顯本末若將定判一

永樂北藏

大方廣佛華嚴經疏

第一六九冊

代聖教收義不盡以法華之前亦有六故豈般若等皆爲枝末又無量義云佛一切時說大小故

大方廣佛華嚴經疏卷第一

月一

三

音釋

剖善厚切 纖思廉切 暎吉了切 浩瀚切  
判也 微也 明也 瀚切  
浩瀚 曝曝步切 臆臆步切 闕映規切 闔闔切  
大貌 善切 女力切 胡夾切 他但切 牖  
顯也 匿藏也 洽霑被也 坦平夷也 牖牖切  
以九切 隙孔也 創楚亮切 翦齊斷也 琢琢切

永樂北藏

大方廣佛華嚴經疏

第一六九册

渠 幽切	翅 施切	妬 都切	治 毛切	竹 角切
岌 魚切	智 巨切	故 纜切	也 也切	寥 寥切
	不 可切	齊 火切	虛 職切	廓 求切
	也 也切	也 也切	縹 縹切	連 連切
	挹 持切	縱 于切	曰 貴切	廓 空切
		經 經切	橫 曰切	闊 大切
		構 居切	曰 緯切	輟 輟切
		會 會切	髮 髮切	止 止切
		也 也切	班 班切	勞 勞切
		虬 虬切		切 切

大方廣佛華嚴經疏卷第二

用二

唐清涼山大華嚴寺沙門澄觀撰

第四立四教者略有四家一梁朝光宅法師  
依法華第二立四乘教謂臨門三車即是權  
教三乘四衢等賜即實教大乘以臨門牛車  
亦同羊鹿俱不得故並無體故諸子皆索故  
是知三皆虛指以為方便此則前三是三乘  
後一是一乘無乖教理若唯說法華為實則  
抑諸般若及諸大乘了義之經是知昔大亦  
有權實法華但會昔權故說三皆虛指昔實

不滯方便故不會之若約會權歸實即是會  
三為一若破小顯大即是會二歸一若開權  
顯實則三是一更無別一故彼經云汝等所  
行是菩薩道先所出內是子所知若廢權立  
實義說為四如攬三點以成一伊點別非伊  
伊具三點昔三既別實不兼權今一全兼成  
四無爽若依昔未顯說一切具有如來知見  
根敗之種今並說成則今昔有異於文有據  
義亦極成二陳隋二代天台智者承南岳思  
大師立四教云一三藏教此教明因緣生滅

四真諦理正教小乘旁化菩薩二者通教通者同也三乘同稟故此教明因緣即空無生四真諦理是摩訶衍之初門正為菩薩旁通二乘大品云欲得聲聞乘當學般若波羅蜜等然教理智斷行位因果皆通淺深不同論共般若唯共於淺三別教別即不共不共二乘人說故此教正明因緣假名無量四真諦理的化菩薩不涉二乘故聲聞在座如聾如盲不名不共而云別者兼欲揀非圓故以一因迥出一果不融歷別而修不得因果圓融

故四圓教圓以不偏為義此教正明不思議因緣二諦中道事理具足不偏不別但化最上利根之人故名為圓華嚴經云顯現自在力為說圓滿經無量諸眾生悉受菩提記等別則教理等皆別圓則教等皆圓又此四教由三觀起從假入空析體異故有初二教從空入假從假入中有別教起三觀一心中得有圓教起又此四教不局定一部一部之中容有多故又更以四種化儀收之謂頓漸不定秘密頓漸同前爰公後二謂一音異解若

互相知名為不定互不相知即名秘密此師  
立義理致圓備但三藏教名義似小濫以餘  
三教亦有三故所以爾者良以智論之中多  
詔小乘為三藏故成實論中亦自說云我今  
欲說三藏中實義故初對舊醫戒定慧故立  
此三事迢然不同異後三教通教意融三故  
別教依一法性而顯三故圓教三一無障礙  
故所以不名小乘教者此教亦有大乘六度  
菩薩三十四心斷結成真佛故故藏通別圓  
之義四教互有而覈其定實餘三不成唯成

當教中義耳但判華嚴兼於圓別以就登地  
已上約寄位行布為別義故名異義同亦無  
大過三唐初海東元曉法師亦立四教一三  
乘別教如四諦緣起經等二三乘通教如般  
若深密經等三一乘分教如梵網經等四一  
乘滿教如華嚴經等然三乘共學名三乘教  
於中未明法空名別相教說諸法空是為通  
教不共二乘名一乘教於中未顯普法名隨  
分教具明普法名圓滿教然此大同天台但  
合別圓加一乘分耳自言且依乘門略立四

種非謂此四徧攝一切故無有失四賢首弟子宛公依寶性論立四種教論云有四種眾生不識如來藏如生盲人一者凡夫二者聲聞三者辟支佛四者初心菩薩言四教者一迷真異執教當彼凡夫二真一分半教當彼二乘三真一分滿教當彼初心菩薩四真具分滿教即當彼識如來藏者初教謂諸外道迷於真理廣起異計二謂小乘於真如隨緣不變二分義中唯說生空所顯之理故名爲半如涅槃半字三謂但得不變不得隨緣故

名一分而雙辯二空故名爲滿四由具隨緣不變二義故名具分廣如彼說然今判聖教那叅邪說若對教主應如此方先立三教或如西域分內外及六師等又依涅槃爲半滿者後二既滿不應復有一分之言旣但得不變一分豈名爲滿又涅槃半滿豈唯約二空豈彼不說妙有而訶空耶故其所立未爲允當第五立五教略有二家一波頗三藏立一四諦教謂四阿含等二無相教謂諸般若三觀行教謂華嚴經四安樂教謂涅槃經說常



樂故五守護教謂大集經說守護正法事故  
此釋名局以觀行等皆互有故二賢首所立  
五教至下當知第二叙西域者即今性相二  
宗元出彼方故名西域謂那爛陀寺同時有  
二大德一名戒賢二名智光戒賢遠承彌勒  
無著近踵護法難陀依深密等經用二瑜伽等論  
立三種教以法相大乘而爲了義即唐三藏  
之所宗師謂佛初於鹿苑轉四諦小乘法輪  
說諸有爲法皆從緣生以破外道自性因等  
又緣生無我翻外有我然猶未說法無我理

即四阿含等是第二時中雖依徧計所執而  
說諸法自性皆空翻彼小乘然於依他圓成  
猶未說有即諸部般若等經第三時中就大  
乘正理具說三性三無性等方爲盡理即解  
深密經等是故於彼三時初墮有邊次墮空  
邊俱非了義後時具說徧計性空餘二爲有  
契會中道方爲了義此依深密所判二智光  
論師遠承文殊龍樹近稟青目清辯依般若  
等經中觀等論亦立三時教以明無相大乘  
爲真了義謂佛初鹿苑說小明心境俱有次

於中時爲彼中根說法相大乘境空心有唯  
識道理以根猶劣未能全入平等真空故後  
第三時爲上根說無相大乘辯心境俱空平  
等一味爲真了義又初漸破外道自性等故  
說因緣生法決定是有次漸破小乘緣生實  
有之執故說依他似有以彼怖畏此真空故  
由存假名而接引之後時方就究竟而說緣  
生即空平等一味此三次第如智光論師般  
若燈論釋中引大乘妙智經說然此二三時  
並不能斷一代時教以各有據互相違故各

別爲於一類機故深密經意爲於一類餐般  
若者聞平等空撥無因果不了空有無二故  
第三時爲其分析於一法上空有之義其妙  
智經則以一類聞說三性迷唯識者未能忘  
心觀緣起者定謂似有故令總忘心境即事  
而真得斯意者則不相違然欲會二宗須知  
二宗立義有多差別略叙數條一者一乘三  
乘別二一性五性別三唯心真妄別四真如  
隨緣凝然別五三性空有即離別六生佛不  
增不減別七二諦空有即離別八四相一時

前後別九能所斷證即離別十佛身無為有  
為別且初二義者由性有五不同故令乘  
有三一權實如法相宗意以一乘為權三乘  
為實故深密三時教中初皆不成次一向成  
是為若過若不及皆非了義第三時中有性  
者成無性不成方為了義故云普為發趣一  
切乘者又初二卷中皆云一乘是密意說故  
知是權又勝鬘經以一乘為方便故大般若  
五百九十三中善勇猛菩薩言唯願世尊哀  
愍我等為具宣說如來境智若有情類於聲

聞乘性決定者聞此法已速能證得自無漏  
地於獨覺乘性決定者聞此法已速依自乘  
而得出離於無上乘性決定者聞此法已速  
證無上正等菩提若有情類雖未已入正性  
離生而於三乘性不定者聞此法已皆發無  
上正等覺心明二深密第二大意同此又云一切  
趣寂聲聞種性補特伽羅雖蒙諸佛施設種  
種勇猛加行方便化導終不能令當坐道場  
證阿耨多羅三藐三菩提又十輪第九亦說  
三乘各定差別皆以性定五故故楞伽中佛

告大慧有五種種性一聲聞乘性二辟支佛乘性三如來乘性四不定乘性五者無性大莊嚴論及瑜伽論皆同此說善戒地持雖但說二種性一有種性二無種性亦云無種性人無種性故雖復勤行精進終不能得無上菩提但以人天善根而成熟之無性瑜伽亦同此說若法性宗意則以三乘是權一乘爲實法華經云十方佛土中唯有一乘法無二亦無三除佛方便說又云初以三乘引導衆生然後以大乘而度脫之以性唯一故故

云諸佛兩足尊知法常無性又第三云一相一味究竟涅槃常寂滅相涅槃亦云佛性者名爲一乘師子吼者名決定說決定宣說一切衆生皆有佛性凡是有心定當作佛三十三又云一切衆生同有佛性皆同一乘一解脫一因一果同用二一甘露一切當得十常樂我淨是名一味又法華第三云我滅度後復有弟子不聞是經不知不覺菩薩所行自於所得功德生滅度想當入涅槃我於餘國作佛更有異名是人雖生滅度之想入於涅槃而於

彼土求佛智慧得聞是經唯以佛乘而得滅  
度等智論九十五亦同此說明知趣寂決定  
迴心法華論中四聲聞內決定及增上慢此  
二根未熟故菩薩與記方便令發心既云未  
熟明必當熟方便令發即菩提心不可不順  
已宗判爲論錯入楞伽第二第四第七皆同  
說二乘無實涅槃但是三昧力故後必當得  
無上菩提法華論中意亦同此皆是假說涅  
槃故云三昧勝鬘亦云言諸二乘得涅槃者  
是佛方便又無上依經實性佛性二論皆說

入滅二乘於三界外更受變易密嚴經中二  
乘畢無灰斷永滅如是經論其文非一永寂  
聲聞必無明矣涅槃第九菩薩品中廣明闡  
提斷善不能發心當文即云彼一闡提雖有  
佛性而爲無量罪垢所纏不能得出如蠶處  
繭此則有而非無又云或有佛性一闡提  
有善根人無等則知無有無種性人況前引  
楞伽五性自迷其文彼經第五性云五者無  
性謂一闡提此有二種一者焚燒一切善根  
即謗菩薩藏二者憐愍一切衆生界即是善

薩若有衆生不入涅槃我亦不入大慧白言  
此二何者常不入涅槃佛言菩薩常不入涅  
槃非焚燒一切善根者以知諸法本來涅槃  
不捨一切諸衆生故此意則明菩薩入而不  
入既云菩薩常不入非闡提者則明闡提後  
必入矣用二況經自云復以如來神力故或時善  
根生耶莊嚴第五無性亦有二種一是時邊  
二者畢竟時邊謂暫時之無即前闡提畢竟  
謂求無即大悲菩薩是知前來所引大般若  
深密等經皆是未說法華之前就其長時云

定性無性非未定亦無諸論隨佛方便成立  
故云定無耳故實性佛性等論皆說以一闡  
提謗大乘因依無量時說無佛性非謂究竟  
無清淨性若謂法華是第二時教爲引不定  
二乘故說一切悉皆成佛而猶未說定性不  
成故名密意非了義者何以自判法華爲第  
三時教誰敢判於法華爲不了耶妙智經中  
及梁攝論成立正法中皆以一乘居三乘後  
故真諦三藏部異執記云三十八年後說解  
節經等無量義云四十年後說法華經明知

法華居後故經云臨欲終時若不信法華居後涅槃臨終居然可信豈不亦以一乘一性破三五耶若以般若爲第二時法華爲第三時於理即通復自違深密第三時中普爲發趣一切乘者以法華破三故明知深密三時不能定斷一切聖教以未居最後故且約顯用二一類義故分三耳義如前說若將法華望之應有四時以一乘教破前三乘故若謂佛性有二者理性二者行性理性定有行性或無斯言可爾故涅槃云或有佛性善根人有

闡提人無即是行性或有佛性二人俱有即是理性然涅槃依於理性明其等有故云凡是有心定當作佛不言凡是有行定當作佛若謂理性定有容趣寂不成則違教理是知闡提不作佛者以作佛非闡提故乃抑揚當時耳若謂法華入滅後信一乘即是變化權聲聞者權必化實無實化誰又豈不誤於一類怯弱好滅衆生是知趣寂皆是法華前意耳又勝鬘經云若如來隨彼所欲而方便說即是一乘無有二乘二乘入於一乘一乘者

即第一義乘此意明隨欲方便而說二乘明知即是一乘無有二矣不曉此意將上方便連下一乘而讀之輒斷一乘以爲方便惑之甚矣又彼經中廣破二乘云無涅槃又云此經斷一切疑決定了義入一乘道豈說一乘以爲方便設有方便之言尚在法華之前況復無耶法華云此經難信難解佛現在世猶多怨嫉況滅度後誠哉斯言若信執三乘五性不信一乘一性者深爲可愍故百喻經第二中王改聚落五由旬爲三由旬喻以喻方

便於一說三後人但信於三不信於一即其事也上約二宗各別所據則互相違反若會釋者亦不相違謂就機則三約法則一新熏則五本有無二若入理雙拂則三一兩亡若約佛化儀則能三能一是故競執是非違無違諍大集五部雖異不離法界涅槃各說身因佛許無非正說餘義次下當會古今違順竟第三立教開宗分二一以義分教二依教分宗今初以義分教教類有五即賢首所立廣有別章大同天台但加頓教今先用之後



總會通有不安者頗為改易言五教者一小  
乘教二大乘始教三終教四頓教五圓教初  
即天台藏教二始教者亦名分教以深密第  
二第三時教同許定性二乘俱不成佛故今  
合之總為一教此既未盡大乘法理故立為  
初有不成佛故名為分三終教者亦名實教  
定性二乘無性闡提悉當成佛方盡大乘至  
極之說故立為終以稱實理故名為實上二  
教並依地位漸次修成故總名為漸四頓教  
者但一念不生即名為佛不依地位漸次而

說故立為頓如思益云得諸法正性者不從  
一地至於一地楞伽云初地即為八乃至無  
所有何次等不同前漸次位修行不同於後  
圓融具德故立名頓頓詮此理故名頓教天  
台所以不立者以四教中皆有一絕言故今  
乃開者頓顯絕言<sup>用</sup>別為一類離念<sup>十</sup>機故即順  
禪宗五圓教者明一位即一切位一切位即  
一位是故十信滿心即攝五位成正覺等依  
普賢法界帝網重重生伴具足故名圓教如  
此經等說若約所說法相者初小乘中但說

七十五法但說人空縱少說法空亦不明顯但依六識三毒建立染淨根本故阿含云貪恚愚癡是世間根本等未盡法源故多諍論部執不同二始教中廣說法相少說法性所說法性即法相數說有百法決擇分明故少諍論說有八識唯是生滅依生滅識建立生死及涅槃因法爾種子有無未別是故五性決定不同既所立識唯業惑生故所立真如常恒不變不許隨緣依他起性似有不無非即無性真空圓成說經空義但約所執既言

三性五性不同故說一分衆生決不成佛名生界不滅真俗二諦迥然不同非斷非常果生因滅同時四相滅表後無根本後得緣境斷惑義說雙觀決定別照以有爲智證無爲理義說不異而實非一既出世智依生滅識種故四智心品爲相所遷佛果報身有爲無漏如是義類廣有衆多具如瑜伽雜集等說三終教中少說法相多說法性所說法相亦會歸性所立八識通如來藏隨緣成立不生滅與生滅和合而成非一非異一切衆生平

等一性但是真如隨緣成立依他無性即是  
圓成一理齊平故說生界佛界不增不減第  
一義空該通真妄真非俗外即俗而真故雖  
空不斷雖有不常四相同時體性即滅緣境  
斷惑不二而二有能所斷二而不二說為內  
證照惑無本即是智體照體無自即是證如  
非智外如為智所證非如外智能證於如世  
出世智依如來藏始本不二則有為無為非  
一非異故佛化身即常即法不墮諸數況於  
報體即體之智非相所遷如是義類亦有眾

多次第對上如楞伽等經起信等論若會上  
二宗廣如別說四頓教中總不說法相唯辯  
真性亦無八識差別之相一切所有唯是妄  
想一切法界唯是絕言五法三自性俱空八  
識二無我雙遣訶教勸離毀相泯心生心即  
妄不生即佛亦無佛無不佛無生無不生如  
淨名默住顯不二等是其意也五圓教中所  
說唯是無盡法界性海圓融緣起無礙相即  
相入如因陀羅網重重無際微細相容主伴  
無盡十法門各攝法界義分齊中當具宣

說二依教開宗宗乃有十如經宗中辯第四  
 總相會通曲分為二先通會諸教後會化儀  
 前後今初諸德立教各自所據今雖立五亦  
 會取諸說略有五重一或總為一謂唯是如  
 來一大善巧攝生方便一音所演則前之二  
 師立一音者不失道理二或開為二此更有  
 三一對小顯大初是半字後四皆滿則無違  
 二藏等言二對權顯實前則二是三乘後三  
 為一乘則不違法華四乘三者三四二教雖  
 則泯二異前而對三顯一曲巧順機後一直

顯本法一向不共如智論說此同印公平道  
 屈曲三或分為三初一小乘次一三乘後三  
 一乘或唯後一是不共一乘智論指此以為  
 不共大品等經共二乘說故此三亦順四乘  
 又梁論第八云如來成立正法有三種一立  
 小乘二立三乘三立一乘第三最勝故名善  
 成立此亦同妙智經真諦三藏部異執疏第  
 二卷中亦同此說四或分為四此亦二門一  
 中間三教存三泯二別故開之為四一別教  
 小乘如四阿舍等二同教三乘如深密等三

同教一乘如法華等四別教一乘如華嚴經  
二約歷位無位開漸及頓故分為四總合二  
三以為漸教餘皆如名五或分為五如前所  
立以漸中有始終故然取多分略指數經實  
非局判以一經中容多教故第二化儀前後  
者今辯如來一代時教略啓十門一本末差  
別門二依本起末門三攝末歸本門四本末  
無礙門五隨機不定門六顯密同時門七一  
時頓演門八寂寞無言門九該通三際門十  
重重無盡門初中本末同時始終一類各無

異說然有三位一若小乘中則初度陳如後  
度須跋中間亦唯說小益小如四阿舍經及  
五部律二若約三乘則始終說三遍蓋三機  
如密跡經等三若約一乘則始終唯為圓機  
說於圓極如華嚴等其中不通小乘復攝九  
世該於前後更無異說然此三類依於此世  
根性定者常聞如上一類之法故佛所演各  
通始終更無前後二依本起末門此有五類  
謂初為菩薩說大二為緣覺三為聲聞四為  
善根衆生五為邪定如出現品日照高山及

三千初成喻中廣辯其相皆明先大後小約法名從本起末以於一佛乘分別說三故十八本二皆大乘出故約機各是一類之機非約一機前後大小三攝末歸本門者依無量義初時說小次說中乘後時說大故法華亦云初轉四諦深密妙智雖復二時三一不同皆先小後大四本末無礙門者謂初舉照山王之極說明非本無以垂末後顯歸大海之異流明非末無以歸本故本末交映與奪相資方為攝生之善巧矣是故通論總有五位

一根本一乘如華嚴經二密意小乘三密意大乘四顯了三乘上三如深密五破異一乘如法華上之四門圓通無礙是則前後即無前後無前後之前後耳五隨機不定門者此上四門初門明三類機始末常定次門明五類機異時常定第三門明一類機自淺之深用二第四門明二類機初機聞頓後機從淺至深更有一類不定之機或從小乘次入三乘後入一乘亦有從小直入一乘或多類機隨聞十五一句異解不同六顯密同時者若異聞互知

是顯不定若互不相知即是秘密密顯同時亦無前後七上來諸門一時頓演八從初得道乃至涅槃不說一句九此上諸門盡通三際十上之九門隨處隨時重重無盡皆無前後後之二門正是華嚴境界融取前八亦不離華嚴之用第三義理分齊已知此經總屬圓教未知圓義分齊云何然此教海宏深包含無外色空交映德用重重語其橫收全收五教乃至人天總無不包方顯深廣其猶百川不攝大海大海必攝百川雖攝百川同一

鹹味故隨一滴迥異百川前之四教不攝於圓圓必攝四雖攝於四圓以貫之故十善五戒亦圓教攝尚非三四況初二耶斯則有其所通無其所局故此圓教語廣名無量乘語深唯顯一乘一乘有二一同教一乘同頓同實故二別教一乘唯圓融具德故以別該同皆圓教攝今顯別教一乘略顯四門一明所依體事二攝歸真實三彰其無礙四周徧含容各有十門以顯無盡初中十者一教義二理事三境智四行位五因果六依正七體用

八人法九逆順十應感教即能詮即前五教  
乃至光香等義即所詮即五教等一切義理  
理即生空所顯二空所顯無性真如等理事  
即色心身方等事餘可思準第二攝歸真實  
者即真空絕相經云法性本空寂無取亦無  
見性空即是佛<sup>用三</sup>不可得思量亦有<sup>十六</sup>十義如法  
界觀第三彰其無礙然上十對皆悉無礙今  
且約事理以顯無礙亦有十門一理徧於事  
門謂無分限之理全徧分限事中故一一纖  
塵理皆圓足二事徧於理門謂有分之事全

同無分之理故一小塵即徧法界由上二義  
互該徹故皆同一性故出現品云如來成正  
覺時於其身中普見一切衆生成正覺乃至  
普見一切衆生入涅槃皆同一性所謂無性  
理徧事故一成一切成事徧同理故說都無  
所成經云譬如虛空無成無壞一性無性即  
是佛性故涅槃云佛性名第一義空第一義  
空名為智慧又出現云無一衆生不具如來  
智慧無不有者即一乘義也三依理成事門  
謂事無別體要因理成如攬水成波故於中



有二一明具分唯識變故覺林菩薩偈云心如工畫師能畫諸世間五陰悉從生無法而不造此明唯心義也何以得知是具分耶次頌云如心佛亦爾如佛衆生然應知佛與心體性皆無盡既是即佛之心胡非獨妄心而已二明真如隨緣成故問明品文殊難云心性是一云何見有種種差別即緣性相違難覺首答云法性本無生示現而有生即真如隨緣答又云諸法無作用亦無有體性明隨緣不失自性即同勝鬘依如來藏有生死依

如來藏有涅槃等四事能顯理門謂由事攬理成故事虛而理實依他無性即是圓成如波相虛令水現故夜摩偈云云何說諸蘊諸蘊有何性蘊性不可滅是故說無生分別此諸蘊其性本空寂空故不可滅此是無生義衆生既如是諸佛亦復然佛及諸佛法自性無所有又十忍品云譬如谷響從緣所起而與法性無有相違須彌頂偈云了知一切法自性無所有如是等文徧於九會五以理奪事門謂事既全理則事盡無遺如水奪波波

相全盡故說生佛不增不減出現品云譬如  
虛空一切世界若成若壞常無增減何以故  
虛空無生故諸佛菩提亦復如是若成正覺  
不成正覺亦無增減何以故菩提無相故乃  
至云設一切衆生於一念中悉成正覺與不  
成正覺等無有異皆以無相平等故不增不  
減經亦同此說非約一分衆生不成佛者說  
無增減耳六事能隱理門謂真理隨緣而成  
事法遂令事顯理不現也如水成波動顯靜  
隱故法身流轉五道名曰衆生財首偈云世

間所言說一切是分別未曾有一法得入於  
法性等七真理即事門謂凡是真理必非事  
外以是法無我理故空即色故理即是事方  
爲真理第七迴向云法性不違法相等故八  
事法即理門謂緣集必無自性舉體即真故  
上之二門正明二諦不相違義如濕不違波  
波不違濕舉體相即故夜摩偈云如金與金  
色其性無差別法非法亦然體性無有異此  
亦喻於如來之藏與阿賴耶展轉無別又由  
事即理故雖有不常理即事故雖空不斷又

由事理相即故起滅同時須彌偈云一切凡夫行莫不速歸盡其性如虛空故說無有盡智者說無盡此亦無所說自性無盡故得有難思盡等則同時四相不待後無亦令究竟斷證離於能所十地品云非初非中後非言辭所及迴向品云無有智外如為智所入亦無如外智能證於如等九真理非事門即妄之真異於妄故如濕非動十事法非理門即真之妄異於真故如動非濕故慚愧林偈云如色與非色此二不為一又云如相與無相

生死及涅槃分別各不同等上七八二門明事理非異九十二門明事理非一故為無為非一非異第四迴向云於有為界示無為法而不滅壞有為之相於無為界示有為法而不分別無為之性上之十事同一緣起故云無礙約理望事則有成有壞有十九即有離事望於理有隱有顯有一有異逆順自在無障無礙同時頓起深思令觀明現以成理事圓融無礙觀也第四周徧含容即事事無礙且依古德顯十玄門於中文二先正辯玄門二明

其所以今初一同時具足相應門二廣陁自在無礙門三一多相容不同門四諸法相即自在門五祕密隱顯俱成門六微細相容安立門七因陀羅網境界門八託事顯法生解門九十世隔法異成門十主伴圓明具德門此之十門同一緣起無礙圓融隨其一門即具一切今且於前十中取一事法明具後十門如下文中一蓮華葉或一微塵則具教等十對同時相應具足圓滿亦具後之九門及彼門中所具教等以是總故故下文云一切

法門無盡海同會一法道場中華藏頌云華藏世界所有塵一一塵中見法界一塵尚具況一葉耶二即彼華葉普周法界而不壞本位以分即無分無分即分廣陁自在無障無礙十定品云有一蓮華盡十方際而不妨外有可見是故或唯廣無際或分限歷然或即廣即陁或廣陁俱泯或具前四以是解境故或絕前五以是行境故下皆準此然此廣陁亦名純雜普周法界故純一無二不壞本位則不妨於雜萬行例然三即此華葉舒已徧入

一切法中即攝一切令入已內舒攝同時既無障礙是故鎔融或有四句六句思之下云以一佛土滿十方十方入一亦無餘若一與一切對辯則攝入各具四句謂一入一切一切入一一入一切入一切互攝亦然四此一華葉廢已同他舉體全是彼一切法而恒攝他同已令彼一切即是已體一多相即混無障礙解行境別六句同前下云知一即多即一等五華能攝彼則一顯多隱一切攝華則一隱多顯顯不俱隱隱不並隱顯顯

隱同時無礙全攝俱泯存亡俱成句數同前下云東方入正受西方從定起等如八日月隱顯同時六此華葉中微細刹等一切諸法炳然齊現下云於一塵中一切國土曠然安住又於一毛端處有不可說諸如來及第九迴向微細中說七此華葉一一微塵中各現無邊刹海刹海之中復有微塵彼諸塵內復有刹海如是重重不可窮盡非是心識思量境界如天帝殿珠網覆上一明珠內萬像俱現珠珠皆爾此珠明徹互相現影影復現影

而無窮盡下云如因陀羅網世界等亦如鏡  
燈重重交光佛佛無盡八見此華葉即是見  
於無盡法界非是託此別有所表下文云此華  
蓋等從無生法忍之所起等九即此二華既  
其徧一切處亦復該一切時謂三世各三攝  
為一念故為十世用二以時無別體依華用一以立華  
既無礙時亦如之是故晉經云過去無量劫  
安置未來今未來無量劫迴置過去世等普  
賢行云過去中未來未來中現在等又云無  
量劫即一念一念即無量劫等時無別體故

不別立以為所依十此圓教法理無孤起必  
攝眷屬隨生下云此華即有十世界微塵數  
華以為眷屬又如一方為主十方為伴餘方  
亦爾是故主主伴伴各不相見主伴伴主圓  
明具德舉華既爾一塵等事亦然如此事華  
既帶同時等十義具此十門而此事等具餘  
教等十門則為百門事法既爾餘教義等具  
百亦然則為千門如教義等有此千門彼同  
時門中亦具百門餘廣隱等例爾亦有千門  
若重重取之亦至無盡於此十門圓明顯了

則常入法界重重之境第二明德用所因問  
有何因緣令此諸法得有如是混融無礙答  
因廣難陳略提十類一唯心所現故二法無  
定性故三緣起相由故四法性融通故五如  
幻夢故六如影像故七因無限故八佛證窮  
故九深定用故十神通解脫故十中隨一即  
能令彼諸法混融無礙十中前六通約法性  
為德相因法爾如是後二皆是業用義通因  
果七約起修義通德相業用八約果德唯是  
德相故前之十門通德相業用約佛則用亦

永樂北藏

大方廣佛華嚴經疏

第一六九册

德相德上用故約機則相亦稱用令知相故  
即用之相染淨雙融即相之用能染能淨故  
相及用不分兩別初唯心現者一切諸法真  
心所現如大海水舉體成波以一切法無非  
一心故大小等相隨心迴轉即入無礙二法  
無定性者既唯心現從緣而生無有定性性  
相俱離小非定小故能容太虛而有餘以同  
大之無外故大非定大故能入小塵而無間  
以同小之無內故是則等太虛之微塵含如  
塵之廣刹有何難哉舊經十住品云金剛圍

用二

三三

山數無量悉能安置一毛端欲知至大有小相菩薩以是初發心一非定一故能是一切多非定多故能是一邊非定邊故能即中中非定中故能即邊延促靜亂等一一皆然三緣起相由者謂大法界中緣起法海義門無量約就圓宗略舉十門以釋前義謂緣起法要具此十義緣方起故闕則不成一諸緣各異義謂大緣起中諸緣相望要須體用各別不相雜亂方成緣起若雜亂者失本緣法緣起不成此則諸緣各各守自一位文云多中

無一性一亦無有多二互徧相資義謂此諸緣要互相徧應方成緣起如一緣徧應多緣各與彼多全為一故此一則具多箇一也若此一緣不具多一則資應不徧不成緣起此則一一各具一切下文云知以一故衆知以衆故一三俱存無礙義謂凡是一緣要具前二方成緣起以要住自一方能徧應徧應多緣方是一故是故唯一多一自在無礙鎔融有其六句一或舉體全住是唯一也或舉體徧應是多一也或俱存或雙泯或總合或全



離皆思之可見文云諸法無所依但從和合起此上三門總明緣起本法竟四異體相入義謂諸門力用遞相依持互形奪故各全有力全無力義緣起方成如論云因不生緣生故緣不生自因生故若各唯有力無無力則有多果過一一各生故若各唯無力無有力則有無果過以同非緣俱不生故是故緣起要互相依具力無力如闕一緣一切不成餘亦如是是故一能持多一是有力能持於多多依於一多是無力潛入一內由一有力必

不與多有力俱是故無有一而不攝多也由多無力必不與一無力俱是故無有多而不入一也如一持多依既爾多持一依亦然反上思之如一望多有依有持全力無力常舍多在已中潛入已在多中同時無礙多望於一當知亦爾俱存雙泯二句無礙思之五異體相即義謂諸緣相望全體形奪有有體無體義緣起方成若闕一緣餘不成起故緣義則壞得此一緣令一切成起所起成故緣義方立是故一緣是能起能成故有體多緣是

所起所成故無體由一有體不得與多有體  
 俱多無體必不得與一無體俱是故無有不  
 多之一無有不一之多一多既爾多一亦然  
 反上思之如一望多有有體無體故能攝他  
 同已廢已同他同時無礙多望於一當知亦  
 爾準前思之俱存雙泯二句無礙亦思之可  
 見六體用雙融義謂諸緣法要力用交涉全  
 體融合方成緣起是故圓通亦有六句一以  
 體無不用故舉體全用則唯有相入無相即  
 義二以用無不體故舉用全體則唯有相即

無相入也三歸體之用不礙用全用之體不  
 失體是則無礙雙存亦入亦即自在俱現四  
 全用之體體泯全體之用用亡非即非入圓  
 融一味五合前四句同一緣起無礙俱存六  
 泯前五句絕待離言冥同性海此上三門於  
 初異體門中顯義理竟七同體相入義謂前  
 一緣所有多一與彼一緣體無別故名為同  
 體又由此一緣應多緣故有此多一所應多  
 緣既相即入令此多一亦有即入也先明相  
 入謂一緣有力能攝多一多一無力依彼一

緣是故一能攝多多便入一一入多攝反上  
應知餘義餘句準前思之八同體相即義謂  
前一緣所具多一亦有有體無體之義故亦  
相即以多一無體由本一成多即一也由本  
一有體能作多一令一攝多如一有多空既  
爾多有一空亦然餘義餘句並準前思之九  
俱融無礙義謂亦同前體用雙融即入自在  
亦有六句準前應知此上三門於前第二同  
體門中辯義理竟十同異圓滿義謂以前九  
門總合為一大緣起令多種義門同時具足

用三

二十五

也由住一徧應故有廣陞自在門由就體就  
用故有相即相入門由異體相容具微細門  
異體相即具隱顯門又就用相入為顯令就  
體相即為隱即顯入隱亦然又由異門即入  
為顯令同體即入為隱同顯異隱亦然又由  
異體相入帶同體相入具帝網門由此大緣  
起即無礙法界故有託事顯法門顯於時中  
故有十世門相關互攝故有主伴門此第十  
圓滿一門就前第三門中以辯義理故下文  
云菩薩善觀緣起法於一法中解衆多衆多

法中解了一又云一中解無量無量中解一了彼互生起當成無所畏等皆其義也上來緣起相由門竟第四法性融通門者謂若唯約事則互相礙不可即入若唯約理則唯一味無可即入今則理事融通具斯無礙謂不異理之一事具攝理時令彼不異理之多事隨所依理皆於一中現若一中攝理不盡則真理有分限失若一中攝理盡多事不隨理現則事在理外失今既一事之中全攝理盡多事豈不依中現華藏品云華藏世界所有

塵一一塵中見法界法界即事法界矣斯即總意別亦具十玄門一既真理與一切法而共相應攝理無遺即是諸門諸法同時具足二事既如理能包亦如理廣徧而不壞陞相故有廣陞純雜無礙門又性常平等故純普攝諸法故雜用二三理既徧在一切多事故令一事隨理徧一切中徧理全在一事則一切隨理在一事中故有一多相容門四真理既不離諸法則一事即是真理真理即是一切事故是故此一即彼一切事一切即一反上可

知故有相即自在門五由真理在事各全非  
分故正在此時彼說為隱正在彼時此即為  
隱故有隱顯門六真理既普攝諸法帶彼能  
依之事頃在一中故有微細門七此全攝理  
故能現一切彼全攝理同此頃現此現彼時  
彼能現所現俱現此中彼現此時此能現所  
現亦現彼中如是重重無盡故有帝網門以  
真如畢竟無盡故八即事同理故隨舉一事  
即真法門故有託事門九以真如徧在晝夜  
日月年劫皆全在故在日之時不異在劫故

有十世異成門況時因法有法融時不融耶  
十此事即理時不礙與餘一切恒相應故有  
主伴門故一理融通十門具矣五如幻夢者  
猶如幻師能幻一物以為種種幻種種物以  
為一物等經云或現須臾作百年等一切諸  
法業幻所作故一異無礙言如夢者如夢中  
所見廣大未移枕上歷時久遠未經斯須故  
論云處夢謂經年覺乃須臾頃故時雖無量  
攝在一刹那六如影像者一切萬法略有二  
義一皆如明鏡含明了性一心所成故二分

別所現如影像故由初義故為能現由後義故為所現故一切法互為鏡像如鏡互照而不壞本相下經云遠物近物雖皆影現影不隨物而有遠近等七因無限者謂諸佛菩薩昔在因中常修緣起無性等觀大願迴向等稱法界修及餘無量殊勝因故今如所起果具斯無礙八佛證窮者由冥真性得如性用故經云無比功德故能爾九深定用者謂海印定等諸三昧力故賢首品云入微塵數諸三昧一一出生塵等定而彼微塵亦不增等

十神通解脫者謂由十通及不思議等解脫故不思議法品十種解脫中云於一塵中建立三世一切佛法等由上十因令前教義等十對具上同時等十門以為別教一乘義之分齊

月三

二六

大方廣佛華嚴經疏卷第二

音釋

攬

手取也切

折

先的切

覈

下華切

鐘

之龍切

餐

干安切

蠶

徂舍切

繭

吉與切

脛

胡夾切

鎔

銷也

永樂北藏

大方廣佛華嚴經疏

第一六九册



大方廣佛華嚴經疏卷第三

用三

唐清涼山大華嚴寺沙門 澄觀撰

第四教所被機者夫教因機顯離機無言上說義理弘深未委被何根器若明能應者十身圓音今直彰所被通有十類前五棟非器後五彰所為前中一無信非器以聞生誹謗墮惡道故二違真非器依傍此經以求名利不淨說法集邪善故下經云忘失菩提心修諸善根是為魔業三乖實非器謂如言取文超情至理不入心故論云隨聲取義有五過

失上三皆是凡愚故下文云此經不入餘衆生手四陞劣非器謂一切二乘出現品云一切二乘不聞此經何況受持故雖在座如聾如瞽五守權非器謂三乘共教諸菩薩等隨宗所修行布行位不信圓融具德之法故下經云設有菩薩無量億那由他劫行六波羅蜜不聞此經或時聞已不信不解不順不入不得名為真實菩薩故後五顯所為中一正為謂是一乘圓機故出現品云此經不為餘衆生說即通指前五唯為乘不思議乘菩薩

說即正爲之機謂一運一切運圓融行位即深不思議又能徧達諸教即廣不思議故文云非餘境界之所知普賢行人方得入等二兼爲謂即時雖未悟入而能信向成種如出現品食金剛喻故地獄天子十地頓超大海劫火不能爲障約未悟入故名爲兼三引爲即前權教菩薩不受圓融之法故十地之中寄位顯勝借其三乘行布之名彼謂同於我法後因熏習方信入圓融以離此普法無所歸故權教極果無實事故四者權爲即是二

乘謂既不聞況於受持故諸菩薩權示聲聞或在法會而聾盲彰其絕分或示在道而啓悟知可迴心五遠爲謂諸凡夫外道闡提悉有佛性今雖不信後必當入故出現品云如來智慧大藥王樹唯除二處不能爲作生長利益所謂二乘用三墮無爲坑及壞善根非器衆生溺大邪見貪愛之水然亦於彼曾無厭捨前三非器是溺邪見第四非器是墮深坑故皆揀之今四及五明佛無厭捨故示而誘之熏其成種又彼品中明不信毀謗亦種善根

謂謗雖墮惡道由聞歷耳終醒悟故又云如日亦與生盲作利益故又如大海潛流喻中明無不具有如來智慧故又破塵出經卷喻中若除妄想皆見佛智故此皆明有自性住性即是所為況法性圓融感應交徹無有一法而非所被第五教體淺深者無盡教海體性難思從淺至深略明十體一音聲言語體二名句文身體三通取四法體上三皆能詮體四通攝所詮體五諸法顯義體六攝境唯心體七會緣入實體八理事無礙體九事事

永樂北藏

大方廣佛華嚴經疏

無礙體十海印炳現體十中前五唯體後五亦體亦性又前四通小後六唯大前七通三乘後三唯一乘前八約同教後二唯別教就前三中大小乘中通用四法一聲二名三句四文取捨不同各有三說小乘三者婆沙一百二十六云如是佛教以何為體用三一云應作是說語業為體謂佛語言唱辭評論語音語路語業語表是謂佛教其名句文但顯佛教作用不欲開示佛教自體發智論中亦同此說二云名等為體謂名身句身文身次第行

第一六九册

列次第安布次第連合故聲但依於展轉因故謂語起名名能顯義評家意取語業爲體雜心論同俱舍俱舍論云牟尼說法蘊數有八十千彼體語或名此色行蘊攝謂若語爲教體即色蘊攝名爲教體即行蘊攝此乃雙存前二情無去取故致或言正理論中意符名等故彼第三釋前頌竟又云詮義如實故名佛教名能詮義故教是名由是佛教定名爲體舉名爲首以攝句文顯宗第三亦同此說三者然俱舍意情無去取若取其雙存即

合四法以爲教體若經部意亦唯取聲故正理十四破彼師云汝不應立名句文身即聲爲體大乘有三大意同前一云攝假從實以聲爲體離聲無別名句等故深密第五云如來言音略有三種一契經等旣云言音有三明以聲爲教體雜集論云成所引聲謂諸聖所說二云以體從用名等爲體能詮諸法自性差別二所依故故無性論破經部云諸契經句語爲自性不應理故成唯識第二亦破彼云若名句文不異聲者法辭無礙境應無

別唯識云此三離聲雖無別體而假實異亦不即聲三云聲名句文合為其體由前二說皆有理教為定量故深密第四云不可捨於言說文字而能宣說故淨名云有以音聲言語文字而作佛事故十地論云說者以二事說聽者以二事聞用三謂善聲善字故以余之意亦應雙取若就前二有去取者寧依名等良以音聲一種正就佛說容為教體流傳後代書之竹帛曾何有聲豈無教體書雖是色亦與名等為所依故亦色蘊攝前淨名十地通

取四者但言所用非正顯體仁王云是名句味諸佛所說故然大小諸宗雖通用四法而理不同謂薩婆多宗四法皆有實體經部聲有實體名等是假若大乘中或有四皆非貝或有四皆如空俱不立故淨名云文字性離無有文字是則解脫十地論釋空中風相等云風喻音聲畫喻名字皆不可取佛藏經云諸法如毫釐不空者則諸佛不出世又下云諸法畢竟空無有毫末相有說四皆事理無礙或說四皆圓融故宗不同也第四通攝所

詮體者瑜伽八十一云謂契經體略有二種  
一文二義文是所依義是能依如是二種總  
名一切所知境界即依於六文顯於十義此  
明教義相成若不詮義教文何用故通取所  
詮成契經體又十住品云文隨於義義隨於  
文文義相隨理無舛謬方為真教又瑜伽云  
佛菩薩等是能說者語是能說相名句文身  
是所說相故皆通取不同前義尅取所說第  
五諸法顯義體者謂但能顯義理一切諸法  
皆為教體淨名第三云有以光明而作佛事

有以諸菩薩而作佛事有以佛所化人而作  
佛事有以佛菩提樹衣服卧具乃至八萬四  
千諸煩惱門衆生為之疲勞諸佛即以此法  
而作佛事又十卷楞伽第四云大慧非一切  
佛土言語說法故有佛國土直視不瞬口無  
言說名為說法乃至云有佛國土動身名說  
又香積世界餐香飯而三昧顯極樂佛國聽  
風柯而正念成絲竹可以傳心目擊以之存  
道既語默視瞬皆說則見聞覺知盡聽苟能  
得法契神何必要因言說況華嚴性海雲臺

寶網同演妙音毛孔光明皆能說法華香雲  
樹即法界之法門刹土衆生本十身之正體  
于何非教耶下云刹說衆生說三世一切說  
又云一切世間諸境界皆悉能令轉法輪等  
其文非一第六攝境唯心體者總收前五並  
不離識唯識等云一切所有唯心現故起信  
亦云依一心法有二種門一心真如門二心  
生滅門然此二門皆各總攝一切法以此二  
門不相離故梵行品云知一切法即心自性  
故唯心現然有二門一本影相對二說聽全

收前中通就諸教以成四句一唯本無影謂  
即小乘不知唯識故二亦本亦影謂大乘初  
教謂佛自宣說若文若義皆是如來妙觀察  
智相應淨識之所顯現名本質教故佛地論  
第一云有義聞者善根本願增上緣力如來  
識上文義相生此文義相是佛利他善根所  
起名為佛說若聞者識上所變文義名為影  
像佛地論云如來慈悲本願增上緣力聞者  
識上文義相生此文義相雖親依自善根力  
起而就強緣名為佛說故二十唯識論云展

轉增上力二識成決定護法論師等皆立此  
義然云文義相生復說五心集現謂如說諸  
行無常即有四聲四字四名一句及所詮義  
此十四相於聞者識上聚集顯現然西方多  
釋今略舉其一謂如說諸字有率爾尋求二  
心然未定知諸字所屬無決定心次說行字  
由先熏習連帶解生有三心起謂率爾尋求  
決定以決定知諸字所屬一切行故聞諸行  
字雖知自性然未知義為令知義復說無字  
但有二心謂率爾尋求未有決定以未定知

無字所屬後說常字由前字力展轉熏習連  
後字生具起五心謂率爾尋求決定染淨等  
流於最後時四字周圍方能解義總十二心  
初二次二次二後五故有十四相義如前說  
餘如別章三唯影無本謂大乘實教離衆生  
心佛果無有色聲功德唯有如如三及如如智  
獨存大悲大智為增上緣令彼所化根熟衆  
生心中現佛色聲說法是故聖教唯是衆生  
心中影像夜摩偈云諸佛無有法佛於何有  
說但隨其自心謂說如是法龍軍堅慧諸論



師等並立此義四非本非影如頓教說非直  
心外無佛色聲衆生心內影像亦空性本離  
故亡言絕慮即無教之教耳須彌偈云法性  
本空寂無取亦無見性空即是佛不可得思  
量淨名云其說法者無說無示其聽法者無  
聞無得龍樹等宗多立此義此前四說總合  
爲一圓融無礙自淺之深攝衆生故第二說  
聽全收成二四句一約同教以成四句謂一  
佛真心外無別衆生以衆生真心即佛真心  
故則唯說無聽故所說教唯佛所現二衆生

心外更無別佛以佛真心即衆生真心故則  
唯聽無說故所說教即衆生自現梵行品云  
知一切法即心自性等三佛真心現時不礙  
衆生真心現故說聽雙存二教齊立四佛即  
衆生故非佛衆生即佛故非衆生互奪雙亡  
則說聽斯寂故淨名云其說法者無說無示  
其聽法者無聞無得二約別教以明四句謂  
由不壞相生佛互在故一衆生全在佛中故  
則果門攝法無遺生尚在佛心中況所說教  
不唯佛現故出現品云如來成正覺時於其

身中普見一切衆生成正覺乃至普見一切衆生入涅槃又佛性論第二如來藏品云一切衆生悉在如來智內故名爲藏以如智稱如如境故一切衆生決定無有出如如境者並爲如來之所攝持故名爲藏衆生爲如來藏又下出現品中明三世劫刹衆生所有心念根欲尚皆一身頓現況佛智廣大如虛空耶二佛在衆生心中故則因門攝法無遺佛尚在於心中況所說教非衆生心現故出現品云菩薩摩訶薩應知自心念念常有佛

成正覺何以故諸佛如來不離此心成正覺故如自心一切衆生心亦復如是悉有佛成正覺此明佛證衆生心中真如成佛故本覺無異以始同本總在衆生心中從體起用應化身時即是衆生心中真如用大更無別佛如起信中多明此義而是自心體用今以此經心佛衆生無差別故佛證衆生之體用衆生之用三由前生佛互相在時各實非虛則因果交徹隨一聖教全在二心故衆生心中佛爲佛心中衆生說法佛心中衆生聽衆生

心中佛說法四由生全在佛則同佛非生佛  
全在生則同生非佛兩相形奪二位齊融即  
隨一聖教俱非二心則佛心中衆生無聽衆  
生心中佛無說是以賢首品云因緣所生無  
有生諸佛法身非是身又偈讚品云如來不  
說法亦不度衆生用三大般若四百二十五云我  
從得道來不說一字汝亦不聞等是故此四  
於一聖教圓融無礙方爲究竟甚深唯識道  
理第七會緣入實體者前來六門同入一實  
故亦有二義一以本收末二會相顯性前中

以諸聖教從真流故不異於真故攝論中名  
爲真如所流十二分教唯識第十釋勝流真  
如云謂此真如所流教法於餘教法最爲勝  
故彼宗雖不立真如隨緣而說佛正體智證  
最清淨法界而於後得安立教法名爲如流  
以本收末亦名如爲教體二會相顯性者謂  
彼一切差別教法從緣無性即是真如是故  
虛相本盡真性本現如來言說皆順於如故  
金剛三昧經云如我說者義語非文衆生說  
者文語非義仁王二諦品云大乘法輪者法

本如應頌如乃至論議如等此經明教即是  
如不說如皆是教若取諸法顯義皆為教體  
一切法皆如也則無如非教第八理事無礙  
體者謂一切教法雖舉體即真不礙十二分  
等事相宛然顯現雖真如舉體為一切不礙  
一味湛然平等由如無礙佛之音聲亦順如  
無礙皆與如智而相應故如前義分齊中廣  
明第九事事無礙體者文義皆圓文即圓音  
此中亦具十種玄門現相品云佛演一妙音  
周聞十方國衆音悉具足法雨皆充徧即同

時具足相應體十住品云欲具演說一句法  
阿僧祇劫無有盡而令文義各不同菩薩以  
此初發心即廣陋無礙體亦名純雜教一句  
不壞陋也純也文義不同廣也雜也又云於  
一法中解衆多衆多法中解了一等皆一多  
相容教也出現品云如來音聲普入一切譬  
如書字等此亦相入即相容也十住又云一  
即是多多即一文隨於義義隨文即相即教  
體出現品云道場皆聞不出衆外各各隨解  
即隱顯教體也又云如來言音唯是一味隨

諸衆生心器異故無量差別亦隱顯教體亦純雜教也又云如來於一語言中演說無邊契經海如善口女等即微細教也阿僧祇品云於彼一修多羅分別諸法不可說於彼一一諸法中又說諸法不可說等一法既爾餘法亦然交映重重無盡無盡即帝網教也觸事皆法即託事生解教也一念頓演即十世教也如諸會中此方所說十住等十方亦爾即主伴教也若隨說一法一門皆有無量修多羅為眷屬等即眷屬教雖不得為主亦

是伴類此且約言說若類通諸法皆為教體即所詮義義即普法具十玄門如義分齊第十海印炳現體者如前差別無盡教法皆是如來海印定中同時炳現設所化機亦同緣起炳現定中是故唯以三昧為教體如出現品用三辯此約果位若約因位圓信亦得即現賢首品云如是一切皆能現海印三昧神通力以上十門該羅收攝未有一法而非教體然後二門正是經宗融取前八無所遺矣第六宗趣通別者語之所尚曰宗宗之所歸曰趣

先明其通後顯於別前中通論一代佛教諸部異計各是一宗謂十八本二各不同故以義相從更復合之然隋朝大衍法師總立四宗一因緣宗謂薩婆多二假名宗謂即經部三不真宗謂諸般若四真實宗謂法性真理佛性等教又此四宗初名立性二名破性三名破相四名顯實初二小乘後二大乘各初淺後深此亦有理但收義不盡以十八部中但判二故今總收一代時教以爲十宗第一我法俱有宗謂犢子部等彼立三聚一有爲

二無爲三非二聚非二即我又立五法藏謂三世爲三無爲爲四第五不說說藏我在其中以不可說爲有爲無爲故然此一部諸部論師共推不受呼爲附佛法外道以諸外道所計雖殊皆立我故二法有我無宗謂薩婆多等彼立諸法不離色心或立三世無爲或分五類皆無有我以無我故異外道計又於有爲之中立正因緣以破外道邪因無因然西域邪見雖九十五種或計二十五諦從冥生等或計六句和合生等或謂自在梵天等

生或謂時方微塵虛空宿作等而為世間及  
涅槃本統收所計不出四見謂數論計一勝  
論計異勒沙婆計亦一亦異若提子計非一  
非異若計一者則謂因中有果若計異者則  
謂因中無果三則亦有亦無四則非有非無  
餘諸異計皆不出此雖多不同就其結過不  
出二種從虛空自然生即是無因餘皆邪因  
此方儒道二教亦不出此如莊老皆計自  
然謂人法地地法天天法道道法自然若以  
自然為因能生萬物即是邪因若謂萬物自

然而生如鶴之白如烏之黑即是無因周易  
云易有太極是生兩儀兩儀生四象四象生  
八卦八卦定吉凶吉凶生大業者太極為因  
即是邪因若謂一陰一陽之謂道即計陰陽  
變易能生萬物亦是邪因若計一為虛無自  
然則亦無因然無因邪因乃成大過謂自然  
虛空等生應常生故以不知三界由乎我心  
從癡有愛流轉無極迷正因緣故異計紛然  
安知因緣性空真如妙有言有濫同釋教者  
皆是佛法之餘同於涅槃盜牛之喻乳色雖

同不能善取醍醐况抨驢乳安成酥酪廣明  
異計如瑜伽第六顯揚第九第十婆沙十一  
十二及金七十論說中百等論亦廣破之今  
但說正因緣已總破諸計是知佛法之淺淺  
已勝外道之深深三法無去來宗謂大眾部  
等說有現在及無為耳其過未之法體用俱  
無四現通假實宗謂說假部就前現在之中  
法在蘊為實在界處為假其成實論經部師  
即是此類五俗妄直實宗即說出世部等謂  
世俗是假以虛妄故出世反上六諸法但名

宗謂一說部等一切我法唯有假名無實體  
故七三性空有宗謂遍計是空依圓有故八  
真空絕相宗謂心境兩亡直顯體故九空有  
無礙宗謂互融雙絕而不礙兩存真如隨緣  
具恒沙德故十圓融具德宗謂事事無礙主  
伴具足無盡自在故然此十宗後後深於前  
前前四唯小五六通大小後四唯大乘七即  
法相宗八即無相宗後二即法性宗又七即  
始教八即頓教九即終教十即圓教又第七  
亦名二諦俱有宗謂勝義真實故不無世俗



因果不失故是有如深密瑜伽等第八亦名  
二諦雙絕宗謂勝義離相故非有世俗緣生  
如幻故是無如掌珍頌云真性有為空如幻  
緣生故無為無有實不起似空華等即般若  
三論中一分之義九二諦無礙宗如維摩法  
華等義如前顯然十宗五教互有寬隘教則  
一經容有多教宗則一宗容具多經隨何經  
中皆此宗故若局判一經以為一教則抑諸  
大乘又夫立教必須斷證階位等殊立宗但  
明所尚差別前之六宗執法有異故分六宗

斷證次位不離八輩合為一教餘義如前立  
教中辯第二顯別宗者一切諸經各自有宗  
今此別明此經宗趣然楞伽云一切法不生  
不應立是宗者斯言遺滯若無宗之宗則宗  
說兼暢略以二門分別先叙異解後申今義  
前中略舉十說用三一衍法師以無礙十四法界為宗  
二裕法師以甚深法界心境為宗謂法界門  
中義分為境諸佛證之以成淨土法界即是  
一心諸佛證之以成法身是故初品中云無  
盡平等妙法界皆悉充滿如來身末後明入

法界品故知唯以法界為宗三有說以緣起為宗法界緣起相即入故四有云以唯識為宗經說三界唯一心現心如工畫師故五敏印二師同以因果為宗謂此經廣明菩薩行位之因及顯所成果德下文不離此故六遠法師以華嚴三昧為宗謂因行之華能嚴佛果故七笈多三藏以四十二賢聖觀行為宗說其行位令成觀故八有說言以海印三昧為宗逆順理事乃至帝網如海波澄一時現故九光統律師以因果理實為宗以因果是

所成行位理實是所依法界故十賢首以前各互闕故總以因果緣起理實法界以為宗趣謂前之二師但得所依法界三四二師但明緣起五六唯明因果七唯因修八唯果用並皆互闕故賢首意取光統而加緣起法界之言由光統師以因果即緣起理實即法界故不開之賢首以因果是緣起中別義理實是法界中別義故加總名以法界有事理及無礙故緣起體上之用故所以加之二申今解者依後二師而頗為改易若取言略攝盡

應言法界緣起不思議為宗若取言具於第十師加不思議此則攝一總題理實即大方緣起即方廣法界總該前二因果即佛華嚴觀其總題已知別義而法界等言諸經容有未顯特異故以不思議貫之則法界等皆不思議故為經宗所以龍樹指此為大不思議經斯良證也淨名但明作用不思議解脫蓋是一分之義未顯法界融通等不思議故不同也若就題中分體宗用則以理實為體緣起為用因果為宗尋宗令趣理實體故法界

總攝上三今釋前義略分為二一釋名二釋義今初法界名體廣如本品今略申其二一事法界二理法界二法俱含持軌二界則性分不同互用皆通二顯義中曲有四門第一別開法界以成因果謂普賢法界為因遮那法界為果是故因果不離理實法界於中十事五對即五周因果一所信因果二差別因果三平等因果四成行因果五證入因果下當指文而此因果互為宗趣一經始終不離因果故但因果為宗不違所依法界第二會

融因果以同法界法界門中亦有十事五對  
互為宗趣一教義相對謂舉教為宗顯義為  
趣或以義為宗顯教為趣以辯義深令教勝  
故二人法相對舉人為宗令知法為趣舉法  
為宗令得人為趣三理事相對舉事意令趣  
理故舉理意在融事故四境智相對舉所觀  
境令成觀智故舉修成智令證同真境故五  
因果相對舉彼修因令證果故舉其勝果勸  
修因故五對別明是宗之趣五對相即為宗  
即趣上五周因果不離此五對之法即事理

法界況因果無性當體同真所以但用法界  
為宗亦不違因果第三法界因果分明顯示  
亦有十義五對一無等境此有二位一在纏  
性淨法界為所信境二出纏最清淨法界為  
所證境二無等心此亦二義一大菩提心為  
普賢行本故二信悲智等隨行起故三無等  
行此亦二義一差別行各別修故二普賢行  
一即一切故四無等位此亦二義一行布位  
比證別故二圓融位一證一切證故五無等  
果此亦二義一修生果今始成故二修顯果

本自具故此上五對各初句為宗後句為趣  
又上五中初一真法界二即緣起又二三四  
皆緣起因後一緣起果故光統具用二義為  
宗無所違矣第四法界因果雙融俱離性相  
混然無礙自在亦有十義一由離相故因果  
不異法界即因果非因果也此即相為宗離  
相為趣或離相為宗亡因果為趣下九準思  
二由離性故法界不異因果即法界非法界  
也三由離性不泯性故法界即因果時法界  
宛然則以非法界為法界也四由離相不壞

用三

十七

相故因果即法界時因果歷然則以非因果  
為因果也五離相不異離性故因果法界雙  
泯俱融迥超言慮六由不壞不異不泯故因  
果法界俱存現前爛然可見七由五六存泯  
復不異故超視聽之妙法無不恒通見聞絕  
思議之深義未嘗礙於言念八由法界性融  
不可分故即法界之因果各同時全攝法界  
無不皆盡九因果各全攝法界時因果隨法  
界各互於因果中現是故佛中有菩薩普賢  
中有佛也十因果二位各隨差別之法無不

該攝法界故一一法一一行一一位一一德  
 皆各總攝無盡無盡帝網重重諸法門海是  
 謂華嚴無盡宗趣上之四門初一即體之用  
 次一即用之體三即體用雙顯四即體用鎔  
 融又初一即因果緣起次一即理實法界三  
 即雙明後一即不思議既以第四融前則四  
 門一揆故即照而遮即遮而照雙照雙遮圓  
 明一觀契斯宗趣矣第七部類品會者既知  
 自趣冲深未審能詮文言廣陋於中有四一  
 彰本部二顯品會三明支類四辯論釋初中

性海之詮常說遍說言窮法界難可限量今  
 自陘之寬略為十類一略本經即今所傳八  
 十卷本及舊譯六十卷皆是十萬偈中之略  
 譯未盡故二下本經謂摩訶衍藏是文殊師  
 利與阿難海於鐵圍山間結集此經收入龍  
 宮龍樹菩薩往龍宮見此大不思議經有其  
 三本下本有十萬偈四十八品龍樹誦得流  
 傳於世故智度論名此為不思議經有十萬  
 偈梁攝論中名百千經西域記說遮拘槃國  
 有此具本三中本經即彼所見有四十九萬

八千八百偈一千二百品四上本經即彼所見有十三千大千世界微塵數偈一四天下微塵數品此上二本非閻浮提人心力能持故不傳之五普眼經即海雲所持以大海量墨須彌聚筆書此普眼法門一品中一門一門中一法一法中一義一義中一句不得少分何況能盡但是入深法界菩薩陀羅尼力之所能持已下諸經並非凡力能受六同說經謂約一類須彌山形世界適於虛空容毛端處以言聲說無有窮盡如不思議法品云

如一佛身以神通力轉如是等差別法輪一切世法無能為喻如是盡虛空界一一毛端分量之處乃至一一化身皆如是說音聲文字句義一一充滿法界等又阿僧祇品云光中見佛不可說佛所說法不可說十九乃至於彼一一修多羅用三分別法門不可說等此意但約一類音聲說法已不可結集豈下位能持七異說經謂樹形等世界既異其中衆生報類亦別如來於彼現身立教施設不同不可定其色與非色言非言等則部類難量八主伴

經謂遮那所說雖遍法界然與諸佛互為主伴如說十住時十方來證皆言我國皆說等則前七經皆有主伴九眷屬經謂餘根器不能聞此通方之說隨宜說教令入此門皆為此經勝方便故名爲眷屬故下經云普眼修多羅以佛刹微塵數修多羅爲眷屬等則前八皆有眷屬十圓滿經謂此上諸本總融爲一無盡大修多羅海隨一會一品一句一文皆攝一切無有分限故現相品云毗盧遮那佛願力周法界一切國土中恒轉無上輪等

故七十三中名圓滿因輪此之謂也第二品會差別者即顯今經與晉譯同異今經九會以晉經第七會初闕十定品重會普光故唯八會今有三十九品初會有六品彼經唯三十四由初會中唯有二品一世間淨眼品即今世主品二盧舍那品即今現相已下五品初會闕四兼闕十定故唯三十四品餘諸品會大同名有小異至文當顯第三明支類者於中復二先顯支流即別行經藏中兜沙經一卷是名號品菩薩本業經一卷是淨行品



小十住經一卷是十住品大十住經四卷及漸備一切智德經四卷並是十地品等目菩薩所問三昧經二卷是十定品無邊功德經一卷是壽量品如來性起微密藏經二卷是出現品度世經六卷是離世間品羅摩伽經

用三

三

三卷是入法界品此等並是隨器受持大本支出二明流類謂修慈經一卷金剛鬘經十卷如來不思議境界經一卷並是華嚴流類而非本部別行或是別行來未盡者未敢詳定餘如纂靈記辯第四論釋者略舉其四一

龍樹既得下本遂造大不思議論亦十萬頌備傳西域此方十住毗婆沙論十六卷即是彼論釋十地中初之二地二世親菩薩造十地論釋十地品魏朝勒那三藏及菩提流支各翻一本光統奏請令二三藏參成一本爲十二卷即今見傳三北齊劉謙之於清涼山感通造論六百卷備釋一經四後魏僧靈辯於五臺山頂戴此經行道一載遂悟玄旨造論一百卷亦傳於世第八傳譯感通分二先明翻譯年代後明傳通感徵前中此經前後

通唯二譯并其補闕四本不同一晉義熙十四年北天竺三藏佛度跋陀羅此云覺賢於揚州謝司空寺翻梵本三萬六千頌成晉經五十卷或六十卷沙門法業筆受慧嚴慧觀潤色謝司空寺者即今潤州興嚴寺是由興華嚴故二大唐永隆元年中天竺三藏地婆訶羅此云日照於西京太原寺譯出入法界品內兩處脫文一從摩耶夫人後至彌勒菩薩前中間天主光等十善知識二從彌勒菩薩後至三千大千世界微塵數善知識前中

間文殊申手過一百一十由旬按善財頂十五行經大德道成律師薄塵法師大乘基法師等同譯復禮法師潤文依六十卷本為定三證聖元年干闥三藏實又難陀此云喜學於東都佛授記寺再譯舊文兼補諸闕計益九千頌通舊總四萬五千頌合成唐本八十八卷大德義淨三藏弘景禪師圓測法師神英法師法寶法師賢首法師等同譯復禮法師綴文四即於前第三本中雖益數處却脫日照三藏所補文殊按善財頂之文即賢首法

師以新舊兩經勘以梵本將日照禪文安喜  
學脫處遂得文續義埒其文之要至下當辯  
今之所傳即第四本其第三本先已流傳故  
今世上之經猶多脫者即第三本願諸達識  
見闕而續之二明傳通感應者自晉譯微言  
則雙童現瑞唐翻至教則甘露呈祥冥衛昭  
然親紆御筆論成西域則地震光流志徹清  
涼則感通玄悟其書寫則經輝五色楮香四  
達文發豔瑞鳥御華讀誦則眇然履空煥  
若臨鏡每舍舍利適會神僧涌地現金色之

身昇天止修羅之陣觀行則無生入證偈讚  
排空海神聽而時雨滂沱天童迎而大水瀾  
漫講說則華梵通韻人天共遵共水斷流神  
光入宇良以一文之妙攝義無遺故一偈之  
功能破地獄盟寧之水尚拯生靈故讀誦思  
修功齊種智宿生何幸感遇斯文其事跡昭  
彰備於傳記第九總釋名題中先解經題後  
明品稱今初總題包於別義該難思之法門  
無名之中強以十門分別一通顯得名二對  
辯開合三具彰義類四別釋得名五展演無

窮六卷攝相盡七展卷無礙八以義圓收九攝歸一心十泯同平等今初諸經得名有其多種或以人爲目或以法爲名人有請說等殊法有法喻等別或體或用或果或因乍復乍單其類繁廣今經受稱亦多種不同一從數彰名如梁攝論第十勝相中云百千經者是華嚴經有十萬頌是也二從喻受名如涅槃及觀佛三昧經名此經爲雜華經以萬行交雜緣起集成故三從法彰名如智論釋囑累品名此經爲不思議解脫經四從義用受

名如下離世間品及出現品各有十名者是依今梵本云摩訶毗佛略陀健孛驟訶修多羅此云大方廣佛雜華嚴飾經今略雜飾字耳前三異名義多總略二品十目多從別義又局當品故今譯者具以六字爲名則人法雙題法喻齊舉具體具用有果有因理盡義圓故標經首二對辯開合者題中七字有十事五對一教義相對謂經之一字是能詮教大等六字是所詮義二就義中法喻一對謂大等是法華嚴是喻三就法中人法一對

用三

廿三

謂大方廣是所證無障礙法佛是能證之人亦名境智一對四就法中揀持一對大之一字是揀方廣是持即揀大異小揀實異權揀果異因亦是體用一對大方是體大方無隅故廣即是用五就人中借下華字以喻其因即因果一對佛是果故是以單用華字則但喻因若合以華嚴則亦喻上之四字至下當明三具彰義類者謂大等七字義皆無量並略以十義釋之初明大十義者一體大謂若相若用等皆同真性而常徧故即是大字涅

槃云所言大者名之爲常此明體不變易如人最長故名爲大又云大者其性廣博猶如虛空此明體遍二者相大謂恒沙性德無不具故互相即入微細重重等具十玄門皆其相故即經方字方者法也三用大謂業用周普如體遍故即經廣字涅槃云又大者能建大義即是約用良以涅槃無廣廣與大同故以廣釋大方廣無大大與廣合故以大釋廣今經具有故各配之四果大謂智斷依正普周法界故即經佛字五因大謂發菩提心起

解行願證精勤匪懈成諸位故即經華字六  
 智大謂大智為主運諸萬行遍嚴一切無所  
 遺故即經嚴字七者教大謂一文一句無不  
 結通適於一切十方三際重重無盡故即是  
 經字八者義大謂所詮法盡窮法界乃至帝  
 網無所遺故即總用三是六字九者境大廿四以上法  
 門普以無盡一一為化境故十者業大謂盡  
 三際時窮法界處常將此法利益衆生無休  
 息故如攝大乘等七種大性不離於此二方  
 十義者方者法也即前十大皆名為法謂體

法相法等三廣十義者廣者多也用多繁興  
 包無不盡故則前十皆多即明一遍一切名  
 之為大一攝一切名之為廣亦可反此此約  
 離釋若合釋方廣二字亦有十義一廣依義  
 謂言教繁廣為生依故二廣說義宣說廣大  
 甚深法故三廣破義破一切障無有餘故四  
 廣超義無有諸法能比類故五廣治義具攝  
 無邊對治之法為能治故六廣攝義通攝無  
 邊異類法故七廣德義具攝二嚴諸勝德故  
 八廣生義能生無量廣大果海故九廣絕義

非是心識稱量所能知故十廣知義具足種  
智破邪見障無有餘故此之十義前四即雜  
集第十一中由義後六即入大乘論第一中  
六義四解佛十義者即是十佛大即法界佛  
方即本性佛廣即涅槃佛及隨樂佛佛即成  
正覺佛華即願佛及三昧佛嚴即業報佛經  
即住持佛總不離心七字皆是心佛釋十佛  
義如八地中及離世間品辯又佛地論第一  
說佛亦具十義謂具一切智一切種智離煩  
惱障及所知障於一切法一切種相能自開

用三

廿五

覺亦能開覺一切有情如睡夢覺如蓮華開  
故名爲佛又真諦引真實論亦有十義恐繁  
不引五釋華十義者一含實義表於法界含  
性德故二光淨義本智明顯故三微妙義一  
一諸行同法界故四適悅義順物機故五引  
果義行爲生因起正覺故六端正義行與願  
俱無所缺故七無染義一一行門三昧俱如  
八巧成義所修德業善巧成故九芬馥義如  
德住持流馨彌遠故十開敷義衆行敷繁令  
心開覺故然華有二種一草木華喻萬行因

然或因與果俱或不與俱二嚴身華通金王  
 等喻於神通眾相等唯與果俱前十義中一  
 五九十局於草木餘通二華六釋嚴者即上  
 十華同嚴一佛為嚴不同亦是十義又上十  
 華如次嚴前十佛即是十義而總別無礙更  
 有十義一用因嚴果以成人是佛華嚴果由  
 因得故二以果嚴因以顯勝成果之後令一  
 一因行皆無際故三以人嚴法而顯用謂佛  
 曠劫修因方顯法之體用故四以法嚴人以  
 顯圓若不得法之體用因果不能圓妙故五

以體嚴用以令周謂用不得體不周遍故六  
 以用嚴體而知本若無大用不顯體本之廣  
 大故七以體嚴相而知妙謂相若有體便即  
 入重重故八以相嚴體以明玄體若無相不  
 顯體深玄故九以義嚴教超言念由所詮難  
 思能詮言離故十諸因互嚴以融攝如禪非  
 智無以窮其寂智非禪無以深其照等又上  
 來互嚴皆有相資相即四句今且約理行互  
 嚴以明初相資四句者一理由修顯故以行  
 華嚴理二行從理發則以理華嚴行梁攝論

用三

廿六



云無不從此法界流無不還證此法身故三  
理行俱融不二而非真流之行無以契真  
非起行之真不從行顯良以體融行而因圓  
行該真而果滿是故標為佛華嚴也四理行  
俱泯二而不二以理之行故非行行之理故  
非理是則能所兩亡超情絕相非嚴非不嚴  
是謂華嚴相即四句理行全收準思可見則  
法喻交映昭然有在七釋經十義雜心五義  
已見上文佛地論有二義一貫穿所說二攝  
持所化即雜心結髮一義合之應除結髮開

成六義依此方訓復有四義一常二法並如  
前辯三經義即衆生徑路四典義今見聞正  
法故寶雲經中亦有十義恐繁不引第四別  
釋得名者先得後釋先得名者大以當體受  
名常遍為義常則豎無初際遍則橫該無外  
方以就法得名軌持為義雙持體相軌生物  
解故廣以從用得名包博為義包則廣容博  
則廣遍佛以就人得名覺照為義照則朗萬  
法之幽邃覺則悟上夜之重昏華以從喻得  
名感果嚴身為義萬行圓成嚴身則

衆德備體嚴以功用受名資莊爲義謂資廣  
大之體用莊真應之佛身經以能詮得名攝  
持爲義持性相之無盡攝衆生之無邊後釋  
名者一就法中體用相對大之方廣謂有體  
之相用故方廣之大有相用之體故皆依主  
釋若相即者即持業釋二就人中果行相望  
佛之華非因位之行故華之佛非餘行之佛  
故亦通相即三以人法相對大方廣之佛華  
嚴非小權乘之佛等故佛華嚴之大方廣非  
因位所得法故相即可知四教義相對亦通

二釋教望於義及前人望於法兼通有財並  
可思準第五展演無窮者謂初於最清淨法  
界開爲理智兩門即涅槃菩提之異又理開  
體用即大方廣智開因果即佛華嚴總連合  
成詮即題中經字又展此目以爲初會初會  
總故十海是理十智是智十海之中含於體  
用十智之中亦含因果又華藏世界及遮那  
徧中即依正二果皆是佛字大威光太子略  
示因華彼二所證所觀即大方廣即總成一  
會所信因果體用又展此會以成後八四周

因果各因是華果即是佛其所修所證之體  
用即大方廣又展此九會遍周十方謂如第  
一會光明覺品辯一類之會已遍十方餘會  
亦爾又展此諸會各有主伴如說十住十方菩  
薩皆來證云十方國土皆說此法則前遍法界  
之會各有重重主伴乃至遍於塵刹異類界  
等無盡時會皆不出大方廣佛華嚴清淨法  
界第六卷攝相盡者謂從後漸卷乃至不出  
九會九會不離初會初會不離總題總題不  
出理智非理不智故理外無智非智不理故

用三

十六

智外無理則理智不二亦攝智從理離體無  
用攝用歸體體性自離故體即非體本來清  
淨強名之清淨法界是以極從無盡乃至一  
字無字皆攝華嚴性海無有遺餘第七展卷  
無礙者謂正前展時即後常卷正後卷時即  
前常展展時即卷故無量無邊法門海一言  
演說盡無餘卷時即展故如來於一語言中  
演說無邊契經海第八以義圓收者上來諸  
門或以七字攝盡如前已辯或以教義攝盡  
或以理智攝盡或以人法攝盡或信解行證

攝盡或唯普賢文殊毗盧遮那三聖攝盡謂  
大方廣即普賢普賢表所證法界故華嚴即  
文殊文殊表能證故佛即遮那具能所故又  
大即普賢普賢菩薩自體遍故方廣即文殊  
文殊表即體之智故華即普賢普賢行故嚴  
即文殊文殊以解起行故佛即圓解行之普  
賢文殊證法界體用之普賢文殊成毗盧遮  
那光明遍照第九攝歸一心者上來諸門乃  
至無盡不離一心一心即法界故起信云所  
言法者謂衆生心心體即大心之本智即方

廣觀心起行即華嚴覺心性相即是佛覺非  
外來全同所覺故理智不殊理智形奪雙亡  
寂照則念念皆是華嚴性海第十泯同平等  
者為未了者令了自心若知觸物皆心方了  
心性故梵行品云知一切法即心自性則成  
就慧身不由他悟然今學法之者多棄內而  
外求習禪之者好亡緣而內照並為偏執俱  
滯二邊既心境如如則平等無礙余曾瑩兩  
面鏡鑑一盞燈置一尊容而重重交光佛佛  
無盡見夫心境互照本智雙入心中悟無盡

之境境上了難思之心心境重重智照斯在  
又即心了境界之佛即境見唯心如來心佛  
重重而本覺性一皆取之不可得則心境兩  
亡照之不可窮則理智交徹心境既爾境境  
相望心心互研萬化紛綸皆一致也唯證相  
應名佛華嚴矣第二釋品名者梵云薩婆嚕  
鷄印拏倭驪訶柰耶鉢擺巨婆娜忙鉢里勿  
多此云一切世間主莊嚴法門威德名品今  
文存略世者時也即是世間主者君也謂即  
諸王及佛然世間有三一器世間即是化處

永樂北藏

大方廣佛華嚴經疏

第一六九册

二衆生世間即所化機三智正覺世間即能  
化主主則唯二諸王及佛主於器界及衆生  
故佛非世間從所統受稱妙謂法門體用深  
廣難思即主之所得嚴謂嚴飾乃有多義一  
器世間嚴謂其地堅固等二衆生世間嚴謂  
衆海各具法門威德故三智正覺世間嚴謂  
於一切法成最正覺三業普周法門無盡故  
所以長行諸王之嚴偈頌讚德皆顯嚴佛衆  
生不嚴不感佛與正覺不嚴不能爲主器界  
不嚴非真佛處復由佛嚴顯遇者有德衆生

用三

三十

嚴輔顯佛超勝如是互嚴亦為妙嚴諸經無此廣嚴故但初名序品今明序已兼正故廣讚諸嚴以為華嚴之由序舊云世間淨眼品者謂所得法眼能淨世間故淨即嚴義餘如前說

大方廣佛華嚴經疏卷第三

音釋

**瞽** 果五切 目盲也  
**釐** 鄰知切 日釐  
**犢** 徒谷切 牛子也  
**抨** 悲萌切 排也  
**纂** 排切 管也  
**瞬** 目動也  
**闡** 專練切 國名  
**綴** 株衛切 綴也  
**紆** 勞也  
**蔡** 俱切 菜也  
**馥** 房六切 香氣也  
**馨** 醴經切 香也  
**邃** 雖遂切 深也  
**研** 堅切 堅也  
**徠** 落代切 落也  
**擢** 力可切 力可也  
**娜** 奴可切 奴可也

大方廣佛華嚴經疏卷第四

用四

唐清涼山大華嚴寺沙門 澄觀撰

第十別解文義者然此經文富義博勢變多端況一義一文包攝法界是以古德用十例科判欲顯難思其第一名本末部類但顯此經無盡非科今文前已具明故今略之加前後鉤鎖亦有十例一本部三分科二問答相屬科三以文從義科四前後攝疊科五前後鉤鎖科六隨品長分科七隨其本會科八本末大位科九本末遍收科十主伴無盡科初

本部三分者謂序正流通初品為序分現相品下為正宗流通有無古有七釋一光統律師以法界品為流通油入法界廣無邊故二隋遠法師以法界品內善財下屬流通寄人顯法故三裕法師以法界品後偈為流通以用四歎德無盡故四有云末後二頌為流通以結說無盡歎益勸修故五或云經來未盡故無流通六或云以餘眷屬經為此流通以彼是此所流出故七或云此經總無流通以法無盡說無休息故故諸會各無流通不同大般

若諸會皆有流通故此上七解各是一理而前六皆有第七獨無若義會之應成四句一有序正無流通如第七二唯正宗無二分由自初暨後皆顯玄微並悟物故初雖列衆而歎佛德後雖寄人有修相故三具三分四俱不可說即言亡言故約義包含不可局取今依具三以分三分之興彌天高判冥符西域今古同遵所以三者夫聖人設教必有其漸將命微言先彰由致故受之以序分由致既彰當機受法故受之以正宗正宗既陳務於

開濟非但篤於時會復令末葉傳芳永耀法燈明明無盡故受之以流通非唯一部當會當品等皆容有之故依三也雖六解皆通今依第二以寄人進修示物有分流通相故故慈氏云若有敬慕心亦當如是學初之一解用四今正宗中關於證入第三但屬善財之一相故末後二偈但結偈中佛德非通一部十行等末類有此偈經來未盡未必在後眷屬流通但約義故依遠公二問答相屬科者古云此九會中大位問答總有五眷第一會中



大衆起四十問或當會答盡名舉果勸樂生  
信分二從第二會初有四十問至第七會末  
答盡名修因契果生解分中間雖有諸問並  
是隨說隨問非是大位問答不思議品不問  
因故三第八會初起二百句問當會答盡名  
託法進修成行分四第九會初起六十句問  
如來自入師子頻申三昧現相答名頓證法  
界分五福城東善財求法等別問別答名歷  
位漸證分古德以善財猶屬正宗故今既判  
入流通則前唯四兼取流通以爲五分未盡

通塗三以文從義科者此經一部有五周因  
果即爲五分初會中一周因果謂先顯舍那  
果德後遮那一品明彼本因名所信因果二  
從第二會至第七令中隨好品名差別因果  
謂二十六品辯因後三品明果亦名生解因  
果三普賢行品辯因出現品明果即明平等  
因果非差別顯故亦名出現因果四第八會  
初明五位因後明八相果名出世因果亦名  
成行因果五第九會中初明佛果大用後顯  
菩薩起用修因名證入因果因果二門俱證

入故各分因異果亦爲十也四前後禪疊科者一部分二謂前九會是本會亦是佛會佛爲主故從文殊至福城東已後並是末會亦是菩薩會以諸善知識爲會主故二就前中亦二初八會明所成解行後一顯所證法界三就前中復二初七會明歷位修成行後一明圓融周普行四前中復二初明修生因果後普賢下二品明修顯因果五就前復二初明修生因後不思議法等三品明修生果六就前復二初明位中因行後十定下六品明

位後之行七就前復二初明地前比行後第六一會明十地證行八就前亦二初明位前十信行後第三會已云三會明入位三賢行九就前亦二初明所信佛果法後問明品下三品明能依能信菩薩行十就前中復二初會明佛依報果後名號下三品明佛正報果五前後鈎鎖科亦分爲十一第一會爲依報因果前明依報果後毗盧遮那品辯因二更取毗盧遮那及第二會初三品爲正報因果前因後果三以名號至菩薩住處名依起因

果依於本有而修起故前果後因四從問明  
品至隨好品明差別因果前因後果五取不  
思議下至普賢行品為圓融因果前果後因  
以不思議等與前為果果別於因與後為果  
則一一融攝然有六義證成一因果相屬科  
中多先果後因故二四十八後未有證成普  
賢行後有證成者結屬前故三普賢品初無  
別發起便即躡前云略示如來少分境故四  
以義明之不思議法顯佛德難思一一圓融  
故五前雖有問不思議品初重念問故六第

二會初已有三業為差別果故由斯六義故  
普賢行品得屬前因六取普賢行及出現品  
為平等因果前因後果七取出現及離世間  
品為出現因果前果後因成佛涅槃亦因現  
故非說真成由離世間為因方能現世八離  
世間品為成行因果通辯行故具因果故九  
取離世間品及法界品為法界因果前因後  
果由離世間稱法界故故因不依位果唯證  
入十法界一品自為證入因果元果後因於  
善財已下亦為無盡因果先因後果故歷事

至普賢一毛因則無盡普賢說佛德過虛空  
 而果無盡以為流通故不明之六隨品長分  
 科者長分為十一通辯教起因緣分二現相  
 品下明佛果無涯大用分三毗盧遮那品舉  
 彼往因證成分四名號下三品明大用應機  
 普周分五問明品下至十地品末明諸位差  
 別修分六十定品下至隨好品末明差別  
 因圓果滿分七普賢行品下二品明普行因  
 成現果分八離世間品明因果超絕世間分  
 九法界品中前分明大衆頓證法界分十爾

時文殊下明一人歷位漸證分七隨其本會  
 科者亦為十分一初會名舉果令信分二第  
 二會明能信成德分三第三會初賢十住分  
 四第四會中賢十行分五第五會上賢十向  
 分六第六會聖位十地分七第七會因圓果  
 滿分八第八會普賢大行分九第九會初行  
 成證入分十善財下善友教證分八本末之  
 位科者本會為九末會有五十五總為六十  
 四分九本末遍收科者先九會為九分文殊  
 為六千比丘說法為第十分及善財歷一百

一十善知識總一百二十分若開諸龍及三  
乘會及彌勒後文殊普賢三人便成一百二  
十五以慈氏云此長者子經由一百一十善  
知識已然後而來至於我所則彌勒已前已  
有一百一十故及三千大千世界微塵數善  
及其分數彌多若合為一則一百二十六分  
十主伴無盡科者一一會一一品一一法皆  
結通十方如此間說十方虛空法界一切世  
界乃至一切塵中皆如是說此結主經也又  
彼一一會等皆有他方塵數菩薩來證法此

結伴也即主伴相與周遍法界重疊無盡是  
則段數亦無盡無盡也上來十例各顯一理  
然亦無盡若依常用應依三分謂初品為序  
現相品下正宗法界品內爾時文殊師利從  
善住樓閣出下明流通序中就文分二初此  
土序二結通十方無盡世界序初中復二初  
證信序後爾時如來道場下發起序然此二  
序廣如常解今但略陳初證信者若原其所  
由則阿難請問如來令置如智度論及大悲  
經說若覈其所以意有六焉一為異外道故

外道經首皆立阿優以為吉故此約如是二為息諍論故智度論云若不推從佛聞言自制作則諍論起故今廢我從聞聞從佛來故經傳歷代妙軌不輟此局我聞三為離增減過故佛地論云應知說此如是我聞意避增減異分過失謂如是法我親從佛聞文義決定非謂傳聞有增減失四為斷眾疑故真諦引律云結集法時阿難昇座變身如佛眾起三疑一疑大師涅槃重起二疑他方佛來三疑阿難轉身成佛說此如是我聞三疑頓斷

既言我聞即非佛明矣上二義通約信聞五為生信故智論云說時方人令生信故此局後四六為順同三世佛故此通六種若準佛地論科為五事一總顯已聞二教起時分三別顯教主四彰教起處五顯所被機今依智論開初總顯已聞作信聞二種為六成就一信二聞三時四主五處六眾然信聞二事文局初首義通九會時主二種文義俱通處眾二事文義俱局隨相則爾約實互融上來略依三分二序然此經體勢少異故依五分釋

文而合後二名依人證入就第一舉果分中  
或科爲十一教起因緣分即初一品二大衆  
同請分三面光集衆分四毫光示法分五眉  
間出衆分已上在第二品內六普賢三昧分  
七諸佛同加分八法主起定分九大衆重請  
分已上在第三品內十正陳法海分在後三  
品內若以義從文且分爲三一教起因緣分  
二現相下說法儀式分三世界成就下正陳  
所說分就初分中亦分爲十一總顯已聞二  
一時下標主時處三始成正覺別明時分四

其地下別顯處嚴五爾時世尊下教主難思  
六有十佛世界下衆海雲集七從爾時如來  
道場下稱揚讚德八爾時如來師子座下座  
內衆流九爾時華藏下天地徵祥十如此世  
界下結通無盡今即初也如是我聞者謂如  
是一部經義我昔親從佛聞故佛地論云謂  
傳佛教者言如是之事我昔曾聞如是總言  
依四義轉一依譬喻二依教誨三依問答四  
依許可具如彼論餘更有釋意不殊前此上  
總合信聞若離釋者先釋如是信成就也智

論云佛法大海信為能入智為能度信者言  
是事如是不信者言是事不如是故肇公云  
如是者即信順之辭也信則所言之理順順  
則師資之道成經無豐約非信不傳故稱如  
是有云聖人說法但為顯如唯如為是故稱  
如是此唯約所詮之理用四次真諦三藏云真不  
違俗名之為如俗順於真稱之為是真俗無  
二故稱如是此約所詮理事若云如斯之言  
是佛所說則唯約能詮有云如者當理之言  
言理相順謂之如也是者無非之稱此明說

事如事說理如理明能詮之教稱於事理也  
融公云如是者感應之端也如以順機受名  
是以無非為稱衆生以無非為感如來以順  
機為應經以言教出於感應故云如是此兼  
對機上來諸釋各是一途更有諸釋言異意  
同若依生物之信應如智論及佛地合釋若  
取敵對阿優應如真諦所釋今當廣之外謂  
阿之言無優之言有萬法雖衆不出有無此  
即斷常之計今云如即真空是即妙有既無  
俗外之真故空而非斷無真外之俗故有而



非常即對破邪宗以彰中道一代時教不出於斯故云如是若華嚴宗以無障礙法界曰如唯此無非為是應隨教門深淺以顯如是不同二我聞者聞成就也將欲傳之於未聞若有言而不傳便是徒設不在能說貴在能傳故次明我聞我即阿難聞謂親自聽聞云月四何稱我即諸蘊假者此用何聞若依大小乘法相各有三說一耳聞非識二識聞非耳三緣合方聞然或具四緣八緣等雖因耳處廢別從總故稱我聞法雖無我言語便故隨順

世間故稱我聞非邪慢心而有所說若依無相我既無我聞亦無聞從緣空故而不壞假名即不聞聞耳若約法性此經旨趣傳法菩薩以我無我不二之真我根境非一異之妙耳聞無礙法界之法門也然阿難所不聞經或云展轉傳聞或云如來重說或云得深三昧或自然能通上皆就跡而說實是大權菩薩影響弘傳如不思議境界經斯為良證但隨機教別故見聞不同上來總顯已聞竟第二標主時處者即三成就言一時者時成就

也時者亦隨世假立時分一者揀異餘時如來說經時有無量不能別舉一言略周故云一時如涅槃云一時佛在恒河岸等即法王啓運嘉會之時也亦可機教一時謂上言如是言雖當理若不會時亦為虛唱今明物機感聖聖能垂應凡聖道交不失良機故云一時佛者主成就也具云勃陀此云覺者謂自他覺滿之者雖具十號佛義包含故偏明之義見題中三在摩竭下處成就也真身無在而無不在故次辯之摩竭提國者通舉說處

此云無毒害以國法無刑戮故表能化法或云遍聰慧聰慧之人遍其國故表所化機阿蘭若法者別舉說場也阿蘭若者此云無諠諍即事靜也法者所證真理二障業苦諠雜斯盡也事理俱寂故加法言菩提場者菩提云覺即能證大智用圓明究竟也場者證菩提之處也然事處即天地之中王舍城之西二百里金剛座上約法則萬行皆是道場理智相會之所故為表所說如所證故不移其處說之若圓融時處等並如前說第三別明時

分者前標一時未知何時故今別顯是初成佛時亦彰大師出現時也此教勝故衆教本故在於初時初言尚總幾日之初九會之文同此初不略爲三解一約不壞前後相說纔成初七說前五會第二七日說十地等第九一會乃在後時以祇園身子皆後時故常恒之說不妨後時雖能頓說有所表故初五信解行願最在初故故皆云不離道樹第六會因地證位居其次深故無不起菩提樹言法界極證最在於後故亦顯二乘絕見聞故雖

異處別時亦不相離爲寄穢土以顯淨故須前後耳若爾世親那云初七不說但思惟行因緣行耶世親纔見十地即爲論釋或則未窮廣文或則知見有異未全剋定菩提流支意大同此二順論釋九會皆在二七日後二七非久亦名始成用四三約實圓融釋皆在初成一念之中一音頓演七處九會無盡之文海印定中一時印現以應機出世機感即應應即有說無非時失故祇園身子蓋是九世相收重會之言亦猶燈光涉入故法界放光亦

見菩薩遍坐道場成正覺故此經十地之初無二七之言二七之言順別機故故諸經論顯初說時有多差別謂普耀密迹二經第七日即說三乘法華過三七日方云說小四分律中六七興顯行經七七五分八七智論五十七日有云與十二游經一年大同時既不定說亦不同皆根器所宜見聞有異約佛赴機無時不說望器無感未曾有說登地恒見常說一味之經就佛而言無說不說若攝方便皆一乘之印現差別耳無涯之說不應

局執故應總攝以為十重如前已辯上顯時分次釋成正覺義約教不同小乘三十四心斷結五分法身初圓名成正覺是實非化大乘之中約化八相示成約報十地行滿四智創圓名曰始成正覺據實即古今情亡心無初相名之曰始無念而照目之為正見心常住稱之曰覺始本無二目之為成約法身自覺聖智無成無不成若依此經以十佛法界之身雲通因陀羅網無盡之時處處念念初初為物而現具足主伴攝三世間此初即攝無

量劫之初無際之初一成一切成無成無不  
成一覺一切覺無覺無不覺言窮慮寂不壞  
假名故云始成正覺如出現品及不思議法  
品廣顯攝前諸說皆一乘之所現也第四別  
顯處嚴者然此下處主及衆即三世間嚴三  
中前二即如來依正衆即淨土輔翼不空今  
初器界嚴者即廣於前場之嚴顯成前覺之  
妙異於餘經之處於中四事各十種嚴明即  
染顯淨即為四別第一地嚴第二樹嚴第三  
宮殿嚴第四師子座嚴然此諸嚴各具三釋

一約事可知二表法謂地表心地法身樹表  
菩提宮殿表無住涅槃座表法空等三就因  
行謂一以窮心地法身之因報得增上金剛  
之地二以般若為因三以悲智相導為因四  
亦以法空為因然或一因行成一切嚴或一  
切行成一嚴或一行成一嚴或一切行成一  
切嚴以通融別純雜無礙今但明一行一嚴  
顯所表故然各攝無盡之德故四事皆有十  
句初總後別今且就文各分為四今初心地  
十句分四者第一總顯地體二四地相具德

三四地上具嚴四一舉因結用今初標以堅  
固釋以金剛諸教或云木樹草座多云座是  
金剛今金地金剛則權實斯顯徹華藏故廣  
如彼品次上妙下地相具德約因釋者一寶  
輪者一攝一切圓行致故二及衆寶華開覺  
悅他故三清淨摩尼圓淨明徹故以上三行  
用嚴心地故結云以爲嚴飾上皆形色四即  
顯色謂青黃等殊名諸色相種種重疊深廣  
如海互相映發等彼波瀾或諸色俱生或更  
相攝入含虛瑩徹現勢多端名無邊顯現此

由隱顯自在定散無礙隨機利行之所致也  
三摩尼下明地上嚴者一寶幢曲有五句一  
摩尼爲體二三光音明用四五網纓辯飾就  
因行者降魔伏外爲幢智光常照慈音外悅  
願行交羅戒香芬馥四攝周垂故二摩尼雨  
寶表神通如意隨機變現雨法寶故三妙華  
散地亦多因行遍嚴心故四寶樹行列者德  
行建立故四佛神力下舉因結用佛力者出  
所因也嚴具多門別說難盡故總云一切悉  
現或於樹中現或於上諸嚴具及地中現明

一一行中皆道場故第二覺樹嚴者即大智  
因感有十一句分四初一總顯高勝長聳迥  
露圓妙獨出故約因即智超數表為高本性  
不昧為顯成物具德曰殊更無二真為特約  
果樹即菩提二金剛下六句明體攝衆德一  
身是金剛金剛三昧本智因故正行成立為  
樹身也二榦是瑠璃本智發解內外明徹故  
三雜寶枝條解隨境差故四條假葉以為嚴  
智資定而深照寶葉雖異共成一蔭百千定  
門同歸一寂自蔭蔭他也五寶華異色在樹

分枝承光色同於地布影表神通等法依定  
有差俱承智光影現心地六華雖不同果皆  
如意無邊行海同趣菩提若自利果成內則  
舍輝若身心湛寂外便發焰若觸境斯明若  
利他果立未熟則舍輝解生佛相已熟則發  
焰還流教光十四體如之行所成果無異因之果  
故與華間列故下經云菩薩妙法樹生於直  
心地等三其樹下三句明妙用自在展轉成  
益初依菩提智放教智光次依智光兩圓明  
法寶後教成悲智即菩薩現前無心行成故

如雲出四又以下一句舉因結用謂佛力爲因流音演法以如如力則智演法音音還如性故無盡極廣多故無盡豎長故無窮無間故稱恒也第三如來所處下明佛宮殿嚴十句分四初一總明分量宮可覆育即是慈悲殿可朝宗所謂圓寂悲智相導若樓閣相依廣者無邊法無外故博者不隘法內空故嚴者莊飾具衆相故麗者華美法義備故充十方者稱法性故二衆色下二句體相圓備一體是摩尼積德銘融之所成故二相嚴多種

神通等法悲寂用故三諸莊嚴下六句妙用自在一衆行發光灑法如雲雲更多義至下當辯二光幢獨出萃者聚也即承光聚影而成謂悲寂交際承智起應降魔超出故三內容衆海無邊菩薩即道場外者亦在其中即依中有正亦果中有因即明涅槃衆聖冥會四聲光寶網綱者爲防禽穢以益殿嚴猶大教網外防惡見內益悲寂教皆圓妙以寶而成故能出佛智光圓音妙說言不思議音略有四義一音聲繁廣二所說難量三聲即無

用四

十五



聲四一具一切五出生果用即正報大用在此依中依正混融參而不雜明依大涅槃能建大義故曰出生六無染現染衆生是正居處是依染違性淨不言出生妄無自體還依真現四又以下舉因顯廣謂德廣難陳故今總結由佛力故一念頓包事理染淨一切法界況多念耶然上充遍十方即通局無礙集菩薩衆出佛神通即攝入無礙現生舍宅即染淨無礙悉包法界廣陞無礙一念即能延促無礙又集菩薩因果無礙出佛神通依正

無礙十種宮殿此應說之第四其師子下師子座嚴十句分四初一總顯形勝師子座者人中師子處之又說無畏之法故得法空者何所畏哉空乃高而無上深不可測廣而無外邊不可窮妙乃即事而真好謂具德無缺二摩尼下六句體德圓備一座臺摩尼即處中正可依處摩尼隨映有差法空隨緣成異中道妙理正是可依二周座華網即外相無染交映本空一淨寶爲輪輪謂臺之處中周帀輪圍即具德周通四華纓周垂諸覺諸通

垂化周攝五寶嚴填飾堂等略舉凡諸總包無處不嚴故云備體顯於法空全收萬像無事非理故六寶樹間飾間上物象也即菩薩妙法樹隨化分枝隨因感果並依無相義曰周迴凡聖相資名為間列三摩尼光下二句

用四

十六

妙用廣大一淨寶出光如雲涉入法空亦爾一一智中知一切法一一法體顯一切智為互照也二主伴寶用互相發揮謂佛化摩尼能作佛事智論云輪王寶珠但隨人意能兩寶物天寶堪能隨天使令佛寶十方能作佛

事菩薩寶珠亦能分作如文殊師利冠中毗楞伽寶珠十方諸佛於中顯現今菩薩髻珠即是其類下文雲集菩薩髻珠亦爾用此嚴座者凡初成佛皆一切諸佛現形灌頂一切菩薩親授敬養故因果寶珠俱來瑩燭如來從果起用故云化現理圓解滿義曰珠王菩薩心頂智照圓淨故曰髻中妙寶寂照照寂皆瑩淨照燭四復以下一句佛加廣演佛境如空故云廣大有感斯至為無不及顯教皆從法空所流是故所流還周法界非智不顯

故云佛力顯處嚴竟第五爾時世尊下明教主  
難思前但云佛未顯是何身佛又但云始成  
正覺未知成相云何故今顯之謂具十種深  
廣功德即是遮那十種無盡法界身雲遍於  
法界成正覺也非權應身文分為二先總後  
別今初總辯即菩提身具無盡德為世所尊  
座相現時身即安處智處諸法無前後故於  
一切法示所覺境即二諦三諦無盡法也成  
最正覺示能覺智開悟稱覺離倒為正至極  
名最獲得名成此當相解若揀別者凡夫倒

用四

十七

惑佛覺重昏二乘雖覺不名為正但知法有  
未知法空但悟我空未知我有有馱生死空  
沉涅槃顛倒未除豈得稱正設許稱正亦未  
名最菩薩雖正有上有修不得稱最設位極  
稱最亦未得名成我佛獨能故云成最正覺  
謂如量如理了了究竟已出微細所知障故  
後智入下別中即約十德別顯十身文即分  
十一三業普周二威勢超勝三福德深廣四  
隨意受生五相好周圓六願身演法七化身  
自在八法身彌綸九智身窮性相之源十力

持身持自他依正今初即別顯菩提身之相也。以成菩提時得無量清淨三輪。故文中先法後喻。法中三先意。次身後語。今初意業即釋上成正覺言。前云於一切法。此云三世乃橫豎影略耳。智入平等是正覺成也。智即二智。三智。四智。無障礙智。二智者。即如理如量也。此復有二。一以如量智達俗名入三世。以如理智證真名悉平等。故佛地論云。以二智覺二諦是也。二者證差別性。即無差別。故三世即平等。瑜伽云。如其勝義覺諸法故名等。

正覺言三智者。即俗智真智中道智也。此亦二義。一真俗互泯。雙遮。辯中則三世平等。二相兩亡。方為智入。二真俗雖即而不壞。相即雙照明中。此二覺三諦之境。境既雙泯。而雙現智亦寂照。而雙流為無障礙智。覺無障礙境為正覺也。言四智者。即圓鏡等四智也。通緣三世境。故並入三世。言平等者。鏡智離分別。故依持平等。平等性智證平等性。故妙觀察智。觀察平等。成所作智。普利平等。四智圓融。一句攝盡。下身語等。皆是四智之所發現。四

智圓融無二性故修生本有非異故不失經宗然上能覺即成上菩提就其所覺即法身也理智無二為真法身二其身下身業也通三世間故云一切此正覺身以是十身之總故此其身通於三身十身無不充滿法身普適世所同依故智身證理如理遍故色身無礙亦同理遍並是圓遍而非分遍謂一切世間一一纖塵等處佛皆圓滿總看亦現別看亦現又國土等即是我身土等體外無別我故我即土等我之體外無土等故餘一一身

互望融攝猶多燈光各互相遍三其音下語業也順有三義一順異類言音經云一切眾生語言法一言演說盡無餘故二順所宜說法如來於一語言中演說無邊契經海故三則順遍佛以一妙音周聞十方國故二譬如下喻顯通喻三業然佛三業非喻能喻唯虛用四空真如略可顯示更以餘喻便為誇佛然虛空喻有同不同故下經云解如來身非如虛空一切妙法所圓滿等此顯不同今分取同義同義多種如下十忍品今有二喻開成四

義一含攝喻兼無分別義二普遍喻兼遍入  
義以此四喻喻意業者下經云佛智廣大同  
虛空故此總喻也量智包含而普遍理智無  
分別而證入又大圓鏡智純淨圓德現種依  
持能現能生身土智影即含攝義下經云菩  
提智普現一切衆生心念根欲等而無所現  
無所現言無有分別平等性智觀一切法自  
他有情悉皆平等亦無分別無分別言顯無  
差別故下經云於一切義無所觀察等是以  
太虛能含衆像衆像不能含太虛太虛不分

別衆像衆像乃差別太虛以況我法不能容  
佛智佛智乃能容我法有我法者分別如來  
是如來者不分別我法二普遍喻中妙觀察  
智無不遍知即普遍義成所作智曲成無遺  
即隨入義又下經云佛智廣大同虛空普遍  
一切衆生心此即體遍悉了世間諸妄想此  
約智遍又云得一切法界等心此約證遍智  
性全同於色性故此約理遍云何遍入不壞  
能所有證知故故下經云世間諸國土一切  
皆隨入智身無有色非彼所能見由隨於如

即入無所入故云平等是以虛空遍入國土  
國土不遍入虛空有國土處必有虛空有虛  
空處或無國土虛空之於國土平等隨入國  
土之於虛空自有彼此虛空可喻佛智國土  
可喻三世三世有處佛智必在其中佛智知  
處三世或無其體佛智之於三世平等隨入  
三世之於佛智自有始終此猶約不二而二  
說耳若二而不二國土虛空三世佛智同一  
性故皆互相入舉一全收普遍亦然三世間  
圓融則言思道斷故名佛智為不思議也次

以二喻喻身業者一毛尚容法界全分必含  
衆像出現身業第二喻云譬如虛空寬廣非  
色而能顯現一切諸色而彼虛空無有分別  
亦無戲論合云如來身亦復如是一切衆生  
諸善根業皆得成就即含攝義而如來身無  
有分別即第二義佛身充滿於法界即普遍  
義又云譬如虛空遍至一切色非色處非至  
非不至如來身亦復如是遍一切法一切國  
土等即普遍義亦非至非不至即平等隨入  
義次以四義喻語業者如來於一語言中具

一切語言故舍支天鼓無心出故如來音聲  
 無不至故應知如來音聲無斷絕普入法界  
 故又云如來音聲無邪曲即平等義隨其信  
 解令歡喜故即隨入義以空一喻遍喻三業  
 故云正覺得無量清淨三輪明文昭然非是  
 穿鑿用四菩提身竟第二身恒下威勢廿一身超勝謂  
 隨諸有情所樂示現受用身土影像差別無  
 不周遍言一切道場者略有十種一智身遍  
 坐法性道場二法身非坐而坐道場三法門  
 身安坐萬行道場四幻化身安坐水月道場

此四義便故來若正約威勢身略辯六類道  
 場一遍一切同類世界道場如名號品等說  
 二一切異類世界謂樹形等如世界成就品  
 三一切世界種中四一切世界海中並如華  
 藏說五一切微塵中文云如於此會見佛坐  
 一切塵中亦如是等六刹塵帝網無盡道場  
 并前十種故云一切言菩薩衆中威光赫奕  
 者正顯威勢超勝勝於勝者故獨言菩薩非  
 不超餘如日輪出照明世界約喻以顯勝  
 出沒無隱顯故處處全現無異體故喻遍坐



道場大明流空餘輝掩耀赫日之照難究其  
涯喻彼威光超暎菩薩菩薩不能測也既云  
照世則終益生盲先照高山獨言菩薩第三  
三世下福德身深廣三世佛德昔皆遍學今  
三際已斷垢習斯亡故衆福皆淨第四而恒  
下隨意受生一隨他意處處受生二隨自意  
能無不生謂慈悲般若恒共相應感而遂通  
窮未來際第五無邊色下相好莊嚴身色無  
盡故名色無邊十蓮華藏微塵數相名相無  
邊而皆稱真則一一無邊諸相隨好放光常

光皆稱法界故云圓滿廣處隱處皆圓現故  
名無差別第六演一切法如布大雲即願身  
演法謂雨大法雨斷一切疑故下經云毗盧  
遮那佛願力周法界一切國土中恒轉無上  
輪然經二句上法下喻文含多意一雲喻於  
身雨為說法法喻影略又先興慈雲後霑法  
雨一雲一雨所潤不同亦隨物機宜雲雨各  
異掩塵蔽日普覆無心等第七一下化身  
自在謂於大衆會能現無邊作用差別皆自  
在故文中二先明廣容謂於如來身一一毛

頭容一切刹而無障礙無礙有二義一以小毛現多大刹則一多大小無礙二此毛多刹與彼毛多刹參而不雜則隱顯無礙後各現下普遍以廣容不礙普遍故還於前毛內刹中神力調生若廣遍十方示現種種變化三業成所作事居然易了第八身遍下法身彌綸以法為身本來湛遍故無來往依法現色還如法身在此即是在彼亦不待往來第九智入下智身窮性相之源相別曰諸性皆空寂性靜故寂相無故空第十三世諸佛下

力持身能持自他依正於中先持正報神謂妙智變謂現身轉變緣現俱名為變皆能持之尚持於他況於自事後段亦然後一切佛土下能持依報橫盡諸土豎窮諸劫所有嚴事常持令現上約十身若約三身者則初三段皆名報身而恒下化身身遍十方下法身就報身中前一自受用報後二即他受用報故云處菩薩眾以諸教中說三身四身成說等別今皆圓融於一始成無不頓具十身為正三四義兼又毛內調生光中持刹如空普

遍等亦即國土等十身三世間之圓融豈報  
化之云別是知略以十德歎於教主其一  
德無不圓融當去情思之矣

大方廣佛華嚴經疏卷第四

音釋

攝陟切猶相也裕俞切戍戍切肇直紹切誼許元切榦古戶切  
枝切蔭於禁切霆失戍切霖霖切霆霖切

永樂北藏

大方廣佛華嚴經疏

第一六九册

永樂北藏

大方廣佛華嚴經疏

第一六九册

大方廣佛華嚴經疏卷第五

用五

唐清涼山大華嚴寺沙門澄觀撰

第六有十佛世界下明衆海雲集衆雖深廣  
難測略啓十門一集意二集因三辯類四定  
數五權實六地位七前後八有無九聞不聞  
十釋文今初來至佛所何所爲耶有十義故  
一爲影響爲主伴故二爲作輔翼得圓滿故  
如普賢等常隨之衆三爲守護如來如執金  
剛等諸佛住處常勤護故四爲莊嚴知道場  
神等常爲嚴淨佛宮殿故五爲供養如偈讚

即正行供養華幢等即財供養故六爲發起  
此經諸請難者即其事故七爲聞法獲益當  
機領悟即其類故八爲表法諸首諸林表信  
行等皆同名故及座出菩薩等顯奇特故亦  
通表萬行俱成佛故九爲順證佛菩薩等證  
說不虛故十爲翻顯即聲聞不聞顯法不共  
故爲斯多意所以衆海雲集非唯證信而已  
也第二集因亦有十因一曾與毗盧遮那如  
來同集善根故二蒙佛四攝曾攝受故三往  
在生死聞圓法故四曾發大心護一切故五

永樂北藏

大方廣佛華嚴經疏

第一六九册

往發大願願事佛故六隨逐如來無厭足故  
七樂聞正法心無倦故八善能散滅我慢心  
故九福智已淨身周遍故十同一法性善根  
大海之所生故為此多義得預斯會中有集  
因亦通集意及隨諸衆各有別因可以思準

第三辯類即上集意便成十類一影響衆二  
常隨衆三守護衆四嚴會衆五供養衆六發  
起衆七當機衆八表法衆九證法衆十顯法  
衆準前可知第四定數者稱法界衆焉能數  
知即文而言九會都數總有一百七十五衆

都序之中有四十一衆謂同生有一異生三  
十九師子座中一若兼取前菩提樹中所流  
及宮殿中無邊菩薩總四十三衆此四十三  
遍於九會第一會中有二衆謂新集十方衆  
佛眉間衆用五添成四十五第二會有新舊二衆  
第三四會各有四衆謂新舊及證法衆天衆  
第五會一百一十一衆謂新舊衆昇天品內  
供養衆有一百七井天衆證法衆第六會四  
衆謂天衆同生異生證法衆七八兩會各唯  
一衆謂普賢等舊衆第九會二衆謂菩薩聲

聞及天王等舊衆舊衆雖重隨會別故並皆  
取之然此諸衆或總爲一一乘衆故或分爲  
二以有實衆及化衆故或可爲三人天神故  
或爲四佛菩薩人非人故或五非人開天神  
故或六加畜生故或七天分欲色故或八菩  
薩有此界他界故或九他方有主伴故或十  
加聲聞故或一百七十五如前說故或無量  
無邊義類多方故一一或以佛刹塵數等爲  
量故又如新集菩薩毛光出衆例上皆爾故  
一一衆皆無分齊此猶約相別若融攝一一

會中皆具一百七十五衆以稱法界緣起之  
會互相在故上且約一界者通十方及異類  
刹塵帝網無盡無盡是爲華嚴海會衆數第  
五權實者夫能對揚聖教影響其跡靡不是  
權當機之流多皆是實諸教所明穢土之中  
雜類菩薩聲聞皆通權實地前是實地上是  
權法身無生生五道故淨土菩薩唯實實報  
生故雜類聲聞是權攝論云欲令淨土不空  
化作雜類衆故若依此經同生異生皆通權  
實海印定現實德攝故隨緣隨位而示現故

第二會初云莫不皆是一生補處故對前十類辯權實者影響一衆自有二類一果德衆謂能加證法諸佛互為主伴非權非實若位極菩薩影響一向是權故有經云昔爲釋迦師今爲佛弟子二尊不並化故我爲菩薩等當機唯實餘八通權實第六地位者有說一切皆是果位以是舍那海印現故或說一切皆因果海非可見聞世尊亦是因者識所現故或皆通因果果得不捨因隨類現故因位願力助佛化故當機之流正修趣故或俱非

因果緣起大衆同真性故將此對前權實則果位一向權因位通權實若對前十類影響證法通因果餘八唯因因位高下難以準定第七前後者初列菩薩後列餘衆者表從本以起末下讚即後明菩薩者表尋末歸本良以本末無二故二文互舉又從本流末必先小後大故自在天爲末攝末歸本必從深至淺故先明自在然皆顯法界緣起逆順自在故也又表四十位一一皆徹因門並該果海故互舉前後令物不作優劣之解故第八有



無者亦有十類一約界無無色二約趣無地獄此二非器故若約轉生有地獄天子若約所益亦通無色三界皆益故三約洲但列閻浮餘三略無故或成難故四約乘無二乘不共教故下為顯法亦不見聞故智度論云若

用五

四

小乘經初唯列聲聞若大乘經初具列菩薩聲聞若一乘經初唯列菩薩故指此經為不共教或大乘經唯列小者為引攝故如金剛經或唯列大亦屬大乘主伴不具故主伴具者必是一乘五約部無四眾未說小教故六

約主無人王王未知故七約三聚無邪定彼障隔故生盲之流但冥益故八約內外無外道非彼測故九約諸天無無想入邪定故十約善惡無惡魔不為違害天中攝故上十且隨相說圓融應有即無所不具第九聞不聞者約權前後皆互得聞約實當會自聞縱不起前而趣於後亦各不相知若約頓機許一時頓領上之九門且從顯著略為此釋中本廣本或隱或顯不可執文第十釋文第一會中前總四十眾大分為二初一同生餘是異

生故論云解脫月是同生衆故又云同生衆請則知兼有地前明知不約地位餘釋云云不符論意云何名爲同異生耶然有二義一謂雜類作諸異生種種形故菩薩得法性身同人作一類菩薩形故二菩薩爲同者通諸位故神等爲異法界差別德故其四十衆文皆有三一標數辯類二列名總結三攝德周圓今初同生衆中第一標數辯類中先辯數佛世界者下辯世界略有三類一世界二種三海今云世界則非種非海權實共許一三

千界一佛化境故或名佛刹佛土皆準此也微塵者七極微量也謂抹三千界並爲微塵一塵爲一菩薩則數已難量矣況舉十數表無盡耶菩薩摩訶薩者辯類也即揀非餘衆具云菩提薩埵摩訶薩埵今從略耳然有三釋一菩提是所求佛果薩埵是所化衆生即悲智所緣之境從境立名故名菩薩二菩提是所求之果薩埵是能求之人能所合目故名菩薩三薩埵此云勇猛謂於大菩提勇猛求故摩訶云大大有四義一者願大求大菩

提故二行大二利成就故三時大經三無數  
劫故四德大具足一乘諸功德故前二通地  
前後二或唯地上更有諸大亦不出此此等  
並是舍那佛內眷屬動止常隨故云所共圍  
繞二其名列名結數先列其名後結略顯  
廣今初夫聖人無名爲物立稱雖得名千差  
而多依行德行德皆具而隨宜別標先十同  
名普者顯具法界總相德故後十異名者顯  
具法界別相德故總別相融同一法界今初  
十名之普是別之總普下十異顯即普能別

普義方成此是古今諸佛同行普賢之行隨  
於諸位差別不同縱成正覺亦普行攝故先  
明之言普賢者體性周遍曰普隨緣成德曰  
賢此約自體又曲濟無遺曰普隣極亞聖曰  
賢此約諸位普賢又德周法界曰普至順調  
善曰賢此約當位普賢又果無不窮曰普不  
捨因門曰賢此約佛後普賢位中普賢悲智  
雙運佛後普賢智海已滿而運即智之悲寂  
而常用窮未來際又一即一切曰普一切即  
一曰賢此約融攝所以先列者爲上首故法

門主故法界體故一切菩薩無不乘故無一  
如來非此成故今諸聞者見自身中如來藏  
性行普行故上雖多義離釋今從別稱合釋  
無處不賢名曰普賢即體普也此一為總餘  
九為別二德普謂稱性之德充於法界以為  
最勝委照無遺如燈之光三慧普遍照嚴刹  
決定高出故四行普內行圓淨智焰外燭故  
稱為妙五音普具一切音演佛淨土深廣高  
出之行故六智普照佛法界無盡境故七心  
普智寶嚴於心頂通行等華高出物表故八

覺普遍覺性相聲皆悅機故無不歸者九福  
普障無不淨稱真無盡故十相普無光相之  
光相遍益衆生故六相圓融思之二海月下  
十異名菩薩一海月光大明者十德十山皆  
依大海十地十度皆依佛智海中看月淨而  
且深依智嚴刹深而且淨如海即大如月即  
明故以名也二講如雷震故曰雲音辯才汎  
濫猶如海光又海上有光天涯無際佛智起  
用一念普周淨惑無窮名無垢藏三修治二  
嚴猶如淨寶秘密高顯故有髻言四法王出

現作用自在二嚴圓滿爲功德光五勇猛化  
生不染化相兩法玄妙如解髻珠六慈雲智  
日互相資映長劫普應高出如幢七堅利智  
慧與精進俱故得稱大智爲行本若齊爲壽  
因八戒等行發是爲香焰種智高直故曰光  
幢九智光遍照是大明德稱真適物名深美  
音十大智發光遍照佛境令福非福相福亦  
稱大二如是等下結略顯廣第三此諸菩薩  
下攝德圓滿中二初別歎勝德後總結多門  
初中亦二初二句就緣歎餘就行歎今初初

句徃因同行顯主伴有由後句從德海生明  
長爲輔翼言毗盧遮那者毗即遍也盧遮那  
光明照義迴就方言應云光明遍照然有二  
義一身光遍照盡空乃至塵道二智光遍照  
真俗重重法界身智能所合爲一身圓明  
獨耀具德無邊故立斯號又毗者種種義盧  
遮障義那者盡義入義即種種障盡種種德  
圓故普賢觀經云釋迦牟尼名毗盧遮那遍  
一切處即身亦遍非唯光遍又云其佛住處  
名常寂光即土亦光矣又云常波羅蜜所攝

成處我波羅蜜所安立處即德圓義又云淨  
波羅蜜滅有相處即障盡義又云樂波羅蜜  
不住身心相處不見有無諸法相處即證入  
義又云如寂解脫乃至般若波羅蜜是色常  
住法故明皆即應即真為本師矣此經文證  
本品當辯言共集善根者即備道資糧言修  
菩薩行者即作所應作云何共集互為主伴  
故主伴有三一迴向主伴二同行主伴三如  
相主伴皆稱共集後句言善根海生者謂佛  
德無邊積妙法寶智定盈洽故稱為海從生

有四一從自佛善根海生謂已圓十身故二  
從本師海生佛為勝緣曾已攝受授法令行  
得成滿故三與遮那同於餘佛海生以上云  
共集故四從法性佛海生以上德海諸佛共  
同平等一味但稱性修即是從生不揀自他  
故梵本云與佛同一善根海生第二諸波羅  
蜜下就行德以歎夫大士必崇德廣業虛心  
外身崇德故進齊佛果廣業故行彌法界虛  
心故智周萬法而不為外身故功流來際而  
非已故德難名矣略分為三一明自分因行

德二勝進果行德三二行無礙德初中亦三  
一自利行圓二利他行滿三證理位極今初  
有三句一諸度行滿謂六度十度八萬四千  
多劫積集究盡事理故云圓滿二慧眼下十  
眼明徹分別名慧照矚稱眼障用五醫斯盡智無  
不矚故云明徹五眼之中慧眼觀理九理無異  
味故云等觀十眼之中慧眼觀事事無不見  
故名等觀是則委見其事為明深達其性為  
徹欲以一眼含諸具通事理但舉其慧三於  
諸下深定已滿三昧者此云等持遠離沉掉

平等持心趣一境故而云諸者其餘諸緣亦  
一境故真如三昧為其定體隨境入別塵數  
多端故云諸也橫則無定不窮豎則深入無  
際故云具足定障未亡故云清淨第二辯才  
下利他行滿有三句即三輪化益一語含四  
辯即正教輪辯謂巧顯深理才謂巧應機宜  
萬法咸演則廣大無涯千難殊對則無竭盡  
故如海也又海遇風緣則洪浪雲涌智逢機  
請則口辯波騰請者既許無邊辯亦廣大無  
盡二具佛下身業神通輪謂三業無失智深

巨撓為具佛功德故得外儀儼若肅然可敬  
三知衆生下意業記心輪根義總明文含性  
欲言如應者根有生熟化不失時器有大小  
授法無謬化謂教化即應攝受者而攝受之  
伏謂調伏即應折伏者而折伏之由此具行  
入正法故第三入法界藏下證理位極亦三  
句一證理法謂以大智證入平等真法界藏  
依佛性論說有五藏一如來藏謂在纏舍果  
法故二自性清淨藏謂在纏不染三法身藏  
謂果位為功德所依四出世間上上藏謂出

纏超過二乘菩薩五法界藏謂通因果外持  
一切染淨有為故名法界內舍一切恒沙性  
德故復名藏此義寬通故今證入言智無差  
別者所證之藏平等要無分別方契此則智  
自無差即由上義能所不殊又此能證智與  
所證藏冥合用五一味無有境智之異故云無差  
此復有二一同無相故下經云無有少法為  
智所入亦無少智而入於法二同法界故則  
能所各互攝盡故下云無有智外如為智所  
入智攝如盡故亦無如外智能證於如如全



攝智故若皆一味豈令智同於境而無智耶  
古德釋云智相盡故不有能令智相盡故不  
無不爾豈令諸相比盡而智獨存是故於境  
則不礙真而恒俗於智則不礙寂而恒照即  
境智非一境則不礙俗而恒真智則不廢照  
而恒寂即境智非異境則空有無二智則寂  
照雙融故云無差別也上來所釋約真理寂  
寥與止寂相順俗諦流動與觀照相順起信  
等中且為此釋未盡其源以令照真不得名  
照照俗之時不得即寂故今正釋者謂言用

則同而異由境不能照智有照故言寂則異  
而同境智無異味故同故無心於彼此忘心  
契合故異故不失於照功智異木石故故名  
真智證理境則唯寂智則寂而常照若約照  
俗則以後得智照差別之境若約融真俗者  
境則真俗不二智則權實用五雙行亦為一味而  
不失止以雖雙行而即寂故若約三觀及融  
境智至下當辯二證佛下明證果法言解脫  
者謂作用自在如不思議法品說於一念中  
建立三世一切佛事等總有十種廣如彼說

即用而真故甚深用無涯畔故廣大上窮彼際故云證也三能隨下明得位極謂普賢身遍於六位隨在一位以願海力持於一切故舊經云在於一地普攝一切諸地功德今此文順西國若順此方應云能以方便隨入一地以願海力攝持一切地也然有引梵本廣明此中句數開合不同不必應爾何者夫譯梵為唐誠乃不易苟文小左右貴於旨不乖中若理不可通則正之以梵本譯人意近則會之以舊經言異意同何必廣引言恒與智

俱者明智窮來際文含二義一望前謂雖在因中一地而願力持一切地功德皆與智俱盡未來際不離一地如一地餘地亦爾是故因門盡於未來恒是一一諸位菩薩不見作佛時二望後以盡未來之大智入如來之果海也雖有二義順前義勝第二了達下明勝進果行分二一得果法二起果用今初有四句一入佛密境此有二意一佛即密境以三業業具非餘測故謂非色現色摩尼不能喻其多非量現量應持不能窮其頂不分而遍

一多不足異其體全法為身一毛不可窮其際此身祕密也佛言聲也非近非遠目連尋之無際身子對而不聞非自非他若天鼓之無從猶谷響而緣發無邊法海卷之在一言無內圓音展之該萬類是謂佛口密也意則用五無私成事等覺尚不能知密之至也皆廣大無涯超絕竒特故云希有二佛之密境即謂一乘如來知見禪定解脫深入無際帝網之境時乃說之故云希有久默斯要甚為祕密又權實隱顯唯佛方知故云祕密今洞見其

永樂北藏

大方廣佛華嚴經疏

第一六九册

源故云了達二善知下入佛平等亦有二意一佛佛平等謂一切諸佛體性平等法身無二故智慧平等德無增減故內用平等悲願普應故二者佛所證法平等即第一義此二無二稱此而了故名善知二已踐下明得佛位謂佛有十地如大乘同性經說一甚深難知廣明地乃至第十名毗盧遮那藏海智地此十同是佛地約德用成別今普光明當其第一普即廣義光明即明甚深難知此文雖略義在普中舉初攝後理實皆踐又普光明

亦十地之總總不出於普法智光故四入於  
下證佛三昧謂海印等定皆深廣如海並通  
一實故得稱門第二於一切下明起果用文  
有三業一現佛身業遍世同事二同佛意業  
總持大法三得佛語業能轉法輪不退有四  
一稱理不退用五無改說故二應機不退十三無虛發  
故三利益不退聞已必定故四調伏不退天  
魔外道不能動故復有四種不退謂信位證  
念今當第四念不退也第三一切如來下二  
行無礙德謂引攝佛德不礙修因故文有五

句一引攝佛德然有二義一則行成攝果二  
則諸佛同加二一切下隨佛遍生不揀淨穢  
也三已曾下供佛集福十方無邊三世無際  
此一切佛皆供養故歡慶有遇不住福相故  
長時無厭四一切下長為輔翼義通真應五  
恒以下悲願調生不以偏小利物唯以同體  
普願攝物令證菩提方顯智體圓足第二成  
就下總結多門無得而稱也菩薩之德焉言  
不可周宜以類取故云如是無量第二大段  
異生眾中總三十九眾相從為三第一雜類

諸神衆第二阿脩羅下八部四王衆第三十三天下欲色諸天衆今初有十九衆通名神者靈祇不測故文皆三段第一標數辯類第二列名結數第三攝德圓滿今第一金剛神衆初辯類中以執持此杵守護佛故然一類皆通有所表如地表心地海表德海等觀其歎德則知通意今此表般若堅利導於衆行到彼岸故二所謂下列名結數然諸衆立名皆隨所得法門爲物立稱一那羅延者此云堅固由見佛妙色皆不可壞故受此名

二見佛身毛猶如日輪現種種光速摧障惱故名曰幢三見佛身光映蔽一切猶如須彌顯于大海神通等法如華開敷故四圓音隨類如雷震故五現爲世主以美妙根令物悟故六智光演法令愛樂故七寶飾妙相如華巖樹方便警物如雷震音八福深相妙炳著光明如師子王處衆無畏九慈眼視物爲吉祥目神通之焰密現物前故十雨此巖具及光明故下諸衆皆類此知至得法處名當自顯恐猷繁文下略不釋第三皆於下攝德圓

滿十句分二初二句總彰願行由昔願力得  
預法會常為親侍由今行滿故能遍侍後積  
集下別顯滿相一福積淨業二智達定境事  
定之境隨事百千理定之境即真如實相不  
思議定則以無礙而為其境今皆智照故云  
明達三通隨佛住四入用難思五處衆超絕  
六應物調生七隨佛化形八護佛住處文並  
可知第二身衆神文三同前初辯類有二義  
一身謂神之自身衆即同生同名及所隨者  
凡有其一必更有二共有其三三故名衆能

所合目名身衆神二約所主謂此類神專以  
變化多身為佛事故二名三德文並可知第  
三足行神亦有二義一謂依止足行衆生及  
守護故如下善見比丘足行之神持華承足  
故下德中戀仰如來二足所行處即道路神  
通表修行履佛所行故第四道場神從所依  
所守得名下諸神衆類皆同此言道場者非  
唯護佛道場但有莊嚴道場之處即於中護  
故下德中願供養佛表護萬行道場及修行  
者故第五主城神表行德防禦法城心城故

如摩耶處說德中以已德行嚴佛宮殿者一  
佛殿為所守之最瑩飾為尊佛故二主伴善  
根互融攝故三瑩飾自心佛安處故第六主  
地神表深重願荷負行德故亦表心地為依  
持故第七主山神通表萬德高勝性皆閑寂  
別表智德最高故德中云得清淨眼名中多  
有光稱第八主林神表以無漏智導於衆行  
森聳建立故德中云皆有可愛光明第九主  
藥神表行德伏惑資益法身若約利他則三  
業不空如藥樹王故下德中性皆離垢即伏

惑去病也仁慈祐物即進善補益也名中總  
名主藥藥既不同神神各別吉祥者主香茅  
之類也清淨光明謂乳石之流名稱普聞如  
藥樹王雪山忍草等明見十方謂眼藥等約  
法準之第十主稼神稼者樹五穀也表萬行  
法味資益自他他自益稱心故德中大喜成  
就十一主河神即河伯之流也表法河流注  
潤益群品又於生死瀑流拯彼漂溺江河淮  
濟清濁俱河故生死法流此神皆主德中勤  
益生者謂遇洪流則平波息浪逢泝沫則微

風輕動水性之屬深止而住居陸行之流富  
生而應來導百川而去害灌萬頃而開利為  
動作意利益衆生約所表法隨意消息十二  
主海神即海若之輩表具舍萬德一一深廣  
也名中三名遠塵離垢者瑜伽八十六云現  
斷煩惱離故遠塵彼隨眠離繫故離垢今約  
近事塵謂塵境垢即煩惱六根對境了彼性  
空故曰遠塵衆惑不行誠為離垢心境相藉  
離垢由於遠塵十三主水神者通上河海等  
水及雨露霜雪等也表法水含潤等多義理

故德中拯溺為救濟危為護謂已溺邪見貪  
愛水者救之將沉者護之而為利益即雲雨  
等潤發生萬物也法合可知十四主火神即  
宋無忌之流也以顯智慧火燒煩惱薪成熟  
善品破無明闇耳德中夫火有二能一能為  
益二能為損今用益止損表法亦爾示慧光  
以去闇用益也除惑苦之熱惱止損也十五  
主風神通表方便無住無所不摧別表如下  
十六主空神表法性空別即離染周遍等亦  
各如名辯德中若情塵亂起翳本性空智日



高昇則情雲自卷空有日而廓尔無際智合  
理而杳然無涯故云爾耳十七主方神即東  
方青帝等類也表顯邪正方隅使行無迷倒  
德中身智教光無不引攝名普放也無時不  
放所以稱恒如日周天故相續不絕十八主  
夜神表於無明黑闇生死長夜用五導以慧明令  
知正路德中夜分亡寢是曰勤修翻彼長迷  
故以法為樂十九主晝神於晝攝化顯行德  
恒明也德中先修正解後勤正行有信無解  
增長無明有解無信還生邪見信因解淨解

藉信深晝之義也上來多主器界故但名神  
準梵本除金剛神餘皆女神表慈育故菩薩  
同於彼類以攝衆生自下攝領有情皆受王  
稱並是丈夫第二八部四王衆文有八段前  
四雜類後四能統是天王所統是八部今初  
阿脩羅亦云阿素落梵音楚夏耳婆沙譯為  
非天佛地論云天趣所攝以多行諂媚無天  
實行故曰非天依阿毗曇亦鬼趣攝諂曲覆  
故正法念經鬼畜二攝以羅睺阿脩羅是師  
子子故伽陀經天鬼畜攝具上說故由此或

開六趣或合爲五多好鬪諍懷勝負故或居衆相山中或居海下如正法念說然有大力者廣修福故今之修福有懷勝負諂媚心者多生其中羅睺此云攝惱以能將手隱攝日月令天惱故二毗摩此云絲也質多羅種種也謂此王能以一絲幻作種種事故德中實者因果俱慢故權應偏摧非不斷餘故云及也二迦樓羅昔云金翅正云妙翅以翅有種種寶色莊嚴故此就狀翻若敵對翻此云大嗉項以常著龍於嗉中故此鳥能食消魚龍

七寶然鳥及龍各具四生謂卵胎濕化後後勝前前劣不能食勝謂卵生鳥不能食胎等勝能噉劣化食四生如增一辯以化食化暫得充虛亦表菩薩攝生故離世間品云菩薩迦樓羅如意爲堅足乃至搏撮人天龍安置用五涅槃岸大速疾力者增一中說此鳥食龍從金剛山頂鐵叔樹下入海取龍水未合間還至本樹是爲速疾大海處攝持力者即是攝彼命將盡者食之而龍受三歸及袈裟一縷在身則不可取菩薩亦爾如前引離世間品

說又出現云取善根熟衆生置佛法中此爲命盡若心有邪歸斷見所覆則不可取普觀海者即周四天下求命盡龍德中大方便力即雖了衆生空而能入有是十力止觀也普能救攝即鼓生死大愛海水取善根熟者也如出現品說三緊那羅者此云疑神謂頂有一角形乃似人面極端正見者生疑爲是人耶爲非人耶因此立稱依雜心論畜生道攝亦云歌神以能歌詠是天帝執法樂神即四王眷屬表菩薩示衆生形而非衆生常以法

樂娛衆生故德中要勤觀察則得法樂怡神自他兼樂爲自在遊戲四摩睺羅伽者此云大腹行即蟒之類亦表菩薩遍行一切而無所行也德中此類鼉駝故令方便捨癡五夜又王初一是北方天王即毗沙門是也若從能領是天衆攝四五今從所領爲名然四王各領二部從一立稱夜又此云輕捷飛空速疾故亦云苦活此天又領一部名羅刹此云可畏名中云毗沙門者此云多聞以福德之名聞四方故此一是天夜又之王餘九是夜又夜

又即王雖一是天又從所領況九皆夜又故  
非天衆下三例然如龍中娑竭羅王豈是天  
耶德中此類飛空噉人故菩薩示爲其王翻  
加守護亦令愛見羅刹不害法身慧命也六  
龍王亦初一是天即西方天王毗樓博又唐  
三藏譯云醜目毗樓醜也博又目也日照三  
藏譯云毗遍也多也樓者具云嚕波此云色  
也博吃又此云諸根也謂眼等諸根有種種  
色故以爲名此不必醜也此王主二部謂龍  
及富單那富單那者此云熱病鬼也娑竭羅

此云海也於大海中此最尊故獨得其名德  
又迦舊云多舌以嗜語故正云能害於所害  
德又者能害也迦者所害也謂若瞋噓視人  
畜皆死也無熱惱者即阿耨達池之龍也諸  
龍有四熱惱今皆離故四熱至下當釋智論  
云此龍是七地菩薩須彌藏經云是馬形龍  
主又一切龍總有五種形類一象形善住龍  
王爲主二蛇形難陀龍王爲主三馬形阿那  
婆達多龍王爲主四魚形婆樓那龍王爲主  
五蝦蟇形摩那斯龍王爲主德中外則雲行

雨施散去炎毒內則慈雲廣被法雨普霑散  
業感苦之熱惱七鳩槃荼王初一是南方天  
王即毗樓勒又此云增長主謂能令自他善  
根增長故此王更領一部謂薜荔多薜荔多  
者此云魘魅鬼餘如音義德中此類障礙深  
重故偏明無礙用五自學權實無礙二十法界智光以  
利衆生八乾闥婆此云尋香謂諸樂兒不事  
生業但尋諸家飲食香氣即往設樂求食自  
活因此世人號諸樂人爲乾闥婆彼能執樂  
故以名焉亦云食香止十寶山間食諸香糝

即帝釋執樂神也帝釋須樂此王身有相現  
提頭賴吒即東方天王此云持國謂護持國  
土安衆生故此從所領爲名更領一部名毗  
舍闍此云噉精氣謂噉有情及五穀精氣故  
德中大法即大緣起法也信解故歡喜深心  
故愛重既歡既重故不替修行第三月天子  
下十二段明欲色諸天衆天者自在義光明  
義清淨義智論云天有三種一人天謂帝王  
二生天謂欲色等三淨天謂佛菩薩第一義  
天今通後二然諸天壽之長短身之大小衣

服輕重宮殿勝劣俱舍十一及瑜伽等論起  
世等經皆廣辯之恐繁不叙文中先有七段  
明欲界天後有五段明色界天前中即分爲  
七今初月天子月者缺也有虧缺故下面頗  
胝迦寶水精所成能冷能照表菩薩得清涼  
慈照生死夜如云菩薩清涼月等名中初一  
是總雖標總稱即受別名下皆準此德中顯  
發衆生心寶者水珠見月則流潤發光淨心  
遇緣則慈流智發生了既發正因顯然生由  
性成則了非外入生與不生無二發乃發其

用五

廿一

本心故顯發雙辯二日天子日者實也常充  
實故下面亦頗胝迦寶火精所成能熱能照  
表菩薩智照故又日以陽德月以陰靈一能  
破暗表根本破惑一能清涼表後得益物又  
依寶性論法日有四義一破暗如慧二照現  
如智三輪淨如解脫四上三不相離如同法  
界也名中可畏敬幢者爲惡者畏其照明爲  
善者敬其辦業以斯超出故以名幢德中居  
者辦業成就本行等利益也生長穀稼開敷  
覺華等爲增長善根如出現品三三十三天

者佛地論等皆云妙高山四面各有八大天王帝釋居中故有三十三也下釋天名皆依佛地名中言釋迦等者釋迦能也因陀羅主也具足應云釋迦提桓因陀羅提桓天也即云能天主撫育勸善能為天主故更有異釋如音義說德中言發起廣大業者令修普賢行故以此天居地天之頂總御四洲雖勝事頗多猶懼修羅之敵若修善者衆即天侶增威苟為惡者多即諸天減少故多好勸發況受佛付囑大權應為至如堅常啼之心施雪

山之偈成尸毗大行破盧志巨慳談般若於善法堂中揚大教於如來會下等皆是發起廣大業也四須夜摩天須者善也妙也夜摩時也具云善時分天論云隨時受樂故名時分天又大集經此天用蓮華開合以明晝夜用五又云赤蓮華開為晝白蓮華開為夜故云時分也隨此時別受樂亦殊故大論云隨時受樂也德中心恒喜足者喜足在於第四今慕上而修五兜率天王此云喜足論云後身菩薩於彼教化多修喜足之行故得少意悅為

喜更不求餘爲足德中彼天是諸佛上生之處故令修念佛三昧也召體曰名響頌人天爲號通號別名皆悉念也不計一方故云一切以諸如來同一法界體德均故念即明記而慧逾增持而不忘故無間斷以佛爲境何五塵之能惑哉六化樂天王論云樂自變化作諸樂具以自娛樂又但受自所化樂不犯他故名爲善化也變謂轉變轉麤爲妙化謂化現無而忽有德中以出世化故得解脫七他化自在天王論云令他化作樂具以自娛

樂顯已自在故名中寂靜境門者境爲入理之處即是門也根無躁動故稱寂靜根即門也根無取著方見境空合爲門也故鶖掘經云明見來入門具足無減修德中物我自在即廣大法門第二色界諸天衆有五衆以第四禪有二衆故然四靜慮攝天多少下經頻列至十藏品當會釋之多依十八初靜慮四二三各攝三天皆舉最上以勝攝劣故但列一下文說頌遍觀諸天第四靜慮自攝九天上五小乘聖居非此正被異生位中廣果至

用五

十三



極故今列之大自在天三千分主所以別列  
今初大梵天王衆佛地論云雖欲寂靜故名  
爲梵具云梵摩此云清潔寂靜謂剝離欲染  
故名清潔得根本定名爲寂靜尸棄此云持  
髻謂此梵王頂有肉髻似螺形故亦名螺髻  
或云火頂以火災至此故貌如童子身白銀  
色衣金色衣禪悅爲食德中本修慈心得生  
梵世等流相續還慙衆生好請轉法輪故智  
光照物不爲汙行故身光發揮若有遇之身  
心悅樂第二光音天二禪第三天也智論亦

云第二禪通名光音彼天語時口出淨光故  
有云彼無尋伺言語亦無用光當語故名光  
音瑜伽名極光淨謂淨光遍照自他處故德  
中定生喜樂離尋伺故得寂靜名然凡得之  
捨動求靜故非廣大味定之喜非無礙法今  
菩薩即動而靜不散不味是爲廣大無礙法  
門也第三遍淨天此天離喜身心遍淨故德  
中身心遍淨未爲廣大物我無二普益世間  
方爲廣大也第四廣果天即第四禪第三天  
於異生善果此最廣故所有功德勝下三故



大方廣佛華嚴經疏卷第六

用六

唐清涼山大華嚴寺沙門 澄觀撰

世主妙嚴品第一

從第二經  
盡第五經

自下大文第七稱揚讚德分亦是發起序文中  
有三第一總結威儀住第二此諸衆下總  
顯德行因緣<sup>用六</sup>第三所謂下別明得法讚佛前  
中有三初結衆集次明相異後顯意同今初  
數廣德深故名衆海起於自地集空道場多  
數大身重重無礙雲之象也又浮雲無心龍  
吟則起菩薩無住佛現爰來二無邊下相異

也不唯上列故云品類無邊旋環不空故云  
周匝遍滿大小等形妍媸等色部主徒從各  
有區分故云差別三隨所下意同也隨所來  
方參而不雜皆得見佛各對目前其猶百川  
各全觀月同無異念故曰一心諦矚欽承瞻  
而且仰不唯直觀丈六乃徹見法界身雲第  
二總顯德行因緣者以上列中隨宜別歎今  
方總顯德行齊均又與下別得法門以爲總  
故前同生衆中共集善根亦是別故又前共  
集明主伴所由今曾攝受顯眷屬所以影略

其文此文多勢且分爲三初明離障見淨二如是下受化根深三種無量下德行圓備初後是因中一是緣以因奪緣大衆自見以緣奪因佛力令見因緣和合無定親疎故因緣間說又初段德行現深後二因緣宿著久攝今見即緣成因感應道交故常居佛會今初離障見淨者煩惱即煩惱障也心垢即所知障也此障翳心迷所知故言一切者謂分別俱生若種若現言餘習者二障氣分麤重麤重如畢陵上慢迦葉不安今皆位極菩薩智

現情亡證理達事心鏡瑩淨故云已離若諸位圓融一斷一切斷亦通初位言摧重障山者通以喻顯以能推道摧二障山障體堅厚崇聳如山又別則智障菩提惑障圓寂通則俱障及一切佛法故名爲重言見佛無礙者斷障果也然有二義一就能見以明無礙由用六斷二礙智明理顯理顯故見法性身智明故見佛智身理智冥一見無礙身無礙亦即涅槃二約所見明無礙者具十無礙已如上說第二如是下受化根深於中初總後別初中

如是者指前斷障之衆劫海者明攝時曠遠  
言四攝者即攝化之方謂布施愛語利行同  
事布施是攝緣與彼資持故愛語是攝體正  
示損益故利行是攝處安住善處故同事謂  
釋疑令彼決定故後一一下別示攝相於中  
向言劫海曾攝何所攝耶謂一一佛所何時  
攝耶種善根時將何法攝謂種種方便攝相  
云何謂教化成熟教化約始成熟就終攝意  
云何令其安立一切智道道者因也謂唯爲  
佛果修佛因耳第三種無量下德行圓備前

攝何益令德圓故於中先辯因圓後入果海  
今初文有五句一種無量善已超七地殊勝  
善根故二悉已下已超八地大願滿故三所  
行下已超十地行滿障淨故四於出離下前  
明德圓此具出道一道無量道已超生死不  
住涅槃故云善出五常見下結成見佛謂德  
高十地是以常見非比量見故曰分明不取  
色相名爲照了又塵毛刹海佛遍重重有德  
斯觀名分明照了二以勝解力下入果海也  
此一段文望前是別總具德中別入果故望

後是總四十衆中解脫標故今且屬前於中  
二初乘因入果是比智知如見鸞翔知太虛  
可冲矚龍躍知宏海可汎也謂以勝解力印  
可佛言知福慧之深遠以信解力瞻仰佛化  
知慈悲之廣大是入如來功德大海亦是勝  
解印持果德二得於下明分得果用言解脫  
門者佛果障寂大用無礙故稱解脫真解脫  
者即是如來通智遊入故號門也衆各證契  
故名爲得此解脫即門佛得其總衆海得別  
又佛解脫但名解脫衆所得法稱之爲門以

能通入彼果用故此解脫之門又衆所得法  
離障自在名爲解脫智所入處亦名爲門以  
因解脫入果解脫亦稱爲門此解脫即門然  
認別圓融因果交徹重重無礙方爲真解脫  
門故下或歎佛果德或歎因行或約天等所  
得欲影顯故次遊戲神通正明入相遊戲者  
出入自在神通者難測無壅故約觀心者心  
境無礙稱爲解脫由此入理故號爲門若以  
門爲門非能通矣門即如實何所通耶正入  
雙亡爲真門矣如此入者則本覺湛然名窮

果海真非妄外則因果圓融心境無涯則解脫無際矣第三所謂下別明得法讚佛四十衆中各先長行得法即經家序列後說偈讚即當時所陳然衆集偈讚並在一時文不累書故編之作次而各得一者顯佛德無盡故衆別入總盡衆不能及故故海慧云如來境界無有邊各隨解脫能觀見而普賢得十者顯等佛無盡故文中先異生衆後同生衆前中三初諸天次八部後諸神今初分二先色天後欲天前中有五今初自在天長行十法

第一法界等者即法身解脫也法界虛空界即用所遍處空即事空法界之言義兼事理謂非但遍空亦遍空內色心等事及空有稱真之理又但言空則一重遍今云法界則重重皆遍何者謂空界容一一塵處及彼事物一一塵中皆稱真故各有無邊刹海佛身大用皆悉充滿故下頌云無窮盡也言寂靜者體也然有二義一明前大用用無用相不礙常寂二由此智用即寂同真是故隨一一用遍一切處也言方便者用也亦有二義一明

前寂無寂相不礙大用二內同真性不礙外  
 應群機故云方便寂用無礙所以稱力二普  
 觀一切法悉自在者智身解脫也此有三義  
 一以普眼於一切法無不能觀二觀一切法  
 不壞事而全理三於一法中見一切而無礙  
 並名自在三知一切法不生等者自共相解  
 脫也亦有二義一知不生等內證真理二無  
 功用行外應群機然不生等佛法之體釋有  
 多門略申一兩一別釋以不生滅約境不交  
 去約行初不生滅略有五義一就遍計由是

妄執無法可生滅也又情有即是理無故不  
 生也理無即是情有故不滅也不滅不生是  
 一法也又求遍計相不可得故不生能顯無  
 相性故不滅不滅即不生亦一法也二就緣  
 起性謂法無自體攬緣而起即生無生既本  
 不生故無可滅也又緣起無性故不生無性  
 緣起故不滅中論云以有空義故一切法得  
 成是故不生即不滅不滅即不生為一物也  
 又推緣無起故不生能顯無生性故不滅三  
 約圓成性謂非是有為故無彼生滅相也又



非妄心境故不生聖智所證故不滅又體非  
遷變故不生隨緣令法起故不滅不滅即不  
生爲一物也四通就三性混融於一法上就  
遍計故不生就圓成故不滅就依他故亦不  
生亦不滅就三無性故非不生非不滅五然  
此四句合爲一聚圓融無礙頓思可見二不  
來不去者約行謂正智背捨妄執而無去向  
證真理而不來又依體起用而不去應機現  
前而不來又往應群機而不去恒歸寂滅而  
不來不來即是不去無二爲一味也由此大

智無念應機如摩尼天鼓無思成事故云無  
功用行也二通釋者不生不滅亦可約行不  
來不去亦可約境謂妄念斯寂猶若虛空何  
生何滅又雖起大用見心無生用謝歸寂了  
本無滅又常稱真理寂照居懷於此心中有  
何生滅此約行釋不生滅也約境釋不來去  
者猶如空華無可去來又緣會即來來無所  
從故無來緣謝而去去無所至故無去又諸  
法即如如豈來去三展轉釋又何以不生滅  
由無來去故何以不來去由無生滅故又既

無來去則非非異不生不滅則無斷無常智契前理故無功用不礙生等故云行也是則不生之生生之不生無功用故常寂行故常用寂用無二是於功用得解脫也斯為正法之要義味難盡無馱繁文四現見一切法等者觀義解脫也現見之言揀比知故真實相言略有三義一以智觀事實事不虛故故下經文觀有為法如實相故二以慧觀理實所謂無相無相不相名為實相三以無礙智知無二實窮實故深盡邊故廣稱智慧海不為

相縛是解脫門五與衆生等者慈障解脫也離諸危怖曰安適悅身心為樂見佛則獲二利故安樂也煩惱不生故得定也佛德難思故樂定無邊斯為大方便也六令觀等者悲障解脫也衆生癡故造業造業故受苦閻用六故不見未來不見未來即顛墮故大怖之極莫越愚癡令觀本寂則癡相本空尚不造善豈當為惡七善入等者業障解脫也佛現十方是無邊境了無依性稱為善入尚不依佛寧造業思八普徃十方等者即無相解脫門七

也雖身應十方寂然不動智宣諸法怕爾無  
依不取於相如如不動故九入佛等者即名  
相解脫也佛智契如名入寂境寂而能應故  
普遍十方身智發光又令物入無相故靜無  
名故寂十中此天王名與前列中少倒前名  
極精進名稱光上下諸文多有此例或義存  
名異或廣略參差皆譯者不善會耳法門名  
住自守者此離二取相能益自他解脫門自  
悟處者即離覺所覺自覺聖智常現前也而  
以無邊等者謂緣無邊法界度無邊衆生得

廣大善提也二上首說偈中二先彰說儀後  
明正說今初焰海是當衆上首仰承佛力爲  
衆申心十地論云承佛力者顯無我慢普觀  
十方示無偏心今觀已衆通局小異耳然頌  
總有四種一名阿耨率覩婆頌此不問長行  
與偈但數字滿三十二即爲二偈二名伽陀  
此云諷頌或名不頌頌不頌長行故或名直  
頌謂直以偈說法故三名祇夜此云應頌四  
名盟馱南此云集施頌謂以少言攝集多義  
施他誦持故今此即伽陀頌也下皆準之爲

何意故經多立頌略有八義一少字攝多義  
故二諸讚歎者多以偈頌故三為鈍根重說  
故四為後來之徒故五隨意樂故六易受持  
故七增明前說故八長行未說故今此正  
唯前二義兼五六二正說中十偈次第各一  
法門結集取此以為長行非此頌前也然此  
中長行與偈有多不同謂偈字則定長行多  
少不同而長行則約天得法偈中即是歎佛此  
必然也若二文互望或因果之殊或體用有  
別或互相影略或難易更陳或法喻不同或

能所遮舉故傳授者善消息之二文相映於  
義易了今初天中初二句即前所遍法界虛  
空兼明能遍佛身則十身皆遍無窮盡者一  
出現無盡若高山之出雲二非滅盡法猶虛  
空之常住次句寂靜也由無性故不可取為  
一異俱不俱等後句方便合二為力此偈是  
說者自法故不結天名下並準知二中初句  
是上自在佛為法王於法自在故次句觀也  
第三句普也後句結法屬人為他說故然其  
結名義同法門恐繁不配他皆倣此三中初

句無功用也不思議是標離分別是釋次句  
即不生等相即生等無即不義第三句即行  
也長行約要先知法無生方得成無功用偈  
則要無分別方能見法無生內證與外用同  
時所以二文前後四中初句明廣次句明深  
即上智慧海也第三句自見法實故能令物  
不迷事理五中初句方便定也次二句與安  
樂也六中初句即前癡闇謂長迷妄境鎮覆  
真心也次句即令觀寂靜次句因滅無明則  
得熾然三菩提明是前滅義七中初二句即

善入無邊境無邊境即所應處也無有比善  
也次句無性者感而應故無依者思念寂故  
由此能令物不造業八中初二句即普徃十  
方說法次一句即不動無依九中初句即入  
寂靜境次二句即普現光明十中初十一字  
即無邊境為所緣求菩提即自所悟處次句  
既緣其境必起通化前文略耳第二明第四  
禪廣果天長行十法中一普觀等者此應根  
授法明於不知根說法無果障中得解脫也  
斷疑生信是說法果故謂觀機識病稱根說

法藥病無謬故疑除疾愈二中隨憶念言略  
有二意一隨念何佛如名應之二隨念有淺  
深令見佛有麤妙此於現身得解脫也三中  
法性平等者唯一味也無所依者離能所也  
莊嚴身者證真莊嚴即非莊嚴故雖現世間  
遠如法性不依諸有此於有依得解脫也四  
中知世間法者謂衆生世間心法各異知已  
隨宜現通說法故云安立一念速安非人天  
外道所能思議以此莊嚴如來教海此於安  
立教法遲鈍障得解脫也五一毛等者約偈

不思議解脫力也無礙有二義一唯就所現  
則毛中多刹自互無礙二雙就能所一毛不  
大而多刹不小一多大小皆無礙也又由無  
大小相故此於取著障得解脫也六普門者  
一門攝一切門名為普門隨一一門各全收  
法界故於其中觀察法界深智契達故名為  
入此於隨相中得解脫七中衆生無邊徃器  
各異應形說法種種不同既根熟不休故窮  
劫長現此於畏若不化生障得解脫八中觀  
一切等者謂觀事入理理超情表云不思議

此於諸業報得解脫九中法門無邊出者爲  
要根器萬品故出要難思此於著相得解脫  
十中種種方便但隨所應終成種智名入佛  
法以大悲出現皆等兩故此於不欲利生得  
解脫上云出要令離妄苦令云入法令得真  
樂也頌中觀已衆內三類天者上五淨居非  
所被故十偈次第一如長行初中前二句即  
所疑境界境界之言通分齊所觀普令者觀  
根爲說故生信解者斷疑也信佛大用分齊  
難測故斷佛上疑生其正解信佛所觀之境

則斷法上疑亦生正解謂如有疑云爲存因  
果非真空耶爲是空故無因果耶今明只由  
真空能立因果因果立故乃是真空也第四  
句釋一切之言佛以利生爲意樂故既該一  
切故廣大無盡二中初句即憶念次二句令  
見佛三中初句即法性平等無依次二句即  
莊嚴身謂如法性爲嚴故無依處四中初一  
句即了一切世間次二句即一念安立不思  
議莊嚴海五中初二句即毛孔現刹上云不  
思議佛刹但以橫多今云過去乃豎窮前際

皆示現者如鏡現像次一句是無障礙令應  
度者見即佛神通依佛鏡智而觀乃法性恒  
爾六中初二句即普門次一句即法界末句  
義兼於入七中初二句即爲一切衆生種種  
出現次句即無邊劫常現前謂約機隱顯佛  
無去來故常現也八中初句即觀一切世間  
也次二句即入不思議法也若約理論深是  
深非甚今不壞事而即理故曰甚深全攬理  
以成事名爲幽奧處兼上二法常寂然釋上  
義也以諸法即寂故不可以理事思也九中

初二句示一切衆生次一句顯出要法十中  
初二句即觀應化衆生次句令入佛法第三  
明三禪長行十法第一門即寂普現名爲方  
便說即是道由說入佛解脫海故此於體用  
有礙得解脫也又方便言亦通入解脫之方  
便也第二門隨一切等者謂不能普現得解  
脫也光影之言略有二釋一謂因光發影影  
但似質而不似光依智現形形隨衆樂不隨  
自智隨樂即應名普示現二水中之月亦名  
光影謂佛月不來影現心水影多似月少似



於水謂水動則流光蕩濇水濁則似晦魄臨池若止而且清則圓璧皎皎此亦隨自他意也此就天王且隨天衆所樂偈就於佛無不應也第三門佛境界有二一如如法性是佛證境二十方國土是佛化境嚴淨亦二離相息妄則嚴如境萬行迴向則嚴化境此二無礙大方便也此於無巧莊嚴得解脫也第四隨諸等者謂大悲深厚故隨入生死衆生無邊故永流轉而示導也此於無大悲捨衆生障得解脫也第五門佛調衆生或折或攝或

兼二行雖悲願多門皆令趣無上道若憶念此居然受化不滯於權此於勝所緣有忘念障得解脫也第六得普門等者佛以稱法性之總持包攝一切總持故云普門復能流演無盡故得稱海此於聞思有忘失障得解脫也第七門謂佛出難值引之令值信心難生勸之令生信含衆德所以名藏下經云信爲寶藏第一財故此於嫉妬邪見障得解脫也第八能令等者上令信佛此令信法仰依即信領解便喜信可趣入喜則奉行因得解脫

名而出離此於迷覆衆生障出離道得解脫也第九門謂衆生界法界調伏界虛空界皆無邊無盡菩薩悲智以方便界開示法界行調伏界等虛空界於有限礙障中得解脫故第十觀衆生等者由悲故憐愍由智故觀察用六觀察煩惱知病行已化而度之此於無悲無十三方便障得解脫也頌中十一頌初十次第如前長行依梵本列名中此長行闕第十天彼名星宿音妙莊嚴天王下言妙音者略而未迴第一頌中初二句是了達方便依法性而

現故後二句說即是道說不思議解脫令衆同歸二中初二句明光影普現無依故如影第三句成上二義以無生故如影無依略不明隨天所樂三中初句標方便無量劫修兼顯大義次二句正明方便嚴佛境界四中初二句即衆生未流轉謂無明所盲覆本淨心造業受身故恒居生死次句即隨而示之五中總相頌佛調生行初句高次句深後句廣六中初二句即普門陀羅尼次一句即所流出示教者示其善惡教使修行稱性無偏故

遍而無盡七中初二句值佛次句生信藏不信則佛難值正信唯佛能生既值佛生信反覆相成今之一遇何得不信八中初二句即所聞之法以無性為法之真性次句即令眾生信喜出離淨則出不信濁成無漏故九中初句能調伏人前因此果耳化眾生界即調伏行無邊無盡為不思議思惟悅生是名為八十中初二句即眾生無量煩惱謂利鈍二使愛見羅刹皆甚可怖也次一句以悲愍之以智令離十一中既闕長行對名略顯初二

永樂北藏

大方廣佛華嚴經疏

第一六九册

句星宿莊嚴義也謂佛光流於法界粲若星羅次句即妙音莊嚴化眾生事不出三輪上云妙音舉一立稱耳若長行立名應云得放光現佛三輪攝化解脫門第四二禪長行十法初中二義一內證真樂經論共說樂有五種謂一因二果三苦對除四斷受五無惱害無惱害樂更有四種謂出家遠離樂禪定適悅樂菩提覺法樂涅槃寂靜樂今當第四若通取受字兼禪定菩提則含因果言恒受者以無所受受諸受故若待境界即非恒也二

用六

十四

而能降下外建大義降神現相除苦因果此於涅槃體用障得解脫也第二門謂無緣大悲與性海相應拔世憂患故出生喜樂無盡名藏此於惱害心得解脫三一念等者修福德因感依正果福之力也雖多人多劫所感念劫融之頓現此於時劫得解脫也第四門謂以佛力不動成住壞三皆如空劫常清淨也此於遷變得解脫也五愛樂等者謂信樂佛菩薩法敬奉修行則二障得解脫也第六門地謂地智義謂證淨即離念超心地也方

便者教導及入地之由入住出等也以無盡辯演無盡法故能經劫七一切等者通有二義一現多身與多供供多佛皆稱真故名大方便即長行意二一念八相遍法界故名大方便即偈中意於上自在名為解脫八於定慧障得解脫九果滿應機是於現身化生無十五堪任性得解脫十見佛大願雲愛樂隨學此於自輕障得解脫二頌中十偈次第依前今初前三句明寂靜樂通舉因樂以顯果樂後句降現之用二中初句即所相應海次句即

能應大悲大悲荷物故名爲地次句即生喜  
藏憂除故喜患除故樂三中初句能現次二  
所現四中初二句即普使成住等次一句頌  
如虛空清淨以三災彌綸而淨土不毀故然  
三四二偈似如前却且順文釋耳五中初二  
句咸敬奉是愛樂餘是聖人次一句即上法  
及信受也六中初句經劫住次二句即地義  
方便無邊是一切也七中通頌八相普周略  
無供養八中初句是前智慧次句神通次句  
無盡及海以隨根令淨是深廣故九中初二

句即德海滿足次句出現世間十中三句通  
明前昔誓願力第四句結中便顯深信愛樂  
藏以文云大歡喜故第五初禪長行十法中  
一普住等者大用應機故普遍說法用而常  
寂故行淨無染得心無行故行淨了境無相  
故無染二佛爲定境住定則所見深故三普  
入等者法海難量名不思議一言演盡名爲  
普入四圓音隨類名音聲海要無分別方入  
佛聲五能憶等者化生即是趣菩提行故以  
宿住智明記六衆生報異隨業有差佛示現受

令生正信七於法自在方能隨類調生八佛  
身無相等法性之清淨現而同化為寂滅之  
行矣九不著諸有故能常現三業無邊更無  
可依十觀性無相猶如虛空何有可盡察用  
隨宜如擊水文隨擊隨生復何可盡偈中先  
上首觀衆開成四天合則梵身即衆亦有經  
云梵衆梵身梵輔梵眷屬身即是衆輔即眷  
屬十偈初中初句法身普遍道場次句智光  
說法次句行淨無染境相知行既亡則大用  
影像亦寂後句通以喻顯雲不離空空不礙

雲以況寂用二中初二句入禪之境如來法  
身即是心性若能觀之爲上定故次句示入  
方便雖多同入一寂三中初句即不思議法  
次二句明普入義以一言說盡故一言說盡  
之辯劫海亦不能窮顯法無盡也約能包則  
一言說盡約能久則劫海莫窮然一言但說  
刹塵未是無盡設欲一言盡者則二三兩句  
相違一言說盡劫海更何所演而得無窮更  
有所演前則不盡又不可重說若欲通者總  
望則可說盡隱映重重則不可盡如擊水文

小擊大擊遍擊各隨文生盡未來際擊盡未來文生為難思法也四中圓音之義文略有三義一廣無邊二別詮表三無分別如次三句餘如出現品辯五中初二句即教化衆生方便行三世諸佛皆以利他為向菩提自清淨業故次句前就梵王故云憶念今據如來故身現耳一毛尚現何況全身六中初句業相差別次句報相差別次句現同世間七中前二句即隨類調生調法自在故能隨類廣遍次句顯明前義無思成事故八中初二句

明佛體性即前清淨寂滅不可盡下略顯四義如空次句佛用應現為行既皆如化不失寂滅九中初二句所現無有邊次句勤現無依著十中初二句常思大用無盡謂安住大悲官能現大事故次句常觀法體無盡自下第二欲界諸天文有七段第一他化天王長行十法中一謂現衆生前自在調伏使其成熟化法無盡故名為藏二觀世樂相皆苦故應捨觀世樂性即入聖樂三隨樂斷疑令起正行四一言普攝諸義遍於時處為物而說五

傲佛修慈六示現等者大悲十力摧彼慢高  
 而無摧心故云示現七以智慧光照諸世間  
 令離三毒之闇則無惡趣之果瞋癡障重故  
 與偈互陳八十方等者為念佛三昧純熟故  
 隨念何佛即能得見如休捨解脫等九應念  
 現成十普入等者寂用自在現世調生總名  
 威力偈中亦十初中初句體遍次句用周故  
 能現前次句教藏能成後句所成自在開於  
 法藏悟深法門即成熟也二中初二句二樂  
 次句令入三四可知五中三句共顯如來大

慈初二句與十劣顯勝次句以喻正顯謂世慈有  
 相若須彌之高大海之廣終可傾盡佛慈稱  
 性若芥子之空投刃之地即不可盡又如空  
 有普覆<sub>中</sub>攝廣容無礙難壞無盡略舉一無  
 盡耳六七與八文亦可知九中初二句明佛  
 體普遍無成不成次句隨衆生心現成正覺  
 十中普現十方即普入一切世間餘皆威力  
 自在第二化樂天長行十一法中一為物開  
 示諸業如化化雖體虛而有作用為力業亦  
 從緣無性而報不亡二捨離等者攀取緣慮



是惑病之本若心境無得則捨攀緣三闇滅  
智生如月盈缺四示現等者梵聲微妙故云  
悅意應遍十方故云無邊五知一切等者此  
有三義一福德之相有十蓮華藏世界微塵  
數故無有盡二謂清淨慈門等無限因所生  
故一一因果皆稱真故一一即無有盡皆同  
虛空三大慈悲行是福德相使盲聾視聽等  
皆慈善根力故涅槃經中有聞讚佛為大福  
德怒云生經七日毋便命終豈謂大福德相  
讚者云年志俱盛而不卒暴打之不瞋罵之

不報是故我言大福德相怒者聞而心伏故  
慈為無盡福相然與前義相成六三達圓智  
了三世劫此就天王且言宿住耳七開悟等  
者此門闕偈上下文中屢有開悟即同法華  
開示悟入以開攝示以悟攝入謂開示約能  
化悟入約所化彼論云開者無上義謂除一  
切智智更無餘事即雙開菩提涅槃謂以知  
見之性為涅槃知見之相為菩提眾生本有  
障翳不現佛為開除則本智顯故示者同義  
三乘同法身故悟者不知義不知唯一實事

故今令知成報身菩提故入者令證不退轉地故即是因義爲證初地已上爲菩提涅槃因故廣如彼釋八稱性之光有何難逾九一切等者謂契理具修長劫無倦故衆魔外道所不能摧十善惡等殊苦樂等異皆知性相十一示現等者無邊品類一毛頓現更無來去尤顯難思偈中脫於第七唯有十偈初中初句總次句開示後二句顯如化力差別業者果不亡故二中初句所攀緣後二無得然緣境有二一真二妄真佛有緣亦成妄惑况

於妄耶種種觀者五求不得故謂佛有耶常見爲惑謂佛無耶邪見深厚四句百非所不能加故無所有非唯一佛十方亦然應化示現非真實故求實無得即見真身真即無緣佛尚應捨何況餘境三四可知五中初二句福德相次句無盡相相好者經云盡人中福不及一天乃至云盡世間福不及如來一相等六中約天之智普知約佛一毛能現七中初二句明毛孔過空謂靈智證理非如虛空真理超事故亦非比無限理智不可分析隨

其少分即融攝重重故一毛之量便越虛空  
次句別示越相謂毛孔不大而無涯即廣陜  
無礙故杜絕思議之境前即一光外展今即  
一毛內廣文綺互耳一毛本自遍空十方豈  
得難滿八中初句長時修次句無餘修次句  
無間修具此三修故進力難壞而言廣大波  
羅蜜者至第五經釋九中初句總顯業之性  
相即緣生果報之不亡便是無性之非有故不  
可有無思也次句佛如是說天如是知次句  
以法性示業性十中初二句小一現大多爲

一難思次句現時不來不現不去又難思也  
第三知足天長行十法中第一天得總相法  
門諸佛將興皆生彼天下生之時普應法界  
頓闡華嚴爲圓滿法二盡虛空等者光明色  
身皆遍空界了不可取故云清淨三以淨願  
力滅惑業苦四五可知六普化等者普即無  
偏常即無間示其真樂即如來藏七自覺智  
境佛已入之故示物同悟八以淨福堅菩提  
心九謂仰觀下化十即照現迅疾也偈中初  
偈前半即出世義上句體智俱遍下句悲用

皆普後半即圓滿教輪前句即實之權為妙  
 門後句會權入實為圓滿二中可知三中初  
 二句以行淨願次句雜染本空故前令滅佛  
 法本具故今令滿妄盡真顯二言相成四中  
 初二句依體普現若月入百川尋影之月月  
 體不分即體之用用彌法界體用交徹故不  
 思議次句稱根說法五中前半即所淨之衆  
 生具三雜染故於中上句標下句略示惑相  
 慢是根本憍逸隨惑憍謂染自盛事慢謂恃  
 已陵他放逸即是縱蕩憍為染法所依慢能

用六

三十一

長淪生死放逸衆惑之本故偏舉此三蕩者  
 動也謂境風鼓擊飄蕩馳散次句能淨法門  
 謂不取於相當體寂故六七及八文並可知  
 九中通顯上既親近必當敬養聞法以聞調  
 他為真供養列名中云星宿幢今故莊嚴與  
 長行互出十中前半所知衆生心上句標深  
 廣下句顯相念慮不住多於草故廣也深者  
 有三義一恒轉如流故不住二本體寂然故  
 不動三從緣妄起無別所依次句即一念悉  
 知第四時分天十法一善根若發憂惱自除

二以無限方便普證法身之境三悲摧感苦  
故名爲輪四以三達智知機授法五陀羅尼  
等者總持入理故名爲門以慧爲體故云光  
明若取助伴則兼念定念即明記故能憶持  
定乃心一常無忘失四無破等一切諸法皆  
是所持六可知七轉法等者轉法示菩提之  
道即是成熟衆生之方便八十眼圓見隨宜  
往調九超出等者超出業障使離惡因不隨  
魔作捨惡緣也十等雨法雨誘令進善使彼  
受行諒令斷惡得心清淨此就於天偈通一

切偈中亦十初偈通顯前半彰已已離後半  
開發能離善根二三四五文並可知六中初  
句即業性言廣大者一念造一切故無窮盡  
者未得對治無能止故有多門故次句善入  
智了自入開示令他入次句入門多種七八  
亦可知九中初句見佛爲緣次二見佛二益  
一正智生必內超業障二佛爲真道豈外逐  
魔緣既不隨魔安造魔業十魔並離故致諸  
言十亦可知第五三十三天衆長行有十一  
法初中承力故憶念念過去佛者曾入此天

故三世有二一亦念未來二過去自互相望  
亦有三世生大喜者境殊勝故慶自福故二  
能令等者然佛身無染淨大小亦無勝劣猶  
若虛空雲屯即闇日朗即明色昏即劣物隔  
言小今妄雲盡而智光照故清淨性空現故  
廣大妙色顯故無比皆解脫力故曰能令三  
大慈不揀怨親若雲無心而普覆四恒見等  
者人天世主多恃威德故佛現超之令其敬  
喜五知其因果差別使物勤修因果並得名  
福六開示等者示佛調生令菩薩做習七初

成後壞住時轉變乃至毛孔細剎皆悉知之  
言轉變者福人出世則琳琅現矣薄福者出  
則荆棘生焉八憶念等者佛毛現因調行天  
憶則能思齊九一切諸樂以佛為因具勝德  
故就樂增勝說諸天耳十開示等者受生善  
根即念佛力開示令不迷惑則去放逸而進  
修十一疑自疑他疑理疑事有種種如聞  
空疑斷聞有疑常聞雙是則疑其兩分聞雙  
非疑無所據又聞空疑有聞有疑空等互相  
疑也今開之使悟偈中亦有十一初中云平

用六

二十三

等者化儀同故又但以世俗文字數故說有三世非謂如來有去來今二中初句廣大次句無比次句清淨然古德明通有六義一廣謂總法界爲身故二遍全遍一塵至十方故三妙色即無色無色之色故四勝無有比故五益利物無涯故六用光破闇故三中前半即慈雲上句果大下句因深一切佛法依慈悲慈悲又依方便立俱稱深廣故致海言次句即普覆也次後六偈文並可知十中初二句即前善根少功德者以少況多彰因爲勝

次句即人天受生故離三惡怖十一中初句即能開之法是寂滅智通次二句由普應故疑皆斷也第六日天長行十一法旣爲日天多辯光益初一名及法門皆是總也謂佛身智光猶如彼日無私而照是曰淨光此光體也次辯光用略有四義一約心高下齊明故名普照二約處則窮十方界三約時盡於未來四約功用常無間斷如斯利益即大智之功二以一切等者衆生本有佛智如海潛流今佛以隨彼彼類身設種種方便務在開悟

令其證入三衆生愛染漂泊無依佛德無礙  
應爲其主隨修絕染名淨功德一行契理即  
曰無邊況其具修耶四修一切等者以智導  
悲爲物受苦故深歡喜五謂體離障惑用而  
遂通故云無礙若身若智俱得稱光周而不  
偏故云普照身心明利是益精爽爽明也大  
集經云國王護法增長三種精氣一地精氣  
謂五穀豐熟二衆生精氣謂形貌端嚴無諸  
疾疫三善法精氣謂修施戒信等今文正在  
第三益其福智義兼前二法力遠資故六淨

光等者身智二光淨物身心信解深廣于何  
不喜七晝則勤心修善業故八大悲海等者  
謂無緣大悲坐於道樹出多奇寶故色相寶  
者應言寶色相圓明可貴故以寶爲體寶莊  
嚴故具十蓮華藏海故云種種一一色相用  
周法界名現無邊境如是皆從大悲海流悲  
海包納不揀賢愚故九慧除癡翳法眼則淨  
淨見法界法界即藏藏如前說十發生等者  
謂於佛所發生清淨心曾一供養能令其福  
續至菩提故如出現品食金剛喻况相續耶



十一使物居業莫越日光令人進德寧過法  
義偈中亦有十一初中前半淨光普照後半  
常為利益滅惡生善破愚為智等為多方便  
二三可知四中前半即一切苦行此有四難  
一背已利世難二行相唯苦難三處經諸有  
難四時劫無量難於此具行故云一切次句  
明深心歡喜亦有四義一為物苦行滿本願  
故義在初句二智照苦性本空寂故即光明  
照空三遍淨無染非雜毒故即遍淨如空四  
自他有果非無利故即第三句全五六可知

用六

三五

光網之義如賢首品七中通明舉劣顯勝以  
辯難思故能成辦諸妙功德言世不及者世  
雖多光益非究竟佛光雖少必徹真源不可  
盡故以一況諸八九與十文亦可知十一中  
初句即能照法門猶一日宮千光並照隨舉  
一法有無量門然有二義一約相類如一無  
常門有生老病死聚散合離得失成壞三災  
四相外器內身剎那一期生滅轉變染淨隱  
顯皆無常門餘亦如是二就性融不可盡也  
次二句普運照義一日周天則日日無盡一

門歷事則劫劫難窮方便多門終歸一極廣者無邊大者無上第七月天長行十法初名法亦總謂光有身智二殊法界亦事理兩別事即機之身心及所依刹身光照身令覺照利令淨智光照心破癡照理令顯身智二光相即則所照四法亦融以之稱普並除惑障俱得淨名二觀察等者悲心普觀授以多法令入無邊法界三衆生藏識皆名心海前七轉識名攀緣轉轉謂轉生亦流轉也緣境非一立種種名故經云藏識海常住境界風所

動種種諸識浪騰躍而轉生喻云洪波鼓溟壑無有斷絕期既知機殊隨應授法四與一切衆生等者謂示物聖樂令得初地此樂本有染而不染爲不思議五謂以菩提心爲家二利爲作業並以身口爲牛利智爲犁耕於

用六

三六

心地下聞熏種生信解芽起正行莖開諸覺華獲菩提果自利則以不放逸隨時守護利他則以能化大願守護不令魔惑禽獸侵犯從因至果得成就也六慈悲等者謂慈護現樂悲救其苦令見因果斷惡修善名真救護

七以佛智風持大悲月使明見正覺離苦清涼八開示等者一切法有二種一是所迷謂緣起不實故如幻緣成故無性二是能迷謂遍計無物故如空妄計故無相又緣起法有二義一無相如空則蕩盡無所有是相空也二無自性如幻則業果恒不失即性空也此二不二為一緣起是故兩喻共顯一法既不迷能所則悟真如成正智火九悲願為物現相好形是大業也十普斷等者毛光普演何疑不斷偈中亦十初二可知三中初句即心

海攀緣轉若以生滅八識即彼第八亦名為轉以恒轉故云念念殊恒故非斷轉故非常新新而生念念而滅念念殊故體恒不即彼如來藏功德常具義亦不離如彼瀑流離水無流離流無水又如海波濤有漂溺故多畜用六養故法合思之次句明了知謂此識深細唯二十七佛智知故次句示心海性即是佛智不令外求稱機故喜四中初二句明失聖樂聖安樂者即聖智涅槃本有今無故沉迷妄苦次句明與示其性有樂非苦外名不思議見性得

樂性即是門五中但是法說如來即田主也  
 悲佃物田為利入有是所作業為利同於求  
 果入有似於耕犁說法即是下種勸善正當  
 守護令熟可知六中前悲救護語其本心此  
 明智光彰其所用悲智相導能真救也七中  
 初句佛為福依月為涼本次句應言大風持  
 官而今云爾即是轉喻大地如佛宮室如福  
 次句即照現義亦清涼義八中可知九中初  
 句佛如虛空大業性也次句大業體也不利  
 衆生非大業故次句大業相依光有影可以

竟  
 知動靜依鏡有像可以辯妍媸然彼影像無  
 自性相如來相好當知亦爾十亦可知天衆

大方廣佛華嚴經疏卷第六

音釋

册六

六

妍媸妍倪堅切美也  
 媸媸克之切醜也  
 與於到切  
 蕩漾蕩徒浪切漾餘亮切  
 溟壑溟各切  
 卒暴卒暴切  
 也海也

大方廣佛華嚴經疏卷第七

用七

唐清涼山大華嚴寺沙門 澄觀撰

已下入第三經 自下第二有八段明八部四王衆初

四段皆初一是天義如前釋今初乾闥婆王長行十法初一即東方天王謂攝受折伏逆

用七

順多端善巧應機故名自在二普見等者謂令衆生見佛一切功德嚴佛一毛而為利益一一皆爾故云普見三以慈愍方便除憂則喜生憂苦既如海廣深喜樂亦難盡名藏然則世之憂喜生丁利害利害存乎情偽苦樂

存乎吉凶吉凶存乎愛惡愛惡盡則吉凶苦樂皆亡情偽息則利害憂喜永斷如此方為永斷憂苦喜樂生焉四永斷等者謂得決定智光則邪惑永斷五謂慈雲普蔭材與不材皆涼慧澤廣霑三草二木咸發六現廣等者現身益物也稱性普應故廣大具相清淨故妙好七佛出說法是大名稱佛法衆僧俱稱為寶令此遠聞義云普散八現一切等者身光普照塵不能染見者必歡智光悅機惑累不生又歡喜也故云大喜九法水遍滋菩提

實行行既樹立見者必歡無復二乘一切皆  
菩提樹也十善入等者一多無礙名為佛境  
天王智達故云善入偈中亦十前五可知六  
中初句現身次二句一切獲安樂也世間即  
一切也無盡樂總顯也謂佛現於世足履影  
覆若在人天現增快樂若在下苦七日之中  
身心安樂乃至終獲涅槃之樂故云無盡次  
句別示出世因果之樂先因後果先世後出世  
皆次第義又總取偈意佛身清淨是解脫因  
生無盡樂是解脫果世無盡樂又解脫因能

現淨身又解脫果又佛身清淨是樂見因樂  
見即為清淨身果衆生樂見是安樂因無盡  
安樂是樂見果無盡安樂是淨身因能現淨  
業是無盡果如是展轉因果名次第成七中  
初二句寶所濟機堅謂難壞密謂無隙閒無  
空處智不得生次句正散寶也八中結句應  
云普放寶光如是見而云妙音譯者之誤妙  
音屬前師子幢故九中初二句法水普滋次  
句道樹普榮也又方便多門是開權也入菩  
提行是顯實也種種方便但為一乘是普滋

也十中初二句佛境也次句安樂也佛力能現無所動者遮妄見也非促多劫就一刹那非展刹那受於多劫本相如故名無所動隨應度者佛力令見第二鳩槃荼王長行十法中初即南方天王謂內惑外讐皆名怨害安住忍力並能伏之二修習等者二利之行趣果曰門深廣難窮名無邊海三知其現欲如應化伏四普成就等者鈍識者現之以通利智者示之以法遍世多劫名普成就並如虛空故云清淨俱能照世即是光明三輪化生

是所作業五世間惑苦可畏不安菩提涅槃安隱無畏萬行為其因道則無畏滅果成矣六消竭等者愛欲漂流深廣如海智日赫照則妄竭真明七謂於諸趣普現身雲耀通明等之電光也八普放等者身智光明遣除二障九多劫修悲用七究竟滅苦為不退轉悲多方三便故復名藏為安衆生所以開示十普現等者稱性神通無來去而流轉偈中初偈通顯明佛已滅怨怨之大者莫越憍慢有之則卑陋滅之則端嚴次四偈可知六中初句欲海

欲為苦本云具衆苦次二句消竭既欲惡止當說善行七中初句普現身雲次句明等雷光故云種種次句兼明雷雨雷有二義一遠震二發生謂蟄蟲發動草木發萌圓音之雷可以思準餘三可知第三龍王衆準偈及梵本皆有十一長行脫第五但有十法初一即西方天王法門及第二如偈當釋三與偈文通有六義一諸趣是化處二淨音是化具三佛名是化法四神通是化本五衆生是化機六隨樂是化意四普現等者謂一毛普現無

邊依正以毛稱性能廣容故廣容即是普遍故能現之佛還自住於毛孔所現刹中能所無雜依正區分大小宛然名建立差別五靜法云準梵本有焰龍王得一切衆生瞋癡蓋纏如來慈愍令除滅解脫門謂大慈居懷則三毒俱滅六開示等者佛大慈悲是福德海二資糧滿然後得故衆生慈福即是百川佛毛示現以表同體既知同體自然朝宗因示悟入故得大喜樂七慈音智俱故云清淨淨無貪愛何畏何憂八示現等者謂於身中現身



土也九觀佛昔行深廣故愛樂歡喜海言通  
二謂歡喜供養十示現等者謂為衆演音故  
云示現音有四義一類多謂一切二普遍謂  
平等三稱根清雅故云悅意四一音隨類故  
云無礙無礙即方便也十一謂此無熱龍住  
清涼池出香美水流注四海導引百川時布  
慈雲降澍甘澤是故能滅諸世間苦偈有十  
一初中諸龍有四熱惱名熾然苦今並有治  
一金翅所食苦初句為治以觀佛法同三歸  
故二行欲時復本身苦三鱗甲細蟲苦並第

二句為治學佛等利故四熱砂著身苦後二  
句為治以不堪蟲癢熱砂中驅今大悲哀愍  
故能治之有說四苦無鱗甲細蟲而有風吹  
寶衣露身之苦亦以第二句治之就龍且說  
龍趣末句約佛通拔畏塗二中此就佛論示  
現前約龍云能轉又前一念時促今一毛處  
小二文影略餘九可知但第五偈即前所脫  
第四夜又王衆長行十法初一即北方天王  
得以無邊等者謂善者自樂不待加哀惡  
者必苦心則偏重巧救多門故云無邊又

此天能伏惡鬼令不犯衆生是救護也二普  
觀悲救救苦護善不滯空有故云方便三惡  
業障重名甚羸惡又羸無善力謂一闡提惡  
即弊惡謗方等者明示妙理是謂資益四傲  
佛歎佛得名聞果五悲智二照合爲一心與  
法身俱故恒觀察六妙音說法利益多端唯  
應度者聲暨能益七教廣理深一句能演即  
是普入八令物離邪則能住正爲守護矣然  
住正道者則不分別是邪是正云不思議九  
集福德因受快樂果由身智光得增長也十

念佛修因生十力果天未證極故云隨順偈  
中亦十文顯可知第五摩睺羅伽衆十法一  
普現威光名爲神通不動性淨示涅槃因故  
云方便依因集德必得無依涅槃二除惑契  
寂是清淨因清涼悅樂是涅槃果三善者善  
之不善者佛亦善之善不善覺亦亡乃入本  
淨四福非福相深不可著非福現福名自在  
相佛佛無二是平等相五無智黑因如燈開  
示怖畏苦果如幢爲歸六以知佛德同空齊  
已一性故歡喜也七見理決斷聞深不怖聞

淺不疑聞非深非淺意而有勇八風不傾爲  
勇猛力既以自正必能正他爲救護主八往  
修喜因故見念皆喜九見理智成則緣不動  
智爲行本諸度悉圓亦猶海納百川更不流  
矣十開生等理示佛等應破情不等令悟性  
等爲平等道十偈如次文顯可知第六緊那  
羅王十法一世喜樂業皆因佛生二聞深適  
神故法喜無上終得涅槃無盡安樂三佛德  
深廣信亦包含四音演真法令聞故妄憂除  
而意悅五達境唯心而本空則安立衆生於

覺悟六難遇益生所以示現相嚴常住名爲  
妙色七大智普慈是二嚴果一切智因是能  
生業八業細難窮自觀示物九神通益物無  
間稱恒十知機巧化謂攝心正智御心如境  
十頌次第文並可知第七迦樓羅王依賢首  
靜法皆云準頌長行脫第五執持王六一智無  
著故見無礙悲普觀故通悉調二遍坐覺樹  
名住法界現通說法名爲教化三進策諸度  
往修故成四境界如偈文難思則入方爲勇  
猛五諸本多脫遇一本有文云大海處攝持

力迦樓羅王得能竭衆生煩惱海解脫門多是古疏本脫今依有本然偈約能竭說佛福智六衆生無邊故成就智多七城有三義一防外敵二養人衆三開門引攝今言法城通教理行果行契理教則無不俱嚴故各有三義謂了心城之性空則衆惑不入見恒沙性德則萬行爰增道無不通則自他引攝便能契果絕百非以成解脫養衆德以全法身開般若而無不通矣方顯教城無非養所詮旨句句通神有斯多義故偈云廣大巨窮重重

四門故無數量究竟能闡唯我世尊八法身無相故不可壞體即真如凡聖平等無分別智安住證會名成就力九現同類形方便調伏十衆生歿生皆由行業佛生死智方能普入頌文如次配釋可知但第五偈或有前脫用七故略釋之初二句甚深廣大次句福智相嚴七行通因果因深果遠已不思議復有一行是如來行所謂大乘大般涅槃則行爲果果皆絕言道佛行如出現品第八阿脩羅王十法一脩羅尊勝等須彌之高如來威光蔽十方

大衆衆生各見真勝主也二彼能以一絲作種種事今一剎那現於多劫調生等事三以多法門入佛境界則苦滅心淨種種法門亦如幻也下云苦末羅即巧幻梵音四多劫多苦爲物非已如尸毗救鴿薩埵投崖已是文夫最勝嚴飾況終剋寂智萬德以嚴翻顯無利勤苦誠爲可醜旣爲物而行故有大眷屬五以大幻通力動刹悟機不怖衆生斯爲大力大力婆稚華梵異耳六開種種權門安衆生於一極之樂權爲入大之本故皆佛智因

權實不迷斯爲遍照七萬善順理普不可壞斯解脫處何染不亡功歸正覺故偈云佛力如是修者堅固妙嚴八悲用智故普令無疑主斯事者廣大因慧九供事修善有勝德故十普入諸趣明處無不遍偈云三世時無不均同有佛性名爲決定具上三義平等行焉不宣實義非善音也此上一段及後夜神皆結歸名上下例然恐繁不釋頌文如次可知自下第三諸神衆有十九衆今初主晝神十法一智了物心如空入色光照身器如日合

空身遍器中如像在鏡世間主力能攝此身  
此身之性等世間故皆入觀機故名普入所  
入之處即為宮殿二義圓稱機故滿心成益  
三身法二光皆可愛樂四法雨潤種已含實  
者解開善未芽者信發五無法不悟名普明  
力曠劫修集成智莊嚴六方便開示世樂亦  
苦令其悟入見理法樂如歡喜地也七如來  
身雲就體則非有無約機則差別遍於十方  
不可謂之無約佛則稱真法界不可謂之有  
此則隨緣非有之法身恒不異事而顯現以

化寂滅非無之衆生恒不異真而成立即無  
差別之差別也八處危者護之令安有苦者  
救之令樂九衆生闇於多欲故沉淪長夜以  
法開曉喜足為先喜足智俱是功德力能令  
離苦得安樂故十有覺德行故名稱普聞既  
福廣名高故不虛其益偈文可知第二王夜  
神十法初七夜神是善財十地善友見解深  
廣彌顯衆海法門難思一普德淨光即善財  
離垢地善友彼名全同法門名寂靜禪定樂  
普游步普游步言即大勇健也寂靜禪定樂

即是定體現法樂住故名爲樂大勇健者即  
是足用健則堪能勇則無畏謂見佛淨機游  
戲神通故名勇健亦游步也勇健廣大故稱  
普德無惑智俱可謂淨光二即發光地善友  
彼名喜目觀察衆生解脫名大勢力普喜幢  
謂此解脫德無不備化無不周名大勢力即  
今廣大身惑俱淨無不樂見故云普喜悲爲  
德相即幢義也觀察普喜名爲喜目三即焰  
慧地善友彼名普救衆生妙德護世精氣方  
是救生由護生故顯德之妙也法門全同次

第又當謂感必現前調令清淨故四即難勝  
地善友彼石寂靜音海法門名念念出生廣  
大喜莊嚴念念出生即積集義見佛利生故  
生大喜莊嚴二義一見佛修歡喜因嚴樂見  
果故二積集此喜神自莊嚴由定發音名寂  
靜音深廣如海五即現前地善友彼云守護  
一切城增長威力偈云尸利以梵音舍於二  
義一云吉祥二翻爲守故下譯跋陀室利以  
爲賢首又以首字音同義別彼爲頭首法界  
品中乃爲守護皆譯者方言少融耳若以義

會增長威力即是普現吉祥正當次第法門  
又同彼云甚深自在妙音解脫妙音故悅意  
悅則意淨即寂能演故名自在六即遠行地  
善友彼云開敷一切樹華一切開敷即普發  
也法門彼云菩薩出生廣大喜光明文少倒  
略耳舊經云菩薩無量歡喜知足光明知足  
滿足文相近也謂能知如來巧智示法大福  
威光故曰光明佛以福智滿足物心則含喜  
名藏七即不動地善友彼名大願精進力救  
護一切衆生法門名教化衆生令生善根教

化開悟文異義同令生成熟始終異耳謂現  
通示相皆為調化一切善根皆令生長平等  
護育即救護一切精進大願故能為之今文  
略耳八念念久修恒遍救護是無邊慈也此  
與善財歡喜地善友似同而文多異又非其  
次故但直釋九於三毒難壞衆生以大悲門  
現莊嚴身故石室留影毒龍革心沉現身耶  
十本為衆生故成自德令他樂滿偈中十偈  
如次初中初句解脫之力能觀次句即寂靜  
樂神以此定觀佛此體故下經云普見三世



佛而無取著以知如來無相性相本空故故  
云寂靜虛空相也次句即大勇健準下經則  
自他兼淨也次句定果也上約佛說若約天  
說即四句皆是定用以住此解脫能見佛體  
用因果故二三可知四中稱理遍喜為廣大  
無邊縱內心不搖而外現威怒更深難測五  
以寂故能遍六以衆生本來自盡故是寂滅  
是以智窮妄末理無不顯妄徹真源惑無不  
盡喜方滿足餘四可知第三主方神十法一  
現身說法令悟得果皆救護力二神通示相

是能成辦業衆生出苦是所成辦業三法光  
破闇闇斷智生智與法喜俱生斷以寂滅為  
樂四普現說法聞必惑滅故不唐勞五聖人  
無名隨物立名貴在生德及滅惑耳六七可  
知八業同性空並不失報俱無差異性相無  
礙為自在力說能感報令除惡業說業性空  
善業亦亡九前約說業性相令物絕業此約  
知業差別擬隨機化十世人靡不有初鮮克  
有終今聖人有志有能故所作究竟世人以  
人隨欲不能兼亡今有慈有愍故令物喜謂

十波羅蜜無不究竟四無量心令物歡喜頌  
中次第配釋可知第四主空神長行十法一  
智慧造理則十眼廣照日月合空則萬像歷  
然二身智二光遍入法界三佛身如空是無  
邊境無生無染為吉祥風四廣說聖道則離  
三障安住二空五上求下化名廣大行為安  
衆生如妙髻焉六沉生死之厄難悲智光以  
濟之七不礙福智相導是謂勝力八惑由智  
遣九妙音善說十不壞本處而稱周十方偈  
中十頌如次三中空有四義舍於五法一離

能取生即絕妄想二離所取相無相無名三  
境無自性即是如如四心無所得是為正智  
迷如以成名相妄想是生悟名相之本如執  
翻成智如外無智智體即如此二猶空寂照  
無礙如斯見佛是曰吉祥四中長行及列並  
名安住今云圓光圓光表智安住表定二事  
相資前後互舉並能滅障於理無違六中生  
死海者瑜伽七十云五法相似生死得大海  
名一處無邊相似故二甚深故三難度故四  
不可飲故五大寶所依故釋曰由前四義衆

生流轉由第五義菩薩入之且約分喻第九  
十云由三相故不同水海一自性不同分謂  
水海唯色一分二淪沒不同唯人畜故唯沒  
身故三超度不同未離欲者亦能度故生死  
海反上可思餘七偈可知第五主風神十法  
用七  
一以方便風合智日光智入深法而無障礙  
身入世間而無影像二菩薩以求菩提之大  
心持稱真之供具等虛空之廣大不礙事之  
繁多而以全法之身一念供無邊之佛如彼  
風力無不成也三長風忽來浮雲散滅慈風

忽起惑苦病亡四福智莊嚴之風摧壞如山  
之障五十力降魔十軍皆殄獨名竭水者欲  
愛為初故六毛孔慈音滅除五怖若百竅異  
吹遍吼悅機七智入實相故妙辯如海如風  
擊樹故能下垂八調生方便為智所入故名  
為藏九禪定宮殿必定慧雙游故能滅癡闇  
約佛則動寂無二見必滅癡十日月明照非  
風不運智行無礙方便力焉十偈可知已下  
經四第六主火神長行十法有云準梵本此脫  
第四一以進力現世除物無明以最初故徧

從火義二惑有二義一漂二惱善巧迴轉則能息之三稱性之福相惑不動與大悲合自利不動俱能攝德無盡名藏四有云準梵本神名勝上縈光普照法門名普能除煩惱塵謂劫海行滿故今能現通滅惑偈云衆妙官神同前列名衆妙用七即勝上義耳然諸本多無十三或有本則具云衆妙宮殿主火神得大慈悲廣蔭衆生解脫門恐是傳寫脫漏耳五光明照耀等者日光合空等空無際智符實相稱實無邊雖曠劫修成全同本有窮靈極數妙

盡難思實為惑本即是正因智照心源即是了因如空與日今略申十義以辯難思一謂日與空非即非離二非住非不住三而日善作破闇良緣顯空之要四雖復滅闇顯空空無損益五理實無損事以推之闇蔽永除性乃無增空界所含萬像皆現六而此虛空性雖清淨若無日光則有闇起七非以虛空空故自能除闇闇若除者必假日光八日若無空無光無照空若無日闇不自除九然此闇性無來無去日之體相亦不生不滅十但有

日照空則乾坤洞曉以智慧日照心性空亦  
有十義準喻思之非唯釋此文亦乃遠通衆  
經該羅前後六體寂發照名寂靜光以斯成  
福莊嚴身相七八可知九分別法相求離不  
了愚癡悟法實性便無執著之見十以行扶  
願故能現世作師子吼頌加第四餘並可知  
第七主水神長行十法一無緣大慈是日平  
等二無邊行法莊嚴自他三寂然不動以觀  
機感而遂通以隨攝若冬則積雪凝白夏則  
無處不流四妙音演佛深旨令悟妙法旋復

五身智二光遍覺開化大充法界清淨無垢  
六清淨法界性相俱絕德無不見則大用不  
亡七衆生不窮故大悲無盡滿而不溢有知  
足義焉流止從緣斯為自在八處處見佛故  
大喜無窮喜從佛生即佛名藏若聆泉流之  
響無不悅也用七九性相無礙之福故能普現神  
通若空色相映之流威光蕩漾十調生行廣  
如空無邊用靡暫停如空無盡偈中第一偈  
前半辯一相因果次句例餘後句辯益初言  
清淨者離過無緣故門如塵數者隨宜利樂

故以慈為因得妙相果以相為因得無狀果  
然如來相有純有雜此就純門若以雜門則  
隨一相一毛皆收如來法界行盡亦相相皆  
爾純雜無礙因果相融圓成非分成故佛一  
相一毛即同法界無有分量今此神從一慈  
門入無盡相耳此約十身之相若三十二相  
之因但說一相一因如智度瑜伽等論涅槃  
大集等經至相海品當引第五偈初言無盡  
以顯光常次充法界以辯光遍不思議者以  
顯光深非色現色非青黃而青黃故其第三

句是顯光用餘九可知第八主海神十法頌  
脫第三一為物供佛是等施福得衆寶相以  
莊嚴身二巧隨根欲說法護善使其長成三  
謂演深廣法體煩惱空梵本偈云一切世間  
衆導師法雲大雨不可測消竭無窮諸苦海  
此離垢塵入法門居七若準此文乃竭苦海四若  
見佛境則惑亡苦息準現經文三是煩惱四  
是於苦若依梵本前苦後惑既譯人脫漏致  
使文義參差故古德云脫第四頌結名既同  
故知脫第三恒住波浪者即是普用水為宮

殿五以智滅癡六爲行所遷一切皆苦菩提  
因起則生滅苦亡便得涅槃寂滅安樂七將  
智滅癡未免於見了癡見性癡見自亡真妄  
等觀是佛境也八一切衆生有佛種性圓明  
可貴具德稱寶佛眼普觀佛智普示正因令  
顯如出金藏大心若起如種生芽故云出生  
緣了二因爲能悟之妙道九了如不取則心  
不搖動湛如停海萬德攸歸故須彌可傾魔  
豈能燒一念降魔如本行集十八法界定如  
法界遍偈可知第九主河神十法一行成兩

法若霈然洪靈滅惑生德若懸河迅流無所  
滯礙二現身息惱若泉澗洗心三真實滌垢  
慈智相資若碧沼澄潭空色交映故名離塵  
淨眼四圓音遍蓋若崩浪發響五拯救漂溺  
六善根無惑可謂清涼若阿耨達池永無熱  
惱七施門無量令彼無慳若蘊藻菱蓮昔令  
物喜八行福契實故見無不欣若深湖廣陂  
是爲廣德九方便慧力雜染皆淨慈彼怨害  
瞋反成歡若萬頃波澄光暎天下十總收萬  
善令會涅槃若彼百川咸會大海會海由智

名海德光明偈亦可知第十主稼神十法一  
功德智慧二種法味資成佛身二喜樂由於  
苦除三衆生爲所淨之境四悲深故通廣五  
下種佛田必至果無壞六智敷物信獲果稱  
華七慈眼視物故福聚無量慈則恬和怡悅  
偈云勝道八以行成佛故始成即宣九懈於  
修習憂惱是生勤策諸根衆惡清淨十隨根  
爲說遂求故喜偈文可知第十一主藥神十  
法十頌一順情則易攝逆意則難調故普觀  
之二三可知四始學者以名爲實賓大士以

名爲佛事五以慈善根力放月愛等光身心  
兩病纔念便滅六迷理迷報二愚盲冥起惑  
造業備受衆苦佛以正法金錚開其智眼令  
明見三諦故云清淨七八可知九無愛見之  
大悲生物德故名藏十世醫療治雖瘥還生  
永滅生德無先念佛因病因光皆是方便謂  
佛有無邊相相有無邊好好放無邊光光攝  
無邊衆言隨念者佛德齊均隨緣隨樂趣稱  
一佛三昧易成敬一心濃餘盡然矣況心凝  
覺路間蹈大方頌可知第十二主林神十法



十頌一佛德無邊皆依智海舍德流光所以  
名藏二等衆生悲是爲廣大一一離障名普  
清淨三一切勝因皆爲佛道各各心淨則種  
種芽生四一切功德莊嚴一毛一一皆然故  
佛爲德聚良以佛果攬因皆圓成非分十七成是  
故一因生一切果一果收一切因皆圓融無  
礙耳五智通萬法是曰普門客塵不生故曰  
清淨悟如日照頓周法界功如拂鏡說智漸  
明明是本明漸爲圓漸六知遍趣行如應布  
法七了音聲性皆同佛音故無不可意能令

世間皆聞佛音方云清淨八昔行稱周法界  
是廣大境神通普令物見做而行之如下喜  
目即其事也九衆生諂佞自不修德寧有進  
賢之心今福智益他則物我兼利偈云諛諛  
即諂佞也十敬念則佛興佛興則莊嚴德藏  
障重者不念不見於佛豈無常哉故應見常  
見也第十三主山神十法一寂而常照故光  
無不闡二相光熟機皆慈善根力如涅槃廣  
明三修因嚴根本爲順物故矚蓮目而欣樂  
觀月面而歡心或見諸根一一皆周法界喜

益深矣四如空不染故長劫無息五癡故長眠唯福智之能覺次三可知九若睡若寤皆令聞法進行斯為佛業如大瓔珞經說過去有佛凡欲說法令大眾眠夢中說法令增善根覺得道果涅槃亦云其人夢中見羅刹像等亦表萬法皆夢大夢之夜必有大覺之明十稱性法門無邊大義一音能演是出現也第十四主地神十法一念念無間平等普觀修慈護法故得金剛之體金剛即內照之實也二一毛福力頓現眾福三證入無生不礙

嚴刹四一向為他五觀機出現名為遊戲六現淨感身方調物惑七內具德海現威力身如地舍海潤發生百穀百穀苗稼皆地香毛故八長行一言盡攝無餘偈頌則一言普遍無極九焰雲普遍令物離垢為性十法能攝持心行如金剛之輪佛則不動現世若須彌出海此下頌中亦有二句結法屬人可以意得第十五主城神十法有云脫第九法十頌具足一光等方便成熟利益二應病與藥令得服行三護法法存則物受福德教理行果

用七

十八

皆有護也四悲救無盡名藏五了佛大智六方便現身七同修佛德八迷真俗理故云愚闇佛出開示令其悟入本迷無始猶若生盲雖聞譬喻竟不識乳唯佛出世方能曉之九準梵本云香幢莊嚴髻主城神得破一切煩惱臭氣出生一切智性香氣解脫門謂正使為臭物殘習為臭氣智性為香體利物為香氣香氣若高山之出雲稱智性而無盡臭氣若香風之卷霧等性空之無邊煩惱則塵習雙亡智慧則自他兼利有本亦具云香髻莊

嚴主城神得開發衆生清淨妙智解脫門亦恐傳寫之脫漏耳義不異前偈云現夢中者夢是神遊亦見聞之氣分也夢中尚調況於覺悟如迦旃延為弟子現夢境界等十二障五蓋重疊如山非智光明莫之能破第十六道場神十一法十一偈一出現字十九兩用謂有佛出現即出現莊嚴具而為供養佛昔如是神以大願做之二對物成行令物做之施為行先故偈偏舉三夢覺皆化則時處俱遍四外寶內眼重重難捨為物說行故云能雨五

清淨焰形神前列中無謂色相道場俱妙莊嚴並爲熟物六疑境界者以唯心爲正念疑法性者以無得爲正念實則無正無邪方稱曰正無念不念是真念矣諸念不生正念方生耳故隨根兩法斷疑生智七辯才兩法稱根故喜八深廣讚佛故名實雙美九樹王眷屬並如經初十即前身遍十方而無來往智入諸相了法空寂也十一種種力者佛有無量力故因行亦然皆嚴具顯示既是道場之神故得道場事中解脫第十七足行神十法

初二可知三內則念念安於理事外則處處建立道場四舉足下足海印發輝諸有威儀無非佛事五以華以光兩寶兩法六衆生無邊是佛化境見佛聞法故生歡喜七圓音警物等梅檀之香風暫一熏修覺身心之調順餘三可知第十八身衆神十法一淨喜境界神者初列處名華鬘莊嚴或是名廣略舉其半或梵音相類譯者之誤未勘梵本法門初三可知四相即無相故如空遍住空非獨虛亦遍於色住非分住一塵亦周如芥子空即

不可盡身與法性不可分故五威儀施化無  
心頓現斯即佛境難以言思六佛為良田出  
世難遇一興微供果獲五常略言色力亦有  
常命安樂辯才此五皆常方云滿足受報無  
盡故悉離貧窮七齒光除垢表所說淨故八  
有染於五塵無慈於六趣者愚癡魔業也體  
五欲性虛已兼亡彼業斯轉而名云守護攝  
持者善守根門攝散持德則遠魔矣然魔事  
惑不出三毒及慢魔惱衆生不出三事謂上  
妙五欲及諸苦具為說邪法則三毒是生三

用七

二十

毒內著即為魔業今守護覺察魔如之何即  
偈中解脫道也九有三意一身雖周於法界  
多示為王攝御自在故二八相處於王宮俯  
接物故三法界菩提樹下法王宮故十迷於  
本空故有妄苦無漏本有是淨善根第十九  
金剛神長行十法一見如來身普現非別豈  
唯凡現之處即無邊相亦隨一一色相皆無  
有邊次四可知但第五神初卷中名諸根美  
妙今但云妙譬文義俱闕又加天主以現為  
世主故六法海深奧繁節差別巧說今現無

有遺餘七約神且說寶飾為嚴巧攝已衆約  
 佛方便相好為嚴無不攝也八因深故大福  
 為能嚴果勝故德相皆明足九惡謂十惡險  
 者惡之因也能陷自他及險道故十若以現  
 文則摩尼髻是所雨若以義取此神名摩尼  
 髻亦得髻是能雨一切菩薩嚴具是所雨表  
 菩薩智光圓滿故偈中第六云漩澗者水之  
 漩流洄澗之處一甚深故二迴轉故三難渡  
 故法海漩澗亦然一唯佛能究故二真妄相  
 循難窮初後故三聞空謂空則沉於漩澗聞

有謂有等皆類此知故云一切差別義也餘  
 並可知上來異生衆竟第五下入自下第二同  
 生衆文分為三初明普賢菩薩得一切法門  
 次十普菩薩各得一門後十異名菩薩各  
 一法門此三各有長行及頌就初普賢長行  
 中二初總標所入二別顯十門今初二句先  
 指陳法體次辯法功能今初言不思議者謂  
 數過圖度理絕言思故言方便海者謂不動  
 真而成事巧以因門契果故云方便後入如  
 來下辯法功能謂證入因圓趣入果海故然

前後但明以別入總故各得一解脫門猶如百川一一入海今明以總入總如海入海故得難思解脫門復稱能入為方便海以普賢是同異二衆之上首故二所謂下別顯十門以彰無盡一嚴土調生調隨所化衆生取佛土故一切佛土者豎通四土橫該法界橫豎相融故一塵一刹皆廣大嚴淨故云一切演最妙法故令所調究竟出離二佛遍塵道詣彼修德乃了彼境三通辯安立菩薩六種功德一位二願餘四在偈四身普應機演所證

法五國土不同所敬各異故隨宜立稱成益不空如名號品六塵中現身說菩薩行境七以時隨法融令三世劫及劫中成壞一念中現無所障礙然事通能所能成壞事謂火水及風所成壞事天地萬像八菩薩根海雖繁用七廣多類但能入自所知境界廿三豈能測量佛無邊法則顯前來衆海未測佛德普賢能知此理九明如來身體同虛空用周法界第十攝因成果故云一切菩薩行入一切智也妙音宣此故云顯示此亦別釋標中第二句頌中

次第如前十門第一偈前半嚴淨佛國後半  
調伏衆生兼顯人法為嚴之義佛子有三一  
者外子謂諸凡夫未能紹繼佛家事故二者  
庶子謂諸二乘不從如來大法生故三者真  
子謂大菩薩從大法喜正所生故此言清淨  
意顯第三最妙法者揀非權小昔以妙法淨  
所化心故所感土亦有清淨佛子來生其國  
還雨妙法二中前半明總遍別中後半明體  
用無礙亦是總遍總中三中四句即前四義  
一修十勝行二起十方便三所證十如四正

證法界成薩婆若地位為總餘五為別四中  
前半普現身後半演所證次四偈可知九中  
初句智身次句智身等法身後二句化用等  
法身之周遍略舉正覺實通一切故上云種  
種十中三句攝因後句成果第二十普菩薩  
各得一門第一菩薩前列名中無以前與普  
賢共為十普今普賢別說故加為十以表圓  
足然偈文具十長行中第七菩薩及法門俱  
脫又脫第八菩薩法門及第九菩薩名至文  
當知十中第一嚴處說法皆名為嚴二塵塵

用七

廿三



皆成正覺已為無盡方是正覺一門有如是等無量成正覺門如出現品辯隨所成正覺門調生亦爾故云成熟不思議衆生界三修行福海嚴出刹海四以深妙智觀難思境故多處不迷多劫不馱五如一逝多林會頓現一切淨土會會皆爾念念現殊六法界舍攝無盡故名為藏觀佛法界之身一毛即無分限七梵本中名普覺悅意聲菩薩得親近承事一切佛供養藏解脫門謂佛昔行因無佛不供今成佛果無衆不歸猶如百川馳流趣

海八準梵本應云普清淨無盡福威光菩薩得出生一切神變廣大加持解脫門謂遍刹充塵劫窮來際皆佛加持之力九梵本中即普寶髻華幢菩薩得普入一切世間行出生菩薩無邊行門解脫門即今經中威光菩薩法門是由脫第八法門及第九菩薩之名遂令第九法門繫於第八之下譯者之謬也謂若無大悲不入生死則不能出菩薩行門如不入海安能得寶此即化他成己十即依體起用頌文前已配釋欲表菩薩法門互入故

不結法屬人後段亦然第三十異名菩薩亦各一法長行中一得成菩薩四種方便一地位二度行三調生即行位所作四嚴刹通二利因果也或一地一度滿或地地諸度滿此一為總下九皆別然不出上四多顯調生謂二遍轉法輪三普示滅惑四普嚴場會五以法隨機六為物永存七法印悟物八頓顯終始九同佛往修十光顯如來難思之境以偈對釋文並可知唯第六偈略須開示初句所證性淨法身言無相者示真如相身即體義

在纏不染出障非淨凡聖必同故云平等次句出纏法身也真如出煩惱障故云離垢出所知障故云光明又塵習雙亡故云離垢真智圓滿故曰光明淨法身者揀於在纏後半體用無礙身由出纏故應用無方約理即是體用無礙約用則止觀雙運故得果則寂照為身即用之體故寂即體之用故智體用既無不在佛身何有量耶故能普應十方此句正顯化用故經云水銀和真金能塗諸色像智慧與法身處處應現往即斯義也



永樂北藏

大方廣佛華嚴經疏

第一六九册

大方廣佛華嚴經疏卷第八

用八

唐清涼山大華嚴寺沙門 澄觀撰

自下第八明座內衆流分於中長分十段一  
明出處二顯衆類三列衆名四結衆數五興  
雲供六供衆海七敬繞佛八坐本方九歎德  
能十申偈讚今初座即是總寶等為別如是  
已下結廣從略非獨輪等故云一切所以此  
能出者良以座該法界依正混融一一纖塵  
無不廣容普遍座所遍刹恒在座中故從中  
出非是化也若約法空之因及法空之座則

萬行為嚴能生菩薩二二下顯衆類皆菩薩  
故三其名下列衆名出處既多名亦多種略  
舉上首十名耳即如次十方四如是等下結  
衆數嚴具非一故有衆多刹塵五此諸菩薩  
下與供雲六彼諸下供衆海衆多菩薩各興  
刹塵供雲已重疊難思況相續不絕而諸供  
具皆稱雲者乃有多義謂色相顯然智攬無  
性從法性空無生法起能現所現迥無所依  
應用而來故來無所從用謝而去故去無所  
至而能含慈潤霑法雨益萬物重重無礙有

雲像焉上下諸文雲義皆爾七現是雲已下  
明敬繞佛順向殷重瞻望不足乃至百千八  
隨其下坐本方參而不雜也如師子子亦師  
子故菩薩座亦名師子自化自坐者自心智  
現還自安處故諸佛菩薩坐多跏趺者為物  
軌故智論引偈云若結跏趺坐身安入三昧  
等九是諸菩薩下歎其德能有十二句初  
總餘別別顯一一各是一種清淨廣大略東  
為三初三明三業清淨廣大一智證普法二  
身隨佛行三語入辯海中一義求亦通三業

次三明得法清淨廣大一獲自分解脫二住  
勝進果位三遍具諸持普門地言即同經初  
已踐如來普光明地後五福智清淨廣大初  
二正明後三重顯今初中一智安理事故云  
善住二福無不修故生信喜然三世平等經  
初已明今更略示謂依生及佛善住平等且  
依佛說佛佛平等法身智身無增減故若依  
衆生生生平等煩惱業苦有支皆等若生佛  
相望者凡夫現在等佛過去進修得果等佛  
現在成佛究竟等佛常住此約三世互望煩

惱佛則本有今無衆生則本無今有菩提則衆生本有今無諸佛則本無今有約迷悟異則說本今涅槃之性非三世攝故知三世有法無有是處若以性淨而說則佛與衆生現今平等而不妨迷悟之殊是故三衆亦有差別亦無差別衆生寂滅即是法身法身隨緣即是衆生故寂滅非無之衆生恒不異真而成立隨緣非有之法身恒不異事而顯現是故染淨三世一切諸法無不平等況稱性互收如是解者名爲善住一切智也如也能上

終歸於地萬法依於佛智究竟還至一切智也後三重顯中一淨前福障故令諸福無邊清淨二成上智慧由觀法界虛空三近勝緣故成前二十爾時下說偈讚佛中十菩薩各別說偈即爲十段就初海慧頌中歎佛身座用八初五歎佛身具德一讚智慧二讚功德三神三通四因深五果勝後五歎所坐嚴麗此衆既從座現故多歎座文並可知第二雷音菩薩十頌歎座及地文分三別初四直歎座可知次三歎於場地即轉顯座嚴於中初一總顯

因深德廣故嚴事難思金剛下別顯末後一  
句結瑩寶座後三偈歎地上之嚴於中前二  
地神興供嚴後一佛力展轉嚴第三衆寶光  
髻菩薩讚中獨讚場地殊異德十頌分二前  
五德用圓備後五法化流通言如佛座上所  
應演者九會五周之文一化隨宜之說已具  
演於場地之中第四大智日頌歎佛所處宮  
殿十頌分二初一總明次段讚處彰人故此  
偈標人顯處凝者嚴整之貌睟者視也謂肅  
然而視後九別明於中二前四明宮殿體攝

衆德即廣其前半後五明妙用自在即廣其  
後半今初初一宮殿雖耀佛坐增明即廣前  
炳然照耀宮殿中也次二頌略辯七嚴結以  
智海廣上凝睟處法堂也謂內持寶柱簷垂  
金鈴外列門階上羅華帳寶樹交暎寶瓔周  
垂為七嚴也闔小門也洞達也如雲布者重  
重無量次次相承也上云凝睟則目視不瞬  
特由內無識浪故云智海湛然次一頌羅以  
寶網列以香幢布以焰明覆以嚴具結云超  
世即廣上世尊處法堂也光如雲布者若彩



雲向日上下齊明也後五中一羅身雲以調  
生正顯前文現十方土二寶樹現三世之嚴  
三略舉多嚴四即上諸嚴卷攝多嚴重重佛  
坐五結歎無盡主伴雲會第五不思議菩薩  
通讚場樹自在德十頌分二初一總顯謂宿  
因願力深廣難思神通現緣生果嚴淨後九  
別顯分三初五歎樹具德嚴場於中初二身  
幹森聳次二枝葉蔭映後一華果芬輝二有  
一偈歎場地蓮網謂蓮華布地則下轉光輪  
寶網羅空則雲間響發三有三偈歎樹自在

初一收入後二出生第六百目菩薩頌中雙  
歎場樹備德自在法化宣流前九偈各一門  
後一結嚴周遍並顯可知第七金焰頌歎佛  
十力功德一頌一力下諸經文屢明十力是  
佛不共之德佛佛等有菩薩緣此發心梵行  
品云復應修習一一力中有無量義悉應諮  
問故不可不知然大般若五十三顯揚第四  
對法第十四廣辯今略以七門分別一立意  
二釋名三自性四作業五次第六差別七釋  
文然了其名則知作業對文料揀差別易見

故將作業差別并釋別名並於釋文中顯今  
初立意者智論意云顯佛大人有真實力令  
外道心伏二乘希向菩薩傲之能成辦大事  
終獲其果故須辯之如來唯一諸法實相智  
力此力有十種用故說為十謂於十境皆委  
悉正知故由時品類相續分別有無量力度  
人因緣故但說十足辦其事謂以初力知可  
度不可度次業力知有障無障以定力知味  
著不味著以根力知智多少以欲力知所樂  
以性力知深心所趣以至處力籌量衆生解

脫門以宿命力分別先所從來以生死力分  
別生處好醜以漏盡力知衆生得涅槃佛以  
此十度生審諦故但說十第二釋名初總後  
別今初總名力者能摧怨敵義不可屈伏義  
故說名力瑜伽云與一切種饒益一切有情  
功能具相應故畢竟勝伏一切魔怨大威力  
故說名為力對法云善除衆魔善記問論故  
十名力十者是數帶數釋也別名至文當釋  
三自性者瑜伽五十七云佛具知根慧根為  
體對法論云若定若慧及彼相應諸心心所

爲性菩薩地總以五根爲性統其文義應具  
六種一最勝體故決擇分中慧根爲性二引  
生體對法兼定三剋實體菩薩地云五根爲  
性由慧勝故且說十力慧爲自性所以但言  
處非處等智力不言信進等力四相應體對  
法兼取相應心法四蘊爲性五眷屬體五蘊  
爲體定共道共無漏色等助爲體故此雖無  
文理必應爾遮犯戒垢助摧怨故六依此經  
融一切法以爲其性無礙法界理應爾故四  
作業者即是辯相至文當顯五次第者諸文

或有前却各有所由此文所列次第與十主  
全同淨行品則界在解前梵行品禪定解脫  
當其第三宿命居天眼之後餘同此次瑜伽  
四十九及智論二十七亦禪居第三餘同此  
次且依論明次第者智論云初力爲總餘九  
爲別於初力中分別有九故初一力通知萬  
法下九展轉開之謂初令知因緣果報故起  
業力次業煩惱故縛淨禪定解脫故解令去  
縛就解次根有利鈍者爲有造業利者爲  
不生故集業由善惡二欲成上下根此二種

欲由二種性以有種種性因緣故行二種道  
謂善道惡道次知其過去審彼未來次以方  
便壞其因緣果報相續故說漏盡瑜伽有多  
門次第廣如第五十說上來依論次第而今  
禪居第七者二論梵行為對自業有離欲不  
離欲故禪居第三此經十住為對遍趣行有  
清淨不清淨故居第七若習欲成性即界居  
欲後若由性起欲則界居欲前若執常者先  
說宿住若為執斷先辯其天眼餘無別理故  
經論皆定六差別者謂此十力展轉相望亦

有差別亦無差別至文當明七釋文然此經  
宗異義皆融攝故一一力中具攝十力乃至  
包盡法界是以宿命乃云智包三世天眼則  
見盡法界非唯見盡佛眼如空即是法界非  
唯智包亦能毛孔頓現業力即觀法性豈唯  
但是有為約門有殊故他宗不壞第一偈即  
處非處智力謂善因樂果斯有是處善因苦  
果無有是處惡因苦果等例上可知處者建  
立義依義起義能建立果與果為依能起果  
法故立處名於此正知故名智力其作業者

即如實知因之與果及能降伏無因惡因種種諍論既遍知已可度者度不可度者爲作因緣文中上半往因下半顯智力於諸境界正解明了即辯此力通知一切法也第二偈即過未現在業報智力瑜伽名自業智力今言一切業者謂於三世中善等三業及順現等皆名自業於自所作受用果業如實知故與初何別若正了知所造善等業感受等果此由初力若了能造善惡等業感受等果是自業力文中上半往因下半現果第三偈即根

勝劣智力謂信等五根此較中上名爲勝劣於此正知及能於彼如應如宜爲說正法即是作業偈中三句往因一句今果四即種種解智力亦名勝解謂若從他起信以爲其先或觀諸法以爲其先成較中上愛樂名種種勝解亦名爲欲欲謂信喜好樂如或貪財利或好名聞好定好慧種種不同如來正知令捨不淨增長於淨此與前根何異根約宿成智有多少解約現起好樂不同論云若照諸根爲先彼彼法中種種意樂是根智力若正

分別意樂差別是解智力在文可見五即種  
種界智力界即性也謂或一二三四五乘性  
等或貪瞋癡等分行等乃至八萬四千行名  
種種性性即種子解即現行故智論云性名  
積集相又九十云性內欲外用性作業必受  
果報欲或不爾用入瑜伽云若照勝解所起相似  
種子此由解力若照即彼種子差別由界智  
力若習欲成性復云何別欲唯大地一數性  
通諸數即寬隘不同也智論云習欲成性性  
名深心事欲名隨緣起若性即種子與根何

異根唯信等優劣性通善惡不同以信等望  
果寬長能生人天三乘聖道為道之根三善  
根但是翻對不望果義尚不名根況性通於  
惡豈得同耶偈云悉能顯現毛孔中者謂非  
唯佛智如空包納衆生之性毛孔內空亦現  
衆生之界耳六即一切至處道智力論名遍  
趣行智力遍即一切趣即至也行即道也謂  
諸衆生種種所行若出離行不出離行各能  
至果如行有漏行生五道中行無漏行至涅  
槃果名遍趣行若知如是種類行跡趣入此

由界智若知即彼行跡一切品類如是行跡能令雜染如是行跡能令清淨此由遍趣智力初力處對非處此中但明至處又初力指因為得果之處此約果是酬因之處故不同也經中初句總標次一念即能知迅速下十<sup>用八</sup>二字所知時處後一句委悉開示七即禪定<sup>九</sup>解脫三昧智力淨行品中加於染淨通漏無漏故佛皆善知及知依此所得諸果故名智力此與自業智力何別若了諸有能修諸定即彼能入而非所餘々々業力皆了未如

是靜慮等定現三神變無倒教授所化有情此由靜慮智力偈中上半所知下半善用言佛為示現者示其諸定現三神變令有情喜使滌煩惱即令去染而得清淨八即宿住隨念智力謂過去境本生本事住宿世故名為宿住於此宿住而起隨念念俱行智名宿住智力瑜伽云若知前際隨念一切趣因是遍趣力若知前際名姓苦樂等事名宿住力此與智論云何會釋謂彼論云但知宿命所經不知諸業因緣相續但名為通凡夫亦得若

兼知業因緣相續則名為明二乘能得若知  
上二無量無邊則名為力斯則力亦知因矣  
故應通云若但知因是遍趣力若雙知者即  
宿住力瑜伽為對遍趣之因故但云果耳文  
中初句標能念智包三世者三世全在佛智  
之中況於隨念不知三世從門別故但云宿  
住刹那悉現即包現之時極促現毛孔中即  
能現之處至微第三句即所現所念之事廣  
第四句結歸智力非唯能念亦能現也九天  
眼智力獨此從所依以立名也若從境者瑜

伽名生死智力謂死此生彼墮善惡趣大小  
好醜皆能正知知前際生死名為宿住要知  
後際得此力名今文乃云佛眼者若約五眼  
餘眼在佛皆佛眼故此非經宗今依十眼佛  
眼能見如來十力故故此一力即攝十力舉  
一為例餘九皆然文中初句體大次句用廣  
次句用勝以無等故後句結其甚深故唯佛  
能演既言普見法界非局未來約宗別故於  
未來門普見法界也十漏盡智力於自解脫  
無惑無疑亦知衆生漏盡涅槃於此正知名



為智力文中初二句所斷諸結即現行隨眠  
即種子習氣即餘習二乘不能盡習亦不能  
盡他漏故不名力後半顯佛能滅然上十力  
智即是體力即是用然智即力更無別性此  
中宿住隨念相應智力是隣近釋自餘從境  
皆依主釋設天眼從所依亦依主釋若宿住  
是境隨念相應智力亦依主釋然此十力量  
於自事各於自事中六如水能淨如火能燒  
各有自力若約總攝初力為大若約辨得涅  
槃漏盡為大若以無礙解脫而為根本則平

等平等第八法界頌中歎佛徃修十度行滿  
今得果圓十一頌分二初一總餘十別今初  
也佛威神力略有三類一者俱生力謂風不  
動衣等二者聖威力謂通明等種種功德三  
者法威力謂波羅蜜圓滿法力令五根中無  
諸非淨四支百節有無量力故名堅固不可  
壞法身常身無邊之身言遍十方者即無邊  
身廣大示現謂變化身無分別者平等智身  
大菩提行者波羅蜜身昔所滿足者衆行先  
成皆令見者大果今出二有十頌別顯一頌

一度皆上半往修因下半今得果十度之義  
十行十地一經始末亦多辯之須粗識其相  
略啓十門一釋名二出體三辯相四建立五  
次第六相攝七修證八約教九觀心十釋文  
今初又二先通名後別稱今初通稱波羅蜜  
多者唯識云要七最勝之所攝受方可建立  
波羅蜜多一安住最勝謂要安住菩薩種性  
二依止最勝謂要依止大菩提心三意樂最  
勝謂要慈愍一切有情四事業最勝謂要具  
行一切事業五巧便最勝謂要無相智之所

攝受六迴向最勝謂要迴向無上菩提七清  
淨最勝謂要不爲二障間雜即三時無悔若  
七隨闕非到彼岸故此十度應各四句分別  
其別稱及出體三辯相至文當釋四建立者爲  
十地中對治十障證十真如故但有十爲對  
六蔽漸修佛法漸熟有情故但說六六中前  
三增上生道感大財體及眷屬故後三決定  
勝道能伏煩惱成熟有情及佛法故又前三  
饒益有情施財不惱忍彼惱故後三對治煩  
惱勤修加行永伏永滅故又由前三故不住

涅槃由後三故不住生死能為無住涅槃皆  
糧後唯四者助六令滿方便助前三願助精  
進力助靜慮智助般若如深密說五次第者  
謂由前前引發後後及由後後持淨前前又  
前前麤後後細易難修習次第如是六相攝  
者此十一<sup>用八</sup>皆攝一切波羅蜜多互相順故  
般若論云檀義攝於六資生無畏法等智論  
云有未莊嚴波羅蜜即不攝者有已莊嚴波  
羅蜜即相攝者今此經文必具攝十若但說  
六六攝後四若開為十第六唯攝無分別智

後四皆是後得智攝七修證者五位通修佛  
方究竟十約因位總有三名謂初無數劫施  
等執力尚微被煩惱伏但名波羅蜜多第二  
劫去勢力漸增能伏煩惱名近波羅蜜多第  
三僧祇勢力轉增能畢竟伏一切煩惱名大  
波羅蜜多故上下文中屢言廣大波羅蜜也  
八約教者諸教可思此教要須一一融攝徹  
果該因九觀心者可以意得十釋文中第一  
偈明施度輟已惠人名之為施即以無貪及  
所起三業而為其性此有三種謂財法無畏

上半因中大悲行施已該此三此悲亦是七  
 最勝中前三最勝下半果中財能資身無畏  
 益心法資法身故得果身身最殊妙三皆悅  
 物故見者必喜亦由具七最勝故身殊妙也  
 二戒度防非止惡名之為戒即受學菩薩戒  
 時三業為性戒有<sup>用八</sup>三種律儀攝善得淨身果<sup>十三</sup>  
 攝衆生戒能除物苦遍十方者無作戒身等  
 衆生故三忍者堪受諸法未能忘懷名之為  
 忍此約生忍又忍即忍可忍即是慧雙忍事  
 理即以無瞋精進審慧及彼所起三業為性

忍亦有二謂耐怨害忍安受苦忍諦察法忍  
 偈云信解真實即諦察法也色相圓滿前二  
 忍果放淨光明第三忍果四精進者練心於法  
 名之為精精心務達目之為進以勤及所起  
 三業為性亦有三種一被甲二攝善三利樂  
 初句通前二以被甲精進瑜伽釋云設千大  
 劫為一日夜處於地獄唯為脫一衆生故次  
 句即第三下半通三果也因既離身心相故  
 果能身遍十方五禪者梵云禪那此云靜慮  
 即以等持為性亦有三種謂安住引發辦事

既引起神通辨利生事故見者深喜現法樂住諸惑不行又資慧斷惑故見者惑滅六般若者般若梵言此翻為慧推求諦理名之慧也此及後四皆擇法為體亦有三種一太空無分別二法空無分別三俱空無分別攝論以加行正體後得為三約六度說瓔珞以照有照無及照中道而為三者唯約法空三觀之義至下當明慧導萬行故云修諸行海言具足者具上三也因如有目故果獲身智二光能滅諸闇七方便者即善巧也方謂方法

便謂便宜下四但各二種今初謂迴向方便拔濟方便文云種種化生即拔濟善巧所修成就兼於迴向善提所化無邊果得十方而橫遍為物取果豎窮來際而不休八願者即希求要誓有義即以欲勝解及信為性亦有二種謂求菩提願利樂他願由初願故出現世間由後願故救生不息九力者不可屈伏故隨思隨修任運成就亦有二種謂思擇修習今言法力即思擇諸法而修習故攝論由此二力令前六度無間現前經云成自然力

即無師而成不習而無不利何能壞哉十智  
度決斷名智謂如實覺了亦有二種謂受用  
法樂智成熟有情智無性論云由施等六成  
此智復由此智成立六種名受法樂由此妙  
智能正了知此施戒等饒益有情經云普門  
智總含二智別配即初句成熟有情次句即  
受用法樂此二無二故成無礙力舒光普照  
第九雲音頌述菩提樹摩尼果中歎佛往修  
十地行果十一頌分二初一總舉謂佛果大  
用由昔地行及結說處餘十次第各述一地

地義當品廣明今皆略述而已初地略述四  
義一加行多劫諸論皆說地前為一僧祇已  
為無量更有異說恐厭繁文二標入地名三  
出生廣智謂生如來家見法實性得妙觀察  
平等性智故四普見佛海同下願智果中二  
地四義一舉法標名二別地行相三修行時  
分四供佛多少三地四義一舉法標名世間  
中極云積福德二修諸禪定三忍度偏多四  
聞持廣博四地四義一歎慧標名世無等故  
二了道品境異凡夫故三起慈悲異小乘故

四淨身土離身見故五地四義一標入地謂  
積集福智故云普藏十平等心故曰等門二  
標地名三真俗極違會令相順四諦法俗境  
無不等觀六地有四一歎行二標名三正顯  
行相即了緣起法四明地用得十空三昧故  
七地有四一先標果用二照達群機三雙行  
巧攝四寄行標名八地四義一別地行相二  
明淨土果三略釋地名四歎地結說九地四  
義一標地作用二善達教法三標示地名四  
廣行多劫十地有四一標起地名二合藏法

雨三能蔽如空塵重四深廣難測故云佛境  
諸偈多有結說文並可知第十善勇猛說頌  
儀中前文多皆觀衆會此觀十方者觀衆表  
無偏心觀方表說周遍二文影略十頌歎佛  
體用應機自在德文分爲三初一總顯次八  
別明後一結歎歸佛一一頌中各有四義今  
初總歎佛令物悟入福智有四義者一多衆  
二心異三悟智四了福莊嚴即福也亦通二  
嚴皆佛令爾故顯衆德即爲歎佛別中一見  
佛體用亦四義一起願二具行三見體四見

用二見法身一勝故無等二淨故無礙三大  
故周遍四深廣故包含三見佛色身一色妙  
謂如金等二相具十華藏相等三光盛謂常  
放等四隨機變謂三尺無邊等四見佛智身  
一無礙無二礙故真俗無礙故二等空稱法  
性故三知根<sup>用八</sup>四巧現五了佛音聲<sup>十六</sup>一音普遍  
二說應器三言同類四應無礙六見佛光明  
一多種二遍照三見佛四現變七見佛毛光  
一顯光名二明出處三示往因四令信悟八  
見佛福相一見福相二了福因三示因體四

明見處後一結歎德廣一數多二深廣三用  
普四結說謂推功歸佛謙已無能上來總明  
第八大段座內衆流竟自下第九明天地徵  
祥謂動地興供即是顯證上來佛成正覺衆  
海雲集各申慶讚顯佛高深而下稱機情上  
協佛願故世主爲之興供天地爲之呈祥就  
文分二先動地後興供前中三一動處二動  
因三動相今初自隱之寬且云華藏約下結  
通實周法界諸天重重並華藏之內故云其  
地何所不該又染淨融故雖標摩竭而地震



華藏二動因中就主顯勝但明佛力感應道  
交亦由物機然汎明動因總有其十今當轉  
法輪亦兼成道餘如別章三動相者其地下  
是震即是聲動即是形聲兼吼擊形兼起踊  
故有六種此六各三成十八相用八推颺不安為  
動自下漸高為起十七忽然騰舉為踊隱隱出聲  
為震雄聲郁遏為吼砰磕發響為擊十八相  
者唯一方動直爾名動四方若次第若一時  
動者名為遍動若八方次第或一時動名普  
遍動又四方八方十方如次名三相動又一

方獨動十方次第動十方同時動又為三相  
餘五例之然動何所為依勝思惟梵天經所  
為有七一令諸魔怖故二為說法時大眾心  
不散亂故三令放逸者生覺知故四令眾生  
知法相故五令眾生觀說法處故六令成熟  
者得解脫故七令隨順問正義故此上七緣  
正是今經所為地論有四非當此文上約外  
器若心地聖賢地法性地亦有震動等義可  
以虛求二興供中三一標數同生之衆亦得  
稱主為物依故二所謂下略列三此諸下結

遍第十如此下結通無盡文分有二一結華藏內二結華藏外前中亦二先舉此界二其華藏下類華藏中一切世界於中三初類衆海興供一切世界者謂華藏中有十不可說佛刹微塵數世界種一一種中各有不可說不可說佛刹微塵數世界彼等一切諸世界中悉有世主而為供養二其一切下類佛坐道場然有二義一彼諸世主各供當處之佛二彼諸世主亦供此佛此佛亦坐彼界道場三一一下類結大衆得法於中有十一句為

聞法得益得益有三一聞益各各信解故謂信其言而解其義二思益謂於所對審緣慮故三修益修益有七一修門謂三昧方便故二修法謂資糧助道故三修果契理成就故四修益隨有所得成法喜故五修轉各各趣入無量乘門及衆生界故六修同悟解法門合先聖故七修極修極有三一大悲極入佛神通境入佛神通境但為益生故此成恩德二大智極入佛力境如來力境悲智超絕無能及故成佛智德三自在極入如來解脫門

盡一切障心境自在成佛斷德亦即是前諸  
 解脫門二如於此下結華藏外謂以華藏例  
 於法界各有此會同為一大法界會方是華  
 嚴無盡說耳上來十段總明教起因緣分竟  
 大方廣佛華嚴經疏卷第八

音釋

跣切 跣古牙切 跣屈足坐也 跣雖遂切 跣清貌 協撥  
 也切 合也 風餘亮切 風也 石切 石破耕切 石石扣築聲

永樂北藏

大方廣佛華嚴經疏

第一六九册

大方廣佛華嚴經疏卷第九

用九

唐清涼山大華嚴寺沙門澄觀撰

如來現相品第二此下第二正宗分從第六經盡第十一

將釋此品四門分別一來意二釋名三宗趣

四釋文然下諸品多用此四若有增減至文

當辯今初來意中二先分來後品來今初三用九

分之中自下正宗由致既彰正宗宜顯故次

來也四分之中已明教起因緣次辯說法儀

式故次來也二品來者曲有二義一前辯衆

集今顯疑現相二前明舊衆今辯新集故次

來也二釋名者一分名者正宗正陳宗

旨揀序流通若四分中名舉果勸樂生信

者舉依正果勸物信樂是故亦名所信因果

亦名說佛依果會以從多說故二品名者如

來是能現之人相是所現之法現通能所能

所合說體用雙陳以立其稱然如來現相各

有五義以成其十如來五者一就理顯謂法

性名如出障名來二唯就行瑜伽云言無虛

妄故名如來涅槃三十二亦同此說三理智

合說轉法輪論云第一義諦名如正覺名來

正覺第一義諦故名如來此與成實大同四離相說般若云如來者無所從來亦無所去故名如來五融攝說謂一如無二如若理若智若開若合無不皆如故名爲如如外無法來亦即如如是來者是真如來現相五者一現面門光相召十方衆二現眉間光相示說法主三振動利網以警群機四佛前現華表說依果五白毫出衆表教從佛流如是等相是如來現相品中辯此故以爲名三宗趣者亦二一分宗三分正宗已如上說四分之宗即

以佛果無邊刹海具三世間無盡自在故以爲宗令諸菩薩發生淨信修行涉求以之爲趣二品宗者以光相表示爲宗令上智玄悟爲趣四釋文者此下二品說法儀式是當分方便即分爲二初現相品爲遠方便後三昧品爲近方便今初一品大分爲六一衆海同請二光召有緣三所召雲奔四現瑞表說五稱揚佛德六結通無窮今初先以五門料揀諸會請問之殊一問之有無二所問法異三能問人別四儀式不同五疑之權實初中前

二後二此四有問中五皆無謂初會標果起  
因故問第二會尋因至果故問但因有升降  
寄六會以答之果無差別第七當會答也然  
諸會更有問者並當會別義以總收之或重  
明於前非大位問第八會明因果純熟故須  
有問謂行修無礙六位頓成故當會答第九  
會明稱性因果故別有問謂俱入法界無差  
別故亦當會答四處都有三百一十句問謂  
初及第二各四十問第八二百第九三十中  
本廣本問則難思二所問異者初兩會問果

廣因略為成信解故第八會問因廣果略為  
成行故第九會問全同初會而因舉主佛之  
因明因是果因顯唯證故三能問人異者初  
及第九皆同生異生二衆齊問以所問法衆  
同依故第二會中唯同生問以所入位同生  
勝故八唯同生一人自問以造修之行各自  
成故四請問儀式復有二義一約言念二約  
通別初中請有二種一言二念答亦有二一  
言答二示相交絡相望應成九句在文唯四  
初會之中具二問答謂現相品長行念請供

聲言請初光示法主現華表義現衆表教即  
示相答三昧品中以言重請下之三品亦以  
言答第二會唯念請如來示相答菩薩言說  
答佛心自在不待興言佛力殊勝現相能答  
第八會言請言答此顯菩薩不同佛故第九  
會念請示相答顯以心傳心唯證相應離言  
說故二通別者初後二會別問通答二八兩  
會別問別答又初會亦得是別問別答次文  
當明第五疑之權實者問諸王菩薩位皆圓  
極何得有疑有云爲衆生疑故有云希佛果

故又顯因果懸隔故然上二解初權後實並  
皆有理可通餘教然此經中若實若權無非  
法界之疑以疑爲有力與所說證爲緣起故  
此事舊爾海印頓現疑之與答念念常疑念  
念常斷其猶像模因模之高成像之下因模  
之下成像之高緣起法界理應爾故次正釋  
文文分二別先長行念請後供聲偈請前中  
亦二先舉人標念謂盡於衆海皆希佛境並  
欲利生成緣起門故標同念二云何下正顯  
問端有四十句且分二別前二十句直爾疑



念請後二十句引例舉法請準義二文皆應具舉互有影略不欲繁辭故下偈中更不引例合二處文直爾請說第二會中亦有此二而引例中問同此直請正欲顯於諸佛道同影略之義又四十句中初二十句問果後十

用九

四

問因中間十句明化用普周通問依正染淨因果前是所求後是所行中是所知故分是舉果故先問果據斯義類亦可分三今以兩段皆有結請故但分二前中亦二先正疑念後明結請今初前十句問德用圓滿後十句

問體相顯著今初十句文唯有八偈有神通及自在二問世界成就品初答中亦同此有今文闕者或是脫漏或是義含無能攝取之中攝此二故故下法界品中闕無能攝取及與神通唯有自在故此三事合則可一開則為三故出沒不同言佛地者即智德分位然此經宗通收萬德故廣則無量略有十種如上所引同性經說然體不出五謂清淨法界及與四智以斯五法攝大覺性具如佛地經及彼論說然要唯有二無所不攝謂真理妙

智融而無二是諸佛地並有生成住持功能  
故名爲地此句爲總該攝諸德下明佛果皆  
答斯問二佛境界下諸句皆別明佛地之德  
言境界者慈智所緣故亦分齊故廣亦無量  
略有十種如出現及問明不思議品廣說然  
出現多明體遍不思議品以辯超勝故云十  
種無比境界問明該其因果體用小有不同  
至文當知若準瑜伽如來境界謂五界差別  
一有情界二世界三法界四調伏界五調伏  
加行界或說要唯有四一所緣真俗二所住

刹海三所起業用四所應攝化並如下說此  
與瑜伽大同總唯有二謂佛即境約分齊說  
或佛之境約所觀化等今文多顯佛之境也  
三佛加持者謂佛勝力任持令有所作廣亦  
無量略有十種如不思議法品及法雲地說  
離世間品十種佛所攝持亦其例也然不出  
三類一如加持化身及舍利等二如加耆婆  
入火不燒等三如加非情作佛事等此與神  
通寬陞不同謂六通中唯神境一有加持故  
今此加持即是神力四所行者是佛所作或

說十種如不思議品云諸佛世尊有十種化不失時等亦是所行之行如出現品謂無礙行是如來行等或大悲攝生或大智造緣無思成事方便善巧所作究竟皆名為行然約人望行標云所行既是所作實通能所故不同彼境界之中彼智所觀所應攝化但就所故況所望不同故不相濫若準瑜伽七十八中引深密經佛答文殊此二別相云所行謂一切種如來共有不思議無量功德莊嚴淨土如來境界謂一切種五界差別五界如前

五佛力者即佛大力自在廣有無量略說有十即處非處等又有十種謂廣大力等如不思議品六無畏者無諸畏懼故離世間品說有十種無畏或說四種如常所明昔云前四用九是異二乘功德佛力是破魔功德無畏是伏六外道功德未必全爾十力無畏亦不共二乘故然上來多明大智功德七佛三昧者謂佛果等持數過塵算如師子頻申等略說十種如不思議品說佛有無量不思議三昧等八準答及頌名佛神通者謂依定發起無礙神

用或說有十如十通品不思議品云一切諸佛有無邊際無礙解脫示現無盡大神通力十通唯局菩薩或說有六如常所辯然名通大小九維答及頌名佛自在謂所作任意無礙成就故廣有無量或說百種謂於衆生自在等各有十故略有十種謂命自在等並如離世間品說不思議品亦說有十謂諸佛世尊於一切法皆悉自在等十無能攝取者頌名無能制伏答中名無能毀壞謂佛所作無有天上人中沙門魔梵及諸二乘大菩薩等

神力能制是故舊經翻為佛勝法也略有十種如不思議品諸佛有十種最勝法等若取無能毀壞即十種大那羅延幢勇健法是上之十問多在不思議品至下當知二云何是諸佛眼下十句問體相顯著謂六根三業於身業中開常光為身光放光為光明故有十句不思議法品諸佛有十種法普遍無量無邊法界謂無邊際眼等離世間品一一各以十門辯釋又出現品說佛三業各具十義然諸經論說佛常光一尋準不思議品常妙光

用九

七

明不可說不可說種種色相以爲嚴好爲光明藏出生無量圓滿光明普照十方無有障礙然放光則有時不放如諸會面門毫相所放之類然相海品其一相常放光明斯即放光亦通常光而分別者常即湛遍放則見有去來故言佛智者廣即無量略說有十體不出五謂清淨智及大圓鏡等四智要唯有二謂根本後得總攝唯一諸法實相無障礙智此之十句多如相海及隨好品二推願下結請將欲引例故且結請二又十方下引例

永樂北藏

大方廣佛華嚴經疏

第一六九册

舉法請亦分爲二初引例後結請今初分二前十句問化用普周後十句問因德深廣今初文唯有九闕安立海一世界海者是化用處如華藏品二衆生海是所化機即刹中所持三準答及頌名法界安立海如世界成就品通明法界所安立海起具因緣等故若因緣者賢首云所化生法也亦是前二於法界中施設安立故諸經論皆說世諦爲安立諦然安立言梵云柰耶而義多合或云理趣或云方便或云法式或云法門或云安立故知即安立

法式也四佛海者能化主也如華藏品廣舉其名亦如不思議等品五波羅蜜海者化所成行如離世間品六佛解脫海者化所得果如法界品七佛變化海者臨機神變化難化衆生即身業化也如諸會不起而遍光明覺品長行身業阿僧祇等皆是其文八佛演說海者稱根說法語業化也如四諦品九佛名號海隨機立稱如名號品十佛壽量海者隨器所感住世脩短如壽量品二及一切下問因德深廣中一創於生死立大誓願二勝進

大心趣求佛果三積集菩提福智資糧四運諸菩薩從因至果五慈悲喜捨四菩薩行六謂求背業感證契真理餘四可知然此十句有通有別別則初二寄十信次二十住次一十行次一十向以向出離故次三登地已上後一等覺此約橫論一切菩薩若約通說各通始終即豎論一切菩薩也故此十句文通行位然皆普攝法界深廣無邊故云海也並如下諸會說二願佛下結請既是引例故致亦言此四十句答文在何問有通局答亦如

之通即諸會與此相應皆是答此上所引者  
居然當之謂前衆海既是九會常隨豈得此  
問局於初會豈復衆海問不盡耶故知初會  
爲總九會同答此問而爲分意別故諸分初  
皆重舉諸問則顯分分之中皆通因果等故  
則從此盡光明覺答十海問問明已下答十  
因問不思議品下答二十句果至下當知又  
就四十問十海爲總九會同答十海一世界  
成就品答世界安立海三華藏品答世界海  
遮那但引因釋成現相三昧但是說法由致

用九

九

並非別答海問三名號品答如來名號海四  
四諦品答演說海五光明覺至十忍品別答  
十句因問通答衆生海修因之人即所化生  
故六阿僧祇品答變化海長行舉數欲顯化  
用難量故偈中廣明變化重重微細難說七  
壽量住處皆答壽量海八不思議等五品別  
答二十句果問總明佛海就德深廣以顯佛  
故九第八會答波羅蜜海總攝諸位皆成行  
故十第九會答解脫海證入法界起大用故  
問中爲次與答異者問約本有修成自行化

他而爲次第謂先有世界衆生則有佛出修  
因得果故波羅蜜海是因解脫是果餘四皆  
大用謂臨機變化隨宜說法稱物立名隨物  
脩短答中先人後已故大用四海居先自利  
因果二海居後又衆生一海亦可通在九海  
皆爲生故種種隨宜顯生多故若約局言當  
會答盡此復有二一現相答下文當示二者  
言說答此亦有二一經來未盡二答二兼餘  
成就品當引第二爾時下供聲偈請中分二  
先明因緣後正說偈今初前請在念佛雖已

知今請彰言使大衆同曉前旣爲法興供今  
乃以供宣心不因拊擊故曰自然非無因緣  
即菩薩威力同異生衆皆菩薩也又表身口  
爲供具故供具皆即法界體故二正說偈中  
十頌分二初三歎德請後七舉法請前中亦  
二初二歎佛明具說因後一歎衆明具說緣  
今初也前偈即悲之智已滿爲物現身後偈  
即智之悲已圓能斷疑除苦有悲必普有智  
必能故應說也後一歎衆請中前半歎衆顯  
無異念後半結請明說則斷疑後舉法請中



分三初四述前初十句問小有不次但取文便及餘一切廣大法者結例所餘謂二十句外佛無邊德亦願說之不思議品廣說餘門諸說果處皆答此也次一頌述前體相顯著十句略示可知後二頌述化用普周十句之問現文唯七以佛海中舍於神變壽量名號以此三海不離佛故不問因者長行明通諸會故列因疑今彰初分請當會答又顯此會因略果廣第二會果略因廣故第二爾時世尊下明光召有緣分長分為十一放光意以

領念故供聲易了故略不明念但疑法何以放光現相答故答相云何謂佛三昧力加持放光令菩薩來遠遠能為此即佛地境界是佛所行無攝無畏故此為總意若別明者如文思之又召來菩薩亦是言答上之十問至文當知二即於下明光依處面門即口言衆齒者表四十問教道遐舒口生真子故咀法滋味益法身故總處放者此會總故三放佛下顯光體隨機多演故四所謂下列光名略列十名皆從體用立稱五如是下結光數六

一一下彰眷屬七其光下辯色相衆寶隱映  
表教道舍容八普照下明光應遠九彼世界  
下彼衆感通十以佛下偈聲命召即通舉十  
號示爲所歸十偈在文且分爲五初六偈自  
彰因果已圓勸同觀禮於中初一總明二利  
因滿成正遍知次一毛光開覺是明行足次  
一頌往來諸趣是世間解一念解脫可謂善  
逝次一云成正覺即佛義焉次一大音演寂  
謂無上士隨心開覺是調御丈夫次一諸力  
皆圓即天人師也二有一頌明衆海已集引

例勸歸既云已爾諸雲爲供是應供也爲對  
引例故不當次三一頌圓音隨機見必蒙益  
結云兩足尊即世尊也四一頌義海頻演宜  
速及時如三世佛大願而來故結云如來也  
五一頌特命有緣是光本意第三爾時十方  
下所召雲奔文分爲三第一同會道場第二  
現自在用第三聲光自述今初亦三初總明  
二所謂下別顯三如是等下總結別中十方  
即爲十段一一方中皆有十事一定方二七  
海三世界四佛名五主菩薩六眷屬數七至

佛所八興供雲九申禮獻供十化座安坐此  
中應有世界種名略不說耳其東方供雲應  
有十種而但九者塗香燒香二文合故言各  
現者主伴一一皆現也重重無礙各遍虛空  
一一可觀名不散滅十方化座體相各異而  
皆同名蓮華藏師子之座者師子之義已見  
上文蓮華藏言通有三意一約菩薩表含藏  
開敷故二約所詮將說依報故三約諸會通  
顯華嚴故上下還於本方坐者佛圓迴身皆  
見面故異於餘宗但八方故三總結中文有

用九

十三

其八一略示前文云如是等二總明海數謂  
十億刹塵以上來所列是華藏鱗次之海口  
光各照一億十方故有十也上二段前別中  
所無三結主四結伴五結來至六結興供七  
結禮獻八結安坐既為總結故闕定方已至  
會中故闕初海等三事第二如是坐已下現  
自在用即為歎德謂塵塵近佛念念益生文  
有其八一明諸菩薩毛孔現光二光現菩薩  
三菩薩入塵四塵含廣利五刹有如來六菩  
薩往供七助佛揚化八所化成益初二可知

三中言安立海所有微塵者略有二義一一  
 切施設依正等塵一一稱真故二約觀心衆  
 生意識所緣即是法界例依名相分別而轉  
 是謂安立安故為塵體皆可依是名大刹皆  
 有覺性是日如來此明菩薩證入衆生性海  
 四中可知五隨世俗故說有三世全稱性故  
 並在塵中六中供養者通財及法七於念念  
 下助佛揚化及第八念念中下所化成益於  
 中賢首對前開悟以三義釋之一別配釋二  
 圓通釋三各別釋初者謂以前十法門對後

所成十益一門得其一益二三前却餘並如  
 次一以夢自在門夢中警覺造惡衆生令得  
 斷惡免苦益故二以菩薩行門令入正定三  
 以現諸天歿生門令生天受樂以放逸則歿  
 尅念便生故上三人天乘四以動刹現無常  
 令猷以歎佛神變令欣成二乘益下皆大乘  
 五以嚴刹大願令修福求向六以攝生言詞  
 令發大心以佛音聲即同體大悲故七以佛  
 雲雨法令入菩薩不退之位已上三位在地  
 前三賢八以照遍滿法界土及神變令得初

地已上智眼見平等法九以佛普現遍法界  
解脫力令得八地已上大力大願無盡智淨  
國土益十以普賢建道場令住佛果大願海  
言生如來家者入佛果位故生非是初地已  
上生佛家也二圓通者此上十法於此十益  
一一遍通謂或一法成十益或十法成一益  
如是互遍無所障礙三各別者謂前十法門  
各自開悟世界海微塵數衆生此以法爲益  
後十益但言須彌塵數不言刹塵之國則是  
已身以人爲益既各別釋則夢自在門亦顯

一切皆如夢故延促等無礙故云自在餘並  
可知此上菩薩法化始從放光終於得益順  
數八段若逆推十二重疊無盡一其十須彌  
塵數衆生得益方在一國餘一切土皆爾故  
云一一國土各令等也二此一切土益在一  
念時中餘一切念時皆爾故云念念中也三  
如是念念之益方是一法門所開悟一一法  
門皆爾四彼多法門方是一念所用餘念念  
所用法門亦爾五彼多念法門方論一廣刹  
如一廣刹如是十刹塵數廣刹皆爾六彼多

廣刹方論一塵內如一塵一切安立中諸塵亦然七如上諸塵方是一安立海如一安立海遍法界諸安立海亦然八遍法界安立海中業用方是一化菩薩所化如一化菩薩十世界海化菩薩一一皆然九諸化菩薩方是一光所現如一光一一光亦然十彼十刹塵數光明方是一毛孔現如一毛孔遍身一一毛孔皆然十一彼遍身毛孔方是一菩薩如一菩薩有如是十億佛刹微塵數各世界海微塵數菩薩遍身毛孔皆爾十二上來所明

十一重作用方論來此一會如此一會於餘佛會亦復如是此後一段偈文具之又上十二重一一開之為二便成二十四重且如一念望一切念即是二義類例相似合之為一餘十一重準此思之如是重疊無盡各周法界唯智頓觀非心識境華嚴海會大用皆然第三光聲自述前既光聲召命今亦光聲自述菩薩位極用窮深廣若非自述時衆難知十頌分二初一總明兼陳說處後九別顯德用殊勝文分為三初三通顯體用自在初偈

悲智相導度衆生而不疲次偈空有雙觀入法門而常寂後偈物我無滯故化他而自清次五頌別叙前現自在與前影略一身遍十方智觀寂滅即顯不唯來此會也二身光普入智眼遍觀三住一毛端遍動諸刹況乎於上處寶蓮華四塵塵多身門門化異舉一歟生門可以例諸五念劫無礙結由證深念劫既融故於念念能作法性無礙者分與無分皆無礙故謂證理不唯無分故在一切處而全在一法一切法亦然各有四句身等不唯

分故常在此而無不在思之後一偈結廣有歸普賢勝行皆入非獨向來所陳故能光中演斯自在大文第四現瑞表法上所現相但召有緣衆集將陳故重現斯瑞瑞文有三初光示法主二現華表義三現衆表教法藉入弘故先明主義爲教本故在教前今初示主文分爲六一意二體三名四相五展六收今初可知二放眉間光即光體也眉間者表離二邊故於體不計有無二邊於義不著常無常等諸法相邊於行不習苦樂二邊於道不

住邪正二邊於人不執因果二邊於教不說  
世出世二邊於諦不見真俗二邊於化不定  
權實二邊是故為衆放眉間光三此光下辯  
光名菩薩智光者令得能知智也普照十方  
藏者令照所知境也藏有三義一智光含德  
無盡故二以十方刹海各於塵內重含諸刹  
故三亦通於五藏以言智光故照初二藏令  
菩薩證照次二藏令菩薩成證則得於涅槃  
成則得於菩提照第五藏令化令淨三中後  
二如下業中四其狀下顯相謂色如燈雲猶

日月洞照周遍潤澤雨法雨故具如相海品  
五遍照下展即光業用於中分五一所照分  
齊謂盡十方一切佛刹二光所現謂土及衆  
生三動刹網以諸世界重疊影現交互相當  
猶如網孔四塵現如來五隨機雨法略舉三  
法皆下所顯初法輪雲示其所行二出離雲  
示其所度三大願雲示說法主謂將說普法  
今知法主大願普周刹塵內故第六作是下  
收則示有終歸證從佛流眉間出光修因順  
果故須右繞自下升高故從足入履佛所行



方證入故第二爾時佛前下現華表義文有二別一總標華現為坐所現中方衆故通表所詮佛華嚴故別表華藏佛所淨故故於佛前出此蓮華既通表華嚴亦具同時具足等十門及教義等而其本意正表義耳忽然現者依理起事難測量故二其華下顯具德嚴用九文亦有二先標十種顯德無盡後所謂下別列十句前六體備衆德後四妙用自在今初蓮子住處有含藏之義故名為藏表示法門一含一切華藏之名由此而立後妙用中一

念況多摩尼寶王即前藏體影現佛身即依正無礙既發多聲聲皆演法第三此華生下現衆表教文略有三一現衆時言一念者華生無間表教義相應二現衆處謂白毫中表教從所證淨法界所流為衆教源如白為色本三有菩薩下正明衆現亦分為三一主屬齊現遍詮諸法故云一切所詮圓滿是曰勝音圓教法門必攝眷屬故下文云世界海微塵數修多羅以為眷屬權實無礙故曰俱時二右繞下申敬就座主伴雖殊並修因順累

故右繞如來文義相隨故依華坐正助不等  
 臺鬚有差上義依理明故忽然而現今教由  
 人立故衆從佛流亦如涅槃從牛出乳三其  
 一切下彰其德業主教是宗故偏歎主文有  
 十句略為二解一豎配十地此明普攝十地  
 功德一句一地初地歡喜得智證如二地性  
 戒是佛所行三地多聞入法身海四行道品  
 善友是依五地雙行現通利物六觀法界般  
 若現前七功用已終故佛與力八無生無動  
 住三昧心九為法師見無邊法十具於大盡

三昧等圓初地尚攝諸地功德況於後後不  
 具前前二橫就極位釋者一理智了真二量  
 智入行三證窮法身四常觀受用五毛現神  
 變六念觀法門七外感佛加八內安深定九  
 豎見來際十橫無不圓故此十句攝為五對  
 若橫若豎能證必具故為二釋用九  
十八

大方廣佛華嚴經疏卷第九

大方廣佛華嚴經疏卷第十

用十

唐清涼山大華嚴寺沙門澄觀撰

大文第五稱揚佛德既現既至任力稱揚自  
申固極之情顯佛無涯之德文分為二初一  
眉間菩薩讚後十方菩薩讚新衆纔集佛

用十

便現瑞文不累書故編成次以讚德相類結  
集併之一處乘現勝音之次先舉勝音之偈  
後十菩薩即如次十方昔人不曉斯文便將  
後十為勝音眷屬非唯章疏之失亦乃翻譯  
有違何者且眉間出衆即主伴皆讚十方來

衆寂無一言主伴禮儀一何踈索況準法界  
品例來者皆有讚詞細尋菩薩之名與前十  
方如次相似但由譯人不審致令名小乖差  
至下文中一一對辯今初勝音文分二先說  
偈儀後正說偈下十例然偈中總相讚佛亦  
舍諸問思之可知十頌分三初三直就佛歎  
次六約衆歎佛三有一偈雙結主伴初中三  
偈皆歎如來體用無礙於中初一不動本而  
周遍則十身圓融遍四法界後二不壞小相  
而廣容上則事如理故此則事舍理故於中

前一偈半一毛攝三世間後半類餘謂遍法界內皆有佛身無有一毛不舍刹海又一毛表解脫門諸佛菩薩智所住故現多刹海者門門皆是淨土因故次六偈約衆歎者聖賢輔翼顯主勝故六偈總明主伴皆遍於中初二總身總相遍後四總身遍別中既微細難思故唯普智方知普行方立三雙結可知第二十方菩薩讚德十方即爲十段今初東方言衆中者大衆海中前列名處名觀察勝法蓮華幢幢相高出王是超勝此喻相似光慧

即是所喻幢體偈中讚佛真應二身密答上佛地如來智等攝佛地故十頌分二初三讚真後七讚應讚真必體用雙美讚應唯約用明欲顯門差實非體外今初也於中初一讚智身次一讚法身後一雙結智舍四智法即法界五法具矣智中上半正體證真下半後起隨俗又句各一智初句大圓鏡智行相深細故次句平等性智自他平等即法界故次句妙觀察智於自共相無礙轉故末句成所作智成就利他導世事故二讚法身中上半

用十

二

體相皆同同有二義一本性法身體同言無依者無住本故無差別者體無二故二已證法身相同力無畏等皆無異故此則無礙慧身不依一切離諸分別是無差別下半用同能現能生身土智影皆無二故即法身無色應物現形三雙結者上半結智上句根本下句後得下半結法但舉其用體通上下以智契如故金光明說如如及如如智為法身故後七讚應分三初一隨樂現應不思議者隨緣無邊故光明覺云億那由劫共思量色相

威德轉無邊等次四身光演法初一化身演法望前應身即重化也次二毛光演法後一結歎難量法輪義如別說後二偈成道起通上皆圓融亦有十身且從一義耳第二南方法喜菩薩前雲集中名普照法海慧會義亦同光明即照法故十頌歎佛寂用應機德答用十前境界法身顯現即分齊境無生無體即所觀境衆生國土皆所化境於中分三初四依真起應於中分二先一偈顯真佛身常者第一義常出三世故智符於理湛然常照顯者

雖二障故現者常在前故不同衆生自體常也法界悉充滿者諸根相好一一無邊無限福智所莊嚴故次二句音恒用普恒自受用廣大法樂故下三偈起用初一普隨物樂次一感應道交後一法光無際二有三偈體用無礙於中初二句約相無生現生次二句約性無住而住次一偈約用無去住而普周後偈體用雙拂謂無體拂上無生無生爲佛法體故今體即非體無住處者拂約性二句亦無生可得拂示生句下半拂前第二偈約用

用如影故三有三偈明真應無盡一法雲無盡二衆會無盡三身相無盡無盡相言兼真身故終不盡者全同體故第三西方香焰菩薩前名月光香焰普莊嚴此中光即月光明慧即是智慧莊嚴十頌讚佛身含衆海即答加持問由加能入故於中前九讚衆海則佛德可知後一結德歸佛前中初一總餘八別別中二前四平遍一切於中初一智身入刹塵次一色身普現用後二釋成前義一普賢行圓故二身心平等故後有四偈明微細入

於毛孔刹中而作用故後一結中非唯一會  
一切菩薩皆入佛身方為讚佛第四北方菩  
薩此同本名但加慧字然此十頌歎佛依體  
起用轉大法輪答前佛行佛以轉法化生為  
其行故文中分三初二句總次八偈半別後  
一偈結別中讚佛十化初二句現受生化處  
處受生身雲遍故次一偈讚神通化末句雖  
云轉法意在通用三有三句讚業果化一切  
諸刹名號不同者示同趣類業報名字故上  
三依身四隨應演妙法者即辯揚化隨應則

能斷彼疑故五一偈勸讚勵化妙音讚勵故  
六一偈慶懌化普雨法雨令彼進修無生法  
故上三語業七有一偈領受意化領問受取  
演昔行故八有一偈決擇意化決擇有精心  
行差別及揀諸法性相不同方能普化故九  
一偈發起意化發起宿善及三乘大行為善  
調故十有一偈造作意化建立佛法事義種  
種皆令見故依實起用即是化身故說化身  
無別心色此之十化與佛地經次第無違但  
令相融不違經旨末後一偈結歸斯會可知

第五東北方方法海菩薩前衆集中名最勝光明燈無盡功德藏法海可當最勝光明義與慧同功德藏名前後無別無盡二字前有後無十頌讚佛攝勝眷屬及佛力問寄讚菩薩實由佛力故結云住力地用十中文中初一智滿得法即爲總相如是方便門者此有五二意一指前謂具前三輪之化故能周遍一一國土二即下九別爲如是方便也餘九別相共讚七事一讚普演大音有三種大一者處大一國故二者義大說佛所行故三者體大周

聞十方故二讚時無空過念念觀法證真實故三能入勝處諸佛身中修淨國故四於染無礙塵中證法而周行故五能入佛境見佛神力入行處故行處有二一智行處謂十力境二佛化處謂器及衆生六有三頌善入音聲初入大音次入妙音後入一切音七一頌善知諸地言從地者即出心也而得地者即住入也力地中者即佛地也所獲法者結上方便也第六東南方慧燈菩薩名全同前十頌讚諸菩薩悟入深廣由三昧力見佛三昧



即答三昧問也於中分四初二歎見佛真體  
一見佛離相二見佛自在言離衆相者般若  
云離一切諸相則名諸佛慈氏論云但離四  
相即離一切謂名義自性及差別也言自在  
者由菩薩定慧雙運故見佛自在也次四頌  
明悟法一證深理法願力而現二悟多行法  
福智成形三達果法體無不遍四了教法深  
廣難知三有二頌歎身業普應一深二廣云  
堅密者齊佛體用堅即金剛之身密謂三密  
之一即一而多故遍一切即大而小故現塵

中無功之應故無相而現若約法門此身即  
如來藏性也不可破壞故堅深而難見故密  
衆生塵心無不皆具本自有之故曰無生體  
絕百非故曰無相衆生六根是謂諸國四後  
二頌歎得佛加持一此佛力二餘佛力第七  
西南方前列名處云普華光焰鬘少同多異  
十頌歎佛攝生自在德答前自在問文分爲  
三初六攝生無遺次二寂用無礙後二大用  
無涯今初文二初二能攝謂身語深廣前偈  
語後偈身身中上半體客塵不染故下半用

隨物見異故亦是釋疑為物現相不乖如空  
 後四偈所攝初偈何人能了內信外攝者次  
 偈以何眼見唯勝非劣次偈了見何法謂一  
 切法地地三心後偈何位究竟菩薩地盡至  
 入佛海次二寂用無礙中初偈用遍出興體  
 無來往後偈即用恒寂隨解自差後三大用  
 無涯者初一一毛皆普現通後一一身各遍  
 轉法第八西北方菩薩前名無盡光摩尼王  
 此云威德慧即摩尼王法喻異耳十頌歎佛  
 出現說法皆周遍德答無畏問說法無畏故

於中分三初二總顯身光遍應次七辯其所  
 作後一結用歸本辯所作中分二初三明光  
 照無遺後四演法周遍一遍塵內外法界刹  
 中二遍佛身中一切刹內三明所轉性相四  
 明能轉圓音後一結用歸本不可得故第九  
 下方菩薩前名法界光焰慧此云普明即前  
 光焰十頌讚佛境界勝用菩薩能入答神通問  
 文云各各現故於中二前三顯佛境界勝用先  
 半偈標其體謂妙身色相後二頌半辯其用  
 後七菩薩能入謂入佛境界於中三初二具

德故知見次三知見成益後二結用速疾並可知第十上方菩薩此與前各顛倒而已十頌讚佛圓音現身神變自在答無能攝取問謂此願力普周無能令不取故於中分三初三頌歎佛圓音兩法德然具十義一唯一妙音一梵音故二遍聞一切稱法性故三此一即多事理融故四彼一一音兩多法兩五彼法各具一切文詞六各同一切衆生之音七此音各各遍一切處八所說各顯性淨之理九各令一切普得見聞十各各皆得究竟之

益上之十義從一妙音展轉開之具十無盡方曰圓音文處可見次四歎佛現身無礙德初偈解脫力故現處周細次偈法身力故現相即虛後二偈以般若德發揮前偈初偈釋下半言影像者顯無方所故謂光東則影西光西則影東質對像生來無所從質謝像亡去無所至故此影像即空無體後偈釋上半言如空者不可取等故故雖現形猶如水月平等如空後三歎佛神變自在德一則毛孔廣容二則願能普遍三舉少況多又上略配

十句其中具有四十句意不能繁指第六大  
 段結通無窮分中分二初舉此二應知下類  
 彼言四天下者意在閻浮言總意別既以結  
 通菩薩雲集尤顯上歎是彼十方遠方便竟  
 普賢三昧品第三入第七經初

將釋此品四門用十同前初來意者前衆既集光  
 示法主今將說法是故法主入定受加為近  
 方便故次來也二釋名者普賢明說法主以  
 說普法故三昧是業用以非證不宣故此則  
 人法合舉普賢之三昧亦此三昧是普賢所

有又三昧境界名為普賢一切如來藏身為  
 普賢故此則普賢即三昧揀餘定也若準梵  
 本普賢三昧威德神變品威德神變皆定之  
 用攝用從體但云三昧也縱佛加光讚皆因  
 定故餘會入定受加起定即說同為一品今  
 此開者文多義廣勸修學故言義廣者建立  
 普賢之行願故故此比餘麤相而說四同六  
 異言四同者入住加出言六異者一數異餘  
 會入起唯一此會入起俱多故二者類異類  
 餘方故三利益異定起多人益故四光讚異

如來毛孔光明讚故五衆請異從定起已待衆請故六證相異餘會經終方有證相此品益已即便地動雨雲等故四五二種十地雖有而不具六今此具六故別立品以此說果餘皆因故又爲諸會本故總故六八九會雖是果定說通因果又非總故三宗趣者入法界定法界佛加爲宗今法界衆成法界德爲趣望於後品亦說世界海爲趣四釋文者文有六分一三昧分二加持分三起定分四作證分五毛光讚德分六大衆偈請分初中有

二一明此界入定二類通十方就初分三一承力入定二彰定名字三明定體用今初有六一時說偈竟時二主顯佛普德唯普賢故三處依如來者常對佛故四所依座大集云菩薩得蓮華陀羅尼故說法處皆有蓮華表所入三昧自性無染舍果法故五所依因謂所入深廣要承力故六正入三昧心境冥故二此三昧下彰定名字毗盧遮那前已廣釋復有釋言廣大生息具此三義名如來藏身身即體也依也此有二種一者修成二者本

性本性者凡聖俱成修成者唯諸佛有諸佛有者慈悲無邊故名爲廣智慧無上故稱爲大生相已盡故云生息涅槃云離有常住故名如來萬德含攝是謂藏身即是出纏之法身也言本性者謂即藏識包含種子建立趣生故名爲廣本覺現量與佛等故名之爲大新新生故名之爲生染淨苦樂所不能動故名爲息即上法身在纏名藏謂空不空空爲能藏藏不空故若以光明遍照解毗盧遮那毗盧遮那即是能觀大智如來藏身即所觀

深理凡雖理有佛智方照又毗盧遮那亦通本有本有真實識知遍照法界義故斯即本覺迷而不知不得其用唯佛覺此能無不爲故云一切諸佛揀非凡也亦非因也顯於依正離如來藏無別自體故入此也賢首釋云諸佛遍於一切即顯諸佛無不周遍法界刹海及彼塵中所有諸刹諸刹塵中復有諸刹如是重重不可窮盡言如來藏身者明即此遍刹之身包容所遍法界刹海無不皆在如來身中故名藏身是故融通總有四句一身

遍刹海二刹在身中三身遍身內刹四刹入  
遍刹身即內即外依正混融無礙無障是此  
三昧所作故以為名將說此法故入茲定三  
普入下明體相用此定相用無量無邊皆悉  
依於如來藏說略舉其要句有十三門乃有  
十以後二門收五句故攝為六對後之二門  
各一對故文有四節義唯有三至下當明言  
六對者初二句明體用一對謂無分別智證  
平等性以為定體影現法界為勝用也謂以  
因因性證彼因性成彼果性顯果果性如是

佛性則具七義一真二實三善四常五樂六  
我七者清淨生佛之性本末不殊況佛果果  
豈不平等佛平等性即如來藏是故但入如  
來藏身即是已入佛平等性此為第一契合  
佛性門也言勝用者即示眾影像門謂能現  
能生身土智影也次二深廣一對廣者無邊  
不在內外故大者無上究竟實際故無礙者  
無所障故同於虛空成上三義通為廣大無  
礙門後句即入法海漩澁門漩即深也三有  
二句出納一對初出生三昧門謂若自相若

共相等一切三昧皆從此生此爲諸定本故  
後攝受法界門終歸此故法界體性故四有  
二句境智一對初句能成佛智門謂不體此  
理非佛智故後示現諸境門然安立言總有  
三種一者世界安立依報二者聖教安立妙  
義三者觀智安立諦相皆法界藏顯示現前  
五有一句即依正舍容門爲內外舍容對謂  
內舍因果智力外舍塵容法界由塵全依法  
界藏現同真性故六有三句即成就攝持門  
爲成持人法對謂初成果人功德大願後持

法輪令不斷絕由斯玄理法眼常全故上言  
四節者初四句明無幽不入釋上毗盧遮那  
遍照之義次四句無德不生釋上一切諸佛  
之義次二句內外舍容釋上藏義後三句成  
德持法釋上身義言義唯有三者體相用也  
入平等性是定體也廣大同空是定相也餘  
皆定用此三圓融總爲無礙普賢三昧二如  
此下類通十方及諸塵道於中有二初舉此  
後如是下類彼類彼中二初明平遍法界後  
明重疊無盡前中十一句初一總明謂盡窮



法界後十別指以彰曲盡一盡虛空界二於空中盡十方處三於十方中遍三世時四於三世中微細物處謂毛端等五凡諸小隙無礙之處六或廣大百千由旬等處七人天日月光明等處八盡佛眼見處九盡神力到處

用十

十二

十佛身能現之處此第十句有二義一者結上國土之言通十一段二者成下以是身內之刹為微細故二及此下重疊遍中略有四重一盡法界塵言及此國土者指前十處之國也二塵中多刹三刹中多佛四一一佛前

有多普賢於上諸處皆入此定故普賢身不分普遍麤細深廣平滿重疊此處入定類通既然法界入定類通亦爾故約主定佛前唯一普賢一切一故若就類通佛前各有塵數一一切故第二爾時一一下加分有三初口加次意加後身加初中有四一諸佛現前以比口加後無結通故此總舉重重時處一一普賢前也二彼諸下讚其得定此雖果定菩薩門入故云菩薩三昧三佛子下明得定所由所由有三一伴佛同口弗佛道同故世菩

佛本願此二為緣三自修行願是入定因又  
 上三義前前由於後後餘豈無斯行耶法門  
 主故表說普法故四所謂下辯加所為此文  
 二勢一辯加所為二顯上行願之相故云所  
 謂也所為謂何為轉法輪故有十一句初總  
 餘別別中初一總攝十智餘九即是十海一  
 即安立海二即衆生及業海三即世界海四  
 即佛海五即名號壽量及解脫海變化大用  
 皆功德故六即波羅蜜海到實相岸故七即  
 轉法輪海八即根海九即演說海與下十智

令知此十二爾時下明意加於中有二先加  
 後釋前中亦二先此土後類通前中與十種  
 智初一總謂與果海之智而言與者佛力灌  
 注令增長故一切智性即果海也智性即力  
 無傾動故具十力故末後智字即能入也餘  
 九為別即是成就品中十智由與此智故後  
 能說彼智觀彼十海而文少不次一即第三  
 法界安立海智安立無邊量故二即第四佛  
 海佛海唯佛分齊之境三即第一四即第二  
 衆生業海業因微細故云廣六五舍二句一

即第八佛神變海解脫作用即是神變神變  
依定加三昧言二舍三世智下文一念知三  
世由佛不思議解脫力故由加總句故合此  
二六即第五七即第九八即第七願海以願  
力故入法界中一切世界九即第十建立演  
說又菩薩根更有多義修十善道有三善根  
修諸地度精進爲根攝受正法信慧爲根攝  
養衆生慈悲爲根爲成佛道悲智爲根種種  
差別皆善知故二如此下類通可知第二何  
以故下釋所因中二先徵意云諸佛有力能

與有慈能普何以十智偏加普賢釋云普賢  
得此三昧法爾應與三是時下身加中亦二  
初此土後如此下類通前中復二先佛手摩  
頂明加被攝受又準梵本明十方佛身皆不  
來此舒臂不必長而同時摩頂各全觸頂互  
不相礙皆是如來自在業用二其手下辯手  
相用於中十句以顯無盡前五德相圓備謂  
牖纖直等故云相好莊嚴後復出下五句明  
妙用自在意明此手亘十方而包三世收因  
果而該人法深廣體用無邊自在非言能說

也後結通可知第三爾時下起定分所作事  
竟故於中二初此界後類通十方前中亦二  
初起定後衆益前中亦二初起主定二起眷  
屬定於中亦二初總謂一起一切起由此妙  
定即是一切三昧海故餘定爲門皆入此故  
彼全同此亦受海名二所謂下別辯塵數既  
多略列其十一即能知智三昧謂無一念暫  
差故云念念無差而不廢遍知爲善巧智二  
即所知塵境上能所一對三現廣刹四現居  
處即於世界總別一對楞伽經云如來藏識

頓現一切身器及諸受用器即廣刹受用即  
是舍宅五知心念差別六知身相名字即衆  
生色心一對七知廣處八知廣身即依正一  
對雖說微塵意彰佛廣虛空無方有物處則  
現唯如來藏是實物有依此建立處所各別  
隨菩薩行刹有淨穢用十隨衆生業趣十五類別故微  
塵中佛復有一義謂如來藏是真佛身其體  
廣大無能知者恒在六七微塵之中一一有  
情各有藏識故云各有無邊大身九從知一  
切法理趣者上八約事別別門顯此約理趣

總該諸法故云一切大般若經理趣分說諸法皆空無生無滅無自性性離一切相不可願求然第一義湛然常住當知即是此如來藏思益經說處處避空皆不離空深密經說理趣有六一者真義理趣謂二障淨智所行真實二證得理趣謂於真義得如實知三教導理趣謂自證已開示衆生此三爲本後三解釋四離二邊理趣謂有問言云何名爲真義理趣應答彼言非有非無非常非斷五不思議里趣謂有問言云何證得應答彼言謂

不思議若於諸法遠離戲論爾時證得真勝義性故知言說皆非真義六隨衆生所樂理趣謂有問言云何教導應答彼言隨諸衆生意樂各異順彼所欲方便開示彼真義者即此藏身彼不思議即此三昧無著菩薩說四意趣釋一切經亦理趣也如攝論辯上來九句唯第三四從現得名餘七皆從所知立稱如此等類有一切世界海微塵數合爲一定即知此定是一切定耳二普賢下大衆得益初標益時分亦是得益所由後其諸下正明

得益減數說九初五得菩薩法門句各一義  
 皆以前定舍此諸義故又此五句後後成前  
 前後四得佛果法即如來三業一得照藏身  
 之實智二得藏身力用之權智三身毛現刹  
 四應垂八相義兼口轉亦以藏身舍此義故  
 普賢出定他人益者感應道交故如春萌芽  
用十  
 陽氣久滿東風一拂衆藥齊敷諸菩薩衆積  
 善以深久同行願纔觀勝境萬德頓圓冥顯  
 雙資于何不可二如此下類通可知第四爾  
 時下現相作證分然得益心喜喜則地動及

有諸瑞諸會聞竟得益故現相居後此會鮮  
 即未聞已先得益故先現瑞以此會辯果顯  
 殊勝故文中有四一世界微動兼出瑞因由  
 因果二力言微動者是前相故二衆寶莊嚴  
 三出音說法四佛會雨寶略舉十種以顯無  
 盡前三事相寶後七法化傳通寶並是出世  
 善根所生第五普雨如是十種雲已下毛光  
 讚德分於中二初結前生後後正顯偈詞詞  
 中十頌分三初一總述前定次八別顯遍相  
 後一結讚所由別顯中二前二偈半直述前

遍後五偈半舉因顯遍於中二初半偈緣力  
遍後五因力遍於中四初偈即體而用故遍  
前半體後半用身相如空法性身也依真而  
住法性土也隨機普應受用化也問法性身  
土為別不別則不名法性性無二故不別  
則無能依所依用十答經論異說統收法身略有  
十種土隨身顯乃有五重一依佛地論唯以  
清淨法界而為法身亦以法性而為其土性  
雖一味隨身土相而分二別智論云在有情  
數中名為佛性在非情數中名為法生段說

能所而實無差唯識云雖此身土體無差別  
而屬佛法性相異故謂法性屬佛為法性身  
法性屬法為法性土性隨相異故云爾也今  
言如虛空者唯識論云此之身土俱非色攝  
雖不可說形量大小然隨事相其量無邊譬  
如虛空遍一切處故如虛空言通喻身土二  
或唯大智而為法身所證真如為法性土無  
性攝論云無垢無星礙智為法身故若爾云  
何言相如虛空智體無礙同虛空故三亦智  
亦如而為法身梁攝論及金光明云唯如

如及如如智獨存名法身故此則身舍如智  
 土則唯如四境智雙泯而為法身經云如來  
 法身非心非境土亦隨爾依於此義諸契經  
 中皆說如來身土無二此則依真之言顯無  
 能所方曰依真成如空義五此上四句合為  
 一無礙法身隨說皆得土亦如之六此上總  
 別五句相融形奪泯茲五說迴然無寄以為  
 法身土亦如也此上單就境智以辯七通攝  
 五分及悲願等所行恒沙功德無不皆是此  
 法身故以修生功德必證理故融攝無礙即

此所證真如體大為法性土依於此義身土  
 迥異今言身相即諸功德言如虛空即身之  
 性下經亦云解如來身非如虛空一切功德  
 無量妙法所圓滿故八通收報化色相功德  
 無不皆是此法身故攝論中三十二相等  
 皆法身攝然有三義一相即如故歸理法身  
 二智所現故屬智法身三當相並是功德法  
 故名為法身其所依土則通性相淨穢無礙  
 我此土淨而汝不見衆生見燒淨上不毀色  
 即是如相即非相身土事理交互依持通有



四句謂色身依色相土色身依法性土法身  
依法性土及依色相故又以單雙互望亦成  
五句謂色相身依法性色相土等準以思之  
此上猶通諸大乘教九通攝三種世間皆為  
一大法身具十佛故其三身等並此中智正  
覺攝故土亦如之即如空身而示普身于何  
不具此唯華嚴十土分權實唯有第九屬於  
此經若據融攝及攝同教總前九義為一總  
句是謂如來無礙身土普賢亦爾義隨隱顯  
不可累安達者尋文無生局見上言土有五

重者一唯法性屬前三身二者雙泯屬於第  
四三具性相五六七八所依四融三世間屬  
於第九五總前諸義即第十依二普賢安住  
下一偈半大願故遍兼顯遍於正中之依也  
重重皆遍用十不見者機不應故不見即是虛  
空身故亦遍不見處故三有一偈半明所現  
超勝四有一偈果德已滿不捨因門第三一  
偈結讚所由者自在難思現無不普標入一  
定實則普游非佛光雲安能讚述第六大衆  
讚請分前衆問佛佛示法主衆覩定起故讚

請普賢前但舊衆此通新舊故云一切戶  
同前故但略舉十頌分三初八歎主請彰其  
能說次一舉法請正陳所疑後一歎衆請明  
有堪聞之器前中二初五頌歎普賢因果深  
廣德明有說因後三歎能遍塵刹雨法德明  
有說果今初偈各一義初一讚已淨法身三  
句明因一句明果因有三義一因修法生義  
通緣了二由大願起即是緣因三依如來藏  
證真平等此爲正因真如即是不空虛空即  
是空藏平等與藏通上二義二讚遍住佛刹

第三句遍因餘皆遍相因中具智莊嚴故能  
寺照具功德嚴令無不覩三讚近佛四讚常  
空實境曰若不隨想轉故曹者輩也五讚度  
生曲盡微塵者細處有多衆生故二有三頌  
說法果中初一讚常演大法如空之言下喻  
廣大前喻無盡無差次一讚說無等法無等  
有二一能說力勝具二嚴故二所說無等說  
佛所行故後一頌舉因結果顯德有由曠劫  
因圓故故能雲雨說法二一頌舉法請中前  
品所問雖有多門統其要歸莫過三種世間

故今三句各顯其一又前問總該諸會此  
當會答故末後一頌歎眾請亦名自述此有  
二義一恭敬一心內堪受法二諸佛隨喜外  
有勝緣故應說也說則上順佛心下隨物欲  
大方廣佛華嚴經疏卷第十

用十

二十

音釋

勵力制切勉也 隙乞逆切與隙同罅隙也 臍丑凶切直也 藥知稟  
切花心 泯彌盡切滅也

永樂北藏

大方廣佛華嚴經疏

第一六九册

大方廣佛華嚴經疏卷第十一

軍一

唐清涼山大華嚴寺沙門 澄觀撰

世界成就品第四

初來意者前說緣既具此下正陳所說總明果相別答法界安立海問故此品來二釋名者世謂三世墮去來今故界謂方分有彼此故又世謂隱覆界亦分齊謂諸有為可破壞世即隱覆無為不可壞法從真性起同無為法即隱覆有為可破壞世各不相雜是其分齊是故感娑婆者對華藏而見娑婆感華藏

者對娑婆而見華藏成就者即能成之緣謂十緣等能所合目若以世界之成就即依主釋也準梵本中云世界海成就下文辯海譯人畧也意云佛果依正聞修方起衆生業報本自有之故但標世界耳三宗趣者標列無邊勝德廣釋所知世界海為宗然其意趣乃有多種一令諸菩薩發大信解悟入為趣謂令知佛及菩薩大悲行海廣覆無邊盡衆生界做而行故世界無邊悉嚴淨故衆生無邊悉化度故利由心異當淨自心及他心故世

界重重無盡無盡以大行願悉充滿故佛界  
生界非一非異能正了知成大智故未能了  
者熏成種故皆意趣也亦為顯此深意故此  
品來故下頌云離諸諂誑心清淨常樂慈悲  
性歡喜志欲廣大深信人彼聞此法生欣悅  
若不聞此無邊無盡無二之境滯於權小普  
賢行願何由可成故普賢自說為令衆生等  
文皆是此品之意趣也四釋文者三品正陳  
法海於中分二初二品明果後一品辯因然  
有二意一約兼明則前二品通答前三十句

果問後一品答前十句因問說因為欲成果  
從多而說分明舉果二將前二品望前品末  
三問通答依正若望下廣文正明於依傍顯  
於正留其正報後分廣故於中初品通辯諸  
佛及諸衆生所有利海後品別明本師之所  
嚴淨又此品明成刹之緣後品別辯果相故  
此品答安立之問其中雖明形等亦是緣故  
今初分二先總標綱要即為本分後正陳本  
義即是說分前中亦二先承力徧觀後牒問  
許說今初上入三昧內契其源今云徧觀外

審其相十海之義已如問釋但小不次耳但觀於十已含餘三十佛海之中具身等故大願之中含因等故第二如是觀察已下牒問許說於中分四一牒問畧歎二許說分齊三說所成益四讚勝誠聽今初分二先結前生後後佛子下正牒稱歎即從後向前牒上果問三十句也初十句牒上世界海等十問觀乃觀海歎乃歎智者智之與海反覆相成謂則自智觀海微細難知知唯佛智方能究盡海難思故佛智難思故海為深廣

若爾何不說智而但說海智離海境安知其相又表唯所證知故但說海十智望海與問開合小異名或小差謂一中前問及觀但云世界海今加成壞望前與智中亦有成壞之言此乃廣畧之異耳言清淨智者離所知障一決斷分明故初句貫下置清淨言餘皆畧也二然皆以多故廣故深故細故重疊難知迥超言念皆云不思議也二知衆生業海者衆生即報類差別業即善惡等殊從此別義觀中開為二句而因果雖殊同是所化衆生故此

及問并與智中並合爲一三即世界都稱或  
化衆生法謂安立施設方便軌則等也四能  
化諸佛數量無邊五即所化根欲差別難知  
而問中合在後之五海五海皆須知根欲故  
六即所應之時前就所觀但云三世今就佛  
智故云一念能知其問及與智皆云佛解脫  
海者以一念普知三世是佛不思議解脫故  
七稱性大願爲現身說法徧化之因故前問  
是名號海及壽量海與智之中名普入法界  
一切世界海智皆由願力故也八應機作用

神變無方九轉稱性大法輪海若據問中攝  
法輪海在演說中若約向觀攝演說海在法  
輪中今此開二演說第十謂隨方施設言音  
差別及法輪隨機故與智中亦開名佛音聲  
智二清淨下十句牒上六根三業十問向十  
約智明不思議此下直就法體爲不思議又  
望前問開合影略顯無盡故以總收別但廣  
身光等一應機之身脩短難測二現金銀等  
色類無邊三十蓮華藏刹塵數相好過於此  
四圓光大小隨機無盡五隨緣放光色類非



一六常光如焰具衆寶色七圓音無盡深廣  
難測八三輪攝化謂神足等九調令成益得  
果不空然其調伏曲有三種一者始終輒語  
應將攝者而將攝故二者始終麤語應折伏  
者而折伏故三者有時輒語有時麤語應成  
熟者而成熟故由具此三故無空過三安住  
佛地下十句牒上最初德用圓備十問前問  
中畧無變化及自在二句以攝在無能攝取  
句中義如前會亦以前文十海有故神變屬  
身自在屬智餘並可知第二如是等下許說

分齊謂具足說故承佛力者當會佛也若言  
具者何以下文唯說安立及世界海耶經來  
不盡故又雖說二世界海亦已通具三十句  
問謂界必有生而依住故有佛現故安立異  
故行業感故餘可意求第三爲令下說所成  
益十句攝爲五對一證智成福對二嚴刹紹  
種對亦即時處對三顯義演教對四生善滅  
惡對五淨業普願對文並可知此亦通爲一  
經教起之所因也此十亦對前十海十智恐  
繁不會第四是時普賢下讚勝勸聽中文二

初長行辯意後偈頌正顯今初十一句初一  
總標謂令聞法必生喜故餘十別顯喜義亦  
爲五對初二樂法生信對二證性立願對三  
了真入俗對四持法示佛對五開法增智對  
如文並顯二正頌中十頌分二初八讚後二  
勸前中亦二初二明佛出現意後六辯定法  
器於中初一棟非器次四示法器後一結歸  
佛力及後二勸文並可知然通此十偈亦是  
牒問以讚前長行總顯難思此下畧示難思  
之相而三十句間列不次含義並足欲委配

釋恐厭繁文第二廣陳本義分中分二初結  
集生起二諸佛子下普賢顯說於三十句果  
問中廣釋世界安立海問餘並攝之文分爲  
二初標舉章門後依章別釋今初分三一立  
數顯同二徵數列異三結畧顯廣今初先告  
佛子者使時情注其耳目也世界廣深目之  
爲海謂積刹成種積種成海海無別體世界  
都名然事類廣多略舉其十以表無盡三世  
同說彰其要勝又顯說決定無改易也二徵  
列中一明攬緣成立二成已依住三外狀區

分四內體差別五寶等莊校六垢穢不生七  
佛出差殊八劫住脩短九隨業改變十包容  
必均此十亦攝十八圓滿後品當會三諸佛  
子下結畧顯廣言世界海塵者智猶難測言  
豈具陳非證法雲安受茲說然上十事於一  
一刹多少不定具緣一種或一或二或三或  
多或成四句謂一成一切等清淨一  
種或一或多或亦無之以有純穢刹故其次  
七事各各唯一謂依空住者非依光等故餘  
準思之其無差別一切皆具以約體性平等

佛力融攝故說無差所以溌淨皆具也有云  
一切世界相望互同名無差者則違下經文  
經云一一世界海有世界海塵數無差別故  
若依相望互同則無有差別之事若將此十  
望刹種者具緣一種多少不定不得云一以  
其種中含有多類刹故清淨一事不得定言  
有無以其種中必含淨穢故其無差別多少  
亦均佛出劫住隨業轉變不得云一依形體  
嚴不得云多以其刹種別有體等故若以此  
十獨望刹海形體依住莊嚴等四許其唯一

餘必兼多故經云一一世界海有種種形故  
今言有世界海塵數者約融攝無盡之說也  
有云約一一刹海中所有諸刹各各一因等  
故有利海塵數者孟浪之甚何者且如刹海  
中刹雖多豈如刹海盡末爲塵之多若欲相  
同即一塵一緣方得相似何得以一刹一緣  
充一刹多塵之數況積具緣等十有刹海之  
塵其一具緣自有刹海塵數是則通有刹海  
微塵數个刹海微塵數矣一刹一緣一依一  
體安得充耶亦不得言通一切世界海說以

下依住云一一世界海有世界海塵數所依  
住故第二依章別釋者十事不同則爲十段  
一一皆有長行與偈長行中各三謂標釋結  
今初起具因緣標中略舉十種通成三世一  
切佛刹二何者下釋然佛土之義雖有種種  
不出其三第一法性土二受用土三變化土若  
開受用有自有他則成四土統爲二種謂淨  
及穢或性及相融而爲一有異餘宗又此淨  
土一質不成淨穢虧盈異質不成一理齊平  
有質不成搜源則冥無質不成緣起萬形故

形奪圓融無有障礙土既不等因緣亦殊今  
文中初三通顯次四別明後三則融攝轉  
變言初三者一如來神力者謂一切淨穢等  
土皆是如來通慧力成爲物而取擬將普應  
佛應統之皆稱佛土故蓮華藏海佛所嚴淨  
而內含淨穢然就佛言之故無國而不淨也  
既即穢而淨故不思議二法如是者梵云達  
磨多此云法爾或曰法性若是法性即以本  
識如來藏身爲所依持恒頻變起外諸器界  
若云法爾者謂有問言何以諸佛衆生起於

刹土答云法應如是不可致詰若會此二謂  
法應如是藏識變起三衆生業力者業有善  
惡國有淨穢故淨名以萬行爲因又云衆生  
之類是菩薩佛土謂法性雖一隨業成異佛  
隨異類取土攝生涅槃微善觀經三心等其  
類非一上三初因二緣三因次四別明者有  
因有緣初一自受用土因大圓鏡智之所成  
故二變化土因謂衆生菩薩共構一緣各隨  
行業來生其國凡聖同居三四二種他受用  
土因然初即初地以上如十大願中修淨土

願是也後即八地已上功用不退行之所成  
故八地中有淨土分後三融攝者通於因緣  
初一即八地已上攪大海為酥酪變大地為  
黃金以漆為淨以淨為漆自在攝生故十自  
在中有利自在窮其因者清淨勝解勝解印  
持隨心變故次一謂成正覺時其身充滿十  
方世界微塵刹土念劫圓融一時成立由二  
種因一善根所流語因中也二成道勢方明  
果用也此一受用變化相融也即如經初即  
摩竭陀地堅固等後一無問成與不成常能

融攝又前是妙覺此是等覺其法性土通為  
諸土之體窮其因者有正有助謂法爾為其  
正因以一切智及總以諸因而為緣因故其  
後三亦融前土非有別體又此十事展轉生  
起謂諸佛土總由佛力何以由之法如是故  
法爾云何而有異耶業不同故眾生由業佛  
復由何成一切智之所變故生佛有異何以  
凡聖同居同構一緣故何以復有純菩薩國  
菩薩願行力故既由行業何可轉變勝解自  
在故云何復得融攝重重佛及普賢自在力

故結畧顯廣如前已釋第二偈頌多以果顯  
因文有九偈束爲八段第一偈頌佛神力據  
此無邊刹海皆遮那嚴淨則下嚴華藏猶是  
分明理實而言願周法界次一超頌衆生菩  
薩同集善根三一頌頌第四成一切智自受  
用土因前半因後半果成唯識云大圓鏡智  
相應淨識由昔所修自利無漏純淨佛土因  
緣成熟從初成佛盡未來際相續變爲純淨  
佛土周圍無際衆寶莊嚴配經可見四一頌  
頌第六嚴淨願力及第七不退行願修諸行

海無有邊者論云謂平等性智大慈悲力由  
昔所修利他無漏純淨佛土因緣成熟隨住  
十地菩薩所宜變爲淨土或小或大或劣或  
勝前後改變上經雖云願力非無有行爲分  
功用有無長行成其二句皆他受用故偈爲  
一初句頌第六次句頌第七以八地已上念  
念入法流心心趣佛境故後之半偈通其二  
文五一偈却頌第三衆生行業加造業因煩  
惱所擾造於穢刹欲樂非一感土有殊前與  
菩薩同修必多善業故此明於煩惱六一頌

頌菩薩勝解七一頌超頌普賢願力以普賢  
 有三一位前普賢但發普賢心即是非今所  
 用二位中普賢即等覺位故此居佛前三位  
 後普賢謂得果不捨因行故長行居後八有  
 二偈却頌如來自在前偈頌果用後偈頌善  
 流畧不頌法爾法爾即是法性通故畧之又  
 第七偈依中有依第八偈正中有依第九偈  
 融於三世故三共顯融攝無礙然其無礙通  
 有十種諸教說土或謂但是無常或云心變  
 理事懸隔多一不融故今經宗要辯無礙一

理事無礙謂全同真性而刹相宛然經云華  
 藏世界海法界無差別莊嚴悉清淨故二成  
 壞無礙謂成即壞壞即成等三廣陞無礙不  
 壞相而普周故經云體相如本無差別無量  
 國土悉周徧等四相入無礙下文云以一刹  
 種入一切一切入一亦無餘及此文云身包  
 一切等其文非一亦是一多無礙五相即無  
 礙文云無量世界即一界故六微細無礙經  
 云清淨珠玉布若雲炳然顯現諸佛影等七  
 隱顯無礙謂深淨異類隱顯等殊見不同故



八重現無礙謂於塵中見一切刹刹內塵中見刹亦然重重無盡如帝網故九主伴無礙凡一世界必有一切以為眷屬下經云毗盧遮那昔所行種種刹海皆清淨種種刹即眷屬也十時處無礙謂或於一刹現三世劫或於一念現無量刹如今第九偈文又下文云三世所有諸莊嚴摩尼果中皆顯現此十無礙同時具足自在難知散在諸文可以六相融之第二段所依住通深淨也長行釋中十事文並可知然依異者由於心樂有差別故

謂一依莊嚴住者樂飾好故二樂無礙故三樂即質光故四怖眾苦故五愛離質光故光作寶色非寶發光六奉聖教故七求神護故八求天護故九菩薩願力所任持故十普安眾生成故如何廣大世界依有情等小類而住<sup>十一</sup>比有二義一外由內感故說依身此復有二一宿因力頌云業力之所持故二現在轉變力即世主菩薩神力任持攝屬已故二由無漏體事大小無礙得相依住故二頌有二十二文分兩別初一總顯一切世界依佛神力

而住故梵本云一切依佛神通現長行不列者若列則餘九非佛神通故偈以此文該於前十皆佛神力後二十一偈別頌前文分之爲九初一頌依莊嚴住舉能顯所莊嚴之具皆寶成故二半偈頌依空三半偈頌依寶光明四一偈頌佛光稟佛教光成世界故五一偈頌寶色光明住以嚴及覆影顯依住六二偈頌佛音聲謂妙善所感音聲有威神故七一偈頌七八二住兼顯說法八有六偈頌依菩薩身住若樹若水皆菩薩身菩薩現故長

行但云菩薩此中兼依佛身此中雖有願力是上宿善所持非普賢願九餘八頌皆頌普賢願所生住於中三初二偈明廣大國土周法界故前偈明淨識所生心外無體故如影像後偈難思業起起不離空次四偈明微細國土調生自在然佛力現此亦普賢願收故二段文皆兼佛力末後二偈彰刹體性結歸有在初偈明刹依性有有即非有次半成壞更起猶若尋環後半結歸普願兼顯廣業第三形相亦通滌淨長行釋中非圓方者三維

八隅皆非圓方故云無量差別山在形者如  
山似焰皆取上尖對上方圓等故餘並可知  
三結頌中十偈分二初一總讚勸觀餘皆正  
頌前義兼舉因顯果於中初二頌前十段後  
七頌前無量差別今初摩尼輪者即亦旋之  
類淨焰莊嚴頌上山焰門闍十一競開義兼宮殿  
後七中分二前三彰刹由因異後四明自在  
由佛一毛孔內難思刹者更有一理謂修行  
者居自報土各各不同佛攝衆生所現國土  
以彼報故重重而現不離一毛第四刹體唯

然淨刹長行略辯二十種體然其刹體諸教  
不同或以八微爲體或以唯心爲體或法性  
爲體或一切法爲體今皆具之謂衆寶等即  
是八微加之佛音聲即九微也一念心現是  
唯識頓變佛變化者或通果色或一切法令  
三世間互相作故又融上諸說爲無礙刹體  
言日摩尼輪即日輪也香通質氣佛言爲體  
者無礙體事故又依如來說力起故頌中十  
偈初偈頌三謂初二及第六不可壞金剛次  
偈頌第三第四三有一偈頌第五一切莊

嚴光明四有一偈頌二種體願力生者頌佛  
力持如影像現頌妙寶相若兼二事頌佛變  
化五有一偈頌二種體上半頌日輪下半頌  
微細寶第六偈頌寶焰殊妙之言亦兼香也  
第七偈頌寶冠寶冠亦佛變化非正頌佛化  
也第八偈頌一念普現境界第九偈頌一切  
寶莊嚴示現及頌後三體摩尼光者頌菩薩  
形寶及寶華葉佛光明者頌佛音聲聲光成  
刹故第十偈結歸普賢第五段刹莊嚴中唯  
明淨刹其中或寶為嚴或人或法或說法修

行示現融攝皆為嚴刹以人法為寶故又由  
說法因等得莊嚴果以果名因為莊嚴也十  
頌分二初一總顯刹嚴後九別頌上文於中  
初一偈頌初妙雲次一偈頌第二菩薩功德  
及第四菩薩願海次一偈却頌說衆生業報  
後六偈如次頌後六事第六段明刹清淨方  
便者唯約淨也若約隨宜攝物佛應統之則  
淨穢皆稱佛土若就行致唯淨非穢然淨有  
二種一世間淨離欲穢故以六行為方便上  
二界為淨土二出世間淨此復二種一者出

世所謂二乘以緣諦爲方便權教說之無別淨土約實言者出三界外別有淨土二乘所居智論有文二出世間上上淨此謂菩薩即以萬行而爲方便以實報七珍無量莊嚴而爲其土今此正明菩薩兼顯二乘然出世上

上淨中復有二種一者真極佛自受用相累兼亡而爲方便二者未極等覺已還故仁王云三賢十聖住果報唯佛一人居淨土未極之中復有二種一八地已上一向清淨以永絕色累照體獨立神無方所故其淨土色相

難名二七地已還未出三界無漏觀智有間斷故非一向淨若依瑜伽入初地去方爲淨土三賢所居皆穢非淨此分受用變化別故約此經宗十信菩薩即有淨土故今此文始自近友終成佛力皆淨方便故通萬行然淨方便即是淨因長行亦可爲等流果如云久近善友得生有善友之刹中故即十事皆淨相也然望莊嚴有同約門別故望具因緣當知亦爾又起具因緣通於染淨此則唯淨莊嚴多約其果清淨多約其因又前多修善此

多治惡故於世界此如洗滌彼如粉繪別釋  
中一近善友同善根者如善財夜神處廣說  
二智導慈雲大彌法界三法門勝解皆已淨  
治約位地前也四即初地證徧行如故云觀  
察一切境界生如來家故云安住五修治等  
者見道之後修道位故餘雖未滿一切皆修  
若約圓融亦得稱滿六初地勝進徧學十地  
行法後後但是依法行故上三皆初地七初  
地發願順行至第八地一切皆成故名出生  
一切願海而言淨者純無漏故八即九地二

乘出要唯止與觀菩薩出要唯無礙辯令眾  
出故九一切莊嚴者十地二嚴皆成滿故十  
淨方便力即是普賢佛功德也十中前三變  
化淨因後七受用淨因上欲總收諸土故依  
次豎配若約橫修初心即可圓具其十頌中  
九偈分二初一總明能所淨前半方便後半  
清淨皆上句果下句因後八別頌前文於中  
初四如次頌上四淨初地慈悲為首故云為  
生修行徧滿真如故云廣大第五偈頌修治  
淨及超頌第七願淨以願通初地八地此據

初地故超頌也第六偈頌前第八出要第七  
偈頌第九及却頌觀菩薩地義通前後故  
第八偈頌方便力上來且配長行其間亦兼  
餘義第七段佛出差別者十事五對於海及  
種有此差別五中初二隨彼類故次一緣廣  
隘故次一隨機宜故五熟未熟故十頌分三  
初一頌總標次五偈別釋如次頌前五對後  
四頌總結既隨心總徧故刹海塵數未足為  
多第八段劫住不同謂刹住經停時分也隨  
能感因有長短故長行略列有十大數更有

永樂北藏

大方廣佛華嚴經疏

第一六九册

多少不同如標結中及頌所顯並通諸刹不  
謂淨長如大地獄其壽更長人趣却促故極  
惡極善受時即多更約異門亦不可定也十  
中唯九者欠不可說不可說也並如阿僧祇  
品偈中十頌然劫但時分無別義理故此偈  
文轉勢頌之畧分為三初二總標許說頌上  
標也次有一偈通頌上列兼顯脩短之因以  
願力故餘七頌總結偈各一義一明脩短通  
於深淨結以心想二淨劫住久釋以因深三  
列諸劫名深淨相攝四佛興願異故入劫不

同五一多互融齊攝雙現六時法相攝普入  
無邊七結由想心示以方便一方便者即了  
唯心也一念與劫並由想心想不生長短  
安在非長非短是謂清淨不壞於相則劫海  
無邊第九段劫轉變故差別者此有二種一  
者但約感成住壞劫皆名轉變二唯約住劫  
之中居人善惡令染淨轉變釋中具二初一  
即是前義故云無量成壞劫轉變言法爾者  
法爾隨業轉也若爾何異起具因緣因緣意  
在於因轉變意彰於果又因緣通有唯成不

壞如自受用因是也餘九釋後義一過惡緣  
故淨變為染下文云泉池皆枯涸等二修人  
天大福令世界多染少淨故先云染如下文  
云粳米自然生等三即地前以未斷障故非  
純淨以淨多故故先云淨經多云染淨與前  
何別或譯人之失或傳寫之誤四即證發心  
居受用土故但云純淨五各各游者即二地  
至十地諸菩薩遊戲神通以多莊嚴而嚴一  
刹或以一嚴而嚴多刹所至染刹則能莊嚴  
也六大莊嚴者即普賢位嚴於微塵內刹如



上口光召衆等是七莊嚴滅者此明夫善緣而惡現謂如來示滅能事隨滅佛滅百年乳不及水況今之世況於滅極釋爲上味鐵爲上嚴八如彌勒來也九以佛神通于何不淨淨名足指案地法華三變淨土即其類也上之十事初總餘別不出業故又初二屬凡次十七四菩薩後三屬佛又約佛菩薩即染淨約於凡夫即淨成染十頌如次頌前可知第十無差別者謂前九辯諸世界約相不同道業染淨由於衆生有差別故今云無差性無二

故故偈云業性起也又約權設則種種差別今約實說則一切無差如教法中或說三乘即是差別說華嚴時一切無差又皆是諸佛之所用故一一融攝等無異故故前九差別是此無差之差今此無差即是前九差之無差也故法華云衆生見燒淨土不毀二皆相即由依此義說淨土中十八圓滿一一稱真皆周徧故二釋中十事一海中包數同則盡海之塵一塵一刹已是含攝之義二佛示威力同三道場同同真性故四衆會同常隨衆

故五光明六名號七音聲八法輪方便上七  
 皆約不動一而普徧無差九塵含刹海十塵  
 容佛境此二約不壞相而廣容無差頌中十  
 頌如次頌上十義但第六約身與前名體異  
 耳而前但約平漫無差今顯塵內重疊融攝  
 無差之義若云約共同事者何以不言深同

業苦同豈世界海中都無此耶

華藏世界品第五 已下入第八經

初來意者前品通明諸佛刹海今此別明本  
 師所嚴依果答世界海問故次來也二釋名

者準梵本具云華藏莊嚴嚴具世界海之徧  
 清淨功德海光明品譯者嫌繁乃成太畧處  
 中應云蓮華藏莊嚴世界海品謂蓮華含子  
 之處目之曰藏今刹種及刹為大蓮華之所  
 含藏故云華藏其中一一境界皆有刹海塵  
 數清淨功德故曰莊嚴世界深廣故名為海  
 有云世界依海故立海名者恐非文意以下  
 云華藏莊嚴世界海住在華中故其梵云嚴  
 具即是能嚴其徧清淨功德海光明即顯嚴  
 之相用依體有用故致之言今文舉體攝用

但云華藏約事可爾何因利海相狀如斯略舉二因一約衆生如來藏識即是香海亦法性海依無住本是謂風輪亦妄想風於此海中有因果相恒沙性德即是正因之華世出世間未來果法皆悉含攝故名爲藏若以法性爲海心即是華含藏亦爾然此藏識相分之中半爲外器不執受故半爲內身執爲自性生覺受故如來藏識何緣如此法如是故行業引故二約諸佛謂以大願風持大悲海生無邊行華含藏二利溱淨果法重疊無礙

永樂北藏

大方廣佛華嚴經疏

故所感刹相狀如之是以出現品中多將世界以喻佛德細尋文意乃由佛德世界如之三宗趣者別顯本師依報具三世間融攝無盡爲宗令諸菩薩發生信解成就行願爲趣餘如前品但總別異耳融攝之相亦見前文十一賢首立華藏觀復有十德大同小異如彼文說第四釋文一品分三初明華藏因果自體二明藏海安布莊嚴三明所持刹網差別三段如次釋華藏莊嚴世界之名今初分二先長行後偈頌長行亦二初舉果屬人顯因深

第一六九册

廣二彰果體相辯其寬容今初也謂指此刹海是我本師修因所淨然因深廣有三勝相一長時修刹海塵劫故不唯三祇二於多劫一一遇多勝緣不唯勝觀釋迦等佛三於多勝緣一一淨多大願願淨國等不唯淨一無生等由上三重故云深廣然瑜伽起信等約三乘教一方化宜一類世界定說三祇今約一乘該通十方及樹形等界故云刹海塵數是以寶雲經言我為淺識衆生說三僧祇劫修行然我實經無量阿僧祇劫修行又時無

別體依法上立法既無盡時亦無窮況念劫圓融不應剋執第二諸佛子下彰果體相者植因既深果必繁奧然所依刹量諸教不同小乘但一娑婆三乘有大小之化或色究竟為寶或他方別有淨邦今一乘十佛之境大小無礙淨穢相融且依一相說有邊表實則一重橫尋無邊況復重重塵合法界然準下別顯應有十事一所依風輪二風持香海三海出蓮華四華持刹海五繞臺輪山六臺面寶地七地有香海八海間香河九河間樹等

十總結多嚴今文之中唯闕一河文且分四  
第一能持風輪第二所持香海第三海出蓮  
華第四華持刹海然其刹因有其總別已見  
上文爲顯別義且明一因成於一果今初風  
輪之因即大願等亦如前釋於中文三初總  
標數二略列名三別舉最上列中名平等住  
者一徧持諸位故二稱實性故餘文可知風  
並在下寶在臺面以力遙持三舉最上者勝  
力能持香海故立其名第二能持下所持香  
海以摩尼發光普照一切嚴海底岸及寶色

永樂北藏

大方廣佛華嚴經疏

第一六九册

香水故立此名又藏識名海具德深廣故流  
注名水刹那性故又佛性名水遠熏名香聞  
未證故涅槃亦云有人聞香第三此香水下  
所出蓮華葉放異光又發勝香高出降伏故  
立此名又所發萬行一一覺性故曰光明皆  
能普熏即香義也第四華藏下所持刹海四  
方均平總顯形相清淨堅固彰其體性金剛  
圓等別明所有即下別顯此爲其本一山二  
地三海四樹各別區分即總顯多嚴但闕一  
河以下有別顯故此畧明下亦略頌第二偈

中然長行偈頌有十例五對謂有無廣略離  
合先後為八九或超間十或頌已重頌故釋  
頌文不可一例上下準之此文略有四例一  
宿因現緣經離頌合二所成果相經略頌廣  
三現緣風輪經廣頌略四山地海樹經有頌  
無十偈分二初二頌上因相即辯因招果餘  
頌果相於中分四初一偈半頌風輪皆上句  
所持下句能持初半偈以果持果後偈兼明  
能成之因前半離障願令清淨故後半無礙  
願依空住故二有一偈頌香海尋此了名三

有三頌半頌蓮華初一偈半釋種種光明華  
則顯此華以寶為體次一偈釋香義就法以  
明寶中出佛佛出世主如從質發香遠熏之  
義後一釋幢義演佛是高出義調生是摧伏  
義四有二頌明利自在總頌上所持刹海初  
偈自在一一稱性故即同時具足相應門也  
心塵準思寶光現佛者依正互融故後偈結  
歸普因故能含攝第二別顯安布莊嚴文分  
為六第一四周輪山二寶地三香海四香河  
五樹林六總結各別有偈今初輪山則清淨

戒德內攝外防之所成也長得中三初總舉  
所依二梅檀下別顯體相三如是下結德無  
盡今初山所依處即地面四周日珠王者所  
依處地故舊經云依蓮華日寶王地住亦有  
言大華之上別有此蓮為山所依義似不順  
所以地受此名者前華名種種光明藥偈中  
云光焰成輪又云一切寶中放淨光明知此  
華以寶為體是則如日輪之珠王為蓮華也  
斯即總華之稱二別顯中前取堅利且云金  
剛今明具德略有十相前四自體圓滿後六

外相莊嚴一身為總形摩尼圓明梅檀芬郁  
皆戒之德也二山峯謂秀出孤絕威伏諸惡  
三山輪古有二義一山彎曲之處二山腹跳  
出如師子座半月為輪準下偈文輪居山下  
為山所依四成山之緣上舉三事各別有體  
今顯金剛內含光焰徧成其體如世土石雜  
而成山金剛徧故得金輪名餘六文顯並在  
山間應頌有十文分為二前六明山體相莊  
嚴頌前別顯後四辯山妙用自在亦顯依正  
無礙即頌前結文前中五初一總頌圍山初

句所圍次二句能圍後句出因言無邊者有其二義一但總相顯多故云無邊實有邊表二說有圍山外者是無邊之邊不礙理而即事故今云無邊者是邊之無邊不壞相而即理故正有一頌頌前山輪三一頌山體四一頌成山之緣五六二偈頌前水等諸嚴及加衣等後四妙用自在並顯可知第二臺面寶地即體心性定之所成也長行文三初標所社二一切下別顯體相莊嚴三總結二中十句初一地體標以金剛釋以堅固不壞徧華

藏地盡是金剛故上菩提場地徧華藏也二地相平淨餘八皆莊嚴謂三飾以寶輪四畜以寶藏五間以異寶六散以寶末七布以蓮華八分置香摩尼九充以莊嚴具但云諸嚴嚴有多少三世佛國之嚴而為嚴者顯無盡之嚴具也十覆以寶網單隱暎莊嚴網有何用普現佛影此網何相如天帝網而布列也又此帝網重現無盡成上普現如來境界及上一一境界皆無盡也偈有十頌分二前七頌前別顯後三頌總結前中三初四頌前八段



而小不次者顯前無優劣故或重或廣者顯義無方也恐繁不配可以意得次二頌嚴具如雲後一偈頌如天帝網謂一寶既收一切則彼刹諸塵復攝一切即重重也後三偈頌總結者結其所屬初偈結屬道場次屬佛力後結能知之人第三地面香海者上之大海既是藏識今明心華之內攝諸種子一一種子不離藏識海故有多香海然一一具於性德故皆有莊嚴長行分二初總舉數準下刹種及梵本中皆有十不可說今闕十字或是

譯人之漏或是傳寫之失下標種處亦然二一切下別顯莊嚴準後總結應云一一香海各有若干莊嚴今文畧無若案文取義一切之言即一切海總以妙寶而為其底等文有二十句前十明海體狀一底二岸三網四水五華六塗七聲八光九人衛現通十結廣無盡後十寶下十句攝異莊嚴唯白蓮華當於水中餘皆在岸言十寶者有云金銀瑠璃磔磔碼碼珊瑚琥珀真珠玫瑰瑟瑟為十十中前七即是七寶芬陀利者即白蓮華亦是正

敷榮時尸羅幢者應云試羅此云美玉若言尸羅此云清淨二義俱通餘並可知以法門合之可以意得頌中菩薩持蓋經有頌無日焰光輪經無頌有且分為二初三頌初十句一頌底二頌岸及網纓即網類三頌餘七細尋可見餘七偈頌後十句而小不次謂一頌階陞欄楯二頌樹林三頌華敷四頌幢相五頌城珠六頌牆閣繚者纏也七頌結嚴屬佛一昔因二現力第四海間香河即隨一一心同時相應功德流注也長行亦三初舉數二

一切下若嚴三若廣下結廣嚴中嚴事並無差別故云一切皆以謂並用寶體寶嚴聖靈游集光雲相暎萬象浮輝十句可知三結廣中既繞小海之小河已有刹海塵數之嚴彌顯諸標結文非唯約事皆是一多無礙耳偈中初半偈頌岸體金剛次一偈半頌摩尼嚴岸三一頌光雲言音次三皆頌漩瀆出影七頌網鐸垂覆及總現諸嚴前現事嚴此說道行八頌現佛依正九頌浪出妙音十頌水出光雲更有影略可以意得第五河間華林長

行有三初總標次一一下別顯後其香水下  
總結別顯二事謂華及樹水陸各一實有多  
事然此一段文勢少異不列十事以顯無盡  
而但舉二展轉明多謂初一白蓮後一寶樹  
於此一樹出五業用一出莊嚴雲二寶王照  
耀三華香盈滿四出音演法五兩寶徧地於  
中文有總別及結別有八事通三世間初六  
現器次一現正覺後一現衆生世間如劍葉  
林等現惡業報天意樹等即善業報男女林  
中朝生暮落皆業報海如是等下且結樹之

雨寶已有刹海塵數例上出雲等四一一皆  
然一樹之中已有多刹海之嚴矣次例芬陀  
利華亦同於樹其華與樹各有四天下塵一  
一皆爾如華樹等類復應有刹海塵數之物  
故為無盡之嚴也後應頌不次文分為三初  
六頌寶樹次一頌白蓮華後三結嚴所因謂  
由佛等力明體用無礙現而常如然此三偈  
有多意趣一者初一偈則器世間次一智正  
覺後一衆生欲明一一事中皆現三世間嚴  
影略其文耳又初明一果能現次例一切莊

嚴後明塵塵皆爾從略至廣從麤至細又初明佛力次彰願力後隨樂力又初果後因願通因果又初自後他願通自他又初明即性無性體本不生次明即相無相現無來去後明不壞於相各見不同方顯華藏之嚴皆言

亡慮絕非可情求也第六辯總結莊嚴上來諸段雖說莊嚴猶未能盡故今總顯一一之境若說不說皆具刹海塵數功德莊嚴是以文云一切境界長行文二先標莊嚴難測二何以下徵釋所由清淨功德文含二義一謂

衆多果嚴即是清淨功德二謂一一果嚴從多清淨功德因生以因望果應成四句謂多因一果一因多果等故隨一一事即曰難思是以頌云但由如來昔所行神通願力而生斯即因也若語果嚴略有五相一者令多周給一切二者令常永無乏絕三者令妙悅單可衆心四者稱性無生無相五者自在鎔融無礙偈文具之總斯五義故曰難思況因果相即偈文有十大分爲二前六果嚴用勝後四對因辯果前中分三初四別明嚴用次一

結屬現緣後一總結多類後四對因辯果中  
一由行願神通為因故獲變化如鏡像果二  
以普行勝智為因故得一塵淨眾刹果三由  
長時近友為因故得刹那頓現之果四彰淨  
國之意使做而行之前半智境嚴即無嚴謂  
自受用上周徧無等法性之土體性無生二  
昏無相後半悲應無嚴之嚴嚴徧法界無住  
之住常住刹中上釋莊嚴竟第三明所持刹  
網釋品目世界之言又前明本刹今辯末界  
故兼深淨文分三別第一告眾許說二諸佛

子此不可說下雙標二章三諸佛子彼諸世  
界種下廣釋二章標二章者謂種及刹然刹  
種依刹海諸刹依刹種則寬陋可知名從何  
得欲明世界無邊方便顯多故立此名謂積  
多世界共在一處攝諸流類故名為種如是  
種類復有眾多深廣無邊故名為海如積多  
魚以成一種魚龍龜鼈山泉島嶼乃有多種  
並悉攝在一大海中而言世界無邊者海外  
有海海無窮也若爾種無別體攬界以成  
何以下文說有形體雖依種類以立種名何

妨此種別有其體如多蠶孔共成一窠豈妨此窠別有其體上舉魚龍蓋分喻耳即依後義亦得名為種性依於此種能生世界如依一未有多穀粒舊經云性多取此義恐濫體性故改為種言有不可說者若準下文香海及種皆有十不可說梵本亦有今脫十字多是傳寫之漏耳三廣釋二章中文分為二初通明刹種不同釋刹種章二別明刹種香海雙釋二章二段各有長行與偈今初長行文二初列十門後隨門廣釋今初也然此十門

刹種之異並悉不離所依華藏故云於世界海中所列十事與成就品都望全異彼通一切海此明一海中種故若別別相望互有互無起具因緣清淨佛出劫住轉變彼有此無方所分齊行列趣入力持等五彼無此有依住形體莊嚴無別彼此名同前後互出都有十五皆顯十者俱表無盡而或異者彰義多端復有同者恐濫全別何以起具前有此無前段總明成立因果此中正辯何等世界住故餘可思準然與前同已如前釋不同五

事今當說之各各方所者若圓滿方所周滿  
法界無處不有不即三界不離三界若隨宜  
方所隨十方中向背各別各各趣入者依門  
趣入約法門者謂三解脫又互相現入而無  
來去等各各分齊者約事隨宜廣陋異故約  
佛分齊則十方無際各各行列即是道路約  
事可知約法謂大念慧行以為游路各各力  
加持者即約食能令住約法廣大法味喜樂  
所持又此互出顯佛淨土十八圓滿十五攝  
故言十八者顯色形色分量方所因果及主

輔翼眷屬住持事業攝益無畏住處路乘門  
及依持云何攝耶此具因緣即因圓滿依住  
即是依持形狀即當形色體攝二種一攝顯  
色七寶光明為體性故二攝果滿隨類之果  
可知約佛大圓鏡智相應淨識之所變故故  
上偈云或一念心普示現為體莊嚴攝三謂  
一攝住處如來莊嚴為住處故二攝輔翼眷  
屬嚴故三攝眷屬有餘眾故清淨攝三一攝  
事業謂作有情之義利故二攝攝益謂現證  
解脫滅彼煩惱及災橫故三攝無畏謂內無

災橫外無怖畏故此中佛住攝二圓滿一攝  
主二攝乘或說一乘等故方所分齊二名全  
同行列即路趣入即門力持為任持劫住轉  
變十八中無義同於果及事業攝亦可成二  
十圓滿於理無違謂劫住窮未來故轉變即  
如來神通變化世界海普清淨轉變即圓滿  
義其無差別彼文雖無即由此故方顯圓滿  
餘皆隨宜故云各各無差既同云何各各所  
無差事有種種故若將此十對成就品十亦  
得相攝恐厭繁文又上諸文一一段中具多

圓滿一一融攝故異餘宗二隨門廣釋但釋  
其三謂依住形體餘七雖略義上已說今初  
依住中初列後結文並可知二形狀中初列  
二十種後結塵數不同今初迴轉形者攝褻  
往來之形也壇墀形者築土為壇除地為墀  
佉勒迦者梵音此云竹篾也三明體中先列  
後結列中亦二十種前十色栴後十是聲會  
釋如前應頌有十分為六段初一頌依住次  
一形狀及布列安住次三體性次三頌於五  
事謂初偈初二句頌所入門次句方所第四



句莊嚴餘二偈中廣大刹之本相即是分齊  
 廣陋此彼相入亦頌趣入初偈以多入一後  
 偈一多互入皆入而無入入則壞緣起不入  
 壞性用又要由不入方能入耳又約體本空  
 故無來無入約相不壞故如本無差以性融  
 相故得互入次一頌無差謂塵容佛海等無  
 差故後一頌力持主伴皆是神力任持普化  
 之言兼於法味

大方廣佛華嚴經疏卷第十一

永樂北藏

大方廣佛華嚴經疏

第一六九册

音釋

分齊分扶切問切齊在詣軟乳克切徵知陵切  
 攬魯敢切穢烏廢切詰契吉切構居侯切  
 也取也也烏廢切也問也也居侯切  
 繪胡對切稗稻穢切嫌胡兼切奧於到切  
 也畫也也似也也憎也也到切  
 藥乳捶切玳玳瑁切瑰瑰切繚繚切  
 花須也也切切切切切切  
 漩漩切復復切島島切嶼嶼切禰禰切絜絜切  
 呂切海也與蟻同隘與狹同禰禰切絜絜切  
 中洲也與蟻同隘與狹同禰禰切絜絜切  
 協協切禰禰切絜絜切

永樂北藏

大方廣佛華嚴經疏

第一六九册

大方廣佛華嚴經疏卷第十二

軍二

唐清涼山大華嚴寺沙門澄觀撰

第二別明種刹香海雙釋二章者謂香海依刹海刹種依香海諸刹依刹種亦有長行偈頌長行分三初總舉諸海所依二次第別顯

海種及刹第三總略結釋今初也上來雖復但標刹種及刹二章而釋依住中皆云依海故列海數此多香海并在刹海地面故云所依言如帝網者大都分布則似車輪其有別者謂帝釋殿網貫天珠成以一大珠當心次

以其次大珠貫穿而繞如是展轉遍繞經百千而若上下四面四角望之皆行伍相當今此香海雖在地面分布相似又有涉入重重之義故云如也第二諸佛于此最中下次第別顯諸海種刹文分爲三初辯中間一海次辯右旋十海後明十海所管之海然十海各管不可說佛刹塵數之海總顯則有十不可說佛刹塵數次第說者但有一百一十一海餘皆略指今初中央一海文分爲二先明香海出華以持刹種後有不可說下明所持世

界前中有三初香海名以多華發光故亦由菩薩行華而爲因故二華名謂以香摩尼嚴此華故又從摩尼底而出生故約法即萬行圓明之所成故海能有華故受華名華依於海取海底稱三種名約事實光遠照故約法

其世界種正是所含種子一一皆有大智光明徧照法界義故性德互嚴故第二所持世界初三初總舉大數次其最下方下別辯二十層大刹後諸佛子下類結所餘初文可知第二別辯中準標及結皆有不可說刹塵其

別辯中但列十九佛刹塵數爲二十重其能繞刹但有二百一十佛刹塵數下當會釋二十層即分二十段最下層中文有七事一舉名二辯際謂世界所據之際如金剛際三依住若準此名大同刹種所依蓮華而舊釋云釋二於前無邊香海所出華上更有此華持此一界者以例上諸層別有依住故爲此釋何妨最下依於總華思之四形如摩尼者爲摩尼狀有於八楞似方不方似圓不圓故異下八隅五上覆六眷屬七本界佛名離二障垢智

眼清淨照世如燈然佛德無邊各隨一義二層已去或有八事謂加去此遠近故或有九事加純淨言故準此若無此言即通深淨此上眷屬漸加利數中間諸事可以準知五中云普方者都望即方而一面之中亦有多隅角隅即是角文體容爾其第十三主刹即此娑婆言形如虛空者靜法云大小乘經並說虛空體無形質不可見相今云有形者迴文者誤梵本云三曼多<sub>圓</sub>第<sub>縛</sub>瞞<sub>嚙</sub>曩<sub>天</sub>伽<sub>宮</sub>伽<sub>那</sub>虛<sub>空</sub>阿<sub>楞</sub>迦<sub>羅</sub><sub>莊</sub>覆<sub>僧</sub>塞<sub>恒</sub>那<sub>狀</sub>迴文應以

形狀置周圍之前虛空安天宮之上然後合綴飾云其形周圍以空居天宮莊嚴之具而覆其上靜法此正深有理致今依經通之亦有理在謂空雖無形隨俗說故以俗典指空為天謂天為圓宮其形如鐵故說天勢圍平野亦如法華云梵王為衆生之父亦隨俗說耳第十五云形如卍字者靜法云室離鞞<sub>三</sub>本非是字乃是德者之相正云吉祥海雲衆德深廣如海益物如雲古來三藏誤譯洛刹曩為惡刹攤遂以相為字故為<sub>象</sub>手<sub>入</sub>義通

永樂北藏

大方廣佛華嚴經疏

第一六九册

此相以爲吉祥萬德之所集成因目爲萬意在語略而義含合云萬相耳餘並易了第三類結所餘此中非唯結數兼總顯上文所依住等文分爲四一總結都數二各各所依下結形類三此一一下結眷屬四如是所說下彰其所在今初即舉本刹種結有若干此所結刹定是主刹以下文指此不可說佛刹更有兩重繞故其直上中間但有十九佛刹而結有不可說者以傍論故不爾豈一刹種最下唯一主刹故知如向所說主刹橫豎共論

有不可說故下結其所在云及在香水河中思之二結形類中三初列十門旣言周而圍繞則知旁去二所謂下廣說十門形狀有十八事望前刹種形中闕須彌山形及嚴具形餘皆全同但此約刹爲異耳三如是等下結歸都數三結眷屬中然有兩重主伴此一者指上不可說塵數也若望前文主刹直上繞數漸增今總相說故云一一各有十刹塵也又是欲顯無盡義故一一復有如上所說微塵數者如上之言文含二義一即總指前

能繞所繞之數繞一世界不欲繁文故云如  
上二者如上亦用十佛刹為能繞也依此則  
似譯人文繁理隱何不言一一復有十佛刹  
塵數耶若依前義則譯者之妙四彰所在即  
最中香海既言及在香河明知傍去第九下經  
第二明右旋十海即繞處中之海有其十也  
各有種刹十海即為十段今初第一離垢焰  
藏海文二先牒中海以定方即是所繞從東  
為首二次有下明能繞之海於中二先明海  
華刹種後此中最下方下明種所持刹有二

十重下九海例然今第一海二十重中各有  
七事一相去遠近二刹名三形狀四所依五  
上覆六眷屬七佛號或有說體或說清淨即  
或八或九其第一重無去遠近但有最下方  
言然文並可知有難即釋其第十四重中云  
形如四洲者水中可居曰洲準俱舍東洲如  
半月南洲如車西洲如滿月北洲界方四洲  
形異而云如者則全似此界也此中文無標  
結大數準例可知耳第二從諸佛子此離垢  
焰藏海南下第二無盡光明輪海此下九海

文皆有二先牒前海為所依後有香水海下  
 明能依之海皆不牒中海為所繞故云南也  
 第三海去但言右旋又不云南者十海如環  
 繞於中海故不正南也如以十疊繞於一盤  
 方所可見又第二已去或無蓮華者前總釋  
 種中云或有依蓮華住或有依海故或無也  
 後能依之海文亦有二先明海華刹種後此  
 中最下方下所持之刹二十重中初一世界  
 文即有七後一文八加純淨故中間唯三謂  
 相去數量刹名佛號餘八海例然已辯二海

第三金剛寶焰光明海第四帝青寶莊嚴海  
 第五金剛輪莊嚴底海第六蓮華因陀羅網  
 海第七積集寶香藏海第八寶莊嚴海第九  
 金剛寶聚海第十天城寶堞海文並可知有  
 欲解釋刹中佛名足可留思已下八經第三大  
 段從第十經去明十海所管之海一海各管  
 不可說佛刹塵數現文但各說十即為百海  
 亦有刹種及所持刹十海即為十段但記次  
 前十海之名此文居然易了十段中一一有  
 二謂先標能管之海以定方後次有下列所



管之海次第於所管中各有三節初從能管  
海邊隣次列九唯第一段九中闕一二如是  
等下總結一海所管之大數三其最近下廣  
說最近輪圍一海於中文皆有二初舉海種  
名體第二此中最下方下所持之刹亦皆二

十重於中超間文有四節一舉下層二超至  
第十等金剛幢者即中央香海刹種中第十  
重刹三更超至第十三者以等此中央娑婆  
故四更至第二十重者以最上故言最上者  
刹種最上若云二十重最上何以得此最上

之名設不欲繁文何以不加乃至最上耶然  
超間者意存略故云齊等者恐失次故又上  
下橫豎皆相當故又此隨所管海有不可說  
皆望本能管之海方面一道布列故下但云  
此海之外不言右旋等第五金剛輪莊嚴底  
香海所管但列九海而結文及最近輪圍之  
海九行許經諸梵本中皆同此闕準前後例  
此必定有第十海所管近輪圍海所持二十  
重刹內最初文云此中最下方有香水海名  
因陀羅華藏者從香字至藏字並長由前已

說香水海故前諸海中無此例故縱依海無過在文不便前第一海所管中九海闕一今此長者多是梵本脫漏後人注之誤書相似貝葉耳餘並可知十海次第但觀次前疏文不俟重舉第三總略結釋文分爲五一總結都數謂一海各管一不可說十海即有十不可說一海一種是以數同二皆依下結海種所依謂即是前能持刹海本大蓮華彼名種種光明藥香幢今此乃云現菩薩形等者是此一華隨義異名有此用故與前最中海底

名同以中間海底即此大華之體中受總稱故取大華體名或是譯者之誤三各各下結種異門此與前釋刹種章及世界成就中十相參大同四此一一下結種中之刹言成世界網者一一世界猶如網孔<sup>三</sup>遞相接連如以網持橫豎交絡皆悉相當如天珠網<sup>七</sup>五於華藏下結歸華藏即建立之處上來雙釋二章長行竟第二重頌總有一百一偈分二初一明華藏自體初句標名次句不壞分量即同真性次句具德莊嚴末句無礙安住餘一百

偈頌所持刹網於中二初九頌能持刹種餘  
頌所持諸刹初中初一頌參而不雜次一安  
布行列次一刹種體嚴次二辨形次一依住  
次二方所趣入後一佛力加持第二頌種所  
持刹九十一偈多頌結文但一二不同謂體  
及形餘皆同也大分十段第一有二十八頌  
明刹異由因緣即結中各各衆生徧充滿下  
云種種衆生居故及各各佛力所加持至文  
當見第二有二頌顯刹微細即結中各各普  
趣入第三十頌明世界體性結文即無義見

前經第四五頌明世界各各莊嚴具第五  
頌明各各莊嚴際無間斷此二如結名第六  
有十頌明世界形狀義見上文第七二頌明  
各各劫差別第八有八偈明各各佛出現此  
二亦如結名第九有十頌光明有無即各各  
放寶光明及各各光明雲覆第十有十一頌  
明音聲善惡即各各演法海今初爲二初半  
偈標章種種多端故曰難思餘偈廣釋難思  
之相於中分二前九偈半喻顯後十八偈法  
說前中分三初三偈半明由染因利有成壞

初一偈半明種則長時利有成壞次一偈刹  
 種雖一居刹有殊後偈結歸業種次有三偈  
 明由淨因一淨心因二佛願通因緣後一明  
 淨業因後三通結染淨因一隨心染淨因二  
 分別起業因即以正喻依亦是以因喻緣心  
 即是因招異熟果果之麤妙蓋由業緣三一  
 偈雙明心業行即業故亦喻衆生同處異見  
 後十八偈法說中分三初六明染淨次四明  
 成壞後八明苦樂今初分二前二顯淨相不  
 同後四對因以辯於中初一唯染由煩惱故

次三通深淨心業通善惡故屬於菩薩及衆  
 生故後一唯淨以屬佛故二有四偈顯成壞  
 中初一麤壞細存壞由惡業存由二因一約  
 佛二善業者故法華云我淨土不毀天人常  
 充滿然滅雖不俱而起必同處雖曰同處而  
 恒相無故難思也次偈業存處立次偈世相  
 不同性無生滅後偈結歸因緣內由心變則  
 深淨萬差外假佛緣于何不淨三八偈明苦  
 樂中三初三總相約利論苦樂次三約一刹  
 中有三惡趣後二明人天樂第二一一毛下

二偈顯刹微細初偈舉果後偈對因以辯第  
 三十偈明體性中亦兼餘義隨釋可知第四  
 五頌明莊嚴第五有五偈明莊嚴際中攝三  
 世嚴故無間斷結歸佛故一塵普見第六或  
 有衆多刹下十偈明刹形差別第七二偈明  
 刹住時分第八有八偈明佛出多少文並可  
 知第九十偈光明有無初一無後九有第十  
 有十一頌刹中音聲善惡初二惡道唯惡次  
 三人天通善惡後六佛菩薩善而非惡正顯  
 各各演說法海也

毗盧遮那品第六已下入第十一經  
 初來意者前明此因之果今辯前果之因答  
 前因問故次來也因是果因故標果稱又不  
 以人取法知是誰因前品初言毗盧遮那曠  
 劫修因之所嚴淨今方顯其事二釋名者略  
 云光明徧照廣如前釋三宗趣者明因廣大  
 爲宗證成前果爲趣四釋文一品分三初總  
 明本事之時二有世界下別顯本事之處三  
 彼勝音世界最初劫中下別顯時中本事今  
 刀劫二佛刹塵數劫也二辨處中亦三第一

總明刹海第二此世界海下別明一刹略無  
刹種刹名勝音者多佛出世說法音故次彰  
其相後說劫名可知第三諸佛子彼勝音下  
的指一方如今娑婆中別說一四天下也於  
中亦三初總明感應之處第二諸佛子此林  
東下別明能感居人第三諸佛子彼大林中  
下別顯道場嚴事今初有三初明香海者非  
持種之海即如今四洲之海耳二其海下海  
出華山三於其山下明山頂之林先標舉後  
顯嚴說此林者佛於中現也說城居人者總

舉所化也第二別明能感居人中亦三初標  
主伴二城二釋主城三釋伴城今初雖有天  
城以佛出故人城為主二清淨下廣釋主城  
於中先顯處嚴城上守禦曰櫓繞城別築土  
臺曰却敵優鉢羅等即青赤黃白四色蓮華  
後此大城下彰其人勝三其城次南下略釋  
伴城於中先辨城名居類後此一一顯圍  
繞莊嚴世界不同安立少異不可例此也第  
三明道場中先辨場嚴二其道場前下明蓮  
華香海為佛現故大文第三別顯時中本事

文分爲二先總舉劫中多佛後其第一下一  
一別顯正彰本事經來不盡故無總結今初  
將欲說別先舉其總言最初劫者即種種莊  
嚴劫也既云最初即此後更有大劫於理無  
違第二正顯本事中歷事四佛即爲四別第  
一逢一切功德山須彌勝雲佛第二波羅蜜  
善眼莊嚴佛第三最勝功德海佛第四名稱  
普聞蓮華眼幢佛各有諸佛子言就初佛中  
文分爲六第一總標佛號第二先瑞熟機第  
三正顯佛興第四毫光警召第五當機雲集

第六廣演法門今初也一切功德山者福德  
崇峻不可仰也復言須彌者定慧高妙難傾  
動也言勝雲者慈覆智濶廣無邊也第二諸  
佛子下先瑞熟機分二初現瑞熟機二其世  
界中下觀瑞熟機前中三初標現時謂百年  
前次此摩尼下正顯瑞相有其十種於中說  
前世所行者示其種子將成熟故說佛名號  
令憶念故說大行願使修發故說轉法輪使  
當聽習生法眼故後現如是下結瑞意也二  
機熟可知第三爾時下正顯佛興於中分二

初一處道成二如於下結通廣徧初中先總後其身下別顯勝德略有十相一示身相法無不在本自普周智與理冥故等彼真界能令色相隨彼融通法界塵毛重重全徧二悲相不捨因行無所不生三成相理行時處爲一切道場身智俱游名爲普詣四色相湛然常住稱爲妙色色色無邊故云具足並無質累是謂清淨五勝相色容蔽於大衆威德懾於羣魔力無畏圓何能暎奪六貴相無邊寶相圓明可貴超過聖帝故曰分明七應相

不往普現如鏡中像八無礙相有感斯見無隔山河九者化相化從真流源無有異十吉祥相身智光照普稱世間此上大同經初二結通中且結同類一界餘皆略也第四爾時下毫光警召文分爲五一放光處顯中道故二王光名發動宿種生起新善故善根有三一者生福及不動業以施忍智三而爲善根二厭苦求滅以信等爲根三求無上慧以四等不放逸五法爲根通說善根以依聖教發心爲性故云音也三眷屬數無盡法故四照



分齊充滿十方通方教故五若有下明光勝  
益文有十句一無明重者自覺智開二煩惱  
深者息現行惑三勤修難出裂五蓋網四三  
障重者摧諸障山五未解脫者淨心垢種六  
未信大者發起入住七闕資糧者生其勝善  
八未入地者除五怖畏九色累功用滅身心  
苦十滯無生者見佛趣果此約差別對治以  
釋若約橫配生善見理可以準思第五常機  
雲集中文二先通顯諸王雲集致敬後諸佛  
子下別彰諸王雲集儀式於中分二先廣明

喜見後略列諸王今初即正出本事之緣文  
分爲六第一標名辨統二總辨眷屬三威光  
得益四偈讚如來五父王宣誥六俱行詣佛  
初文可知第二夫人下總顯眷屬者有德曰  
夫人有色曰采女王子別本云二萬五千者  
別梵本也案瓔珞本業經上卷云十住銅輪  
寶瓔珞百福子爲眷屬生一佛土受佛學行  
教化二天下銀輪寶瓔珞五百子金輪一千  
子初地四天王一萬子二地忉利天王二萬  
子三地已上乃至淨居天王但云眷屬亦如

是故知無過二萬子者若三界王即當等覺  
又以一切菩薩為眷屬案喜見所統但以城  
言又見佛興至第三佛方云去世五百銀輪  
斯為正也或約教異理亦可通上首云大威  
光者有大威德聖道光明故第三爾時下威  
光得益文分為二先舉因總標後何謂下列  
益明體皆從勝用標名一佛德圓滿摧障稱  
輪定中能知故受斯稱二此總持能持諸佛  
普法三即空涉有名為方便斯則權實雙行  
為不共般若稱體用之廣大四以二嚴調伏

真實慈也五法雲震音能拔苦本六稱理法  
喜故德無邊自他俱慶心為最勝七知離名  
法法亦應捨如實捨也八善巧起用平等無  
思通從此生故名為藏九盡眾生界荷負無  
疲要令信解為大願也十所有辯才皆入佛  
智自他俱照是曰光明此上十法初三功德  
法次四熏修法後三起化法多言大者境界  
無邊稱性廣大智契貫達並受證名第四偈  
讚如來文分為二先說偈之由後正陳偈頌  
十偈分三初二示佛出現既滅闇難遇不可

失時次五令觀佛德有德有慈真可歸也後  
三引例勸歸無遠不歸固宜往見第五父王  
宣誥文分為二初宣誥所因以聞讚故太子  
道深親承佛益王機猶淺轉假他聞二正以  
偈誥偈有十一分之為三初三集眾勸觀次  
七勅令辦供鄭注禮云中猶衣也謂以繒綵  
衣帶於車廣雅云馭駕也餘並可知後一偈  
勸賚供佛第六俱行詣佛初導從持供後至  
而設敬第二復有妙華下略列諸王文易可  
知第六時彼如來下廣演法門文分為五一

佛轉法輪二威光獲益三以偈讚述四傳化  
眾生五佛加讚勵今初也佛解脫用主教宣  
示刹塵眷屬隨機益殊第二是時大威下得  
益中初總後別總中上說三世佛法即佛昔  
所集也既見佛得益轉受菩薩之名所謂下  
別智即是體光明語用所照境殊故分十一  
也一深定智明一切法聚略有三義一正定  
等三二善惡等三三總收一切不出有為無  
為二種法聚二位相收一味性現故云平等  
定中證此名彼三昧二大心智明謂後後因

果皆入初心略有三義一後因初得故言一切悉入若脩塗至在初步學者祿在其中二善提直心正念真如真如門內攝一切法三者三德開發初後圓融初發心時便成正覺故三大智智明法界者所照之體大也普光明者即相大也智慧光明徧照法界義故蘊恒沙性德故名爲藏妄惑本空故云清淨明見稱眼見性肉眼即同佛眼四大願智明知諸佛法願爲本故五大行智明無邊果德此行入故六速疾智明謂趣入無生功用不退

無功大力一行含多受斯稱也七神通智明三輪幹事出離不能八大福智明照攝嚴故九六解智明謂佛勝解力成莊嚴海十佛用智明普周法界十一佛德智明降魔制外後三佛境故十五但了知餘可證知故云得入第三以偈讚述文分二別先因後偈十五偈中分三初一標益體用次八顯用所見於中前七見因後一見果三一偈發願思齊即前品初修治大願也第四傳化衆生文分爲三初明自悟二爲一切下明轉悟他顯示十法與前自得

十一有同有異文並可知三今如須彌山下利他之益第五如來讚勵中偈有十一初三讚發心得法大果當成次四對劣顯勝進者圓德次二外加內智決證無疑後二舉一例餘行者即得第二遇第二佛文分爲二先結前生後二正顯佛興今初謂將說後佛故總論劫壽明多小劫者欲顯多佛現故說人壽佛壽者由佛壽促而人壽長故得威光一生歷事三佛二彼佛滅下正顯佛興文分爲五一明滅後佛興二觀相獲益三讚德勸詣四

眷屬同歸五聞經悟入今初也此中佛名謂智道等萬行皆到彼岸見性了了故名善眼果由因飾是曰莊嚴二爾時下威光觀相獲益中二先觀相即獲益之由也二即得下正獲益也先列後結列有十種一念佛三昧者菩薩之父故首明之乃至十地不離念佛無邊海藏門者蘊積名藏深廣稱海然略有三義一由此定中見多佛故下文云以佛爲境界專念而不捨是人得見佛其量與心等由念能見所以稱門二一一佛德是無邊海藏由

念能知所以稱門云何無邊海劫海所修有  
行願海成就色身有相好海成就智身有辯  
才海建立念處有名號海修諸助道有功德  
海安立衆生有淨刹海如是諸海一一無邊  
各各出生蘊積名藏三無邊勝德由念佛生  
故此一門深廣蘊積何者念十六法性身則契如  
理念功德身成無邊德念相好身證無邊相  
障無不滅德無不生一言蔽諸總由念佛從  
此通悟所以稱門即此一門說不可盡二總  
持大智能達深法三無緣普應四等除熱惱

五佛深德海蘊積力用菩薩緣此喜徧身心  
六悲則心感喜便浮動深契法性則曠若虛  
空悲喜兩亡爲平等清淨七般若者覺法實  
性離分別也有可離者非真離也知自性離  
不復離也無離之離即真法界真法界者本  
來清淨法界清淨即般若清淨般若清淨則  
萬法本淨萬法淨者無淨無不淨爲真淨也  
實相般若爲萬法之體觀照真此衆德攸依  
故云身也八通用智俱故無礙隨現九入法  
之深離說之垢十智照佛法淨所知障含藏

衆德二如是下結中明歷事增進故云十千  
通達之言釋前即得第三爾時下讚德勸諸  
文分爲二初說偈後偈益偈中分三初一偈  
歎希慶遇二有七偈歎佛勝德於中三初三  
身業次三語業後一意業三有二偈勸衆同  
歸後諸佛子下偈益可知第四時大威光下  
眷屬同歸第五其佛下聞經悟入文分爲三  
初佛爲說經二當機獲益三如來讚述今初  
主經法界體性大方廣也清淨佛也莊嚴即  
華嚴也有多眷屬者顯此教圓二彼諸下當

機獲益亦有十益既云大衆或一人得一或  
二三四或具十者威光先證故略不標大衆  
之言亦已含矣故下佛讚然此十事略爲二  
釋一者如次配於十地十度或取地義或取  
度義者達一切法本來清淨名清淨智不取  
淨相是名方便即初地入證之智也二則二  
地離破戒垢是所除障照諸善品即戒光明  
三即忍度忍爲上嚴一切愛樂四無利不入  
無法不照無見不淨是爲精進增廣衆行約  
地義釋以諸道品燒無盡惑成無邊光五趣





威光下威光往供四時彼如來下佛為說經見普法故名為普眼以慧為性故曰光明況一眼即十眼融無障礙眼外無法方真普眼以諸緣發見即緣各為根因沒果中緣皆號眼故全色為眼恒見色而無緣全眼為色恒稱見而非我矣五爾時下威光得益五度皆福定為最大寂無不照名普光明得此已下彰其定用福非福言略有二意一福即是善非福是罪二福即是相非福即性雙了性相故經云福德即非福德性此即深也了一切

者廣也故有海言遇於初佛但得十者自力未勝故次佛十千者道轉深故今唯一者道已滿故第六時彼佛下如來記別十一偈分四初四顯具菩提心謂初有願次偈有悲四有智光三兼精進通策三心故菩提心圓當成妙智次四上入佛境三有一偈示其果相得同諸佛四有二偈讚其現能利他住普賢行遇第四佛文分為四一佛出人中二天王就供三如來說法四得益還歸今初約相目類青蓮約德心無所染相德高顯名稱外彰

摧邪眾歸故曰幢也二是時下天王就供中  
 二先明菩薩行進報處天宮此城即是品初  
 所列之一後知佛可歸持華往供三時彼下  
 說經方便之言略有三種一無實權施曲巧  
 方便也二理本無言假言而言大方便也三  
 權實無滯亦大方便事理皆照方曰普門四  
 時天王下得益還歸中聞上普門正受安住  
 法喜無盡故名曰藏由此證達諸實相海此  
 劫之中十須彌塵數如來今但云四又無結  
 會古今現證得益等者經來未盡故也若結

會者應云爾時威光菩薩者毗盧遮那是等  
 所信因果會竟  
 如來名號品第七此下第二修因契果生解分第二會初從此第十二  
經盡第十三經菩薩問明品  
 將釋此品五門分別初來意者先明分來前  
 既舉果令生信樂今明能生因果信解故次  
 來也二會來者生解之中信為其首故又前  
 舉所信之境今明能信之行故次來也三品  
 來者前品舉因顯果成所信之境今舉果辨  
 因彰能信之行果中三業身為其總故先來

也又遠吞前名號海問故二釋名亦三初分  
名修因契果生解分謂修五位之圓因成十  
身之滿果令諸菩薩解此相故即生修因契  
果之解依主釋也二會名約處名普光明殿  
會然有三釋一以殿是寶成光普照故二佛  
於其中放普光故三佛於殿中說普法門慧  
光照世故立其名依前一義即依主釋後二  
有財約法則名信行之會三品名如來現相  
品已釋召體曰名表德為號名別號通一切  
諸佛通具十號名釋迦等則不同故如來即

十之一品中正說隨機就德以立別名既表  
德之名則亦名亦號如來之名號依主釋也  
三宗趣亦三初分宗謂以修生修顯因果為  
宗令諸菩薩修行契入為趣二會宗者若就  
總望信解行德攝位為宗通成佛果為趣信  
能必到如來地故近望唯信為宗成位為趣  
若依長科十分之宗此下三品以為一分即  
果用應機周徧法界以為其宗依此起信為  
趣故此亦名正報因果亦是所信信何法門  
信佛身名等於衆生則知我名如佛名也信

佛法門隨宜而立知我妄念苦集亦全法門  
信佛意業光明徧照則知自心無不知覺故  
先古諸德亦將上三品舉果分收三品宗者  
顯佛名號周徧為宗隨機調化利益為趣或  
上二皆宗生信為趣第四問吞問五周因果  
差別平等聖不同何以分名合之為一吞通生主  
差別平等解故離於修生說何修顯故問前  
會舉果本為生信今何重舉名號等三吞凡  
約境生信有其二義一標舉境法明有所在  
二攝以就心令成信行前會約初義此會約

後義又前會果廣因略故名舉果此會因廣  
果略故總攝為因先依後正文影略耳若約  
鈎鎖者自屬正報果故不同第七會說所成  
果此中自辯信所依故問何不入定以未入  
位性不定故若爾十定豈散善耶然說法之  
儀通有四句一定後說如諸會二說後定如  
無量義經等三定中說如第九會無出言故  
四不入說如此信中及第七會諸文非一第  
九表證唯證能說一得永常不礙起用故第  
七為表常在定故又入為受加彼不須加故

不須入說後入者說在行故將起後故是知  
動寂唯物聖無常規故下文中辯十信之用  
一方入正定餘方起出說自在無礙也餘會  
摩頂後說此會說後摩頂是知此經體勢縱  
橫不可定準第五釋文若隨義約品科十分  
之中此下三品當果用應機普周分若約隨  
法就會科十分之中此一會當第二能信成  
德會今就四番問答科從此終第七會即當  
第二修因契果生解分若順諸會應直分問  
答今為順文一會分三第一序分第二請分

第三說分今先序分具如經初但加普光以  
為小異略分為三初標主時處二始成下別  
顯三事三與十佛下輔翼圓滿二中分三初  
別顯說時二於普光下別顯說處處在菩提  
場東南可三里許聖熙連河曲三彼河之龍為佛  
造此今舉總攝別前標國名以本收末上舉  
場稱故下不動覺樹而徧十方三妙悟下別  
顯主德亦即示成正覺之相也準第八會初  
及深密經等皆說佛有二十一種功德升兜  
率品當廣明之今文有初十句亦略釋耳十

句之中初總餘別總中妙悟皆滿者妙悟晉經名善覺論經名正覺良以梵音云蘇含於妙善及正等故譯者隨取悟即覺也雙照真俗故稱妙悟備下諸句異於因人故復稱滿別中一二行永絕者煩惱所知生死涅槃皆名二行俱不現前名為永絕二達無相法者清淨真如名無相法達者了也三如來常住大悲任運利樂又常安止聖天梵住故云住於佛住四所證能證及以化用皆等諸佛五真能治道解脫障故六所說教法外道不能

轉故七行諸世間違順魔怨不能礙故八安立教法超言念故九於三世境若事若理了達記別無錯謬故具此九別成初總句同異成壞準思可知第三輔翼圓滿文分二別一標數揀定二歎其勝德前中菩薩揀非凡小補處明非下位他方而來非舊眾也言一生者釋有二義一約化相謂如彌勒此復有三一人中一生二天上一生三下降一生正取天中二約實報一生謂於四種變易生死中唯有末後一種名無有生死一位所繫此文

多約化相耳二普善下歎德德雖無量略歎一普善觀察者能觀智也普有二義一普衆同有此德二普觀十境善有三義一善知相二善知無相三善知此二無礙衆生界下明其所觀皆具上三義十中初是總句所化衆生次此生何來由迷法界起於世界我當令彼住涅槃界淨諸業果故須識心行之病文義之藥令厭世間欣出世間不盡有爲不住無爲上辨橫觀十法今豎達三世觀涅槃知已現當證觀諸業已現當造果報已現當受

心行已現當發餘可類知亦以六相融之第二時諸菩薩下請分中二先舉人標念後若世尊下正顯問端然句雖五十問但四十以第二十句是說意故此四十問望第一會有同有異後二十句全同前二十句大同小異又復前後不同初十句即前第三十海前會即總說所觀深廣此則別說如來依正以前會中爲總故此會別顯信所依故故前會皆致海言此中但云刹等第二十句前名菩薩十海此列住等行位前通諸會總顯圓融行

布因故此約當分欲顯差別因之相故後二十句雖則全同前總此別又前即所信今辨所成欲顯所信所成體無異故文句全同若唯約義亦可分三謂初十句問佛德應機無方大用辨因所依果次十句問菩薩行位即果所成因後二十句佛果勝德顯因所成果是則以佛為緣而起於因還以此因而成於果是此分之大意也故論云多聞熏習無不從此法身流無不還證此法身即其義也今取文義俱便大分為二初十句直爾疑問後

三十句引例請問義不異前然所依所成文應互有但是影略不欲繁辭故初會直爾與問即此中引例此中引例即彼直問又前但明一重所信故合三十句果今為分二段故間之以因今初十句先總顯請意後開示下別列所疑十句依正間問者正報應機必依刹故亦表依正無障礙故五句依者一刹類二莊嚴三清淨四體性五成就上五即前二海廣如四五二品其佛住等五句即正報大用一佛身徧住諸刹佛心常住大悲二所具



功德及所證法性三隨機說法四作用威光  
五修行得證現成菩提然此五即前會七海  
一即佛海二即解脫海三即演說海四即變  
化海五即名號及壽量海波羅蜜海其衆生  
海但是所化故略不舉會諸海中此之十句  
下有言說及現相軍二卷至下當知第二如十方  
下引例請問文分為三初十句標彼說意明  
其有悲後三十句舉彼所說顯其有智末後  
一句結以正請彼佛既爾此亦宜然初中初  
句總謂今諸菩薩行願成就故餘九為別一

上繼佛種二云何繼以救衆生故三云何救  
令離惑故四如何救知彼根行故五以何救  
說法藥故六成何益一除集諦染二泯道諦  
疑三拔苦希望四證滅愛處故又成菩薩行  
具悲智也具此悲智何所為耶令佛種不斷  
佛種不斷有何相耶謂成三德救護衆生成  
就恩德永斷煩惱成於斷德了知諸行成於  
智德諸行有三一者心行二所行行三所了  
行謂一切行無常無相即所了也云何救護  
演說諸法云何永斷淨諸雜染永斷煩惱種

現雙亡除諸雜染謂唯現惑云何成智謂永斷疑網智成何益斷諸希望惑除何益滅諸愛著一切著者著有著空著行著果不著諸法正智現前悲救衆生佛種不斷是菩薩之要也諸佛之本意也所陳諸問一一皆有斯益又釋一切菩薩是所成就云何成就不斷佛種即自成就救護衆生成就於他云何救護謂離二障永斷煩惱無煩惱障了知一切無所知障以何方便能斷二障謂說諸法此煩惱障其相云何謂愛與見除諸雜染絕愛

煩惱永斷疑網絕見煩惱此所知障其相云何謂於境不了有所希望法執未忘一切生著今相無不了何所希望達法性空當何所著二障既寂二智現前成菩提涅槃謂不斷佛種則菩薩成就矣第二說諸菩薩下舉彼所說文分爲二初十句問因後二十句問果今初文有九句昔云欠第九十忍一句又以十信自不成位是住方便攝在住中故不別問故仁王經教化品云伏忍聖胎三十人十信十止十堅心故信住不分也有義云有四

第三

二十六

義故信不入位一進退不定故二雜修十心  
無定階降故三未隨法界修廣大行故四未  
得法身顯佛種性故由斯不開十信則成此  
會及第三會俱答十住問也十行第四會答  
十迴向第五會答十藏第四會中答以藏有  
二義一收攝義謂收攝諸行以用迴向故答  
在迴向之前二出生義以出生地上證智故  
問居迴向之後十地第六會答十願初地中  
答十定十進第七會答各有自品十頂一種  
答文不顯古有多釋一云準梵網經說十忍

後有心地法門即此十頂理亦可通但彼經  
說處乃有十一初無菩提場會但云方坐千  
光王座及妙光堂說十世界海其二三四與  
此三四五會處法全同他化十地次第亦同  
而化樂天說十禪定初禪說十金剛心二禪  
說十願三禪說十忍四禪摩醯首羅宮說我  
本源蓮華藏世界盧舍那佛所說心地法門  
不云重會普光及祇園重閣次第又別難可  
會通又此中間因後更有果問故彼佛心地  
即後如來地等非十頂也有云僧祇品答以

準瓔珞等覺別有頂位以因位窮終今僧祇中說十大數數中之極故云十頂彼問雖十吞有多數對上定通亦非其類故不可也有云壽量品吞彼中十重佛土皆上為下頂極至賢首佛刹名為十頂又佛名第二名此十

言十頂者因位終極十定十通皆等覺位十忍居後又得頂名問中約位終極故名為頂吞據法門忍受以智印定故云忍也非位終極不具十忍非有十忍不極因位二文更顯故十忍品末云通達此忍門成就無礙智超過一切衆轉於無上輪等既言超過即是頂義亦猶四善根中忍頂法門義相類故不爾忍無別問空吞何為設欲成十應脫十信十信雖未成位亦隨法界修廣大行德用殊勝別一會吞應有問故若將十忍已下四品共

答頂問於理無失俱是等覺之終極故第二  
二十句問所成果全同初會於中亦初十句  
明內德成滿後十句體相顯著初中如來神  
力前會名佛加持即神力加持故神通約外  
用無壅神力約內有幹能離世間品各有十  
事其相自別言無礙者謂如來所作無能障  
礙也上文名無能攝取等義皆同也後十中  
辯才是語業智慧是意業最勝是身業準前  
會中唯欠佛光明之一句餘如前釋其所答  
文亦如前引出現不思議相海品說但前總

甲二

二十八

會故引此文所引之文正答今問說者宜重  
引之三願佛下結請請同彼說故致亦言請  
分竟第三說分於中通下六會答此所問準  
問長科亦為三分此初三品答所依果問二  
問明已下答所修因問三從不思議品下答  
所成果問其平等因果因乃果中之因果乃  
此果之用故屬果收初中分二先如來現相  
答由其念請故又如來證窮故後文殊言說  
答伴助主故假言顯故今初分二一佛現神  
通二衆海雲集今初知其心念者領念請也

現神通者示相答也言隨類者有其三義一  
隨疑者所宜異故謂我云色今見以聲今聞  
冥資今曉皆是現通以法界身圓明頓現也  
二隨疑者流類別故三隨疑者所疑異故謂  
若疑十信即見如來足輪放光周乎法界等  
若疑十住則見如來足指放光百刹塵外菩  
薩集等如放光一事既爾餘相皆然故知初  
會現相徧於九會此會現通通於一分結集  
隨義編之作次耳故下三會皆有不起覺樹  
之言第二現神通下衆海雲集即現相答初

十句之問光現佛刹答佛刹問刹有金色等  
是刹莊嚴既以金成亦答刹體彼刹菩薩亦  
刹莊嚴菩薩大寶以為嚴故亦刹清淨純淨  
佛刹唯菩薩故淨修梵行是刹成就淨土行  
故亦刹清淨所修淨故此已上答五句依問  
兼答五句正報土各有佛及見如來坐蓮華  
藏是答佛住現通放光是答威德名不動智  
等是答法性見佛轉法輪是答說法佛成正  
覺是答菩提文雖在下義皆此具光明覺現  
即現此故十方衆集即為十段一一方內文

各有八一遠近二土名三佛號四上首五眷屬六詣佛七到已致敬八化座安坐去此遠近皆十刹塵數者前會為說所信因果深廣故須遠集華藏之外十方刹海今為說於生解因果漸漸增修故但集娑婆隣次之刹信行最劣故復云十後後漸增至法界品還集刹海初不云一直云十者表無盡故要刹塵者比餘勝故為有所表故分階級非初信等不是通方故結及證成十方齊說又隨迷名外悟處名來而實佛土本無遠近土皆名色

永樂北藏

大方廣佛華嚴經疏

第一六九册

者表信麤現故亦表顯然可生信故佛號同智者有信無智增無明故信中之智本覺起故主同名首者梵云室利一名四實一首二勝三吉祥四德是以譯者前後不同今通用之以信為首攝諸位故次第行中信最勝故甚難得故於生死中創發信心為吉祥故信三十一能增長智功德等一切德故此十菩薩同表信門故皆名室利各隨一門達一切法故復有差次文當釋亦有傳云梵云室利此云吉祥室利云首亦是一理眷屬皆十刹塵者表

一一行攝無盡德故皆詣佛者有歸向故餘  
如前會又下菩薩名等皆是表法菩薩表所  
行之行本刹表所證之理佛名表所得之智  
今初東方言金色者心性無染與緣成器為  
自體故本智如空離覺所覺湛然不動動即  
是妄非曰智故又縱成佛果不異凡故即本  
覺智住心真如菩薩妙德者慧達佛境處處  
文殊由慧揀擇契於本智故分因果二覺首  
者覺心性也無性不礙隨緣隨緣不礙無性  
無礙智也不染而染不染而染不染染俱難了知為

妙色也三財首者法財教化即滅闇智了衆  
生空如蓮不著四寶首者真俗無違可珍貴  
故善知業果不犯威儀性相無違唯一乘旨  
是為唯觀瞻<sub>言</sub>華矣五德首了達如來應現  
說法之功德故即是明於法相又了佛德心  
明白也若有此智如青蓮華最為第一六目  
首福田照導如目將身平等福田為究竟智  
是最可重故云金色佛為福田以佛為境故  
同上文殊依金色界七精進首正教甚深必  
在精進能策萬行為最勝智圓明可貴故復

軍二

三十一





永樂北藏

大方廣佛華嚴經疏

第一六九册

大方廣佛華嚴經疏卷第十三

軍三

唐清涼山大華嚴寺沙門澄觀撰

第二爾時文殊下辨言說答就文分四一歎  
眾希奇二諸佛子下牒問總歎三何以故下  
徵歎總釋四諸佛子如來下廣顯難思今初  
軍三  
也前眾疑問佛令文殊答者以文殊示居此  
土生有十徵來自他方體會萬德降魔制外  
通辨難思化滿塵方用周三際道成先劫已  
稱龍種尊王現證菩提復曰摩尼寶積實為  
三世佛母豈獨釋迦之師影響而來一切咸

見故其說也何不待請敬同佛故何不待告  
承佛神力佛意許故眾既念請佛方現相非  
夫尊極大士安得理契潛通故上以光示普  
賢此乃冥加妙德若爾普賢云何定後更請  
表說所信甚深細故何不入定以果從因同  
於信故餘如上說何故無加以無定故又承  
佛神力是冥加故歎眾希有者略有五義感  
應懸隔難一遇故德行內充總稱歎故以名  
表法甚希有故創起信行未曾有故此一眾  
會即是等空法界會故二牒問中脫於刹體

佛出現者即前威德也阿云無也釋多羅上也三者正也藐者等也又三徧也菩提覺也謂道不可加曰無上也無邪委知為正徧也三徵釋中徵上難思言也下釋云能感之機差別無邊如來普應周于法界廣難思也下結文具顯又隨宜說法意趣難思又等法界者舉一說法等餘多門門不可盡量等法界法門難思第四廣顯難思文二先總顯多端二隨門別顯今初也舉娑婆為首略顯十種差別多端準下結通實通法界十句不出三

業一身為總相現十法界不同故云種種二名以召實次下廣辨三金銀等色不同三二相等異四形有長短三尺丈六乃至無邊五壽命限量或無量劫或不满百年下至朝現暮寂六處謂化處染淨等殊七根謂眼等等三隨感現異八生處有利利等別九依語之用隨方言音施設非一故十觀察者周旋顧盼以應羣機又觀存亡安危可不智照諸境示有多端下結意云令諸衆生各稱己分而自知見得調伏耳第二諸佛子下隨門別顯文

分爲三初終此品辨身名差別答上佛住之  
問近廣種種身等八句以色相等皆屬身故  
二四諦品辨言教徧周答佛所說法問近廣  
種種語業三光明覺品明光輪窮照答上威  
德法性菩提三問近廣種種觀察其五句依  
報但有現相答廣在前會故今初廣上名者  
然聖人無名爲物立稱若就德以立德無邊  
涯若隨機立名等衆生界雖復多種皆爲隨  
宜生善滅惡見理而立海印頓現不應生著  
也文中分四一娑婆之內自有百億二娑婆

隣近即百億之外三類通一切謂盡十方四  
釋差別所由由隨物故初中分三初此四洲  
二四洲之隣十界三總結娑婆今初亦三初  
標處次列名後結數他皆倣此舉四洲者昔  
云意取閻浮言總意別餘三天下佛不出故  
單三  
然雖不出除北俱盧餘容有往下並準之一  
切義成即悉達也無事不成就故圓滿月者  
惑斷智圓恩蔭清涼故師子吼者名決定說  
釋迦牟尼者釋迦云能仁種故牟尼云寂  
默契寂理故第七仙者七佛之末故若取賢

劫當第四仙即喻也無欲染故毗盧遮那廣  
如前釋瞿曇氏者唯約姓也此云地主以從  
劫初代代相承為轉輪王故然上云釋迦乃  
是族望此即姓望故智論第二云釋迦牟尼  
姓瞿曇故佛名經亦然沙門此云息惡無惡  
不息故復稱大最勝者聖中極故德無加故  
導師者引導衆生離險難故於生死海示衆  
實故然名舍多義略釋此十恐文繁博餘但  
隨難解之二此四天下東下此洲之隣十界  
即為十段其善護等皆四洲之通稱也今初

東方斷言論者證離言故無能說過故南云  
帝釋者為天人主能稱物心故西云水天者  
水善利萬物天光淨故北方醫羅跋那者具  
云醫濕弗羅跋那醫濕弗自在也羅跋那者  
聲也即圓音自在耳上云盛火者盛火焚薪  
不擇林木佛智利物無揀賢愚問餘聖教說  
大輪圓內平布百億上即諸天下安地獄如  
何此說上下皆有四洲答此教所說事隨理  
融隨說法處即是當中縱極上際旁至大輪  
圍山亦有十方互為主伴以融為眷屬本數

非多十方界融亦準於此因此略說娑婆融  
通改非改相略有其五一約事常定如小乘  
說二隨心見異若身子梵王三就佛而言本  
非淨穢四隨法迴轉如上主伴互為五潛入  
微塵如前會說若通論餘淨土更有五義謂  
諸刹相入義相即義一具一切義廣陞自在  
義帝網重疊義並如前後諸文所說三諸佛  
子此娑婆下總結娑婆二諸佛子此下彰娑  
婆鄰近十方亦為十段密訓唯九者勘晉經  
開曉意下闕一闍慧南方唯二舊經則具乃

是新本脫漏準前後例不應獨此便略西北  
方名有十一者獨此有餘不成文體此中專  
念法應即是前所脫聞慧亦是梵本之漏注  
者誤安貝葉耳下方云帝釋弓者如來念定  
之弓以明利箭能射業惑阿脩羅故然舊云  
法命主意取帝釋以法教命為天主故今云  
其弓但一事耳若作宮室字以處取人大同  
晉本第三諸佛子如娑婆下類通一切準四  
諦品更有舉此例餘十方亦如娑婆互為主  
伴第四如世尊下釋差別所由此有二意一

自既由於差別名言等而得成就今還做古以差別熟他二昔菩薩時隨機調物今時出世稱本立名如昔教衆生令空妄境今成正覺爲立超境界名他皆做此故而得成熟之言通自他也

四聖諦品第八

平三

五

釋此一品五門分別初來意者此品廣前種種語業即答前佛說法問亦遠答前會佛演說海之一問故既知佛可歸次知法可仰上名隨物立今法逐機差故次來也二釋名中

言四聖諦者聖者正也無漏正法得在心故諦有二義一者諦實二者審諦言諦實者此約境辨謂如所說相不捨離故真實故決定故謂世出世二種因果必無虛妄不可差失言審諦者此就智明聖智觀彼審不虛故凡夫雖有苦集而不審實不得稱諦無倒聖智審知境故故名聖諦故瑜伽九十五云由二緣故名諦一法性故二勝解故愚夫有初無後聖具二故偏說聖諦四謂苦集滅道總云四聖諦帶數釋也性相云何逼迫名苦即有



漏色心增長名集即業煩惱寂靜名滅謂即  
 涅槃出離名道謂止觀等此約相說通大小  
 乘智論云小乘三是有相滅是無相大乘四  
 諦皆是無相涅槃云解苦無苦名苦聖諦謂  
 達四緣生故空則超筌悟旨成大又涅槃云

凡夫有苦而無諦二乘有苦有苦諦而無真  
 實菩薩無苦有諦而有真實謂若苦即諦三  
 塗之苦豈即諦也二乘雖審知之而不達法  
 空不見真實又二乘雖知苦相不知無量相  
 故大經云苦有無量相非諸聲聞緣覺所知

瑜伽說苦有一百一十然此經中雖彰名異  
 即表義殊以名必召實故是無量四諦義也  
 約一界一諦即有十千娑婆四諦有四百億  
 十千名義而文義包博言含性相又究此四  
 非唯但空便為真實今了陰入皆如無苦可

捨無明塵勞即是菩提無集可斷生死即涅  
 槃無滅可證邊邪皆中正無道可修無苦無  
 集即無世間無滅無道即無出世間不取不  
 捨同一實諦故斯一品有作無作有量無量  
 皆在其中準下第五地中復以十重觀察至

下當明三宗趣者以無邊諦海隨根隨義立  
 名不同徧空世界以此為宗務在益物調生  
 為趣又上二皆宗發生淨信為趣四解妨難  
 問既彰佛語業答說法問佛所說法多門何  
 以唯陳四諦答以名雖在小義通大小事理  
 具足謂苦集二諦是世間因果所知所斷無  
 改易故滅道二諦出世間因果所證所修事  
 決定故知斷證修能運眾來到彼岸故世界  
 有異此獨無改況無量無作何義不收是故  
 約此以顯差別又為破計引機故謂演彼聲

聞四諦局法令亡所執引入一乘無邊諦海  
 故約此辨何以四諦皆帶苦言謂苦滅聖諦  
 等然謂生苦之集故云苦集盡苦之滅名為  
 苦滅至苦滅之道名苦滅道不得單言苦道  
 以道非生苦不同集故又非滅苦不同滅故  
 能證苦滅故云苦滅道五正釋文一品分二  
 先標告二諸佛子下正釋於中分四初娑婆  
 諦名二隣次十界三類通一切四主伴無窮  
 然此望前品略於單說四洲就初二中一一  
 方內文各有二一別列諦名二結數辨意然

其立名或有因從果稱果籍因名約事約理  
或總或別如文當知初娑婆中列內四諦即  
爲四別一苦云罪者摧也謂摧壞色心故二  
逼迫者不可意境逼迫身心也此二總顯三  
變異者壞苦也攀緣者追求苦也聚者五盛  
陰苦也刺者從喻立名如刺未拔依根者由  
苦能生一切惡也虛誑者於下苦中能生樂  
想也癰瘡處者此喻二苦有癰瘡處性自是  
苦此如五陰苦若加手等觸苦上加苦是苦  
苦也愚夫行者行苦也愚人所行故如以瞋

毛置掌不覺若置眼內爲苦不安愚夫不覺  
行苦如掌內之毛而復以苦反欲捨苦皆愚  
夫行也二集中初二通顯謂有業惑者繫縛  
三界滅壞善根次二別顯煩惱餘多通業惑  
三苦滅中無諍者煩惱爲諍故體真實者非  
唯惑滅而已實乃法身常住爲滅諦之義故  
次云住自性也謂本來滅故四苦滅道諦云  
十藏者謂信聞等如十藏品說二結云四百  
億十千者准望前名號一四洲有十千今一  
四天下一諦亦有十千四諦歷於百億故有

四百億箇十千隨衆生心下顯差別之意也  
 第二辨十方諦名一密訓即東方界也苦名  
 分析悉無力者推之於緣無實物也形狀物  
 者有形皆苦也集中病源者謂有攀緣故滅  
 云一分者由妄起故分數塵沙理不可分  
 故稱一分道言上行者所之在滅言觀方者  
 謂觀四諦也更有四方如十定品二最勝世  
 界者即是南方前名豐溢豐溢是正翻最勝  
 乃義譯耳苦名有勢力者生老病死猶四山  
 臨人世雖賢豪力無與競集名非已物者已

本性淨妄惑何預滅名義中義者事善有義  
 滅理尤勝義中義也道名燒然以智慧火燒  
 煩惱故三西方離垢世界苦名有無數者三  
 際無涯故集名增長者從惑生惑業故滅名  
 稱會者以事之滅稱會理滅故破印者世之  
 陰苦若蠟印印泥印壞文成此陰纔滅彼陰  
 續生今云破印永不生也道名諸有邊者照  
 實即生死可盡也故中論云真法及說者聽  
 者難得故是故則生死非有邊無邊謂二事  
 難得故非有邊難得者容有得義得則生死

有邊受寄全者業寄於集受還亡業寄於道永不可失四北方豐溢世界者豐溢自南方界名前品此方名為豐樂梵云微部地夷切豐樂得旨譯者不審二名相參耳苦名有海分者二十五有各一分也數所成者數體九即集集所成故集名分數者無一理以貫之則惑業萬差矣攬噬者攬搏也噬嚙也集之損害猶惡禽獸也滅名無所修者修已極故道名無量壽者謂證滅永常今因標果稱五東北方攝取世界苦名地獄性者未入忍來

常有墮性根本空者約性以說同淨名五受陰洞達空故集中由妄惑故愛見羅刹橫相執取妄體本空故無可取故中論云虛誑妄取者是中何所取佛說如是法欲以示空義滅道俱名離言者滅性離言道令言離故六東南饒益世界苦名如賊者五盛陰苦劫害我故集名無力者於出生死無有力能善法治之不復相拒故滅名捨因者無為無因而體是果菩提之道望此亦因獨寂滅涅槃得稱果果故曰捨因道名一切印無不審汰故

印義後說七西南鮮少世界苦名邪行者體  
非正道是行性故集名廣地生大苦樹故宅  
主即無明也滅名絕行處者心路絕故道名  
廣大路者先聖後賢游之而不厭故八西北  
歡喜界中苦諦闕一者晉譯少出生唐譯少  
失利集名無底者煩惱深故非習道學浮沉  
而不已滅名破依止身與煩惱互為依止展  
轉無窮唯證滅理方能永破道名廣大性者  
無不在故九下方開闢世界苦名我所成者  
我見有故集名我心即我見愛滅名覺分者

所覺處故道名入義者能入滅諦第一義故  
十上方振音世界苦名匿疵身為惑病所藏  
處故傲慢者慢以生苦為業果取因名染著  
性者性令染故如樂受壞苦誰謂苦耶駛流  
者刹那性故即行苦也不可樂者苦苦也覆  
藏者藏苦因故樂藏壞苦故不苦不樂藏行  
苦故速滅者流轉苦也難調者誰不欲捨莫  
之能出不憚疲苦方能調之集名至後邊者  
不斷無窮故門者入苦趣故滅名不可取取  
則不滅也小之則無內不容一物也大之則

無外法界性也道名難敵對者有感必破不  
為惑破故猶明能滅闇故無闇而不滅闇不  
滅明何能相敵第三諸佛子下類通一切初  
舉娑婆以類東方後舉東方以類餘九第四  
如娑婆下顯主伴無盡文中初舉此例彼謂  
娑婆為主有密訓等盡空世界皆為伴後彼  
一切下以彼類此則知密訓等盡空世界為  
主攝伴亦爾則無盡無盡耳此猶約娑婆同  
類世界而說以結數中同百億故餘樹形等  
異類世界彼一一類皆徧空法界是則重重

無盡無盡非此所說也如是皆為調伏衆生  
光明覺品第九

入第十  
三經

解此一品略以五門初來意中自有其十一  
為答前所依果問故然古德對前二品已答  
二問此品正答三問謂長行放光答佛威德  
見成正覺答成菩提文殊說偈正答佛法性  
問今更一解謂長行但現相答已如前說偈  
中具答三問謂初五答菩提次一答威德後  
四答法性二為廣名號品總標多端故正廣  
種種觀察是意業故三者即說十信之體性

故如下三會將說正位皆有偈讚此其類也  
四顯實徧故但所說有二一佛二法佛有二  
一身二名法亦有二一權二實前但佛名徧  
此顯身徧四諦即實之權徧此品顯即權之  
實徧故五現驗故上一云徧衆未目覩今光  
示徧相故六顯總徧故前但名諦別徧今此  
一會即徧法界一一皆悉同時同處同衆同  
說同徧故七顯圓徧故謂前顯差別一切方  
能徧一切今顯無差別一切即圓融徧一切  
故八與下經爲其則故謂下結經通云徧一

切者皆如此辨以如來一乘圓教於須彌山  
等一類世界施化分齊皆若此故九示前  
神通相故上云現通如何現耶一會不動徧  
法界故十爲顯理事俱無障礙令捨執從法  
故此意雖通在文徧顯有上諸義故此品來  
也第二釋名者一開二合初開者光明體也  
覺者用也此二各二謂光有身智二光覺有  
覺知覺悟又光有能照所照覺有能覺所覺  
如來放身光照事法界令菩薩覺知見事無  
礙文殊演智光雙照事理令衆覺悟法之性



相二合者良以事理俱融唯一無礙境故得  
一事即徧無邊而不壞本相身智無二唯一  
無礙光故涅槃經瑠璃光菩薩處云光明者  
名為智慧知悟不殊唯一平等覺悟之心知  
無事非理故又此二光不異覺境此三圓融  
單三  
唯無礙之法界雖平等絕相不壞光明之覺  
品中辨此故以為名若從開釋光明之覺光  
明有覺之用通依主有財若從合說光明即  
覺可持業也第三宗趣者以身智二光無礙  
覺悟為宗令物生信為趣又釋名並是品宗

來意盡為意趣第四解疑妨問此足輪光何  
時放耶若說名諦意如何佛刹菩薩眾數並  
同名號如先已放前何不說答是前名號品  
放但前二品明文殊此會說法不俟光照今  
辨百億刹中乃至徧法界說故須光以顯示  
其所來菩薩即前菩薩故並全同次有妨云  
光照百億百億何不照此釋云此為主故若  
彼為主則說彼照又疑云下光既窮法界金  
色更在何許當刹當刹有本會處皆去十刹  
主伴徧故第五釋文大分為二初如來放光

二照此下光至分齊今初足下放者表信四  
義一自下而上信最初故二最卑微故三為  
行本故智度論第九云足下放光者身得住  
處皆由於足四顯信該果海已滿足故輪義  
亦然圓無缺故言百億光者以徧法界所照  
十三  
之刹皆百億故第二光至分齊者此中光照  
大數約其現文且有二十六節前九別名後  
十七同辨即為十段若據實義應有等法界  
無盡之節節有偈中上本經必應廣說然  
非多度放光亦非一度放光次第照於多節

唯一放光同時頓照盡空世界但為言不並  
彰說有前後隨機心現節節各見則如來光  
明節節而照金色文殊節節而至乃至法界  
各見亦爾在佛文殊節節皆徧如月普照百  
川各見若法界機頓見前來諸類所見信會  
既爾住行等會同徧亦然十段之中文各有  
二皆長行佛以身光照現事境令眾自觀偈  
頌文殊智光讚述事理令眾悟入十段依答  
文三初五答菩提即分為五初一總顯菩提  
超情二通顯菩提因果三顯八相菩提四顯

菩提體性五體菩提之因今初長行中二光  
照本界染淨二如此處下現自法會普徧之  
相前中三初總標分齊二百億閻浮下別顯  
所照三其中下類結明顯今初言三千大千  
者俱舍論云四大洲日月蘇迷盧欲天梵世

各一千名一小千界此小千千倍說名一中  
千此千倍大千皆同一成壞梵世謂即初禪  
故云同一成壞以三度積故曰三千略去小  
中舉其末後故云大千長阿舍十八雜阿舍  
十六正理三十一及瑜伽智論雜集顯揚亦

不殊此有云然顯揚第一明三千世界三災  
所壞故知初禪小千二禪中千三禪大千若  
金光明直至非想皆云百億意在徧諸天故  
此經文中但至色頂約無色無處故今依二  
經二別顯所照中初現人中二現八相三現

第三

十四

諸天初中閻浮提者新云瞻部俱舍云阿耨  
達池岸有樹名瞻部因以名洲提者此云洲  
也東弗婆提者此云勝身身勝餘洲故西嚮  
耶尼此云牛貨以牛貨易故北鬱單越此云  
勝生以定壽千歲衣食自然故大海者即外

鹹海也百億輪圍者一四天下一小鐵圍故  
 中者有千大者唯一皆云百億者此方黃帝  
 算法數有三等謂上中下下等數法十十變  
 之中等百百變之上等倍倍變之今此三千  
 若以小數計有萬億今約中數從千已上百  
 百變之則有百億故唐三藏譯為百億俱胝  
 測公深密記第六云俱胝相傳釋有三種一  
 者十萬二者百萬三者千萬由此三千以俱  
 胝數或至百數或至千數或至百千唐三藏  
 譯是千萬也故或百數又依俱舍譯各又為

億此譯俱胝為億故下光照一億十億等梵  
 本皆云俱胝總由俱胝之數不同故也二現  
 八相中文有五相受生舍三佛成道後始放  
 光明却現初生及後涅槃者約微細門融三  
 世故亦非能照是報所照是化以放光身在  
 摩竭故此經報化融故大菩薩等化處見報  
 下位之機報處見化二不並故能照所照唯  
 是一佛顯佛自在超思議故三百億須彌下  
 現諸天中舉須彌者二天所依故二現自法  
 會中二先現本會此是一會徧一切處非是

多處各別有會乃至法界亦如是徧此圓融法非思之境二悉以佛神力下現新集衆言佛神力者亦即是前各隨其類現神通也文有四段謂總顯列名刹號佛名皆同名號品中但增百億爲異耳偈文分二先彰說人後顯偈辭今初言一切處文殊者略申三義一約當節如初節中百億佛前有百億文殊爲一切也各各皆說當節之偈故文皆云各於佛所二一文殊從一處東來即從一切處東來至一法會即至一切法會故雖東來而即

一切處以是法界即體之用身故三約表法文殊乃是不動智之妙用觸境斯了六根三業盡是文殊實相體周萬像森羅無非般若何有一處非文殊哉下九節中皆有二段倣此可知二正顯偈辭然釋此偈有通有別通者此明菩提超情別謂顯前光中所見之事於中又二一約境謂融前所照顯理法故二約觀謂令大衆泯絕諸見於所照事不生執取然觀資理成理由觀顯故通而釋之即明菩提超情大分爲二初一反顯餘九順釋今

初反顯違理之失謂菩提體德超絕一切佛地論明佛非漏非無漏亦應於世非著非無著今乃見佛內離諸漏外不著世則有漏可離有世不著取捨未亡此見違理故非道眼證道眼者無分別故餘偈順顯見理之益皆

單三

十六

上三句觀相下句觀益於中九偈各是一義且分爲四初六觀佛次一趣求次一觀生後一了法初中初偈正顯佛菩提性本來自空稱此而知則無上失體謂真性相謂德相並性無所有竟何所離本無有著誰爲無著如

是知者名爲正解修習明了斯爲正行下句觀益言疾作佛者約文殊門情盡理現即名作佛約普賢門信終圓收約行布說則不見此理成佛未期他皆倣此次一偈依正等觀佛菩提性依正無二故亦顯光所照處以明離見謂上半於前所見世界令離妄動知真法界不應動故次句例前八相佛身亦同等不動而了故成勝智次偈佛法等觀了同體故二念豈生一亦不存得難思果次偈生佛等觀言身即衆生以梵本中云佛及我故

我即行人之身稱理普周云平等住平等則無能所故曰無住我即法性更不證入法性無性復何所入如是知者曠世難逢故般若文殊分云若知我性即知無法若知無法即無境界若無境界即無所依若無所依即無所住也又本會即住無所住新集則入無所入問若皆平等云何分別有三寶耶智論答云平等即是三寶謂平等即法寶法寶即是佛以未得法不名佛故得平等法分別有須菩提等次偈會通平等謂上來主伴依正不

離五蘊五蘊性空即是平等有相差別總名為數即同無為故非數法離數超世成寂靜果次偈拂上出世謂真出世者超越入出不礙照知故成光耀又上第三偈佛即是法第四偈法即是眾第五偈明是三寶皆無為相此偈與虛空等二有一偈趣求者以上雖離見而知猶恐滯寂故上半勸求次句又觀性離謂了迴向心本自不生是離相迴向也離相求佛得名稱果三次一偈所見眾生亦皆稱真故無生壞知無眾生是無上道故下經

云無上摩訶薩遠離衆生想末後一偈知法  
 即成前法會周徧所由上半標門即十玄門  
 中一多相容不同門也次一句釋所由即十  
 種所由中緣起相由門也並如義分齊中謂  
 一與多互相生起且一依多起則一是所起  
 而無力也多是能起故有力也以多有力量  
 攝一以一無力入於多是故此一恒在多中  
 多依一起準上知之是則此多恒在一中也  
 以俱有力及俱無力各不並故無彼不相在  
 也以一有力一無力不相違故有此 自在

也緣起法界理數常爾稱斯而見何所畏哉  
 由此緣起成前平等由前平等成此緣起文  
 理昭然不許事事無礙恐未著深思第二重  
 光照十方各十佛土者是娑婆隣次之十刹  
 也十偈通顯菩提因果分三初偈菩提之因  
 次五菩提果用後四令物思齊今初上半所  
 為謂無明造業愛能潤業故生死無窮如泥  
 中刺不覺其傷如瘡中刺為其所毒下半能  
 為即從癡有愛菩薩悲生非大菩提莫之能  
 拔無此悲智非佛法故次五菩提果用中初



偈悲智雙滿智見諸法悲以轉授普見通於性相故離二邊謂真故無有俗故無無真故無有則雖無而有俗故無無則雖有而無雖有而無則不累於有雖無而有則不滯於無不滯於無則斷滅見息不存於有則常著冰消俱不俱等何由而有諸邊都寂故云皆離次一美徃因行次一慈力降魔次一智斷致用後一法鼓警機文相並顯後四令物思齊者斯即佛因能如是行得諸佛道四偈顯四種行一游刹無著謂不壞其相故能普游了

刹性空故於有無著二念佛生喜上半所念法身顯故如空永常解脫累亡如空清淨下半能念憶持明記故喜生願足三亡苦濟物四護法輕身文並可知第三重光照百界偈中顯佛八相菩提十偈分二初偈標德充滿軍三後九別廣調生今初謂了俗即真故如幻本十九虛真不礙俗故達諸法相性相無礙是真通達無二礙著則轉依心淨大悲同體故調伏衆生則三德備矣故能攝化後九中即悲願自在調伏普周雖數越塵沙略論其九皆言

或見者然有多義一或多機異處各感見二  
或同處各見三或異時別見四或同時異見  
五或同時異處見六或同處異時見七或異  
時異處見八或同時同處見九或一人於同  
異交互時處見多人所見十或一人於同異  
俱時處見一切人所見以是普眼機故然佛  
不分身無思普現也一初生時身如夜月皎  
鏡可觀智猶滿月清涼照物故云永作二行  
七步時顯其具德三顧眄時觀方現笑四師  
子吼時說我獨尊五出家時解縛修寂六坐

道場時障盡德圓七轉法輪時因悲度物八  
顯神通時調彼難調九示入涅槃不妨神用  
又下二句亦總結前九皆是神通並有深意  
如第八會第四重光照千界頌中顯菩提體  
性十頌分三初偈雙具悲智爲菩提體次四  
三德內圓後五即體悲用今初上半智深下  
半悲濟次四偈中一歎菩提永絕二我德謂  
二我之見必因於身今觀於身若我即陰我  
即生滅若我異陰以何相知故但妄情曾未  
甦有既無有我誰是我所我我所空身從何

有無身之身顯法身德二顯解脫般若德涅槃二十五云貪瞋癡心永斷滅故心善解脫於一切法知無障礙故慧善解脫涅槃略有百八句以顯深廣言明行者即般若德若作明行足釋即禪慧德瑜伽三十八云明謂三三明行謂止觀二品涅槃十六又云明者三明一菩薩明二佛明三無明明菩薩明者即是般若波羅蜜佛明者即是佛眼無明明者即畢竟空然皆般若因果理智異耳足有二義一腳足義約因二圓足義約果此文略無

無數下顯其離過非有為故無數超下位故無等豈是因明能求其過因明立量依世俗分別定有定無故曰世間今體絕有無故彼莫能過也如說佛聲非定有故不同外道立常從法性生離造作故不同菩薩所立無常三科皆爾豈將佛德判屬無常諸因量者謂諸因諸量及自他共等三種比量比量雖有三支五分因是量主故曰因量三一偈歎佛超絕三科德蘊者聚義謂是有為生死果相界者種族義謂是愛著生死因相處者生門

義謂諸識內外緣相然不離色心俱舍論云  
愚根樂三故說蘊處界三蘊等有二一者有  
漏是世數法佛非此成二是無漏則佛非無  
因滅無常色等獲常色等故如來妙色常安  
隱故四歎佛超離根境智雙寂契彼性  
空根塵兩亡內外解脫亦常照內外脫於無  
知空尚不存妄從何起又上四偈初一法身  
故常二無過故樂三數不能成故自在稱我  
四解脫故淨後五即體悲用中初偈不動普  
應德上半不動下半普應二我永亡稱性不

動智周法界何有去來次偈動寂無二德三  
句入寂一句起用一相是表所謂無相無二  
是遮體不可分又無二者非對有說無也觀  
無始終故心不增減三輪之化云無量神力  
次偈無染了機次偈度心平等後偈無生現  
生智契非有悲心徧生隨機引之令歸常寂  
第五重光照十千界頌中明等菩提因行文  
有十行皆三句辨相一句勸修雖皆作業而  
展轉深細略分而五初一大悲下救業不求  
自利故云永出人天次四修智上攀業一信

二樂三念四學又初一長時修常信不轉故  
次一殷重修志樂不退故清涼慧者無惑熱  
故次偈無間修不暫斷故後偈無餘修常徧  
學故三有一偈內照業觀身實相者如淨名  
觀佛前際不來等又如法華不顛倒等中論

法品云諸法實相者心行言語斷無生亦無  
滅寂滅如涅槃即上半也又云諸佛或說我  
或說於無我諸法實相中無我無非我即下  
半也又離我者超凡夫離無我者超二乘故  
能悲濟然我無我通有四句一唯有我二唯

無我三者雙辨即生死無我涅槃有我四雙  
非上二互形奪故四一偈等觀業大悲同體  
所以等觀見真息妄不起分別妄盡契如名  
入真實五後三偈大用業初偈神足通後二  
法智通於中初一知土法性土為非色餘皆  
為色此二融即皆悉委知後一知佛又十展  
轉者初悲欲救生當云何救信樂近佛樂其  
何法樂佛功德佛以功德成其身故空樂何  
益當念念修學學他不如自觀自觀不及物  
我齊致入真滯寂當起大用用何所為當擬

窮十方界入諸佛海第六重照百千界即第二答佛威德問威德約身故前五法身後五智身前中分二初一揀迷謂以威德則自在熾盛色相則端嚴吉祥種族則名稱尊貴雖是薄伽而見從外來取相乖於最勝故爲倒見猶眼有病故見外空華執內爲外謂空爲有後四示悟顯最勝法初偈明如來色相無邊故起情莫測無邊有二一深故隨一一相稱真無邊二廣故謂具十蓮華藏塵數之相次偈釋上二義前半釋深相即無相故後半

釋廣無相之相故廣復有二一無限因成二應機普現謂色無定色若金剛之合朱紫形無定形猶光影之任脩短相無定相似明鏡之對妍媸故隨樂皆見三一偈明所證超情以成前義前半正顯謂欲言其有體相寂滅欲言其無色相無邊故止言顯妙唯智方契故心慮叵量理圓言偏故言說莫及後半重釋謂應緣非不合住體非和合又緣起修成非不合契真相盡非和合又緣即非緣故非和合非緣即緣故非不合合相離故無諸相

非合亦離體寂滅也四有一偈明能證超絕  
結歸佛身上來體性寂滅遣有身相具足遣  
無非合不合遣俱有無而復謂佛是非有非  
無還成戲論中論云戲論破慧眼是皆不見  
佛故次遣之謂妄惑不生故非蘊聚起心則  
生便成戲論決定見者不隨境相名自在力  
有無不能累其神故無畏也非言行處為絕  
言道後五智身中初知解脫智謂外身非業  
繫內心無取著為皆解脫常契等理故云正  
念又內脫二障外用無羈此明自住下四大

用自在展轉相釋初一以寂照智利生意淨  
寂也光明照也淨故無著明故智周故能大  
作佛事次一云何利生謂變化智自在上半  
一多無礙下半隨器普現次偈明一多所從  
以無生智隨物而感謂一身多身但由衆生  
分別心起故無積無從其猶並安千器數步  
而千月不同一道澄江萬里而一月孤映情  
隔則法身成異心通而玄旨必均云云自他  
於佛何預後偈復拂前迹謂即前分別之器  
亦無所有妄見之身豈當可得此法是佛所

知當依此理見佛此後二句兼通結上第七  
 重光照十方百萬世界此下四段答法性問  
 佛以功德為法性故即分為四初一總顯內  
 外包攝德二方便幹能德三大悲救攝德四  
 因果圓徧德今初偈中分二前五歎佛法難  
 思後五示入方便今初分三初三直就佛明  
 次一對機以辨後一約法以明今初初一  
 句所緣及一切種智清淨於所緣所知中無  
 礙智自在轉故次句所依清淨煩惱習氣永  
 無餘故三一切種心清淨一切善根皆積集

故四具大悲故五無憂喜之離染安住捨故  
 故無所著六惡想都絕不依止名聞利養故  
 七八二句體雖叵量具相好故稱歎九智光  
 徧覺離倒名淨身光可知十永害習氣故十  
 一住正念故離邊常明記故不動亦是成上  
 智光所觀故結云佛智又此一偈即四無所  
 畏光明即正覺清淨即出苦滌累漏盡及與  
 障道無畏不動即無畏之義外難不能傾故  
 不墮勝負二邊故是無畏智二一偈對機以  
 辨中身心離分別者含於二意一約佛以三



業隨智慧行等故二約機即知上功德而能  
身心無分別者則得無疑無滯益三有一偈  
約法以顯雖法界徧轉無性寂滅故無所轉  
假以言宣云方便說其能轉智即十力智後  
五示入方便者上來說佛不離功德菩提上  
所說法不離教義次第令入初偈令念菩提  
初句善決性相次二句契理絕想以生分別  
想即戲論故具斯二義為念菩提故大般若  
云覺法自性離諸分別同菩提故又心絕動  
搖言亡戲論又瑜伽九十五有六種戲論故

名為諸次偈隨教上二句了法亡言次句得  
旨方名隨順次偈入佛功德上二句雙存一  
多相別故次句雙泯相形奪故一因於多有  
多中應有一多因於一有一中應有多今多  
中無一一無從矣一中無多多無從矣故二  
俱捨也而性相融通入一即是入多名普入  
也然一多相依互為本末通有四義一相成  
義則一多俱立以互相持有力俱存也即初  
二句二相害義形奪兩亡以相依故各無性  
也即二俱捨是三互存義以此持彼不壞彼

而在此彼持此亦爾故上文云一中解無量等是四互泯義以此持彼彼相盡而唯此以彼持此此相盡而唯彼故下文云知一即多多復即一是也諸文各據一義故不相違矣復總收之以為十義一孤標獨立二雙現同時三兩相俱亡四自在無礙五去來不動六無力相持七彼此無知八力用交徹九自性非有十究竟離言次偈入佛菩提依正皆寂故無所依智契於斯故無分別後偈知法義上明生土皆寂不可言異依正兩殊不可云

一第八重光照一億界前云百萬今十倍於前即千萬為一億也十偈歎佛權實雙行方便幹能然方便之言略有三意一以因中十種加行方便之力修成佛果自在之德二但是差別之用皆名方便其無礙慧無若干故

重三

重六

三即實之權起用自在故名方便今文具三皆三句辨相一句結名初偈即體起用為方便然有六義一智超下位二證法無邊三解脫有海四具上三義到涅槃岸五壽兼真應六身光無涯皆佛功德二歎寂照方便初句

橫照次句豎窮次句即寂照而無思故難思也三歎佛事理無礙方便初二句有無無礙次一句定散無礙四歎佛修無修方便初句善窮性相次句無念勤修樂於解脫釋修涅槃離不平者釋前正念以不見生死為雜染涅槃為清淨此二無差為真寂滅五歎迴向方便初二句趣如法界是迴向實際餘皆迴向善提次句迴向眾生住如化物故為方便六證知方便初句隨順證入次句知而無障次句知徧趣行即利生法即知即證為自在

修也七寂用方便初句寂次句用次句寂用無礙為無住涅槃凡小難到八時數方便可知九難思方便初句了生滅剎那一期皆悉了知次十一字了相即眾生體不出三界九地軍三下二界是色無色界非色二界八地皆名為想無想天軍三為非想有頂非想非非想悉了知者能了兼了其性即是無生此是無邊之境故難思也上二偈但了差別即是方便十無比方便初二句知相上句豎窮下句橫攝次句知性此二不二故無比即為方便也第

九重光照十億界歎佛大悲救生德十偈多以第四句爲結於中分三初偈總標行海已圓而能普化次八別顯化類不同後一總結悲智周徧初中初句無餘修廣謂徧受大謂極苦次句長時無間次句功行已圓極惡難度已能度故云何能度謂師子吼師子吼者名決定說定說一切衆生皆有佛性度一闡提定說無我度諸外道定說欲苦不淨以度波旬定說如來常樂我淨度諸聲聞定說大悲以度緣覺定說如來無礙大智以度菩薩

故云普化衆生次八別中云何普化初化癡愛衆生前半所救如人墮海五事難出一水深二波迅三迷闇四蟲執五憂迫失力衆生欲海流轉亦爾此中愛有二義一已得無厭深廣如海二於未得處無足如流癡亦二義一迷不見過二妄見有德結網自纏五由前癡愛招大憂苦次句舉古佛已行亡身爲物故曰至人後句立誓當作二度著欲衆生上半所救放逸者著欲緣也著五欲欲事也不實分別欲因也受衆苦欲果也未得已失皆

受大苦正得亦苦橫生樂想況當受三塗故  
云眾苦次句受教自修後句立誓轉化三救  
著我眾生前半所救著我為因受生死果未  
證無我浩無邊際次句救方說二無我唯佛  
有之四救惡趣眾生三句所救謂無善可恃  
顯唯惡業及惑病因招三惡趣展轉復起三  
毒之過因果俱燒末句救方但淨其心因亡  
果喪五救邪見眾生前半所救上句明因迷  
四真諦惑現境故次句起見邪見翳理即為  
闡宅後半能救之方六救著有眾生前半所

罪三

二十八

救三有深廣總喻於海漂至人天還溺惡趣  
未遇如來多成難處希求不已故名為憂未  
有對治故無涯畔具上諸失故不可處後半  
能救可知七救無明眾生前半所救由本住  
無明故不見無住之本迷理惑事狂走於生  
死之中後半能救佛既授法正念即升也八  
救險道眾生前半所救人天報危臨墮惡趣  
名為險道能救可知後一偈總結者前半結  
有教證之智能導無緣之悲次句結有同體  
之悲能徧十方六道後句結於所救不越羣

迷第十重光照十方總結無盡長行分二先明世界數量略有十七漸窮法界後明彼諸世界所有皆現十頌明因果圓徧德於中分二前四示佛因果徧說後六勸物順行今初初一偈因圓果滿彰有說因初三句三遠因第三圓後句十力果滿次一偈大用外彰正明說二十九法周徧可知後二對因辨果初一偈徧因初可為因三句皆果法供養佛故於法順知普為衆生故能徧用斯即等流名相似果晉經云正心供養明是法供養也後一偈三因故

能速證初二句六度自利謂供佛是檀意柔兼戒從初至末是進策也次句利他兼方便等二行既圓則佛果朝夕故云速成後六偈觀物順行佛昔如是行今得說法果令物行之亦得斯果初一偈求法行二說法行三聽法行四有三偈破相行今初初句離過勝他名利名為異情次二句顯德一句德福一句圓智又無異者於一切法都無所求若此之求則見真法身也二說法行前半說法益物義利者令衆生得離惡攝善故此世他世益

故世出世益故福德智慧益故上四對皆先  
義後利後半若無說無示同佛說也三聽法  
行兼顯法輪之體初句教法次句即教成行  
無有一文一法非菩提因豈止三十七品次  
句悟理揀去隨文後句理無廢興故常見佛  
果也後三破相行初一正明後二轉釋今初  
初三句反顯金容煥目而非形安可以相取  
後句正顯法性超乎視聽唯可虛已而求後  
二轉釋云何不見前偈以妄喻真眾生妄惑  
尚不可窮諸佛契真如何見盡後偈復轉釋

云雖徧十方不可定取如刹徧空有其四義  
一多刹滿空二體無來去三不妨成壞四無  
別所依佛身徧空亦具四義一頓徧多刹二  
恒不去來三應有出沒四體用無依是故佛  
身亦不可以徧空而取耳上來三品答初十  
句所依果問竟

單三

三十

大方廣佛華嚴經疏卷第十三

永樂北藏

大方廣佛華嚴經疏

第一六九册

音釋

眇匹莧切 流也切 倣甫兩切 癱於容切 睫即涉切

也也 纒牆來切 攫攫也 噬時厥切 縛切 齒倪結切 闌毛切

也也 痲才支切 傲魚到切 駛疏士切 眇蒲彌切

視切 邪也 妍妍也 媼媼也 醜也 羈居宜切 一闌

提闌 闌提此云信不具



大方廣佛華嚴經疏卷第十四

軍四

唐清涼山大華嚴寺沙門 澄觀撰

菩薩問明品第十

釋此一品亦有四門初來意中有通有別通謂上來三品已答十句生解所依此下正答生解因果故次來也生解因中先答十住攬信成將答所成先辨能成又正答十信故下三品來也後別者三品明信有解行德解為二本此品先來二釋品者菩薩是人問明是法遮果表因故云菩薩問即是難明即是

答然問有二種一汎爾相問梵云必理車二者難問謂以理徵詰梵云鉢羅室囊即今品意也答亦有二一但依問訓報曰答二若俱為解釋旁兼異義美言讚述令理顯煥曰明即今品意也明亦破闇能除問者之疑闇故今文殊九首互為明難遞作礎推研覈教理以悟羣生故以名也又長行明起於問偈頌明解於問故曰問明不云答者欲以明兼於問故問有二義故得稱明一問中徵責詰難理盡使答者亡言此至明之問也二以問中

進退詰理今現使答者易釋故以為明又明  
 即法明以十菩薩問出十種法明故曰問明  
 雖諸義不同皆菩薩之問明依主釋也三宗  
 趣者亦先通後別通復二義一通分宗二通  
 會宗並如會初二別明此品有其二義一望  
 當品以十甚深為宗依成觀解為趣二望後  
 二品則以甚深觀解為宗成後行德為趣第  
 四釋文此下至菩薩住處明生解之因配十  
 句問如前問中依文次第且分為六初此下  
 三品明未信令信二第三會已信令解三第

四會已解令行四第五會已行今起願五第  
 六會已起願令證入六十定品至住處品已證  
 入今等佛今初三品即為三別此品明正解理  
 觀次品明隨緣願行賢首品明德用該收就  
 初分二先問答顯理後示相結通前中以十  
 菩薩各主一門顯十甚深即為十段一緣起  
 甚深二教化甚深三業果甚深四說法甚深  
 五福田甚深六正教甚深七正行甚深八正  
 助甚深九一道甚深十佛境甚深此十甚深  
 次第云何緣起深理總該諸法觀解之要故

首明之衆生迷此故須教化違化順化有善惡業欲知此業由說法成然說法成善唯佛福田既說順田須持聖教教在勤行行須正道助道助必有正殊塗同歸得一道者當趣佛境故爲此次又此十種亦可配於十信但不次耳文殊佛境即當信心文殊主信故佛境即所信故約發心次第信居其初約所信終極最居其後亦明十心不必次故勤首即進心財首爲念心明四念故覺首定心能觀心性爲上定故智首則慧心慧爲上首兼已

莊嚴故有十度法首即不退心如說修行得不退故寶首即戒心三聚無缺如寶珠故業果甚深戒所招故德首即護法心說法甚深是所護故目首即願心福田等一由願異故目能將身如願單四導行故賢首即迴向心以歸一道即迴向真如一身一智等即是佛果文三云如本趣菩提所有迴向心等以是圓融十法故各兼多義又亦攝十信之十德恐繁不叙且爲十甚深解然有二義一約行二約法言約行者文殊發問九菩薩答明妙慧通於

衆行九菩薩問文殊爲答明衆行成於妙慧  
言約法者初九顯差別義後一顯差別同歸  
佛境此二不二成信中之觀解文中十段皆  
先問後答又先起明問後解問明今初問中  
二先彰問答之主問覺首者彼得此門故緣  
起深義不覺則流轉故二佛子心性下正顯  
問端略啓五門一問所爲二述問意三定所  
問四會相違五釋本文初所爲者有二義故  
最初問之一拂異見二顯深理拂見有三一  
令諸菩薩知法從緣異外道見二知從心現

捨二乘見三但心性起不同權教二顯深理  
者令諸菩薩於此實義發深信解起行證真  
始終皆實故問斯義起信論云有法能起摩  
訶衍信根是故應說所言法者謂衆生心依  
一心法有真如門及生滅門彼論依此生淨  
信故二述問意者謂明心性是一云何見有  
報類種種若性隨事異則失真諦若事隨性  
一則壞俗諦設彼救言報類差別自由業等  
熏識變現不關心性故無相違者爲遮此救  
故重難云業不知心等謂心業五依各無自

性自性尚無何能相知而生諸法既離真性各無自立明此皆依心性而起心性既一事應不多事法既多性應非一此是本末相違難亦是理事相違亦一異相違亦真妄相違三揀定所問者準此問意離如來藏不許八識能所熏等別有自體能生諸法唯如來藏是所依生亦不可言八識無二類故名心性一以能生種種非相違故亦非第八而為性一熏成種種非相違故心性之言非第八故答中既言法性本無生示現而有生法性即

是真如異名正與報事相違故成難耳文殊欲顯實教之理故以心性而為難本欲令覺首以法性示生決定而答海會同證楞伽密嚴皆廣說故四會相違者問若爾瑜伽等中異熟賴耶從業惑種辦體而生非如來藏隨緣所成如何會釋答瑜伽等中對於凡小約就權教隨相假說楞伽密嚴對大菩薩依於實教盡理而說既機有大小法有淺深教有權實故不相違故密嚴云佛說如來藏以為阿賴耶惡慧不能知藏即賴耶識此明守權

拒實訶為惡慧又彼經云如來清淨藏世間  
阿賴耶如金與指環展轉無差別楞伽中真  
識現識如泥團與微塵非異非不異金莊嚴  
具亦復如是皆此義也又彼經云如來藏為  
無始惡習所重名為藏識又入楞伽云如來  
藏名阿賴耶識軍四而與無明七識五共俱又起信  
論云不生不滅與生滅和合非一非異名阿  
賴耶識又如達磨經頌云無始時來界為諸  
法等依攝論等就初教釋云界者因義即種  
子識實性論翻此頌云此性無始時等彼論

就實教釋云性者謂如來藏性如聖者勝鬘  
經說依如來藏故有生死依如來藏故有涅  
槃以此等文故知兩宗不同淺深可見又唯  
識等亦說真如是識實性但後釋者定言不  
變失於隨緣過歸後輩耳五釋文者文分三  
別初心性是一者立宗案定二云何下設相  
違難三業不知心下結成前難今初謂心之  
性故是如來藏也又心即性故是自性清淨  
心也又妄心之性無性之性空如來藏也真  
心之性實性之性不空如來藏也皆平等無

二故云一也第二設難中二先總顯相違謂  
心性既一云何而有五趣諸根總別報殊故  
云種種不同二所謂下別示相違有十事五  
對一約總報明趣有善惡善謂人天惡謂三  
塗下四對皆約別報於中二謂於前善惡趣  
中各根有滿缺謂眼等內根三於滿缺中各  
生有同異謂四生不同勝劣處異四於上同  
異生處各貌有妍媸五於上妍媸各受有苦  
樂上之五對前前皆具後後後後必帶前前  
展轉異同成多差別故云種種不同心性是

一其義安在第三結成前難中此文意稍難  
見略為二解一依古德作遮救重難如前第  
二問意中辨二直結成前難且依此釋文自  
有三意由前難意亦有三故一直問所以故  
今結云非但本性是一我細推現事各不相  
知既有種種何緣不相知既不相知誰教種  
種若謂業令種種業不知心若謂心令種種  
心不知業一一觀察未知種種之所由也二  
者懷疑故結云既不相知為是一性為是種  
種三作相違難結云一性隨於種種即失真

諦種種隨於一性即失俗諦今見種種又不  
相知此二互乖云何並立已知大意次正釋  
文亦有十事五對略爲二解一通二別通謂  
總觀前來總別二報於中初一對就先業因  
約能所依以難然有二意一約本識謂業是  
能依心是所依離所無能故云業不知心離  
能無所故云心不知業以各無體用不能相  
成既各不相知誰生種種下並準之二約第  
六識業是所造心是能造並皆速滅起時不  
言我起滅時不言我滅何能有體而得相生

成種種耶第二對約得報果時難能所受謂  
受是報因即名言種爲業所引受所受報離  
報無受故云受不知報離受無報故云報不  
知受以並無體故準前應知三約名言因就  
能所依難謂前能受報因依心無體故無相  
知餘義同前四約因緣就親疎相假難謂所  
引名言種爲因能引業爲緣相待相奪各無  
自性如不自生等準之五約境智相對相見  
虛無難謂境是心變境不知心心託境生心  
不知境以無境外心能取心外境是故心境



虛妄不相知也第二別觀者以初二對結趣善惡趣善惡者正由業重受總報故二復以第二及第三對結受生同異初對以名言種對所生處次對以名言種對能依本識三復以第三及第四對結苦樂不同及端正醜陋初對觀現受時次對觀苦樂因及彼妍媸皆由緣令異謂損益因成苦樂果以瞋忍因成妍媸果四復以第四及第五對結諸根滿缺亦由滿業因緣有損他益他之異故成內六處滿缺之果又由內根有滿缺故於分別位

了境不同並皆無性各不相知既不相知誰令種種第二時覺者下答中二初一偈讚問許說上半讚問謂自究深旨一向爲他仁心弘益也次句許說分齊稱性說故後句勸聽言同意別故令諦受後十偈正答答勢縱橫具答三重問意且分爲二前五答前釋成之中以何因緣而不相知用此釋成答前難故首而明之後五正答前難今初分二先一法說後四喻況今初意云特由從緣種種故不相知也即此偈上半出因下半結歸本宗後

四即為同喻量云眼等是有法定不相知故是宗法因云從緣無體用故同喻云如河中水河水無體用河水不相知眼等無體用眼等不相知若以緣起相由門釋者初句因緣相假互皆無力次句果法含虛故無體性至

單四

八

有為法也果從因生果無體性因由果立因無體性因無體性何有感果之用果無體性豈有酬因之能又互相待故無力也以他為自故無體也下半結中是故者是前體用俱無故故彼一切法各各不相知也第二喻況略有二意一以此四喻通釋諸法不相知言二別對前文諸不相知兼通前設難今初以四大為喻然各上三句喻況下句法合然此四喻各顯一義一依水有流注二依火焰起滅三依風有動作四依地有任持法中四者

一依真妄相續二依真妄起滅三妄用依真起四妄為真所持然此法喻一一各有三義一唯就能依二依所依三唯所依今初喻中唯就能依者流也然此流注有十義不相知而成流注一前流不自流由後流排故流則前流無自性故不知後二後流雖排前而不平四到於前流故亦不相知三後流不自流由前流引故流則後流無自性故不能知前四前流雖引後而不至後故亦不相知五能排與所引無二故不相知六能引與所排無二故

不相知七能排與所排亦無二故不相知八能引與所引亦無二故不相知九能排與能引不得俱故不相知十所排與所引亦不得俱故不相知是則前後互不相至各無自性只由如此無知無性方有流注則不流而流也肇公云江河競注而不流即其義也然上云前後者通於二義一生滅前後謂前滅後生互相引排二此彼前後即前波後波小乘亦說當處生滅無容從此轉至餘方而不知無性緣起之義耳二依所依者謂前流後流

各皆依水悉無自體不能相知然不壞流相故說水流三唯所依者流既總無但唯是水前水後水無二性故無可相知是則本無有流而說流也二法中三義者一流喻能依妄法二妄依真立三妄盡唯真初中妄緣起法似互相藉各不能相到悉無自性故無相知是則有而非有也二依所依者謂此妄法各自自虛含真方立何有體用能相知相成即由此無知無成含真故有是則非有而為有也三唯所依者謂能依妄法迥無體用唯有

真心挺然顯現既無彼此何有相知正由此義妄法有即非有以非有為有復說真性隱即非隱以非隱為隱此上三意即三種答答上三種問思之何故以水喻真心者以水有十義同真性故一水體澄清喻自性清淨心二得泥成濁喻淨心不染而染三雖濁不失淨性喻淨心染而不染四若澄泥淨現喻真心惑盡性現五遇冷成冰而有硬用喻如來藏與無明合成本識用六雖成硬用而不失軟性喻即事恒真七煖融成軟喻本識還淨

單四

十

八隨風波動不改靜性喻如來藏隨無明風波浪起滅而不變自不生滅性九隨地高下排引流注而不動自性喻真心隨緣流注而性常湛然十隨器方圓而不失自性喻真如性普徧諸有爲法而不失自性略辨十義少分似真故多以水爲喻此義見文雖似不具而大通衆經第二依火焰起滅喻中三義同前初唯焰者謂焰起滅有其二義一前焰謝滅引起後焰後焰無體而不能知前焰前焰已滅復無所知是故各各皆不相知二前焰

若未滅亦依前引無體故無能知後焰未生故無所知是故彼亦各不相知妄法亦爾剎那生滅不能自立謂已滅未生無物可知生已則滅無體可知是故皆無所有也斯則流金爍石而不熱也二依所依者謂彼火焰即準四由於此無體無用不相知故而有起滅虛妄之相是則攬非有而爲有也妄法亦爾依此無所依之真理方是妄法是亦非有爲有也三唯所依者推起滅之焰體用俱無無焰之理挺然顯現是則無妄法之有有妄法之無

湛然顯現遂令緣起之相相無不盡無性之  
理理無不現上三義中亦如次喻答前三問  
也下二喻準知第三依風有動作喻妄用依  
真起三義同前一唯動者離所動之物風之  
動相了不可得無可相知妄法亦爾離所依  
真體不可得故無相知斯則旋嵐偃岳而常  
靜也二依所依者謂風不能自動要依物現  
動動無自體可以知物物不自動隨風無體  
不能知風法中能依妄法要依真立無體知  
真真隨妄隱無相知妄三唯所依者謂風鼓

於物動唯物動風相皆盡無可相知妄法作  
用自本性空唯所依真挺然顯現是故妄法  
全盡而不滅真性全隱而恒露能所熏等法  
本自爾思之可見第四依地有任持者喻妄  
爲真所持三義同前初地界因依有二種義  
一約自類二約異類前中從金剛際上至地  
面皆上依下下持上展轉因依而得安住然  
上能依皆離所無體而能知下然下能持皆  
亦離所無體可令知上又上上能依徹至於  
下無下可相知下下能持徹至於上無上可

相知是故若依若持相無不盡所現妄法當  
知亦爾必麤依細謂苦報依於業業依無明  
造無明依所造展轉無體無物可相知斯則  
厚載萬物而不仁也肇公亦曰乾坤倒覆無  
謂不靜也二約異類者如下文地輪依水輪  
水輪依風輪風輪依虛空虛空無所依準此  
妄境依妄心妄心依本識本識依如來藏如  
來藏無所依是故若離如來藏餘諸妄法各  
互相依無體能相知是則妄法無不皆盡二  
依所依者地界正由各無自性而得存立向

若有體則不相依不相依故不得有法是故  
攬此無性以成彼法法合可知三唯所依者  
謂攬無性成彼法者是則彼法無不皆盡而  
未曾不滅唯無性理而獨現前餘義同前上  
通答釋成前難竟第二別對諸不相知及通  
前難者初水流轉喻前二對不相知答趣善  
惡難以善惡趣流轉體故二大火喻第二三  
對不相知答前諸根受生如火依薪有生滅  
故次以長風喻前因緣答前好醜遇物鼓扇  
現諸相故次以地界亦喻因緣答前苦樂展

轉因依以輕重故又喻前境智答前諸根隨  
 種所生根等異故上來總別並答釋成中以  
 何因緣各不相知竟第二五偈答前設難文  
 分為三初三偈正答前難次一偈釋成前義  
 第三一偈拂迹入玄今初先明大意次正釋  
 文今初前問有三重今此三偈一具答上  
 之三問謂第一直耳問云既有種種何緣得  
 不相知前五偈答竟既不相知何緣種種答  
 有四因一妄分別故二諸識熏習故三由無  
 性不相知故四真如隨緣故初偈具二三餘

二各一義然此四因但是一致謂由妄分別  
 為緣今真如不守自性隨緣成有諸識熏習  
 展轉無窮若達妄源成淨緣起諸宗各取並  
 不離象受一非餘斯為偏見上第二疑云為  
 是種種為是一性今答云常種種常一性第  
 三難云一性隨於種種則失真諦種種隨於  
 一性則壞俗諦今答云此二互相成立豈當  
 相乖性非事外曾何乖乎種種種種性空曾  
 何乖乎一性由無方有一性能成種種緣生  
 故空種種能成一性是以緣起之法總有四



義一緣生故有即妄心分別有及諸識熏習是也二緣生故空即上云諸法無作用亦無有體性是故彼一切各各不相知是也三無性故有論云以有空義故一切法得成經云從無住本立一切法即上隨緣是也四無性故空一即一切空無性是也是以無性緣生故空則非無見斷見之空為真空也無性緣生故有則非常見有見之有是幻有也幻有即是不有有真空即是不空空不空空故名不真空不有有故名非實有非空非有是中道

義又開此空有各有二義一真空必盡幻有以若不盡幻有非真空故二真空必成幻有以若礙幻有非真空故二幻有二義者一幻有必覆真空以空隱有現故二幻有必不礙真空以幻有必自盡令真空徹現故文殊各

單四

十四

味法界即中道義離相離性無障無礙無分別法門思以準之復次性有二義一者有義二者空義復有二義一者不變二者隨緣以有義故說二空所顯即法性本無生也以空義故說依他無性即是圓成即各不相知以有義故說於不變以空義故說於隨緣此二不二隨緣即是不變不變故能隨緣若唯不變性何預於法若但隨緣豈稱真性故隨其流處有種種異而其本味停留雪山又若性離於法則成斷滅法離於性則本無今有又

法若即性性常應常性若即法法滅應滅故二相成非常非斷此二相奪故說非有非空為中道義苟得其會不惑百家異說願諸學者虛已求宗次正釋文且第一偈答三問者初答何因種種此具二意一以八識熏習而成故初句五識第十四次句心是本識集起義故意通六七七謂審思量故六謂意之識故了別義故偈文窄故不立識言亦諸情攝此從別義通則八識皆得心意識名諸情根者通於八種類非一故五依色根六依第七七八互

依又第七識爲染汙根第八又爲諸識通依云諸情根言以此者以上八識爲能所熏展轉爲因而常流轉無別我人故云無能轉者又識外無法亦爲無者二明由不相知方成種種上半出種種以此者以前不相知故舉體性空方成流轉即此八識各無體性故無實我法而爲其主向若有性不可熏變安得流轉次遣疑者以虛妄中有二義故一虛轉二無轉故常種種常一性也次答難者虛轉故俗不異真而俗相立無轉故真不異俗而

真體存故互不相違也第二偈亦答三問初明真如隨緣故成種種者答所以也初句印上心性是一是不變義次句答上云何見有種種是隨緣義唯心變現全攬真性生非實生故云示現下二句印上業不知心等者以是隨緣不失自性義故是以諸趣種種了不可得生即無生無能現者性不動故無所現者妄法虛故次遣疑者常生常無生上半即無生之生業果宛然故勝鬘云不染而染難可了知下半生即無生真性湛然故勝鬘云

染而不染難可了知又法性本無生不空如  
 來藏也此中無能現空如來藏也答第三難  
 者此中無能現性非性也亦無所現物相非  
 相也又示現而有生性不違相亦無所現物  
 相不違性無二為二二即無二無礙圓融豈  
 有乖耶言法性者法謂差別依正等法性謂  
 彼法所依體性即法之性故名為法性又性  
 以不變為義即此可軌亦名為法此則性即  
 法故名為法性此二義並約不變釋也又即  
 一切法各無性故名為法性即隨緣之性法

軍四

十六

即性也本有二義一約不變本謂源本本來  
 不生隨緣故生二約隨緣有此法來本自不  
 生非待滅無即示現生時本不生故故下云  
 無能現也第三偈答三問者初答所以者上  
 三句種種即一心性亦印前文殊不相知等  
 下句出因由妄分別故有種種正答前問此  
 復二意一上二句依他起也次句圓成實也  
 後句徧計性也由徧計故能起依他依他無  
 性即圓成實故唯識云依他起自性分別緣  
 所生圓成實於彼常遠離前性故此與依他

非異非不異二者上二句因緣所生法也次  
句我說即是空也後句亦為是假名此二不  
二是中道義又妄心分別有情計謂有然  
有即不有故云一切空無性常有常空是即  
萬物之自虛豈待宰割以求通哉又前偈從  
本起末末不異本此偈攝末歸本本不礙末  
豈相乖耶第二一偈釋成前義然有二義一  
者云何得知無性以法眼觀稱性非倒成淨  
緣起當知此理甚為決定二者前偈訶其見  
有種種是妄分別此不應依此偈印其觀察

無性各不相知斯為法眼固應依止即依智  
不依識也第三一偈拂迹入玄者謂前法性  
無生一切皆空實也示現有生眼等差別非  
實也妄心分別有妄也如理觀察非妄也以  
妄為緣生世間流轉以如理觀成出世間非  
倒法眼皆是名言而無真實何者如言取故  
又欲言其實而復示生欲言不實體性即空  
欲言是妄妄不可得欲言非妄能令流轉欲  
言世間即涅槃相欲言出世無世可出則染  
淨兩亡是以物不即名以就實名不即物而

履真然則實理獨靜於言教之外豈文言之能辨哉故但假說是以什公云唯忘言者可與道合虛懷者可與理通冥心者可與真一遺智者可與聖同耳又後三偈亦如次明三無性觀又此五偈合前四喻初以流轉合水漂流次頌合火火本無生隨緣生故次頌合風風即空無因見物動妄謂有故次頌合地法眼見理無分別故後一總顯令亡言故又前五偈是印成答次四出所以答後一奪令亡言文殊一問以含多意覺首縱答體勢無

方逆順研窮以顯深致幸諸學者不吝文繁第二教化甚深先問中二初標告告財首者彼得此法財益生門故二正問中二初立宗衆生即非衆生彼此同許亦可躡前覺首八識皆空二云何下設難謂衆生既空佛云何軍四化若佛不見生空則無大智便成謗佛若見空而化豈不違空空有相違進退何據於中先明十隨辨所化差別後明三輪顯能化不同今初一隨根生熟時如是時中堪如是化又此句為總謂隨何壽命時等下九為別各

有二義謂隨其壽命脩短而化又以無命者法而教化之身二義者謂隨其所受何等類身而受化故又宜以觀身空寂等而得度者以彼化故餘準此知故下答中多說後意行謂三業善惡解謂識解差別言論者國俗教誨此六多約未發心前後四多約發趣已去心樂者有所欣求方便者隨所進趣思惟者依法求義觀察者如說修學二於如是下能化差別先牒十隨後現三業教化調伏通於語意爲以十隨化故衆生非空耶爲以衆生

空故十隨虛設耶第二財首答中準諸深經及此偈文略有四意一佛見衆生本來自空非斷空故不礙隨化偈云諸法空無我衆報隨業生故二佛知衆生不能自知真空故悲以隨化偈云隨解取衆相顛倒不如實故三隨化即空不異衆生空故二不相乖偈云此是樂寂滅多聞者境界故四融上諸義良以攬空爲衆生生與非生唯一味故不增不減經云即此法身流轉五道名曰衆生法身即衆生衆生即法身法身衆生義一名異以斯

義故佛見衆生舉體自盡本是法身不須更  
化大智現前見於法身隨緣即衆生故大悲  
攝化今以寂滅非無之衆生恒不異真而成  
立故是不動真際無化而化以隨緣非有之  
法身恒不異事而顯現故不壞假名化即無  
化所化既空有不二能化亦悲智不殊不礙  
有而觀空方能入理不動真而隨化方能究  
竟化他衆生不知此理故流轉無窮今令衆  
生悟如斯法是則真實隨化非直十隨不違  
空理亦由此十方契真空故淨名云當爲衆

生說如斯法是即真實慈也十頌分二初一  
舉法勸聽上半以人顯法已含答意上句體  
深下句用廣即聞之寂則聞無所聞故無衆  
生大經亦云若知如來常不說法是名具足  
多聞即寂多聞則善解藥病不礙隨化下二  
句許說勸聽後九頌別答前問文勢多含略  
爲二釋一者一一別答謂初三答隨身次一  
隨命三一頌答隨觀察四一頌答隨行及方  
便五一頌答隨心樂及解六一頌答隨言論  
七一頌答隨思惟時通此九二謂依前五隨



答後四隨亦時通於九今依此消文文分爲  
六初三頌教依隨何身時隨其心樂修其方  
便思惟觀察此四徧於五段二有一頌依命  
時三二頌依行時四一頌依解時五一頌依  
言論時六一頌教離二取通結上文今初三

軍四

十

頌若著我時作界分別觀分別觀身皆無我  
故若愛染身時作念處觀觀於內身及心法  
故總相而言即二空觀初一我空次一法空  
後一類通一切今初上半即尋思觀觀於內  
身四大五蘊若即若離尋求主者不可得故

下半觀益如實知於假我則有計實我無次  
偈觀身實相法無我觀上半諦了身空謂攬  
緣假立來無所從故本無住處緣盡謝滅去  
無所至無停積處虛假似立實無所住下半  
觀益後偈類通以身觀身既明見自身二我  
皆空則知萬法皆是虛妄此觀亦寂故不起  
心若作念處釋者內身揀於外器及他身故  
念處有二一通二別通則身等皆無我等別  
則觀法無我今是通也復有二種一小二大  
此中是大觀身性相同虛空故空無二我誰

是我言已兼二我次偈觀受不在內外中間  
故無方所後偈觀心及法不得善法及不善  
法故云知法虛妄心如幻故不起分別又別  
則身受不同通則受等皆身是故三偈皆致  
身言前問意云衆生既空云何如來隨其身  
五十四  
化今釋意云以彼不知身本空寂教如是觀  
故說如來隨衆生身而教化也下皆準之二  
一頌令於壽命思惟觀察命謂命根能令色  
心連持故名爲命壽謂壽限即命根體實謂  
由業種力引一期報衆同分體住時分限假

立壽命從業緣起起即無起業盡便滅滅無  
所滅本無主者況剎那生滅實無自性喻以  
火輪謂旋火速轉不見始終生滅遄流寧知  
本際又薪火不續識鈍謂輪命實遷流妄謂  
相續又輪資火有命假心明待他而成固無  
自體三二偈令依行時思惟觀察成四種觀  
一無常觀二空觀三無我觀四無相觀於中  
初偈略標其四一切有者三有也亦一切有  
爲然無常等經論異說今且依辨中邊論以  
三性釋之初無常三者約徧計名無性無常

以性常無故約依他起名生滅無常有起盡  
故約圓成實名垢淨無常位轉變故空亦有  
三一無性空性非有故二異性空與妄所執  
自性異故三自性空二空所顯為自性故無  
我亦三一無相無我我相無故二異相無我  
與妄所執我相異故三自相無我無我所顯  
為自相故無相亦三一相都無故二相無實  
故三無妄相故然皆融攝則此宗意而偈正  
意多約前二性辨後一偈略顯二觀上半明  
空觀報從業生如夢從思起不實故空下半

明無常觀由上不實故念念無常前即過去  
已滅事顯例後現未當滅不殊四一偈依解  
令入唯識量觀境即心變故心為主然此唯  
識略有二分一相二見今隨其見分之解取  
其相分之相心外取故為顛倒也五一偈依  
言論時令尋伺名等入如實觀謂了名等唯  
意言分別無別名等意即意識分別言即名  
言名言既唯意之分別名下之義亦無別體  
故所言論以兼名義既隨分別則妄計意流  
尚未了唯心安入法性若能如自覺通達

是入唯識之方便也即復此心無相可得妄想不生便入法性上約心垂體非不即又不入者妄想體虛無可入故六一偈通結亦近結次前二偈能緣所緣即見相也又觀一切法唯是意言未能除遣此境亦為能所以此為方便得入唯心種種法出生者此相見二分由無始數習有種種法相似生謂能緣心生則種種境生所緣境起則種種心起起法必滅安得暫停若了相無相生無有生名了種種則了唯心若了無性心境兩亡則住

無分別自覺智境不動法界名入法性故末後偈結上諸觀令亡觀相也佛如是化應如是知幻人化幻皆無化化也第三業果甚深問中亦二初標能所問人以事中顯理是可貴故問寶首也二一切下正顯問端中三初舉法按定謂諸眾生身但四大假名四大無主身亦無我安有所彼此同許以為按定二云何下正設疑難能造能受是謂為我所造所受即是我所以無我故無能造受誰令苦樂無我所故無所造受何以現見而有苦

軍四

二十三

等十事五對一苦樂者約麤相說三塗爲苦  
人天爲樂二就苦中各有妍媸三於其樂中  
有內身外境四通於苦樂受中若時若事皆  
有多少此上皆約生報前生作故五現作現  
受名現報隔一生去受名爲後報二然法界  
下結難謂二無我理即真法界真法界中定  
無善惡未知苦樂從何而生此問所以也爲  
無我故無我所耶爲有所受亦有我耶此致  
疑也以聖言量及正理量違於現量如何可  
通結成難也第二答意云達體業亡迷真業

起報因業起何須我耶業報攬緣虛無自體  
故無我所由法無我非斷滅故業果不亡斯  
乃正理聖教所明不違現事法若定有不可  
造受便違正理在文分二初一法說餘九喻  
況今初上半約俗諦緣生即業報相屬答前  
現見次句勝義即空印其按定此二不二故  
不相違無所有言該上業果則亦無我所後  
句是聖教量智論第二云有業亦有果無作  
業果者此第一甚深是諸佛所說下九喻顯  
通相而明喻於業果從緣無性不壞事相別

彰喻意喻各不同初三頌喻業報無性不壞  
虛相次一偈喻無造受者三一偈喻性一相  
殊後四喻體無來處初中初偈雙喻業果皆  
真心現雖無實體而相不同次偈喻能生因  
緣相虛後偈喻所生業果無實今初若法相  
宗唯以本識為鏡今依法性宗亦以如來藏  
性而為明鏡然有二義一隨境界質現業緣  
影故合云業性亦如是二隨業緣質現果影  
像故前偈云隨其所行業如是果報生二文  
影略共顯業果似有無體合云業者謂善惡

第四

二十四

等三性者通性及相謂此業體以無性之法  
而為其性不失業果之相而為其性由無性  
故能成業果由不壞相方顯真空故中論云  
雖空亦不斷雖有而不常業果亦不失是名  
佛所說不失業果方顯中道又如鏡現穢像  
非直不汙鏡淨亦乃由此顯鏡踰淨如來藏  
現生死業果亦然非直不損真性平等亦乃  
由此知如來藏自性恒淨也此有四位一能  
現位復有二義一由真淨故現染二由真淨  
故不為汙二所現位亦有二義一由相虛故

不能汙二由相虛故虛相現三相對位亦有  
二義一由分明現染方顯性淨二由性本恒  
淨令染妄現四真淨虛染鎔融一味無礙圓  
融思之此約染淨門以但有所現即為染故  
更約喻中以一異門釋謂一鏡是定一門二  
所現染淨妍媸等殊是定異門染淨雖虛不  
能相攝故是異也鏡現染處不異現淨故是  
一也三像不異鏡是非異義鏡外無像故鏡  
不異像是非一義正現像時去像亦失鏡故  
上二即非一非異門四像雖即鏡而不壞像

單四

二十五

鏡雖即像而不礙鏡是亦一亦異門也二田  
種生芽喻能生者田喻業緣也種子喻於識  
種因也此二相待無性故不相知由不相知  
方能生於後有苦芽故云自然能出生也亦  
本識為田名言為種三幻師現幻喻喻所生  
者若幻色喻報則幻師喻業若幻色喻業則  
幻師喻業因以業亦緣生同報無體而幻相  
不亡故中論內以化復現化喻業果俱空若  
幻唯喻報業則不空四衢以喻四識住造業  
處故二機關出聲喻無造受者機關緣造體

虛無人喻業從緣故無造者從機出聲尤更  
 非實喻報因業起安有受人夫無我者因對  
 我無既無有我何有非我著無我者亦是倒  
 故三出敲音別喻性一相殊者如鳥在殼舍  
 聲未吐喻業同一性出殼聲別猶感報無差  
 然鷄子之中終無鳳響業雖無性善惡冥熏  
 四有四偈喻體無來處皆從緣來即無來故  
 然亦不同初一喻因舍於果故無來處次偈  
 果酬於因故無所從此二喻內異熟業果也  
 次偈轉輪王七寶喻外增上業果也後偈喻

無漏業果無漏智火焚蕩有漏智因漏發故  
 亦無來業果寂然方依約住第四說法甚深  
 亦可名應現其深問及答中通三業故以說  
 法化勝故從此立名生問中初總標告問德  
 首者顯佛德故二正顯問端中三初舉法按  
 定謂佛證一味法界彼此共許二云何下正  
 設疑難謂證悟既一說現乃多為一耶多耶  
 偏取互妨並立相違就法即體用相違約佛  
 是證教相違下辨十種相違前九是別後一  
 總結三而法性下釋成前難謂非唯佛悟於

第四

二十六



一我觀法界亦不有多能證所證既並不殊  
以何因緣而現多種將無如來乖法界耶答  
有二意一云所證雖一隨機現多多在物情  
佛常無念二者所悟一法即無礙法界即事  
之理全在多中所現乃即理之事全居一內  
以即多之一是所悟即一之多是所說既無  
障礙何有相違豈唯不違亦由得一方能廣  
現由多現故方令悟一偈中分二初一歎問  
利益上半歎深但言一理深而非甚今即多  
是一故曰甚深即一之多尤更難了不可但

以一多知故下半知益知此甚深方知愛樂  
後九喻答皆三句喻況下句法合喻中皆上  
二句即體之用三二兩句即用之寂又初二  
句以一成多次句不礙常一故不相違然此  
九喻別答九種無量總顯境界無量初地一  
持多喻答現無量利軍四住勝劣地二十七無異故二  
火一燒多答化無量衆物從火化不擇薪故  
三海一波異答說無量法義海波濤無窮盡  
故四風一吹異答震無量界隨物輕重動有  
異故五雲雷普雨答無量音圓音普震法雨

無差故六地一第異答無量莊嚴芽莖華實  
 為藻飾故七廓日普照答知無量心無私普  
 照窮皂白故八淨月徧見答無量神通不往  
 而至隨器現故九梵王普應答現無量身不  
 分而徧彌法界故

大方廣佛華嚴經疏卷第十四

音釋

遞大計切礎推礎知林切推推傳追切研研倪堅切覈覈下  
 華考也環胡關切攬魯敢切窄側格切輒柔乳切燦充切  
 銷封切敲克角切銷也敲卵孚也窄狹也端淳洽切鎔

大方廣佛華嚴經疏卷第十五

軍五

唐清涼山大華嚴寺沙門澄觀撰

第五福田甚深問中初標告以福田是照導引生又施為諸度之前導故問目首也二顯問端分三初舉法按定佛為生福之田名為福田田德無二名為等一此理共許二云何下正顯疑難謂田既是一植福應齊施報有差由何而起前等此異即緣果相違別顯十事文並可知三釋成前難云田雖齊等心有高下容可有殊既心無異思報云何異答有

數意一約眾生由器有大小心有輕重故得報有差非如來答二約佛徧稱差別之機方稱平等即一之多差不乖等即多之一等不礙差由心平等無私方能隨現多果終令解脫一味曾何異哉十頌舉十喻喻上諸義初一總喻印成後九別顯所以前中初句印等是緣等彼此共許次句印異乃因異答別之由次句無異思惟誠如所見下句總合後九別中皆上半喻下半合一水喻器有大小方圓任器故二幻喻體外方便貴且悅心三五

喻體內方便終得實樂上二喻佛巧稱物機  
四鏡喻約眾生謂隨妍媸而影殊心高下而  
報別與前鏡喻曰緣不同餘義無異後五皆  
約佛明五藥喻即多之一具百味故普去一  
切煩惱毒故六日喻即一之多無幽不燭大  
小之闇並除七月光普照喻佛平等佛上諸  
迹雖隨機現要且無私八大風普震喻徧動  
羣機九大火普燒喻終歸寂滅又此五喻喻  
滅惑智二障至平等智地普動諸有皆證無  
爲前四即善巧隨機此五則終令造極豈不

等耶第六正教甚深問中初標問人以破懈  
息故問勤首二正顯問端中四初佛教是一  
者舉法按定一有二義一謂斷煩惱集證出  
離滅此義不殊彼此共許二謂多人同見所  
見不異二衆生下正設疑難難亦有二一對  
初義見教之後何以久而不脫故云云何不  
即斷惑出離二對後義多人同見何以有脫  
不脫故言云何不悉斷惑而出三然其下釋  
成前難正釋後義多人苦集皆不殊故五蘊  
是正三界通依此苦果也癡愛發潤爲集因

也兼顯初義前後苦集亦不殊故四是則下  
 結成相違出者有益不出無益佛教是一其  
 義安在答意云修有勤惰障有深淺機有生  
 熟緣有具闕智有明昧功有厚薄故成有遲  
 速答初難也修與不修故見同益異答後難  
 也上之別義不出勤惰二門故十頌分二初  
 一開章許說謂上半許稱實而說下半開二  
 章門餘九別釋初一釋速解脫後八釋難出  
 離今初上半際疑下半為釋勤則通策萬行  
 離身心相故說速出然有五相一有勢力由

被甲精進故謂於佛法中發大誓願二勇捍  
 謂於廣大法中無怯劣精進故三堅猛由寒  
 熱蚊蚋等所不能動精進故四常不捨善軛  
 由於無下劣無喜足精進故五精進由加行  
 精進故由斯五相發勤精進速證通慧滅障  
 解脫下八以喻釋難出章總相翻前皆名懈  
 怠一火微樵濕喻善根生及三障重整一  
 聞教纔少修行而業惑內侵令所聞速失所  
 行速廢故成懈怠難出離也二鑽火數息喻  
 喻修有懈退然此下喻多通三慧以辨懈怠

此喻約聞即聽習數息明解不生約思即決  
擇數息真智不生約修即定慧數息聖道不  
生聖道如火能燒惑薪煖頂已前皆名未熟  
已熟而息火尚不生未熟數息雖經年劫終  
無得理故遺教對此明小水長流則能穿石  
禪宗六祖共傳斯喻願諸學者銘心書紳若  
直就修行以釋當以智慧鑽注於一境以方  
便繩善巧迴轉心智無住四儀無間則聖道  
可生瞥爾起心暫時亡照皆名息也三闕緣  
求火喻物者艾等也教詮聖道等彼火珠要

持向智日以行承之則聖道火生空持文字  
不能決擇心行乖越道何由生四閉目求見  
喻智微識劣喻彼孩稚約聞慧者雖對明師  
不肯諮決約思修者雖對教日心眼不開書  
聖道之不生何其惑矣五闕緣心廣喻喻愚  
人無淨信手以持定弓復無戒足以拒惑地  
以劣聞慧箭欲徧射破業惑厚地空欲難遂  
六毛滴大海喻謂以少聞思欲測法海妄生  
希欲懈怠尤深七少水滅火喻劫火徧熾喻  
觸境惑增少分三慧安能都滅八不動徧空

喻喻雖知性空智未游履而言徧證亦增上慢人也第七正行甚深問法首者以行法故二顯問端中三初出聖教受謂心領義理持謂憶而不忘二何故下申其所疑佛言能斷今有不<sup>四</sup>斷即<sup>五</sup>教行相違先標相違隨貪已下出所不斷<sup>四</sup>勢力已下結成不斷謂有持法非唯不滅舊惑亦乃隨解新增十一種惑勢力所轉前四根本後七隨惑皆言隨者雜集第七說諸煩惱皆隨煩惱有隨煩惱而非煩惱由此即顯根本煩惱亦得名隨隨他生故通

釋貪等如九地中今約依法新起者說即貪求名利瞋所不解迷其自行恃法自高覆藏已短論難生忿結恨擬酬疾彼勝已慳自所<sup>四</sup>知不解言解廢法逐情三能受持下結成難也佛言受法能斷煩惱今受還起其故何耶答意云法是法藥要在服行服與不服有斷不斷非醫咎也故十行品云如說能行如行能說智論云能行說為正不行何所說若說不能行不名為智者故如說行方得佛法不以口言而可清淨十頌分二初一勸讚略說

初句勸聽遠離貢高輕慢怯弱三種雜染方  
名善聽求悟解故專一趣心聆音屬耳掃滌  
其心攝一切心方名諦聽次句讚問顯行稱  
理故名如實下半略說言非但者要兼修行  
獨用多聞不能證入故下諸偈皆云於法不  
修行多聞亦如是此名不行之失非毀多聞  
若無多聞行無依故是以不行爲失如調達  
善星行之爲得如阿難身子故自利利他之  
行並須明達誓窮法海爲種智因但應善義  
勿著言說婆沙四十二云多聞能知法多聞

能離罪多聞捨無義多聞得涅槃淨名云多  
聞增智慧以爲自覺音下經推度生之方便  
乃至不離善巧多聞上單顯聞涅槃四事爲  
近因緣即雙美聞行故智論云多聞廣智美  
言語巧說諸法轉人心行法心正無所依如  
大雲雷霍洪雨如是教理無量無邊恐繁且  
止九頌喻明皆上半喻況下半法合初懼溺  
渴死喻喻貪隨文義失謂義門波濤漂蕩其  
心慮溺溺他無暇修行自絕慧命故名渴死  
二設食自餓喻喻隨說廢思失說法施人多



求名利不思法味損滅法身三醫不自救喻  
喻善知對治而不自治四貧數他寶喻喻說  
佛菩薩功德不能求諸身心故無分也五王  
子飢寒喻謂王子違王法教於內起過故受  
飢寒學人亦爾生在法王教法官中行違佛  
教起惡惑業故無慚愧忍辱之衣寧餐法喜  
禪悅之味故飢寒也六聾樂悅彼喻喻不解  
自說失謂夫真說聞者必忘說聞逐語而說  
爲自不聞七盲畫示彼喻喻不見自義失八  
船師溺海喻謂將導衆人游佛法海倚自所

解不慎身行爲法所淪九巧言無德喻謂亦  
說修行或談已德內無實德但有虛言獨此  
一偈三句是喻合文但云不行亦如是彌顯  
不毀多聞又此九偈亦可別對隨貪等義如  
理應思第八助道甚深問智首者以顯智爲  
正道之體統其助故二正顯問端中三初舉  
法按定謂斷惑證理導行得果唯是大智彼  
此同許二如來下正設疑難謂既智爲上首  
應唯讚智那亦讚餘此是正助相違難三而  
終下結成前義前難云智爲上首已應不合

讚餘況非以一法成佛固當不合偏讚為要  
假多為唯用智為隨一行皆得佛耶若隨一  
得成亦違智為上首進退皆妨下答意中印  
其初後釋其中間謂智為上首誠如所言智  
如明王為眾之御故大品云般若如目五度  
如盲故印後義云終無唯以一法實如來歎  
三世諸佛皆具說故以餘萬行資於智故釋  
其中間別讚乃有多意謂隨心令喜故隨時  
生善故所治蔽殊故入門不同故眾生不能  
盡受故下當屬文又智論云般若必具一切

行是故讚一即是讚餘讚餘即是讚智十頌  
分二初一歎問許說餘九正答所難略分為  
二先二頌開二章門後七雙釋二章今初初  
偈標眾行成果章謂正助相假必萬行齊修  
故諸佛同說言無有說一者必具說也後偈  
標隨機別讚章文具禪經四隨謂初句即隨  
樂也將護彼意稱悅其心故性不同者即隨  
宜也附先世習令易受行習以成性故分不  
同者即隨治也觀病輕重設藥多少謂貪分  
多者教不淨等隨其所應度者即隨義也道

機時熟聞即悟故下別釋中二初三釋隨器  
別讚章後四釋衆行成果章前中二初兩偈  
半別釋隨治後兩句結前生後今初然六度  
成其行四等曠其心四等多約利他六度多  
明自利六度如初會四等如下說然並通四  
隨略舉一治耳涅槃云慳者之前不得讚布  
施者即隨樂意也二結前生後中上句結前  
下句生後後四偈釋衆行成果中各上半喻  
下半合然有二意一仍前漸具之義便得釋  
成智爲上首二正明所用不同故須兼具然

攝論第九明立六度通有三意一爲除惑故  
二爲生起佛法故三爲成熟衆生故前段具  
初意此段通具三謂二二合者對治別故先  
基後室等即漸具故皆爲利他即成熟故文  
中初偈二度爲治不發行因故合云行本謂  
著財不發施著家不發戒故基堵有二義一  
基即是堵即施爲進善之首戒爲防惡之初  
並稱基也二堵爲環牆即檀爲萬行首基也  
戒防未起非堵也官室者解脫也次偈二度  
已發修行心爲治退弱心因故謂不能忍生

死苦事長時修助善品有疲怠故今忍城防  
外惱之敵進郭長內行之衆通說則此二皆  
能防外養內次偈二度治壞失心因故謂散  
亂壞靜慮邪智壞正解故今明菩薩定靜惑  
亂慧鑑萬法動寂自在故菩薩依之以發通  
慧賴之以證理果其由有力之王澄清四海  
明鑑萬機故率土戴恩天下仰則後一偈四  
等爲因自他安樂招果無盡故第九一道甚  
深亦名一乘問中標問賢首者至道柔順故  
又賢猶直善佛佛皆同一直道故二顯問端

中三初標宗按定謂佛佛所乘同觀心性萬  
行齊修自始至終更無異徑故云一道此理  
共許二云何下正設疑難先總後別前中謂  
因道旣一果應不別云何現見佛刹等殊爲  
果異故因非一耶爲因一故無異果耶若雙  
存者即因果相違下別辨十事一界有染淨  
等殊二居人善惡等異三諸乘等別廣略等  
殊四或三學調伏或強輒折伏五壽有脩短  
六光明或色相不同或常放具闕或照有遠  
近七隨染淨土居人異故現通亦殊八衆會

異者此有三種一多少二會數三凡聖大小  
九教儀者如此土以音聲爲教香積以衆香  
教化等十法住者有久近故各有差別者通  
上十位然若約一佛十事各不同者德首已  
明今問諸佛十事互望不同耳第五第三無有下  
結成前難謂若諸佛於因行法有具不具可  
有利等不同今皆同具利等那別同具即是  
一道第二答中意云非唯因同果德亦同而  
見異者隨機感耳非佛自位而有差別何者  
諸佛因果具同異故謂同滿行海是同因也

將此同因隨所調伏種種迴向應機之果是  
異因也由此異因感差別果由上同因同感  
眞應身土等果是則約佛即同能隨異約機  
同處而見異以生就佛雖異而常同以佛就  
生雖同而見異以佛望佛能異之必同其猶  
錦窠常同常異瑜伽三十八諸佛平等唯除  
四法一壽量二名號三族姓四身相意明隨  
機故除此四事餘皆等也就果同中自性身  
土一向體同自受用者平等無二相似名同  
餘二身土亦相似名同而隨機見異故成唯

識云自性身土一切如來同所證故體無差別自受用身及所依土雖一切佛各變不同而皆無邊不相障礙餘二身土隨諸如來所化有情有共不共所化共者同處同時諸佛各變為身為土形狀相似不相障礙展轉相雜為增上緣令所化生自識變現謂於一土有一佛身為現神通說法饒益於不共者唯一佛變諸有情類屬佛異故偈中義理多舍故文勢非一旦分為二初二偈印其立宗明真身無二餘偈答其疑難辨應有異同今初

初句總印先標文殊者警其聽受法常爾者明因果無異法爾常規餘顯一相略明四一初句法一以法常故諸佛亦常次句人一次句因一後偈果一略舉其五一者身一此有二義謂若約所證法界為身則體同為一若兼能證無罣礙智為身即相似名一下既別明心智則正當初意然體同義異二心一八識心王俱不可知故三智慧一四智三智二智一智皆無別故四十力一五無畏一此五亦略攝諸德二答疑難中分二初二偈總明

軍五

十

隨機見異於中前偈約佛後偈約機前中即隨本異因為物迴向各得差別故云如是如是即差別之義也略舉十中三事耳即隨所化衆生而取佛土後偈約機者約佛則刹等皆圓約機隨行見別如直心爲行則見不諂之國故衆生之類是菩薩佛土餘六偈展轉釋疑分四初一偈有疑云若皆圓滿何以不見答意云衆生不見豈得云無然有三義一約他受用則地前凡小衆生不見二約自受用則等覺衆生亦皆不見若約即應同真權

教菩薩不見次偈有疑云若皆不見何以知有釋云有見者故亦有三義初則淨意樂地已去由願自在力故見他受用二淨無塵習普賢願滿方見自受用三圓解之人則名心淨即應見真意在初後義兼中間三有一偈疑云若應由物見何名佛土釋云佛威神故則知生佛共成既攬同成異亦稱體成益四有三偈釋疑云上云衆生不見淨刹又云佛神力今異爲刹體處別佛有分別耶故釋云利實同處佛亦無心物自見異耳於中初半

顯實云刹無分別佛無憎愛分別即差別義故晉經云佛刹無異相如來無憎愛若順今經亦可此二通佛及刹次半偈明異自在物次半偈明正見刹異次半偈彰非佛各次三句釋佛無憎愛有感便現非佛有愛無感不見非佛有憎末後一句總結一切諸佛法皆如是隨機隱顯真體常存亦通結一段第十佛境界甚深十信觀圓便造佛境於中亦先問後答問中分二初標能所問八大衆同問者攝別歸總故總別無礙六相圓融問文殊

者佛境甚深除般若妙德無能達故始信終智皆託佛境故無按定結難者表尊敬故若人若法難致詰故二佛子我等下正申請問又分爲二初結前標後加讚妙辯者敬上首故二何等下別顯問端句有十一初總餘初境界有二一分齊境界謂從十地因後果位之法是佛所有二所緣境界謂佛所知之境並非餘測總爲佛境二請問佛境以何爲因三請佛境界生儀式四應機普入世間五能知之智六所知之法七圓音起說八明知



體相九內證平等十顯現何法十一量之大  
小並非因位作用所及亦非下位能知故云  
佛境若約能知能度等即是分齊約所知等  
名曰所緣能所雙融異即非異言思道斷是  
佛境也答中十頌次第而答唯廣一義獨在  
於初與總合辨欲顯分量徧於總故即深而  
廣故初句總標體深次句分量廣大故佛地  
論引經釋云諸佛境界唯除虛空無能爲喻  
次句釋上廣後句釋上深然有三義一約一  
切衆生即如來藏更何所入翻迷之悟故云

第五

十二

證入二約理非即非異故云入無所入三約  
心境心冥真境故說爲入若有所入境智未  
亡豈得稱入實無所入方名真入即廣之深  
本超言念即深之廣安測其涯二答因問謂  
此因無限略示三義一殊勝以行超絕無等  
等故二微妙以證理深玄盡法源故三廣大  
以多劫說少亦不盡故三答度問謂隨其心  
器意樂不同隨其智力解悟差別誘引進修  
令各獲益以徧法界委悉無謬差別難知故  
云佛境四答入問謂世間即是衆生世間國

土即器世間一切者徧法界故入有二義一以智身潛入密益衆生故二以色身現入顯益衆生智身難知文中偏顯五答智問上半權智橫無不知故云自在豎達三際故無所礙下半實智故云慧境平等如空無若干也

單五

十三

虛空之言亦兼喻上無罣礙也權實無礙方爲佛境六答法問法界是理生界是事攬理成事理徹事表故云無別是故事則不待壞而恒真理則不待隱而恒俗非直廣大無限亦乃甚深無際究盡了知故稱佛境又法界

是所證生界是所化了知是能證能化究尋其本亦無差別是難知之佛境也七答說問一切言音隨性隨相皆悉了知未曾起念故無分別以一切差別言音即是如來法輪聲攝故以斯答說音聲實相即法輪故八知即心體了別即非真知故非識所識瞥起亦非真知故非心境界心體離念即非有念可無故云性本清淨衆生等有或翳不知故佛開示皆令悟入即體之用故問之以知即用之體故答以性淨知之一字衆妙之門若能虛

已而會便契佛境九答證問即證大涅槃三  
德圓也非業繫故解脫也非煩惱者轉煩惱  
即菩提是般若也無物者虛相盡故法身顯  
也無住處者成上法身無所在也無照者成  
上般若能證相寂也無所行者成上解脫無  
業行之用也由無用故用彌法界由無照故  
無所不知由無在故無所不在故結句云平  
等行世間也是謂三德祕藏佛之境也十答  
現問上半所現初句橫盡十方次句豎窮三  
際下半能現並於如來圓鏡智中無念頓現

故出現品云菩提普現諸心行即斯義也上  
來辨十甚深即問答竟自下第二現事結通  
於中二先現事後結通今初因何而現上來  
十首法光開曉衆生身心故佛力暫現示相  
而答令其目驗而欣厭故所現有十第一法  
單五  
即所行之法謂三學等殊二業謂正行漏無  
漏等三集因苦果四身類不同五根機差別  
六四生非一七持戒則人天勝劣八犯戒則  
三塗重輕九國土則依處染淨十說法則近  
報淨居聰明利智速具佛法此經文闕晉本

具之又此亦可配十甚深以是示相答故一  
 法首正教甚深二寶首業果三勤首懈怠難  
 出四財首觀內身等五德首佛法一味隨根  
 異說等六覺首往善惡趣七智首六度順行  
 通為持戒之果八目首佛田平等但犯戒布  
 施得果差別九賢首隨心世界有差別等十  
 晉經既有說法即是說佛境界法也第二如  
 是下結通廣徧於中二初結東方後南西下  
 類餘九方亦現十事以此處說法則現事通  
 於十方餘處說法亦應類此總為一法界大

會思之問明品辨信中解竟

淨行品第十一入第十  
四經

釋此一品五門分別初來意者夫欲階妙位  
 必資勝行有解無行虛費多聞故前品明解  
 此品辨行又前明入理觀行今辨隨事所行  
 又前行此願並義次第故次來也十五次釋名者  
 梵云具折囉此云所行波利此云皆也徧也  
 成輪律提云清淨也謂三業隨事緣歷名為  
 所行巧願防非離過成德名為清淨又悲智  
 雙運名為所行行越凡小故稱清淨以二乘

無漏不能兼利非真淨故得斯意者舉足下  
足盡文殊心見聞覺知皆普賢行文殊心故  
心無濁亂是曰清淨普賢行故是佛徃修諸  
佛菩薩同所行也所行即淨持業釋也三宗  
趣者以隨事巧願防心不散增長菩薩悲智  
大行為宗成就普賢實德為趣四解妨者問  
文中但辨一百餘願何有行耶答文中辨行  
略有數重謂就所歷事中始自出家終於卧  
覺皆事行也知家性空理行也觸境不迷善  
達事理智行也以願導智不滯自利大悲行

也上二不二悲智無礙行也遇違順境心不  
馳散止行也智不沉沒觀行也即止觀雙運  
行也又對於事境善了邪正當願衆生皆假  
觀也知身空寂心無染著空觀也見如實理  
中觀也或先空後中或先假後空或一或二  
或一念頓具斯為妙達三諦觀之行也又所  
造成行皆施衆生不起二乘之心安忍強軟  
兩境唯增善品心不異緣妙達性空善巧迴  
轉皆願利物同趣菩提二乘天魔所不能動  
善知藥病決斷無差即十度齊修之行也又

皆願利生皆成佛德見惡必令其斷見善必令其具即四弘誓願之行也故智首總標諸德以求其因文殊令善用心頓獲眾果但言惟願豈不惑哉復有問言夫妙行者統唯無念今見善見惡願離願成疲役身心豈當為

第五

十六

道答若斯見者離念求於無念尚未得於真無念也況念無念之無礙耶又無念但是行之一也豈成一念頓圓如上所明也行學之者願善留心第五釋文中二先智首問舉德徵因後文殊答標德顯因今初亦先標問答

之人後陳所疑之問今初此二菩薩為問答者歷事巧願必智為導故事近旨遠唯妙德故文殊則般若觀空智首則漚和涉事涉事不迷於理故雖願而無取觀空不遺於事故雖寂而不證是為權實雙游假茲問答二陳所問中有二十云何總十一段段各十句成一百一十種德第一段明三業離過成德二得堪傳法器三成就眾慧四具道因緣五於法善巧六修涅槃因七滿菩薩行八得十力智九十王敬護十能為饒益十一超勝尊貴

此十一中若就相顯二四與六此三唯因八  
及十一此二唯果餘通因果或攝為四對因  
果初二十句問福因福果先因後果次二十  
句問慧因慧果先果後因三二十句問巧解  
因觀行果四有五段問修行因成德果初一  
單二  
為因餘四為果或分為二初十云何問淨行  
十七  
體是問因義後十云何問行所成是問果義  
以善修七覺等亦是淨行之能故皆言云何  
得者為修何行而得之耶初十望後故說為  
因望歷緣巧願成淨行體即是於果未是圓

果而是分果故上總云舉果徵因今分為二  
初之一段總問其果後十別明今初十句得  
此十種三業成下十果由無過三業故超勝  
尊貴由不恚害故常為饒益由無餘惑不可  
譏毀故十王敬護由惡緣不可壞得佛十力  
由修行不退轉滿菩薩行由遠離諸相如如  
不動成涅槃因由德行殊勝故於法善巧由  
體清淨如虛空故成具道緣由涉境無染故  
德堪傳法器由智先導故成就眾慧又由後  
十能成就此十以十三業永無失等唯佛不

共分分無失亦通於因又此十句初一總顯  
無過次八別顯無過後一總出其因若以智  
慧爲先導身語意業常無失故又於中八前  
二離過後六成德又後九中不隨於瞋故不  
害不隨於慢故不可毀不隨惡見故不壞敗  
不隨於疑故不退動恒修勝行不隨於貪故  
清淨無染不隨於癡故智爲先導所作稱真  
如是等業云何而得後十段別明中初一異  
熟果次四士用果次二離繫果次一增上果  
後二等流果今初即修道之器以菩薩起修

行時要具此十方成二利之行瑜伽具釋一  
常生中國有佛法處二種族尊貴非下賤等  
三生信向三寶修善之家非外道等家四形  
色端嚴非醜陋等五具丈夫相諸根不缺六  
正念不忘亦宿念現前七慧悟高明善解世  
法八柔和調善離過修行九志力堅強故無  
怯弱十性自開覺不染世法又無畏者依智  
度論菩薩有四種無畏一總持無畏於法記  
持不懼忘失二知根無畏知根受法不懼差  
失三決疑無畏隨問能答不懼不堪四答難

華五

六



無畏有難皆通不懼疑滯今並皆得故云具足又此十事若約法者在佛家是生處具足等思之又具足者唯佛一人云云第二十慧下四段明士用果中一慧為揀擇二力謂修習三善巧謂智四道品助修悉以三業而得成就今初言慧者即道之體十中一勝世間故二過二乘故三棟權教故四佛果超因故上四棟劣餘六當體一無分量二無若干三超言念四無等匹五難比校六唯證相應欲言其有無相無形欲言其無聖以之靈欲

言俱者慧無二體欲言雙非非無詮顯故不可說第三力者即具道因緣皆言力者此十各有資道之能故一因力者即是種性謂已有習種無倒聞熏與性種合故名為因梁攝論云多聞熏習與阿賴耶識中解性和合一十九切聖人以此為因無性攝論云此聞熏習雖是有漏而是出世心種子性二欲力者有勝欲樂希大菩提及起行故三方便者謂造修力依六方便成悲智故二慈悲顧戀二了知諸行三欣佛妙智四不捨生死五輪迴不染

六熾然精進攝論廣說四緣力謂善友勸發  
五所緣力即所觀察悲智之境六根謂信等  
七觀察者謂於自他事理藥病善揀擇故八  
奢摩他比云止也九毗鉢舍那比云觀也瑜  
伽起信等論深密涅槃等經廣辨其相具如  
別章今略顯其相以爲十門一心行稱理攝  
散名止一止不滯寂不礙觀事三由理事交  
徹而必俱遂使止觀無礙而雙運四理事形  
奪而俱盡故止觀兩亡而絕寄五絕理事無  
礙之境與泯止觀無礙之心二而不二故不

礙心境而一味不二而二故不壞一味而心  
境六由即理之事收一切法故即止之觀亦  
見一切七由此事即是彼事故令止觀見此  
心即是彼心八由前中六則一多相入而非  
一七則一多相是而非異此二不二同一法  
界止觀無二之智頓見即入二門同一法界  
而無散動九由事則重重無盡止觀亦普眼  
齊照十即此普門之智爲主故頓照普門法  
界時必攝一切爲伴無盡無盡是此華嚴所  
求上觀十思惟者籌量應作不應作故第四

於法善巧皆約流轉以明前四流轉之體三界流轉之處三世流轉之時三科之義略如前釋廣如別章緣起六地廣明三界三世如前後釋皆言善巧者一善知彼法空無所有二善知不壞假名分別法相加能攝無盡彌第五善巧也第五修涅槃因七覺三空十地品廣說第六滿菩薩行此下二種明離繫果初六度四等修即士用滿即離繫治諸蔽故及第七具足十力並見上文第八十王敬護是增上果第九云何得與一切衆生爲依下二段

明等流果由本願力爲依救等由本行力爲第一等今初能爲饒益依等十句如迴向初第十爲第一下超勝尊貴十地論釋今就佛果略釋其相謂如來功德海滿更無所少故稱第一此亦總句大者體包法界故勝者自利圓滿故最勝者利他究竟故妙者煩惱障盡故極妙者所知障盡故上者望下無及故無上者望上更無故無等者望下無儔故無等等者望儔皆是無等者故所以廣舉諸德者欲顯行之勝故上來問竟第二文殊答中

文分為二第一歎問成益饒益者利益也安  
 隱者安樂也利樂者即上二也佛地論第七  
 有五重釋利樂之義已見光明覺品第二佛  
 子下正酬其問於中二先標因成德酬其舉  
 德後指事顯因酬其徵因今初先標其因謂  
 善用其心心者神明之奧心正則萬德攸歸  
 言善用者即後歷緣巧願觸境入玄如上所  
 辨則獲下顯所成德初總後別總謂一切勝  
 妙功德皆因用心一百一十門德何足難就  
 可謂一言蔽諸勝謂獨尊妙謂離相又德無

第五

三十一

不備云勝障無不盡名妙此之總句亦即酬  
 上十種三業之總句也餘九別顯句雖有九  
 義亦有十如次酬上十段之德一於諸佛法  
 心無所礙者即初第一堪傳法器德念慧覺  
 悟皆具足故二住去來今諸佛之道即上成  
 就眾慧三世諸佛唯以佛慧為所乘故三隨  
 眾居住恒不捨離即上具道因緣成就種性  
 欲樂方便常以眾生為所緣故四如諸法相  
 悉能通達即十善巧義無惑也五斷一切惡  
 即七覺三空揀擇棄惡無越此故六具足眾

善即六度等七當如普賢色像第一由此故得十王敬護八一切行願皆得具足即是前文成就十力得佛果位方具足故故晉經無此一句而有成就如來一切種智斯為十種智力定無惑也唯此一段望前不次以內

具種智外具色相此二同在果圓前後無在或譯者不迴九於一切法無不自在故能與物為依為救為炬為明十而為眾生第二導師即是王文於眾超勝上求第一唯佛一人今纔發心則道亞至尊故云第二然舊經中

亦云而為眾生第一尊導故知第二譯者意也第二佛子云何下指事顯因於中三初總徵次別顯後總結成益二別顯中五門分別一總明大意文中總有一百四十一願菩薩大願深廣如海應如迴向非止爾也此蓋示於體式餘皆倣此又非無表一百者十信圓融一一具十也四十一者即四十一位也明此諸位所有惑障由此能淨所有勝行由此能行故二通顯文旨然此諸願句雖有四事但有三義開為六言三事者謂初句願所依

單五

二十二

事次句願所為境後二句是願境成益開為  
 六者初事有二一者內謂菩薩自身根識等  
 經云菩薩等故二者外謂他身或依正資具  
 等經云在家等故次事亦二種一能發願者  
 二所願眾生經云當願眾生故後事亦二一  
 者自益由此諸願成前諸德故二者益他由  
 此發願願眾生故此後二句或前句是因後  
 句是果如云所行無逆成一切智等或二俱  
 是因如云巧事師長習行善法等或二俱佛  
 果如云永離煩惱究竟寂滅等或俱通因果

如云以法自娛了妓非實等或三四二句共  
 成一句如云演說種種無乖諍法等亦可後  
 二句中初句所入法如云知家性空等後句  
 所成益免逼迫等以不必具故合為一三別  
 開義類然上三事中願所依事雖有多類不  
 出善惡依正內外隨義準之二願所為境其  
 一一願盡該法界一切有情不同權小談有  
 藏無故又願即是行成迴向故一一皆成所  
 行清淨善業行故如云知家性空則菩薩之  
 心必詣空矣三願所為境成利益中由願於

軍五

二十三

他成種種德自獲如前所說功德然有二義  
一通二別通則隨一一願成上諸德斯為正  
意二別顯者如願於他得堅固身心無所屈  
則自必成十種三業離過成德之德也二願  
於他具足成滿一切善法則自成就堪傳法  
器三願於他深入經藏智慧如海則自成眾  
慧四願於他具諸方便得最勝法則自成就  
具道因緣五願於他語業滿足巧能演說則  
自成就十善巧德六願於他得善意欲洗除  
惑垢則自成七覺三空七願於他所作皆辦

具諸佛法則自成滿菩薩行德八願於他捨  
眾聚法成一切智則自成就如來十種智力  
九願於他皆如普賢端正嚴好則自成就十  
王敬護十願於他統理大眾一切無礙則自  
成饒益為依救德十一願他得第一位入不  
動法則自成就超勝第一德以斯十一配上  
答中總別十一段文並可知通別交絡應成  
四句謂一切願成一德一切願成一切德等  
以因願一多相即故成德亦一多鎔融四對  
辨成例謂若以初後二事相對辨例略有十

例一會事同理例如菩薩在家事也性空理也二處染翻染例如若得五欲染也拔除欲箭翻染也三相似類同例如若有所施令一切能捨等四世同出世例如上升樓閣願升正法樓等五以因同果例如正出家時願同佛出家等六捨偽歸真例如著瓔珞願到真實處等七以人同法例如見病人願離乖諍等八以境成行例如見涌泉願善根無盡等九以妄歸真例如見婆羅門願離惡等十以近同遠例如受和尚教願到無依處等五正

第五

二十四

釋經文長分為十初有十一願明在家時願二有十五願出家受戒時願三有七願就坐禪觀時願四有六願明將行披挂時願五有七願澡漱盥洗時願六有五十五願明乞食道行時願七有二十二願明到城乞食時願八有五願明還歸洗浴時願九有十願明習誦旋禮時願十有三願明寤寐安息時願今初在家有十一願初一總舉在家以家是貪愛繫縛所故若了性空則雖處居家家不能迫次一在家行孝願以是至德行本故首而



明之大集經云世若無佛善事父母事父母者即是事佛父母於我為先覺故今翻令事佛者生長法身故護養一切者一切眾生皆我子故護之一切男女皆我父母故養之生無不從之受身故平等敬之法身佛故次

第五

二十五

四受家室等願然五欲射心猶如箭中王侯有官餘皆名室次五在家所作事業等願在頸曰瓔在身曰珞珞以持衣瓔以繫冠一切悉捨亦捨心也了聚無性成佛智也第二捨居家下出家受戒時有十五願初一正捨俗

家次三出家方便僧伽藍者此云眾園眾有六和法則事理一味故無諍也大師謂佛眾所宗故小謂和尚親所教故若約末世三師為大七證為小靡不有初鮮克有終故希不退次四正落髮出家袈裟者不正色衣也亦云染色表心染於法要無所染方曰染也然二乘之染亦非真染必心染大乘故云具大仙道為於正法除其結使方為究竟寂滅落髮披衣之後為正出家餘七受學戒時初三自歸佛在之日則五受之一佛滅之後受五

八戒必依三歸歸要三者翻彼外道邪師邪  
 教及邪眾故猶如良醫良藥及看病人煩惱  
 病愈故為與眾生成為緣念故三寶之義至下  
 當釋受學戒者即十戒也亦通五戒優婆塞  
 戒經云欲受菩薩戒先應徧受五戒十戒二

百五十戒若尼則受六事及五百戒受謂受  
 戒學即隨戒願中即止作二持闡黎者此云  
 正行軌範教授故云具足威儀和尚此云親  
 教亦云力生道力自彼生故翻云入無生  
 智依之得戒故翻無依具足戒言義舍二種

一則大比丘戒二則菩薩戒亦制意地方為  
 具足第三若入堂下七願明就坐禪觀時願  
 初四為修方便次二正修止觀後一修行事  
 訖第四下足住時下明將行披挂時六願下  
 衣蓋醜故願得慙愧上衣即衫襖之輩前已

軍五

二十六

辨袈裟故此直云僧伽黎僧伽黎者義云和  
 合新者二重故者四重要以重成故云和合  
 即是三衣中第一衣故第五手執楊枝下澡  
 漱盥洗時有七願揚枝五利是曰妙法去穢  
 為淨西域皆朝中嚼楊枝淨穢不相雜此為

常規凡欲習誦別須用之盥者澡也第六手執錫杖下乞食道行時總有五十五願更分為三初十二願游涉道路次見衆會下十九願所觀事境後見嚴飾下二十四願所遇人物今初錫者輕也明也執此杖者輕煩惱故明佛法故更有多義具如經辨今略明二用一執爲行道之儀二振以乞食故發相似之願無依之道是真道也向無餘法真涅槃也真淨法界心所履也險道有二一多賊鬼毒獸二陜徑阻絕初惑業罪苦凡夫之險道也

後自調滯寂二乘之險道也皆爲難處不斷生死而入涅槃正法界也二觀事境願初觀衆會謂衆聚多談無義故願說深法衆心易乖故令和合二大柱者舊經云大樹梵云薩擔婆去聲此云樹也薩擔婆入聲此云柱也由茲二物呼聲相濫古今譯殊柱有荷重之能一舍由之而立翻此願離我能之諍忿恨何由而生三德猶叢林森聳可敬十一陂澤者畜水曰陂不集諸流故願一味十二說文曰穿地通水曰池沼即池也取其盈滿引法

流故亦可巧思穿鑿能有說故十三汲者取也辯才演法猶綆汲水無憂林者處之忘憂故三見嚴飾下二十四願所遇人物六云獲根本智滅眾苦者若得見道無分別根本智則斷惡道業無明故三塗苦滅則三苦八苦亦皆隨滅死及取蘊直至金剛後根本智則能永斷七願入真實慧永無煩惱者此有二種一約入真見道之慧斷身病之苦惱及煩惱病謂一切惡趣諸煩惱品所有麤重是分別起亦為身病遠因至歡喜地真見道中一

剎那斷頓證三界四諦真如身病及惑永不復有二約金剛心慧頓斷一切諸煩惱病及習氣隨眠證極圓滿真實勝義諸惑永亡依上解者真實慧者即根本智但約所滅惑苦不同耳八四大乖違成病知空則永無所乖於佛菩薩能知恩德者諸佛菩薩始自發心普緣眾生難行苦行不顧自身垂形六道隨逐眾生見其造惡如割支體迄成正覺隱其勝德以貧所樂法誘攝拯救見其憍恣示迹涅槃留餘福教以濟危苦故自頂至足從生

至死皆佛之蔭斯之恩德何可報耶得人小  
恩常懷大報不知恩者多遭橫死故經云假  
使頂戴經塵劫身為牀座徧三千若不傳法  
利衆生畢竟無能申報者故唯自利利人如  
說修行爲報佛恩耳沙門此云止息畢竟止  
息唯大涅槃世之甲冑軍五隨於師旅進忍甲冑三十八  
趣於無師能離五邪方爲正命謂一詐現奇  
特二自說功德三占相吉凶四高聲現威令  
他敬畏五爲他說法行此五事若爲利養皆  
邪命也第三句通願離五第四句但離初一

明斷方稱長者守王正法始曰大臣第七若  
見城郭下二十二願到城乞食時願初三總  
處王都則賢達輻輳林藪則衆德攸歸次三  
入家未入則諸家差別入已唯一無多如入  
佛乘無二三也次八乞食得不得願次七得  
食正食後一食訖說法亦爲報施主之恩也  
其中云藏護諸根者瑜伽名善守根門淨名  
云所見色與盲等乃至云知諸法如幻相是  
也第八從舍出下還歸洗浴時節炎涼五願  
可知第九諷誦下習誦旋禮時有十願右者



大方廣佛華嚴經疏卷第十六

軍六

唐清涼山大華嚴寺沙門澄觀撰

賢首品第十二

初來意者夫行不虛設必有其德既解行圓妙必勝德難思收前行願成信德用故次來也又前智首舉果徵因文殊廣顯其因略標其果云獲一切勝妙功德故問賢首令廣斯言是以偈初躡前起後二釋名者謂體性至順調善曰賢吉祥勝德超絕名首即以此名菩薩演說此法賢即是首賢首之品以當賢

位之初攝諸德故偏舉賢名三宗趣者於信門中成善實行德而自在莊嚴無方大用建立衆生通貫始終該攝諸位以為其宗今起圓融信行成位德用而為意趣四釋文者文有三分初文殊發起次賢首廣說三十方現證今初分二初經家敘述二正明發起二段各有結前生後今初先結前已說順違皆順客塵不能濁其心悲智雙游萬境不能亂其慮是曰清淨行矣大功德者即前所成之果後欲顯示下生後文舍始終約終則顯示信

滿菩提心殊勝功德廣具五位因行盡故約始但於生死誓證菩提萬德攸依故今顯示二偈正發起中前半結前偈文窄故略無所成之德後半勸說令說修行之德則與長行文有影略第二時賢首下賢首廣說於中先總標舉以偈答者此略有二一少言攝多義故二美詞讚說令淨信故以始德該終散說難盡故顯此勝妙之功德故第二正顯偈詞有三百五十九頌半大為三分初四頌謙讚許說分次三百四十六偈半正說勝德分三

九偈校量勸持分初中分二初偈總明前半讚問勸修後半謙已少說海喻次下當明後三開章以發心之德況出修行巧顯深廣於中初偈舉發心章次偈況出修行章初心祈於當證德已軍六巨量況長時入位徧修故多佛不能盡說後偈許說分齊前半法說如是者雙指發心修行下文具顯故前文雙問故後半喻明然有二意一顯喻少分謂發心行德如太空大地所說者二隱如足履一塵二密喻不異謂鳥足之空不異太空微細之塵不殊



大地故此略說義無不周若廣若略皆無邊  
故出現品云如鳥飛虛空經於百年已經過  
處未經過處皆不可量何以故虛空無邊際  
故等彼就果行此就因德然普賢行德似同  
佛果是故皆以虛空爲量上下文中皆同此  
說此初發心與下文十住初發心住及發心  
功德品各何別耶此中發心該於初後取其  
成德乃是信終取其爲本乃在初發雖如輕  
毛功歸初篲故十住初發即是此終成彼初  
發此終爲能發彼是所發此正是發起之發

義兼開發彼是開發之發義兼發起其發心  
品正顯十住初心之功德耳以斯甄別非無  
有異故瓔珞云發心住者是人始從具縛未  
識三寶乃至值佛菩薩教法中起一念信便  
發菩提心第六既云始從凡夫最初發心明知此  
中發心該於初後問此既是初何得乃具後  
諸行位及普賢德耶古德釋此略有二門一  
行布次第門謂從微至著從淺至深次第相  
乘以階彼岸如瓔珞仁王起信瑜伽等說二  
圓融通攝門謂一位即具一切位等如此經

所說亦如大品等中一行具一切行此中有二門一緣起相由門二法界融攝門前中普攬一切始終諸位無邊行海同一緣起爲普賢行德良以諸緣相望略有二義一約用由相待故有有力無力義是故得相收及相入也二約體由相作故有有體無體義是故得相即及相入是也此經之中依斯義故行位相收總有四說一或始具終如此門中具一切行位普賢德海者是也二或終具始並在十地位後如下文十定十通等說三或諸位

齊收並在十住等一位中各收一切悉至究竟如十文十住十行等說四或諸位皆泯行德顯然如離世間品說二法界融攝門者謂此諸位及所修行皆不離普賢無盡法界然此法界圓融無限隨在一位即具一切今在信門收無不盡下諸位中皆具一切者並準此釋問下發心功德品亦說初心具無邊德與此何別答此據行首信門所具彼約行本菩提心具問約法相收是則可爾約入修行豈十千劫修信纔滿即得如此無邊德海

答以法是圓融具德法故若諸菩薩行此法  
行是彼所收或無量劫或無定限十千劫言  
非此所說如下善財童子及兜率天子等所  
行所得並是其人不同行布次第教中之所  
說也又十千劫乃是一經瓔珞但言一劫二  
劫此經縱有行布亦皆圓融亦有引此下文  
證成此信乃是捨異生性成就聖性出無明  
地生如來家以有則獲灌頂而升位等非是  
信故若爾初地豈得灌頂升位等耶若云展  
轉進入佛地何以不得始自於信展轉入耶

若許從信展轉入者何以要判此乃捨凡入  
聖下文自有十地之會此中尚隔住行向等  
判為入地乃孟浪之談下發心品亦判為初  
地發心義同此會問下云無量億劫勤修學  
得是無上菩提智斯則非一生也亦非十千  
以為無量通斯難者應有二義一此約行布  
展轉義故二約圓融展促無礙義故如上所  
辨故善財見仙人執手一一佛所經無量劫  
故脩短難思特由於此故賢首菩薩云信大  
乘者猶為易能信此法倍更難以初心即具

一切功德故難信也第二菩薩發意下正明發心修行勝德文分為五初五頌發心行相二信為道元下略示勝能三若常信奉下所具行位四或有利土下無方大用五一切如來下喻況玄旨然此五段初一顯正發心後

第六

五

及下作有情義利即行相也菩提三寶有情皆其所緣能攝一切菩提分法為其功德不求五欲等反顯菩薩所求最勝言因緣者謂親能發起求大菩提曰因假之助發為緣因即自性住性內熏之力緣即習所成性又上二皆因善友及境外熏為緣瑜伽云由有四因四緣四力菩薩發心四因者一種性具足二賴佛菩薩善友攝受三多起悲心四長時猛利難行苦行無所怯畏四緣者一見聞佛神變威力二聞法微妙三見法欲滅四見生

受惑業苦四力者一自力二他力三因力以宿習故四加行力謂於現法親善聞法修善加行故若具上因緣及初三二力當知不退若因二四力心不堅固今經即初及三也又起信論智印經有七因緣如彼應知下別顯中以三因四緣攝上諸義三因者謂信悲智四緣者三寶衆生也今文中後半總以信智因緣三寶境信謂於實德能深忍樂欲心淨爲性故云淨信然實謂一切事理德謂三寶淨德能謂世出世善有其力能今法寶中已

攝初後亦三寶中皆具此三體實具德大用救生故大者智心求大菩提廣者悲心廣濟舍識翻彼二乘小陋心也別中初半偈揀去偏偽謂攝眷屬過所不能染故文中不求五事求即過故一若求人天五欲此能長貪多是鬼因二求王位長瞋多地獄因三求富饒長癡是畜生因實通三塗各從多說四求自樂是二乘因五求大名稱若勝負心是脩羅因若我慢心是外道因又以理求樂是人天因爲王攝屬是魔羅因有二乘心目之爲偏

有餘心者名之爲偽後三偈半直顯真正別釋因緣於中初偈悲因下救嚴土供佛亦爲調生故滅苦是悲利樂是慈次一偈半大智上供上二不二爲真正發心後偈總結成信兼信因行其中對上四因四緣可以意得又上從不求五欲下即顯信心之德故瓔珞經云修十信心須具十德今文並具但不次耳一遭苦能忍即前反顯二正顯中初二句即慈悲深厚三次句及莊嚴國土即修習善根謂利他善及淨土因故四有三字即供養諸

佛五受持一句志求勝法六證菩提故即求佛智慧七一句即深心平等八次二句即親近善友九次二句即心常柔和謂至誠供養柔和善順於佛法故十有二句即愛樂大乘十德備矣又此十德即求菩提之意下經休舍云欲教化調伏一切衆生盡無餘故發菩提心等又末後偈初句即自性住佛性以信心佛衆生無差別故方是真法可謂深信次句即引出佛性後句即至得果性又文有四弘可以意得又上云深心信解常清淨者與

理相應方曰深心若昔染今淨淨則有始始即必終非常淨也信煩惱即菩提方為常淨由稱本性而發心故本來是佛更無所進如在虛空退至何所慨衆生之迷此起同體大悲悼昔不知誓期當證有悲故不為無邊所寂有智故不為有邊所動不動不寂直入中道是謂真正發菩提心第二信為道元下七頌略示勝能於中初一頌總標次五頌別釋後一頌總結今初初句又標道有二義一果所謂菩提涅槃二因謂三賢十聖乘一直道

元亦二義一本義菩提本故其猶滔滔之水始於濫觴二首義元者善之長也即一因之初功德二義通因及果母有二義生長養育下三句共釋初句長養即母二義亦道元義一切善法及第二句即因功德第三句即果功德無上道者即大菩提由信長善得此菩提由信斷疑出愛成涅槃證不信身心如來知見豈能開示菩提涅槃次信無垢濁下別顯中有二十句一句辨一勝能一心淨為性故能翻不信濁二信理普敬故翻憍慢三

十藏之內信即是藏七聖財中信爲第一四  
信方受取奉行五信財如夢故無所恡六智  
論云佛法大海信爲能入七增福智因八到  
二嚴果九十五根五力各在初故十一信本  
無惑方斷惑根十二若向餘德不名淨信十  
三信境本空故無所著十四正信之人不生  
八難十五非不正信十六正信解脫十七成  
不壞本十八爲菩提根十九增佛勝智二十  
究竟見佛謂信自己心自佛出現信外諸佛  
諸佛現前故下經云一切諸佛從信心起三

是故下一偈總結勝能前法後喻信樂者信  
三寶性已於方便諸度求欲修行信樂二字  
是菩薩正意由此二故於諸行有能故名最  
勝非佛不信故云難得喻如意珠略有五義  
一勝義法寶中王故二希義非佛輪王餘無  
有故三淨義能清不信濁故四貴義出位行  
寶等不可盡故五蘊義蘊衆德物無障礙故  
第三若常信奉下五十頌半廣明信中所具  
行位然有二意一行布二圓融古約圓融故  
名信中所具於中三初明所具行次辨所具



位三結歎功德今初八頌半分二先五頌明  
信三寶以成諸行後三頌半明信展轉以成  
諸行前中初三頌信佛成行初二句標章持  
戒惡止也修學處善行也瑜伽云既發心已  
應於七處修學故名學處謂一自利處二利  
他處三真實義處四威力處五成熟有情處  
六成熟自佛法處七無上正等菩提處次一  
偈半雙顯二德若不持戒尚不能得疥癩野  
干之身況於菩提戒止妄非則性淨菩提開  
發因果功德皆依學處而生故云地也後一

永樂北藏

大方廣佛華嚴經疏

第一六九册

偈別明成供養行謂財法供養故云大也次  
一信法後一偈信僧文並可知二有三頌半  
成展轉行展轉依前功歸於信二若為諸佛  
下三十九頌明所具諸位於中成後四位即  
為四段初三頌明十住位有六句初句發心  
住次句治地修行二住次句生貴住次句方  
便具足住次句正心住後句增上是不退住  
最勝心是後三住準下釋之二若得增上下  
二頌半明十行位波羅蜜是十行總名摩訶  
衍是異二乘行初二行收如法供養是順理

行次二行攝念佛心不動及常見佛並是定  
慧行故屬後六行釋相可知三若常覩見下  
三頌明十迴向位通顯三種迴向佛體常住  
是向菩提法永不滅是向實際餘向衆生四  
若得堅固下三十頌半明十地位初半頌是

初地謂深法是所證真如愛樂是極喜異名  
二半頌是離垢地以離犯戒有爲過故三一  
頌離慢等是三四二地以三地於禪不著故  
無慢又以求法不懈亦名離慢第四地得出  
世間道品故云無放逸然不捨攝生故云兼

利四有一頌明五地謂雖得出世而還處生  
死故無厭真俗互違難合能合餘地不過故  
云勇健無能勝此是難勝之名也五有一頌  
明第六地悲智不住般若現前謂神通攝物  
是大悲行知衆生行是十二緣生是大智行

第六

十

六二頌半明七地謂初一明有中殊勝行後  
一頌半明空中方便智準釋可知七若具最  
勝下三頌明第八地略辨六義一道勝謂無  
功用道故云勇猛無上二力勝謂智力摧魔  
三用勝謂超四魔境捨分段故無蘊魔無捨

命故無死魔惑不現行故超煩惱魔覺佛十力故超天魔四位勝不動地故云不退也五行勝謂得無生忍六因勝謂此位中當大授記位也八二頌明第九地作大法師略辨四義一諸佛加持名佛現前二解了諸佛深密之法三諸佛憶念增其慧力四佛德自嚴為衆說法九若以佛德下十九頌明第十地位分五初八頌三業殊勝德初五頌半身業於中前三頌明身體德殊勝後二頌半明身業大用次演說一頌半語業勝說法益生後二

頌意業勝智先導故二若以智慧為先下四頌明三業廣大功三輪攝生德初一頌身業次一語業後二意業三若知煩惱下二頌辨得法結位四若得十地下三頌明三昧分大盡分受位分並顯可知五若蒙下二頌明大用難測亦是釋名分事也謂以大法智雲合衆德水能蔽如空麤重故又若蒙下二頌亦是進入佛地第三菩薩勤修下三頌結歎其德初三法說後一喻況前中賢首云初二句悲願內滿謂菩薩勤修等者結前若字下

義無不果者結前則字下義以若有彼則有此非是前後鈎鎖相因唯是本位信中有此則有彼同時具有而說有前後是故信門具足一切行位之相然行雖無量皆以悲願爲首故就此結之次二句明此悲願益物不空次一頌結前所具行位初句舉人標法威神即信爲能具之由次句結能證智眼證如如永常故次二句結所證道十善舉二地行等取餘地及餘位餘道謂教證等勝寶皆現後一頌喻况唯喻後偈初句及威力喻前初句

信體堅固以喻金剛並居智海之內以信威力能生所生衆寶即喻前第三句行位第三句喻前法眼常全第四或有剝土下二百三頌明無方大用分彼能無邊大用者由普賢德徧一切時處法界無限故略辨十門三昧業用一圓明海印三昧門二華嚴妙行三昧門三因陀羅網三昧門四手出廣供三昧門五現諸法門三昧門六四攝攝生三昧門七俯同世間三昧門八毛光照益三昧門九主伴嚴麗三昧門十寂用無涯三昧門以無不

定心故皆云三昧作用不同略辨十種又初門依體起用末後明用不異體中間並顯妙用自在又十三昧皆具此三今初六頌明海印三昧文分爲二前五別明業用周徧後一總結大用所依前中三初三佛事次一三乘

第六

十二

依海印之義昔雖略解未盡其源今以十義釋之以表無盡之用下經云如淨水中四兵像乃至莫不皆於水中現又云海有希奇殊特法能爲一切平等印衆生寶物及川流普悉包容無所拒故大集十四云如閻浮提一切衆生身及餘外色如是等色海中皆有印像以是故名大海爲印菩薩亦爾得大海印三昧已能分別見一切衆生心行於一切法門皆得慧明是爲菩薩得海印三昧見一切衆生心行所趣然此經文多同出現但出現

現於四天下像又約佛菩提大集唯閻浮約  
菩薩所得然皆見心所趣等了根器也此文  
所現形類應根器也二文互舉皆是所現菩  
薩定心以為能現言十義者一無心能現義  
經云無有功用無分別故二現無所現義經  
云如光影故出現品云普現一切眾生心念  
根性欲樂而無所現故三能現與所現非一  
義四非異義經云大海能現能所異故非一  
水外求像不可得故非異顯此定心與所現  
法即性之相能所宛然即相之性物我無二

第六

十三

五無去來義水不上取物不下就而能顯現  
三昧之心亦爾現萬法於自心彼亦不來羅  
身雲於法界未曾暫去上之五義與鏡喻大  
同六廣大義經云徧十方故普悉包容無所  
拒故明三昧心周于法界則眾生色心皆定  
心中物用周法界亦不離此心七普現義經  
云一切皆能現故出現云菩提普印諸心行  
故此與廣大異者此約所現不揀巨細彼約  
能現其量普周又此約所現無類不現彼約  
能現無行不修八頓現義經云一念現故謂

無前後如印頓成九常現義非如明鏡有現  
不現時十非現現義非如明鏡對至方現經  
云現於四天下像故四兵羅空對而可現四  
天之像不對而現故云非現現也以不待對  
是故常現該三際也具上十義故稱海印諸  
佛窮究菩薩相似問仁王三賢都無八相之  
文初地方云方生百三千一時成正覺此之  
八相豈在信門答即上所引大集亦云灌頂  
住菩薩得佛神力若菩薩成就如是等法能  
於無佛世界示現八相乃至廣說彼說住終

永樂北藏

大方廣佛華嚴經疏

第一六九册

若占察經漸次作佛略有四種何等爲四一  
者信滿法故作佛所謂依種性地決定信諸  
法不生不滅清淨平等無可願求故二解滿  
作佛三證滿作佛謂淨心地四一切功德行  
滿作佛究竟菩薩地起信依此說信成就  
發心能八相作佛單六文據昭然十四況圓融門中不  
依位次寄終教說信滿即能因果無礙以因  
門取常是菩薩以果門取即恒是佛或雙存  
俱泯自在難思又此化現非唯一位依一類  
界而能具攝一切地位徧於時處故云念念

徧十方也第二嚴淨下華嚴好行三昧文有十句略辨七行前六句各一行七八是十度行九結上自在十總結所依萬行如華嚴法身故餘如別說第三一微塵中下四頌明因陀羅網三昧門於中初二句標定心境然有二意一由一多相即故入一定能成多定由成多定令一塵內有一切塵一一塵中現一切刹二但令一塵現刹一切亦爾故云成就一切微塵定次二句明不壞相而普現故云不增次二頌明一塵中所現刹相無礙如焰

重現如帝網次半頌舉一例餘亦有二意一例上一塵之內所具之塵二例如一塵入定示現餘塵入定示現亦然後二句結用所因辨三門一三昧力此同標中二不思議解脫力如不思議品云於一塵中現三世佛刹等三神通力謂幻通自在並如下說第四若欲下十八頌明手出廣供三昧門初一總標後一還結中間別顯欲顯勝妙略舉一手為供所依由於昔時以手持供供佛施人稱周法界故令真流供具等諸佛之難思第五菩



薩住下八頌明現諸法門三昧門分四初一  
總標多門二有五頌別顯二十種門供等即  
門通入佛果故三一頌半結多所因由四悉  
檀故初半對治次半世界隨行差別即當爲  
人而成就言謂第一義四半頌結用難測第  
六有妙下十七頌明四攝攝生三昧門文分  
爲二初一偈總標名用餘頌別顯於中分四  
初四頌布施攝初一偈半求受用者恣其所  
須次半偈求自在者施以王位又此施位即  
難行施以是可愛著故次偈身行法施後偈

妙色悅心是無畏施又後二偈初身行法儀  
後服世妙飾貴悅物心隨求即與次二頌愛  
語攝一切愛語謂慰喻慶悅勝益之語言種  
種梵音者即八種梵音一最好聲其音清雅  
如迦陵鳥二易了聲言辭辯了三和調四柔  
輒五不誤六不女七尊慧八深遠言俱積羅  
者亦云都吒迦此云衆音合和微妙最勝皆  
愛語之具隨心說法應在後偈隨世所宜應  
在前偈以瑜伽一切愛語略有二種一隨世  
儀軌語二順正法教語今開示佛說八萬法

門即順正教也三有二頌明同事攝物見善  
 薩俯同其事知有義利而修行故於中初頌  
 一切同事八風等事皆悉同故後偈謂行同  
 事忍於諸苦而同事故四有八頌明利行攝  
 謂說趣義利之行以益有情於中初二偈一  
 切利行此有三種一於現法利勸導利行謂  
 今以德業招守財位以益近故經文略無二  
 於後法利行謂勸捨財位清淨出家即當初  
 偈三於現法後法利行謂勸離欲即後偈也  
 又初一偈即難行利行此自有三一不識出

離即外道異執二不求解脫即未種善因三  
 現捨國財誘耽財位於此利行是謂難行次  
 一句即攝二利行一即十種清淨利行也二  
 令離十惡即此世他世樂利行次三句即善  
 士利行慈心勸導等故次二偈即遂求利行  
 謂眾生為八纏所繞開解令離故名遂求初  
 偈即化無愧纏以恃壽長不知進修不知此  
 身但姪欲生終竟敗壞具諸煩惱故後偈開  
 解無慚纏眾生餘略不具次二偈即一切種  
 利行初偈即應攝受者而攝受之後偈即應

調伏者而調伏等後一偈即一切門利行謂不信令信故亦總結諸利行也瑜伽廣說利行居先略明同事居後此則先略明同事者以利行中若以行勸修與愛語相近若自示行即同事相近同事即是利行利行未必同事此二相近廣略互彰耳又次下三昧亦同第六事故第七雅思下十七頌俯同世間三昧門於中三初六身同世間利益衆生若依若正無不示爲次六示同外道救彼邪黨初五別辨後一總結義如別說三衆生迷惑下五頌

明語業大用初一總明次三別顯後一總結別中云或邊呪語者梵云達邏鼻茶曼達邏鉢底鞞言達邏鼻茶者是南印度中邊國名也此云消融曼達邏者呪也鉢底鞞者句也謂其國人稟性純質凡所出言皆成神呪若隣國侵害不用兵仗但以言破之彼自喪滅故曰消融呪句也或云稚童男童女方得言成呪句餘不得也又天密語等者婆沙七十九說世尊有時爲四天王以聖語說四諦二王領解二不能解世尊憐愍故以南印度邊

國俗語說四諦二天王中一解一不解世尊  
 憐愍故復以一種筏戾車語說四聖諦時四  
 天王皆得領解善破於他者以因明比量等  
 真能破故非外所動者真能立故不為他破  
 後一偈類結非唯說四諦六度萬行等皆然

一心說法得語實性能起隨類之用名三昧  
 力已下第第八有勝三昧下八十九頌半明  
 毛光照益三昧門智契解脫之門慈熏身語  
 意業故得身同法界大用無涯毛光觸物為  
 益萬品徧於時處緣者會之是謂菩薩圓建

立衆生也文分為五初一頌標門總辨二所  
 放光明下別明一毛光明業用三如一毛下  
 類顯一切毛光業用四如其本行下釋成分  
 齊五若有聞下聞信光益今初就所益說故  
 名安樂就第二段中二初略辨四十四門光  
 用後如是等下結略顯廣就四十四光中皆  
 有四義一標光名二辨光用三出光因四結  
 光果類例相從分為十段五對初有二光顯  
 示三寶二有四光今發大心上二即三寶四  
 弘對三有二光總圓福智四有二光入理持

法上即二嚴二持對五有六光六度行圓六有七光四等救攝即六度四等對七有一光總彰三學八有八光雜彰萬行供養為先為三學萬行對九有六光令六根內淨動與理會十有六光明六塵外淨觸境皆道即振清境淨對今初二光中前一顯現於中初句標名以近初標但云所放不言又放次三句辨用後偈辨因中示三寶令其正歸示正道令其正向上通一體及別相三寶亦示佛塔令其正信義兼住持後一光照耀用有七句一

偈辨因並顯可知第二四光令發大心中即四弘願也初一令眾生無邊誓願度因中興有為而毀有為為二一光令煩惱無邊誓願斷因中興有為而讚禪定上二皆事理兼修三上欣佛果四愛樂三寶窮盡法門因中四弘之終故總結云及示發心功德行第三有二軍六光總圓福智智因中分別法相決了真理無十九虧理事不減佛法故得一念悉解多門第四二光入理持法初一慧入二空即義持也後一具四總持於法自在第五六度光中戒因

中云發大心者謂若發二乘心則破淨戒大  
心導善不在人天勤策萬行慧爲上首各加  
一偈餘可思之第六有七光四等救攝中初  
一慈光與佛慧真樂見無量佛此有二義一  
見事佛真樂因故二見心佛一一心華有覺  
性故次三悲光拔苦初一厄難苦次一疾病  
苦後一死苦令見佛者一捨命不恐二惡道  
不畏又要臨終勸者智論二十八云臨終少  
時能勝終身行力以猛利故如火如毒依西  
域法有欲捨命者令面向西於前安一立像

亦面向西以幡頭挂像手指令病人手捉幡  
脚口稱佛名作隨佛往生淨土之意兼與燒  
香鳴磬助稱佛名若能行此非直亡者得生  
佛前抑亦終成見佛光也若神游大方去留  
無礙者置之言外不爾勉旃斯行次二光令  
生法喜初則欣法聽說法喜已充終則觸境  
無非佛法成喜之極後一令成大捨捨除放  
逸衆惑之根第七一光總彰萬行三學攝盡  
故曰普聞第八八光雜明諸行供養爲先前  
五供敬田後三施悲田第九六光內淨六根

第十六光外清六境文並可知戈者平頭戟也鋌者小矛也第二如是等比下結略顯廣一毛之用光有塵沙第三如一毛下類顯一切毛光業用及結用所依謂三昧力第四如其下釋成分齊如是等光今何不見謂有緣者見如目覩光無緣不覺盲瞽常闇於中分

第六

二十

二愛其行三能隨喜四但見所作後偈現因不必有緣但功行內著光明爰燭有三種因一修廣福二供多佛三求佛果即福智二嚴也上之七類皆蒙光照二喻說中雙明見與不見二喻皆有法合初日出喻喻光為益因合中謂法日常明有智慧者心不住法如人有目則能得見有三類人則不能見一者凡愚二邪信外道三劣解二乘皆無因緣如人無目後寶嚴喻喻光正益明法寶常存由福無福有處不處第五若有下一頌明聞信光

此謂信仰解了不生疑惑則成佛果不以不見疑菩薩之無光不以極苦莫救謂光明之無益亦不高推果用謂菩薩不能故云永斷諸疑第九有勝三昧下六頌主伴嚴麗三昧門亦是出現三昧文分三別初一標門顯意第六次四明一方業用於中前三法說後一喻合三十一既言量等三千則不壞次第劣於十地及等覺也三一頌類顯十方第十有勝三昧名方網下三十四頌半明寂用無涯三昧門約處名爲方網約相是謂寂用亦總顯上來動寂

無二故文分爲三初一標名總辨十方交絡出入縱橫故名爲網二或於下三十二頌半正顯業用三是名下一頌總結難思就業用中分三初二頌於十方處交絡出入明於器世間自在二有五頌十方佛所入出無礙明於智正覺世間自在三於眼根下二十五頌半通顯於三世間自在菩薩於三世間自在略有二義一以自身作三世間故得自在二菩薩於三世間處示現自在今此三段初二約後義後一通二義文或綺互理實皆具初



二世間略有四重無礙一約處謂東處即是西處是故菩薩常在東恒在西也二約佛謂東佛即西佛是故在東佛恒在西佛三約菩薩身不分謂在東之身即是西身四約定謂入定即是出定所以爾者略顯二因一以所

觀之法事隨理融相即在故二能觀之心亦寂用無礙故然此文中為顯菩薩秘密隱顯自在德故但說後二若辨前二則似菩薩無力三於眼下通顯於三世間自在文分為四一明根境相對以辨自在二童子下明於他

身自在三鬼神下明微細自在四一切塵下器界事中以辨自在今初十二頌六對一一對中有十義五對無礙之相欲辨無礙先須明識定慧此中云三昧起者觀也入正受者定也定慧雖多不出二種一事二理制之一

處無事不辦事定門也能觀心性契理不動理定門也明達法相事觀也善了無生理觀也諸經論中或單說事定或但明理定二觀亦然或敵體事理止觀相對或以事觀對於理定如起信論止一切相乃至心不可得為

止而觀因緣生滅為觀或以理觀對於事定  
下經云一心不動入諸禪了境無生名般若  
是也或俱通二如下云禪定持心常一緣智  
慧了境同三昧是也或二俱泯非定非散或  
即觀之定但名為定如觀心性名上定是也  
或即定之觀但名為觀如以無分別智觀名  
般若若是也或說雙運謂即寂之照是也所以  
局見之者隨矚一文互相非撥偏修之者隨  
入一門皆有剋證然非圓暢今此經文巧顯  
無礙言五對者第一對根境無礙謂觀根入

定應從根出而從境出者為顯根境唯是一  
心緣起無二理性融通是故根入境出耳境  
入根出亦然第二對理事二定無礙謂分別  
事相應入事定而入理定欲觀性空應入理  
定而入事定以契即事之理而不動故入理  
即是入事制心即理之事而一緣故入事即  
是入理而經文但云入正定不言理事及乎  
出觀境中即云分別色相斯事觀也根中即  
云性空寂者理觀也亦合將根事對於境理  
以辨無礙第三對事理二觀無礙謂欲分別

第六

二十三

事相應從事觀起而反從理觀起者以所觀之境既真俗雙融法界不二故分別事智即是無生之智二觀唯是一心故亦應將境界對根事理以辨無礙第四對出入無礙以起定即是入定故起定而心不亂若以事理相望應成四句謂事入事起事入理起等等若以根境相望又成四句謂根事入境事起等一一思之皆有所由第五對二利體用無礙謂於眼根起定心不亂是體也自利也而不礙現於廣境是用也人天不能知利他也良

以體用無二故自利即是利他此上十義同爲一聚法界緣起相即自在菩薩善達作用無礙思之思之又經且約根境相對亦應境界相對謂色塵入正受聲香三昧起等此如下童子身中入正定等中明復應根根相對謂眼根入正受耳根三昧起等一塵入正受多根三昧起等並略故不說上來無礙深妙難思始學之流如何趣入今當總結但能知事理無礙根境一如念慮不生自當趣入又向云色性難思等即色等總持是色陀羅尼

自在佛等亦應云分別眼性難思有眼陀羅  
 尼自在佛等又眼中云性空寂滅即眼之度  
 門眼等本淨亦應云色等度門色等本淨不  
 唯取相為染無心為淨而已也又以智論三  
 觀束之分別色相等是假名觀也性空寂滅  
 是空觀也此二不二色性難思中道觀也三  
 無前後皆是一心對此三觀應辨三止謂方  
 便隨緣止體真止離二邊分別止既止觀雙  
 運亦名一心三止也即一而三即三而一雙  
 照三一雙遮三一是一無礙也一一釋文準思

第六

十四

可見此是菩薩圓融功德而自在嚴觸目對  
 境常所行用希心玄趣幸願留神二童子下  
 六頌半於他身得自在在此有三義一如前眼  
 根入等但約見境為出入耳二菩薩化現彼  
 身作此轉變速疾也三菩薩以眾生身作自  
 身如下十身相作等是故於彼身入此身出  
 而彼不覺知唯應度者知得度也三鬼神下  
 二頌半微細自在謂毛孔約正報即佛及眾  
 生毛頭約空處微塵是色相多約器界並身  
 在中入定出定為顯三昧純熟隱顯自在故

亦通觀彼入出定等即於境無礙也若唯約  
身在彼下十定中亦云無生法中入起安有  
處即四一切塵下四頌半器界事中周徧入  
出然菩薩身普徧略有四位一普徧一切十  
方利海二徧彼刹內樹等物中三徧一切塵  
毛等中皆圓徧非分徧是故皆全身顯現四  
以是法界身故不異不分恒在此常在此無  
有前後第三是名下一頌總結初句以德命  
人次句依人顯德後半明說不盡近結第十  
定用無盡遠結前十定大用無盡以是無盡

第六

十五

之法門故第五一切下喻況玄旨分亦名舉  
劣顯勝分以上所說普賢行德窮于佛境蓋  
是信滿之位既越常規乖於視聽滯情封教  
取信無由故舉斯近事以鏡玄趣令開悟也  
七十九頌分為三段初二總標喻意二十七  
六頌別顯喻相三一頌結說顯德今初先一  
偈半明非喻能喻後半偈借喻通玄今初舉  
四難思意在菩薩神力瑜伽決擇分有六種  
不可思議謂一者我二有情三世間四有情  
業果五諸修靜慮者靜慮境界六諸佛世尊

諸佛境界今衆生含其前三加龍變化所以  
 有四菩薩神力即靜慮者境界舊經梵本皆  
 云禪定力用故然衆生業報四因難思謂處  
 所差別故事差別故因差別故異熟果差別  
 故諸龍變化不起心念六天四洲雲雨不同  
 等故難思也佛自在者有五難思謂真如甚  
 深故自在轉故無漏界證得故無障礙故成  
 立有情所作事故菩薩神力由三種相除佛  
 後二以今經文分同佛五以皆超言念故無  
 可同喻後半中然取分喻以小喻大令聞喻

者忘象領意故衷以智者二聲聞下別辨中  
 略顯二十種大喻以況菩薩之德初有三頌  
 半明聲聞現通喻況菩薩自在益生德先明  
 省末偈舉劣顯勝不爲衆生無大悲也不求  
 菩提無大智也大饒益者具悲智也二有二  
 偈日月現影喻況菩薩普應羣機德三有二  
 頌水現四兵喻喻菩薩海印現像德四有二  
 頌善音巧辨喻喻菩薩總持巧說德五二頌  
 女授辯才喻喻授法益生德六譬如幻師下  
 二頌幻師巧術喻喻不思議解脫德七二頌

軍六

二十六

修羅隱形喻勝通隱顯德八五頌象王隨  
變喻喻定用自在德九二頌修羅大身喻喻  
法界身雲德同於上文主伴嚴麗十有四頌  
帝釋破怨喻喻降伏眾魔德十一切利天下  
六頌天鼓說法喻況菩薩以無功用現身說  
法德十二有三頌天鼓安慰喻況菩薩慈音  
除惱德十三有三頌天王普應喻喻普應悅  
機德十四有二頌魔繫愚夫喻喻攝生同行  
德十五有二頌梵王殊現喻況菩薩解脫自  
在德十六魔醯下二頌自在數滴喻況菩薩

一念普知德十七三頌大風成事喻喻大願  
宿成德十八二頌眾聲悅意喻喻四辯悅機  
德十九二頌大海包含喻喻禪慧普修德二  
十大海龍下二十四頌半龍王遊戲喻喻菩  
薩遊戲神變德文分為二初二十二頌半明  
龍王大用不同後二頌正明舉劣顯勝前中  
初半偈總標餘頌別顯於中四初四偈半雲  
色不同喻菩薩身雲各異次有四頌電光差  
別喻菩薩光明等殊第三偈云寶藏色者梵  
云室利揭婆此云勝藏勝藏即寶名也閻浮

提中帝青色者梵云天帝火焰摩尼色亦珠寶名也三有三頌半雷聲不等喻菩薩三昧多種四有十頌所雨不一喻菩薩說法多門言曼陀羅者此云悅意澤香即塗香也鷄羅多摩者鷄羅此云華藥多摩此云天上華謂此香是天華藥所作故也婆利師迦者此云雨時生華末利香即華名其色猶黃金第二如是無量下二頌正舉劣顯勝謂娑竭羅龍於六欲天等總十五處現斯作用而身不動捏心無分別但由業報之力現斯自在菩薩

亦爾住無功用不動不思於十方界應現多種亦以菩薩功德之力隨機見殊此就喻意顯勝可知第三彼諸下一頌結說難思前半非喻能喻後半結上略說引諸喻者略有二意一顯菩薩自在不同二貴令衆生起信且江南之人不信千人毳帳河北之者多疑萬斛之舟皆耳目不暨故耳所以或舉目擊或據具縛之人自在若斯菩薩之用固當無惑今猶疑者豈不傷哉大文第三第一智慧下九頌校量勸持分此廣大用人皆有分見而



不習誠爲自欺故中人可勸而進也於中分  
二初一頌結前所說略就六慧結之第一者  
上無加故二廣大者語其分量超二乘故三  
真實者明其體性內證無虛故四無邊者有  
二義一量智普知故二離種種二邊故即中  
道慧也五勝者超地位故六殊勝者同普賢  
故二此法下八頌明信受難得於中初一總  
顯餘七別明前中希有者佛出懸遠已難可  
遇唯初成頌說故希有也奇謂初能具後特  
謂迥出諸乘此句讚也下文勸耳聞謂遇經

單六

三十八

忍可謂信因信則心淨受請領文領義讚乃  
通言通筆說唯約言上皆所作總說皆難後  
別明中三初二偈半明難信次半偈況出餘  
行後四偈舉事校量前中初一偈明人天之  
器信爲甚難若爾今或能信何耶由二力故  
一現修淨福稱所求故二昔因聞熏今發種  
故今不信者願少聽聞爲毒塗鼓終成堅種  
後一偈半舉三乘之信展轉難得況於一乘  
明文昭然權實有據第二半偈況出餘行中  
信忍尚難況具餘行難中之難也真實解者

亦有說行而不信圓融之旨非真實解也願諸學者善擇知見第三四頌舉事校量初三校量難信初二舉二難以況信難後一舉福勝以彰信勝後一校量餘行之難唯明誦持餘略不說亦顯修行真解非可校量也此之四事後後過於前前巧辯深勝大段第三時甲六賢首下顯實證成分於中有四一動世界大機發故二蔽魔宮唯佛境故三息惡道利樂深故四佛現證契佛心故於中摩頂讚善隨喜即三業皆證勸物信行第二會竟

大方廣佛華嚴經疏卷第十六

音釋

實求位切甄稽延切兜兜當切率此示切梵語  
 慨口礙切悼大號切濫盧職切齋齋居  
 拜蓋切吒陟嫁切邏郎果切鞞駢馳切迷莫蔑莫灰莫車莫  
 結切梵語蔑戾戾戟訖逆切鋌時連切矛迷浮切替替  
 車此云邊地地但有朕切目矚未欲切甚也視視襲博揚切美也毳諸切然然  
 也毛席暨及巨至切也

大方廣佛華嚴經疏卷第十七

軍七

唐清涼山大華嚴寺沙門 澄觀撰

升須彌山頂品第十三

巴下第六經

初來意者先辨會來前信此解義次第故又答十住問總有二段前信是住之方便此明

軍七

正位故次來也二品來前品說信究竟此品趣後說住故次來也二釋名亦先辨會名約處名初利天會約人名法慧菩薩會約法名十住會皆依主釋二品名須彌正云蘇迷盧此云妙高如來以自在力不起覺樹應機現

彼故云升也表位漸增不處人間顯位清淨故居天也若天表淨何獨妙高妙有十義如於法故一者體妙謂四寶所成二者相妙謂八方四級三者色妙謂四正色北金東銀南吠瑠璃西頗胝迦一切草木鳥獸等物隨所至處則同其色自常不變四者德妙謂八方猛風不能令動五眷屬妙謂七金山七重圍繞及七香海海印旋流六依持妙唯天依住得通者居七作業妙不離本處而鎮四洲映蔽日月而成晝夜八生果妙謂波利質多能

益天衆九爲首妙於四洲地最在先成十堅  
固妙於輪圍中最高在後壞高者高八萬四千  
由旬入水亦爾下據金剛上隣空界頂上縱  
廣量亦如之獨出九山故稱高也十住之行  
亦復如是聞思修解而爲妙體四德八聖以  
爲妙相四辯爲色令物解同雖同衆音自智  
不變八法不動而爲妙德七支奉戒金山圍  
繞七識流轉而爲海印第一義天依持而住  
可以神會非情能升不離本處徧應十方映  
蔽佛口及菩薩月而成涅槃生死晝夜生教

行果而爲妙樹世界初成菩薩先出爲衆生  
現種種資具世界將壞菩薩後沒爲說上定  
今免三災高者具成八萬四千諸度法門自  
在障外爲衆生故入生死海亦具八萬四千  
諸度法門據金剛性隣勝義空又智入佛慧  
必窮其底德超方便迥出群峯爲顯十住功  
德妙高是故須升妙高山頂四王處半旁而  
非正表住不退異信輕毛故越彼天居妙高  
頂善財童子於妙峯山頂見德雲者亦表斯  
位彌顯有由然上所釋皆圓教意故下發心

品云應知此人即與三世諸佛同等與三世佛功德平等得如來一身無量身纔發心時即為十方一切諸佛共所稱歎不可同於方便教說若約觀心妙高者謂三昧須彌寂然不動無思無心不收不攝任性而定稱本心地入佛智海湛然不遷是妙法樂觸境自在合本性淨是四德寶而自莊嚴斯則本覺如來升法須彌之頂三宗趣者先約會以十住行德為宗攝位德果為趣二品以嚴處請佛赴感為宗根緣契合說法為趣四釋文者此

會六品分為二分初二品方便發起後四品當會正說前中初之一品唯是由致偈讚一品義有兩兼一是方便謂前品化主赴機後品助化讚佛主伴圓備方演法故二是所依謂三天說法各有偈讚欲顯三賢皆依佛智單七有差別故離如來智無自體故獨為方便三甚抑讚詞行向二會同此科判今初一品長分十段一本會齊現二不離齊升三各見佛來四各嚴殿座五皆來請佛六俱時入殿七樂音並止八各念昔因九同讚如來十殿皆廣

博嚴淨也言爾時者即前二會時主伴齊徧  
演前二會之法也今此明徧即十重說處中  
第一重也何須舉此欲明前會不散成後會  
故後必帶前合成法界無礙會故一一諸會  
無休息故後後諸會皆同時故若散前會即  
無後故所以唯約覺樹會者此為本故得佛  
處故理實第二亦同此徧若同時徧何有九  
會前後若有前後何名同時應云即用之體  
同時頓徧即體之用不壞前後猶如印文第  
二爾時下明不離覺樹各升釋天問動靜相

違去住懸隔既云不離何得言升古有多釋  
一云本釋迦身不起道樹別起應化以升天  
上一云不起是報升天是化一云不起是法  
身升天是化用並非文意以此文中俱是毗  
盧遮那十身雲故一云以去即非去故名不  
起非去即去是以升天如不來相而來等若  
爾但是升相離故非是樹下別有不起之身  
故不可也有云此佛神通同體業用即住是  
去去即是住住是體徧去是用應應是體應  
雖升後而不離前體是應體雖不離前而升

後若爾何殊第三師不起是法又以住釋於不起而言住是體徧何得獨住菩提樹耶升天何得非體徧耶菩提樹下寧非用耶今顯正義然佛得菩提智無不周體無不在無依無住無去無來然以自在即體之應應隨體徧緣感前後有住有升閻浮有感見在道樹第七天宮有感見升天上非移覺樹之佛而升天宮故云不離覺樹而升釋殿法慧偈云佛子汝應觀如來自在力一切閻浮提皆言佛在中此不離也我等今見佛住於須彌頂此而

升也文理有據更以喻顯譬猶朗月流影徧應且澄江一月三舟共觀一舟停住二舟南北南者見月千里隨南北者見月千里隨北停舟之者見月不移是爲此月不離中流而往南北設百千共觀八方各去則百千月各隨其去諸有識者曉斯旨焉古德釋此略有十義一約處相入門以一處中有一切處故是故此天宮等本在樹下故不須起然用彼故說升也二亦約相入門以一處入一切處故樹徧天中亦不須起欲用天宮表法升

進故云升也三由一切即一故天在樹下四  
 田一即一切樹在天上不起等準前五約佛  
 身謂此樹下身即滿法界徧一切處則本來  
 在彼不待起也機熟令見故云升也是故如  
 來以法界身常在此即是在彼六約佛自在  
 不思議解脫謂坐即是行住等在此即在彼  
 豈非下位測量故也七約緣起相由門八約  
 法性融通門九約表示顯法門十約成法界  
 大會門然此十解前五玄門次四所以後一  
 總意欲成十義相參而立雖似雜亂不違經

宗並可用也然此中相望有四對法相即無  
 礙一此處彼處二此身彼身三若去若住四  
 若一若多約處此處彼處相即無礙應如十  
 中前四約身相即無礙應如五六及前正顯  
 又十中後四通於身處約處唯有此彼約身  
 更加去住謂此身即是彼身去身即是住身  
 若身若處俱通一多上來諸法同在一時無  
 前後也一多相望應成四句一不離一切樹  
 下升一天宮即如今文二不離一樹升一切  
 六三不離一切樹而升一切天經云十方世



界悉如是故四不離一樹下而升一天經中  
欲顯一多相即故舉初句升釋天既爾升餘  
天亦然如後二會升天既爾往餘處亦然復  
應樹樹相望而成二句謂不離一樹下常在  
一切樹不離一切樹而常在一樹復應以不

起餘處類不起樹下展轉相望皆悉周徧不  
壞前後自在難思又既一處有一切處亦有  
微細義所用不同有隱顯義若加前時後時  
有十世義唯見說住及於餘法有純雜義後  
後帶於前前有帝網義此天望餘成主伴義

十玄具矣問帶前起後事理應齊何故三賢  
獨有斯旨答顯異義故謂初二會相隣接故  
不假帶前此三人天隔越故須連帶又此三  
會同詮賢位六已入證不假帶前第七即位  
中普賢居然不假第八頌彰五位體用已融  
第九唯明證入體用一味故並皆不假第三  
時天帝下明各見佛來約佛則用從體起約  
機境從心現隣而未即故云遙見第四即以  
下各嚴殿座表嚴根欲之殿為法器故置師  
子座表十住之法門故文有十句初總餘別

總云普光明藏者此是解位智照法空含衆  
德故從信始入故有置言別中初句約體餘  
並顯嚴皆云十千者萬行因感故言層級者  
萬行熏成故金網防護慈悲帳蓋以育以覆  
四攝繒綺以爲周垂圓融行願交絡萬善柔  
忍慚愧以覆法空第一義天清淨梵行繞斯  
法體一一智照故曰光明於生死中遣長夜  
闇舉斯果德令物行因下行向中約位漸增  
表法無異第五爾時帝釋下請佛居殿於中  
三業崇敬以爲請儀言善來者應機來故不

來相而來故帶法界會來故三稱善者喜之  
至故舉三號者略歎德故願哀處者希仗勝  
田生大福故第六爾時下俱時入殿謂根緣  
契合成益不虛十方如是通上六段入殿事  
訖故一結通下四段文殿中之事第七爾時  
下樂音止息謂攝散歸靜得定益故第八即  
自下各念昔因獲智益也散緣既止勝德現  
前寂然無思發宿住智種善根者即下十佛  
曾入此殿聞法供養故亦表見自心性同昔  
佛故第九迦葉下同讚如來然三世諸佛皆

於此處說十住法獨讚十者表說十住及無盡故所以讚者義乃有四一十佛曾處則殿勝可居二互舉一德例讚本師三叙昔善根慶遇堪受四昔佛同說表法常恒文中先明此界後辨結通今初十頌各上半標名讚德上句別下句通下半以人結處唯初一句諸佛不同然佛別名多因德立讚者取德以釋上名初迦葉者此云飲光若從姓立示生彼族若就佛德一者身光蔽餘光故二者悲光飲蔽邪光故拘那牟尼舊曰金仙亦云金寂

寂故無礙金故明見迦羅鳩馱者具云迦羅鳩村馱此云所應斷已斷如金已淨如山不動亦可見無礙者此佛德如金山者是前佛德毗舍浮者亦云毗涇婆部毗涇婆者此云徧一切也部者自在也亦云徧勝無三垢故無不自在而超勝也三垢者現種及習尸棄亦云式棄那此云持髻亦云有髻無分別智最爲尊上處心頂也又髻中明珠即無分別也毗婆尸者此翻有四謂淨觀勝觀勝見徧見如月圓智滿是徧見也魄盡惑亡是淨

觀也既圓且淨是勝觀勝見也弗沙亦云勃沙此云增盛明達勝義是增盛也提舍亦云底沙西域訓字底邏那此云度也沙是儲沙此云說也謂說法度人或但云說辯才無礙者即能說也波頭摩者此云赤蓮華身心如蓮華淨無塵垢然燈者智論云此佛從初現生乃至成佛舉身常光如然燈故身智光明普周稱大然十中後七乃過去劫佛如何賢劫曾入殿耶古釋有二一約時劫相即入故二約其處有麤細故麤隨劫壞細者常存如

法華天人見燒我土不毀又梵王見淨身子見穢今此天帝是大菩薩同梵王見亦佛加故二如此下結通十方第十爾時世尊下殿皆廣博即示如意相廣殿同處以遣局情亦表廓大慈悲等衆生界又如來入殿即覺智現前忽然廣博則身心無際十方已下結通無盡唯結後四前已結故須彌頂上偈讚品第十四初來意者既明化主赴感今辨助化讚揚將演住門先陳體性性即佛智先讚如來故品

來也二釋名者須彌約處讚稱佛德依處有讚故立此名亦頂上之讚揀餘處也三宗趣者以集衆放光偈讚為宗為成正說為趣又顯佛德為宗令知住體為趣第四釋文總為三分第一集衆分第二放光分第三偈讚分第七今初文有十同義兼三異謂五六七一集因同皆佛力故亦同會前時二十方下主首同三一各下眷屬數同四從百佛下來處量同前十此百位已增故五其名下表法名同慧即十解能見法故菩薩名異至偈釋之六

所從來下世界名同同名華者位相創開無著感果故別即次第配於十住一發心主導世間故二淨治心地如蓮開故三修行圓淨故四水生之貴故五方便堅誓故六正心無相如香氣故七不退意悅故八阿盧那者此云日出時紅赤之相童真明淨故九那羅陀者此云人持以華香妙人皆佩故王子佩持法王軌度故十智徧如空故亦可別明十住勝進十法思之可知七各於下所事佛同同名月者表位中佛果智明闍息恩益清涼應

器周故別名即十住自分十法之果一以十  
難得法可謂殊特二發十大心不可窮盡三  
觀於空等不可傾動四了知業行生死涅槃  
如風不住五饒益安樂一切衆生如水普潤  
六聞十種法心定不動故得解脫七聞十不  
退可謂無上八三業無失如星明淨隨意受  
生燦然滿空神足自在若依空運轉九善知  
煩惱現起習氣故得清淨十觀察無數衆生  
根欲智慧心境餘不能知唯自明了以此十  
因成茲十佛上且隨要相屬以爲此釋委明

其相如十住文八是諸已下申禮敬同九隨  
所來下威儀住同十如此下結十方同又上  
十方從東次第如名號品問準此結通即於  
十方盡空世界皆有菩薩而來集會者且如  
東方過百刹塵土外亦有衆集未知彼因陀  
羅華世界爲在何處餘界亦爾答如名號品  
第二爾時下如來放光分文義有六一時二  
主三處四數五相六業處謂兩足指足指拒  
地得住有力成位不退而行有恒數位過前  
加於千也相表解顯故云妙色普照十方顯

佛衆會一光照於一切則一切亦爾重疊無礙無不互見爲一法界圓明大會第三爾時法慧下偈讚分中十菩薩說即爲十段初一是總餘九爲別以法慧是說法主故總叙此會本末事義總顯佛德餘九歎佛差別之德總別共顯如來無礙之會此十菩薩名亦表十住其所說法表位勝進勝進有二一趣後位二趣佛果今約佛果今初東方法法慧總了佛法故勝進中云欲令菩薩於佛法中心轉增廣文中觀佛現用及與往修皆周徧故十

頌分三初五叙因佛光見多感事初一叙此品放光次一叙前品請讚餘三重叙此品次二勸觀佛力更發勝心即前品不起而升後三舉因結果初一舉因後二結果由因中行願利利齊修故果位身智徧應徧斷第二南方一切慧者了畢七一切法真實之性十二淨心地故頌意爲顯於諸衆生增長大悲以稱實而觀救世者故十頌分六初二違理觀佛非見佛次四了法真性真見佛三有一偈迷性取法不見佛四一偈佛即同法爲真佛五一偈引

已了法爲見佛六一偈推功有本了真佛初中前偈出其妄觀假設長時以況覓見後偈明其有損由上不依真實則取相乖真但見集網繫於苦獄盲無慧眼冥然不見佛之法身然此遮取相故假設長時無有多劫全不了義以見如來增智慧故第二四偈了法真性真見佛於中二前二真觀後二真止前中初二句空觀緣生無性故次二句假觀隨俗假名故次二句中觀由前生滅一切諸法即無性故相體即是不生滅也後二句觀益諸

法如即是佛如無生滅佛體本常觀稱於如則佛常現況三觀一心則佛之體用無不現矣後二真止中以觀觀法能所紛動故須寂之初句牒前法性次句泯其能所法性本空非觀之使空故無所取何有能見次二句心冥性佛故止絕思求又上來空以遣有假以遣空如則雙遣空假形奪兩亡若謂雙非還成戲論故辨起心皆妄絕念方真念本自無斯絕亦滅故中論云如來寂滅相分別有亦非如是性空中思惟亦不可用斯文也後一



顯觀益心冥體性惑何由生亦舍三止意也  
又亦通結止觀稱上而觀見惑性空即同佛  
性何能染哉第三一偈迷性中上半取法次  
句迷性末句結過第四一偈佛即同法如謂  
同空法故離三世同假法故相具足同雙遣  
十一  
故無住無著同如體故徧不動搖第五一偈  
引已中此親自證希衆無惑第六一偈推功  
有本者非師心也亦謙已推人異乎凡情令  
法鈎鎖殊塗同致下八準之第三西方勝慧  
以解佛勝智隨空心淨故以為名頌意為顯

欲令菩薩智慧明了即大智了如及佛性故  
十頌分四初一讚智為迷悟本次四正顯迷  
悟次四喻前得失後一推功有在今初由難  
思故迷難則容有思者故有悟次四迷悟中  
初二迷後二悟迷中初一心外取境生想違  
理故不能見無相之佛後偈取內蘊相不了  
蘊性故不見心佛亦是愚法小乘故名無知  
者後二悟中前明倒想內外俱妄今有了因  
內外皆悟初偈翻前外取謂了一切法即心  
自性亦非性情破理現則見舍那稱於法

性無內外也後偈翻前內取了蘊性相則見  
自心之佛與盧舍那非一非異故難思議然  
此一偈文含多意一但是蘊縛無有我人則  
破前凡夫取我相也二前後因依相續無性  
則破凡小取法相也此性即第一義空第一

第七

十三

義空即是佛性又上性無所有正因性也前  
解此了皆了因性此蘊相續即是正因亦名  
生因言正因者是中道義中道即是佛性謂  
現在陰滅中陰陰生是現在陰終不變為中  
陰五陰故現陰非常如種生牙種不至牙雖

不至牙而能生牙此現在陰雖不至後而能  
生後則現陰非斷而中陰五陰亦非自生不  
從餘來因現五陰生中陰陰斯則後陰非無  
因故後陰非常既能續前故後陰非斷非斷  
非常是中道義正因性也能生佛果故曰生  
因衆生佛性有二種因一者正因二者緣因  
正因者謂諸衆生是故五陰即正因也緣因  
者謂六波羅蜜非蘊相生名緣因也今以了  
因了彼正因故曰於此性了知了即般若亦  
緣因也第三四偈喻前得失者前三喻失後

一喻得前中二初二喻內取失於中初一顯無緣了不見正因闇中寶者正因性也圓滿可貴所以稱寶居於無明五陰室內如在闇中燈喻緣了之因下半法合無人說者闍於緣因雖慧莫了義含二意一慧即正因合上寶也闍於緣因故不能了二佛法即寶以闍緣因雖內有慧不成了因不見真性然則緣因即是了因了因未必是於緣因有親疎故善友是於緣因而必是了佛性名爲了因未必是緣此約智慧性故若以第一義空爲佛

性者唯是正因而非了因但爲了因所了而非生因所生若以智慧爲佛性者即是了因若以五蘊爲佛性者名爲正因亦名生因然復生必對了正必對緣今燈一喻雙喻緣了闇中之寶雙喻正了義意包含具如涅槃二軍七十六七所辨又上燈喻既是正義何以涅槃十四師子吼立佛不許耶故師子吼言一切衆生有佛性性如乳中酪以有性故要須緣因何以故欲明見故緣因者即是了因譬如闇中先有諸物爲欲見故以燈照了若本無者燈

何所照故佛難言若使乳中定有酪性即是  
了因若是了因復何須了又善男子一切衆  
生有佛性者何須修習無量功德若言修習  
是了因者已同酪壞結正義云乳有酪者以  
定得故佛性亦爾衆生有者以當見故然上  
諸義總有二意一燈了於寶爲正義者約因  
性故師子吼立佛不許者約果性故二者燈  
喻正者約其體性與有不異佛不許者約其  
現惑與無不殊故知若言定有名爲執著若  
言定無是則妄語應言衆生佛性亦有亦無

然衆生智慧是佛性因菩提涅槃是佛性果  
然則佛性非因非果今此經宗宗於法性故  
以法性而爲佛性則非內非外隨物迷悟強  
說升沉佛性要義不可不知廣如別章及涅  
槃師子吼品等說後偈自有翳者此喻了因  
與惑俱故見不清淨以不淨故不見佛法佛  
法即見佛性故涅槃云佛性二種一者是色  
二者非色色者諸佛菩薩非色者一切衆生  
色者名爲眼見非色者名爲聞見佛性者非  
內非外雖非內外然非失壞故名衆生悉有

單七

十五

佛性二一偈喻上外取之失瞽謂全無於目  
如鼓皮故則全不見佛無垢障爲明淨目取  
相是識非智慧眼故不見也三一偈喻前悟  
中抉去取相之翳捨於空華之像絕見契如  
則見如佛第四一偈推功有在準上可知第  
四北方功德慧者生在佛家善解佛德故此  
頌意顯於三世中心得平等了知自心窮法  
空故十頌分四初四明凡小妄覺次四示其  
真覺三有一偈佛覺雙圓後一偈推功有本  
今初分二初一偈說凡迷緣起之無性執著

相而輪迴後三頌通凡小初一辨迷執隨言  
作解可謂小智心外取法爲妄分別餘二偈  
明過失初二句曲徑趣寂迷一直道次半有  
常等倒長世間惡有無常等長無明惡次半  
不見二空受二死苦後半無實諦觀何有法  
眼三乘縱有亦不名諦次四示其真覺中初  
偈引已之損勸物成益次偈教其真見謂見  
佛無取即是見如如即佛所知也次偈教其  
了俗上半躡前證真下半方能了俗後偈拂  
前二見以成真見謂上半取真俗之見忘方

見真俗之正理下半反釋謂有真俗之可見不能見真俗之真源故智論云若人見般若

是則為被縛下半意也若不見般若若見則得解脫上半意也若人見般若若見則為解脫即

第六七偈意也第七若不見般若若見則為被縛即

第四偈意也唯忘言者可究斯旨第三一偈顯佛二覺雙圓不可覺中而自覺故是曰奇哉知無衆生而能覺他大導師也第四可知

第五東北方精進慧以勤觀真理集無量善俱無住故頌意為顯欲令其心轉復精進

無所染著文中由離分別如實見故十頌分二前九觀法後一推功前中三初三所執無相觀於中初一舉分別過後二顯無相觀一離所取上半知於情有下半知於理無如迷木見鬼知鬼是迷有名如實知鬼知鬼本無舉體是木名為見木二離能取以所取空故上半舉失如若見鬼即不見木下半顯得離於鬼見方為見木次三明緣起無生觀一遣所緣然依他二義一者幻有從分別生即是上半二者無性即是下半二泯能緣上半牒

前生過有無生見同世非實下半見等無生  
名真見者三辨觀益後三明圓成無性觀一  
牒前二無謂能所分別皆不可得者即圓成  
性淨故二正顯真性初句體有次句相無此  
二融即故無能說三觀成利益及第二推功  
文並可知第六早七東南方善慧菩薩成就般若  
慧鑑不動可謂善矣此頌為顯欲令其心轉  
復增進得不退轉無生法忍文中離垢解脫  
無體性故十頌分四初二見佛次三見法次  
三觀成利益後二推見有依今初前偈讚所

見上半標讚下半釋成智離所知心脫煩惱  
兼二利故二障難除衆生難度自強不息為  
希有勇健後偈中能見謂我如實見如大菩  
薩見次三見法中約衆生說初偈正顯盡即  
有為諸行無常速起滅故有為之性湛若虛  
空便是無為體常徧故次二偈拂迹入玄上  
半拂前無為謂既如虛空何有無為之相次  
四句拂前有為謂既約自性論無盡則不壞  
於盡故曰難思盡即無盡故無衆生也後二  
句觀成利益見法身也次三觀成中初偈顯

法空由下半了能所見緣成無性故上半能  
 所之見自亡次二句顯我空能所之法尚空  
 誰為能見之者後二句顯實但除上病不除  
 真法二空之體及所顯圓成即真佛也三一  
 偈雙結知佛法益文顯可知四有二偈推見  
 有依者謂佛說一道清淨故能遣有進慧演  
 無量門復能遣無想滅理現方知如來乃住  
 無有無之際也又智論云法性為實證實為  
 際凡夫有實未能證也第七西南方智慧者  
 決斷不動所以名智頌意為顯於一切法皆

能出離文中生死涅槃皆善離故十頌分二  
 初一引已勵眾餘偈希眾同已於中亦二前  
 六示迷後三啓悟前中亦二初一人執理實  
 無人橫計成險餘皆法執於中初二執世法  
 後三雙執世出世今初初二句明執謂計蘊  
 為實不能觀身實相餘皆明過初二句執實  
 乖理不見佛次二句無慧不見佛後二句但  
 益流轉後三雙執中亦分為二初二執法後  
 一執佛前中亦二一立理二起執初中上半  
 假立謂待前流轉生死以立涅槃煩惱名諍



觸動善品損害自他故名爲諍此有漏法諍  
隨增故名爲有諍有彼諍故故生死者有漏  
爲體無彼煩惱故稱涅槃下半雙非謂生死  
涅槃俱因煩惱假立其名何有真實又二互  
相待故俱空二互相奪故皆寂後偈起執上  
半執下半損後一執佛中亦上半執下半損  
執有三義一佛佛相望二三身等相望三心  
佛相望後三啓悟中亦二初二順理之得後  
一舉佛釋成前中亦二半偈明順理而知餘  
顯順知之益益中亦二半偈標一偈釋云何

超言若取知能知寂未免於言有所緣故知  
自知知亦非無緣故須能所平等等不失照  
故無知之知不同木石故云能見後偈舉佛  
釋者上云佛然佛云何然釋云覺於三世離  
分別故種習斯亡爲斷根也又亦無心捨於  
分別名爲斷根第八西北方真實慧菩薩心  
不顛倒是真實慧頌意爲顯欲令增進於一  
切法皆得善巧文言於法不顛倒如實覺了  
是善巧義十頌分二前二明依實立名名能  
益物後八顯名下之實辨益所由今初前頌

明損益受苦聞名速解脫故受樂不聞反沈  
淪故後頌叙昔以成今說後八中分三初三  
覺妄證實是覺察義次一雙覺二諦是覺照  
義後四非覺而覺是妙覺義今初也初偈證  
實立名初句揀似比量無常計常常計無常  
等是顛倒法名似比量次句證真現量如眼  
見故次句揀似現量顯真現量謂男女天地  
等見一合相名似現量一合相相不可得故  
故名爲離非唯所覺離合亦無如外之智與  
如合也下句結名次偈例去來後偈成現觀

次一覺照者真諦名實無和合故俗諦非實  
假和合故互融無雜名究竟解夫實見者尚  
不見實何況非實見非實者知其即實故中  
論云一切法真實一切法非實亦實亦非實  
非實非非實是名諸佛法後四非覺而覺者  
初偈正顯如智相離名不可覺寂無遺照故  
名了此要不可得方是真修次二偈展轉釋  
成初偈釋無一之義上半相待而有通同異  
體下半緣生故空則一多相盡矣後偈上半  
釋前偈下半無能所作故無所依從業想生

故是和合下半釋成上半云何知無能所異  
業想外無我所故後有一偈結成妙義上半  
所住下半能住由無住故無所不住謂不住  
有以即空故故能住有契有實故亦不住無  
無即有故不住俱有無無二體故不住雙非  
不壞二相故能住例知既以無住為住則心  
絕動搖方契本覺湛然常住第九下方無上  
慧名如初頌又從法王教生當紹佛位故名  
無上頌意為顯欲令增進心無障礙文云無  
著無念不住法故十頌分三初一釋已名義

次八顯佛勝德後一推功結益次八中分二  
前六內證德後二外化德前中亦二前偈正  
明證入後五照境顯理今初即菩提涅槃以  
無所得得菩提故處即涅槃本覺自然故非  
造作悟亦冥符則智無分別三細已盡六麤  
居然又不可以識識無麤者不可以智知  
故無細者又有能所證名之為麤無能所證  
目之為細皆言語道斷故並無之菩提涅槃  
絕心行故後五中初偈正明照境境即俗境  
有能所故即俗而真故云無數心同無為故

云遠離是佛真法雙結能所後四遣相顯理  
 皆躡迹遣滯初偈雙非顯中照理滅障菩提  
 淨無離有無故次二偈釋前雙非一偈半釋  
 非照義初句是總次句能照無著故云無念  
 亦不染此無念次句所照無著以無處所為  
 所住故次句不壞能所次二句雙遣性相次  
 二句釋非無照稱理照故後偈拂前無二之  
 迹言無二者但言無有二非謂有無二若存  
 無二之見則還成二以無二必對二故遣之  
 又遣之以至於無遣故云三界一切空空謂

第一義空諸佛同見後二外化德中前偈正  
 顯令住無住之覺後偈釋成身即非身故無  
 可悟悟身見起此見如身身見兩亡真法身  
 也觀身實相觀佛亦然故就佛結推功可知  
 第十上方堅固慧者智力成就不可壞故頌  
 意為顯欲令增長一切種智文云得淨慧眼  
 了佛境故十頌分四初偈總歎為物興世智  
 光徧照大悲勇健次四別示悲相初偈觀機  
 次二反以釋成後一正明兼顯僧寶次三頌  
 半見聞利益後一頌半結德無盡此為終極

故總舉前十

十住品第十五

初來意者上由致既彰正宗宜顯故次來也  
又前辨所依佛德今辨能依十住故次來也  
二釋名者慧住於理得位不退故名爲住本

業下卷云始入空界住空性位故名爲住然  
住義多種寄圓說十總言十住帶數釋也下  
諸品有十準此可知三宗趣者以十住行法  
爲宗攝位得果爲趣四釋文者四品分二前  
三當位行德後一勝進趣後前會無勝進者

永樂北藏

大方廣佛華嚴經疏

第一六九册

但是趣位方便未成位故迴向是位無進趣  
者三賢位滿總爲趣地之方便故亦顯趣無  
分別離趣相故今初分三初品辨位次品辨  
行後品明德初亦名解文分七分一三昧分  
二加分三起分四本分五說分六證成分七  
重頌分今初何故入定略辨六意甲七一此三昧  
是法體故二非證不說故三顯此法非思量  
境故四觀機密法故五爲受佛加故六成軌  
儀故餘如玄說文有三別一入定人法慧入  
者是衆首故餘入則亂不調伏故顯十住法

慧能說故二入定依謂承佛力推功化主表  
無慢故三入定名為揀果定故云菩薩任性  
能知觀解善巧故名方便十住各攝多門善  
巧故云無量心詣於法故云入也又一切三  
昧皆有三相謂入住出五識對境意從門出  
遠境護根意識却入此通權小今即照之寂  
故名為入即寂之照故名為出入已未起故  
名為住餘三昧等並如前釋二以三昧下加  
分於中三初總辨因緣二明加所為三別顯  
加相今初又三一標加所因二加緣顯現三

讚說因緣今初謂以三昧力故論云所以偏  
加金剛藏者得此定故前由佛力能入今由  
定力佛現互為增上力相云何謂無作三昧  
顯自覺智寂不失照冥同佛心故感佛現三  
業加也二十方下加緣顯現來處佛數皆云  
千者望行猶劣故多佛加者顯於法及法師  
增敬心故又顯諸佛同說故加佛同名法慧  
者得法不異故論云此菩薩聞同己名增踊  
躍故但諸佛於此住門中現皆名法慧以法  
力故法應爾故普現其前者不來而至故三

告法慧下讚說因緣於中二一讚有加因能  
入定故言汝能者希越之辭此定難得汝今  
乃能入故舉定名者向來默入衆未知名故  
舉歎之令衆仰故二善男子十方下雙說加  
定因緣於中先別顯四因一伴佛神力諸佛  
自說者令衆敬仰故二主佛宿願三主佛現  
威四法慧善根略無大衆機感後入此三昧  
令汝說法二句結因所屬謂由上四事前三  
爲緣第四是因因緣合故入此三昧故前四  
定因令汝說法即是加因故論云何故加爲

說此法故故十行十向之中皆云令汝入是  
三昧而演說法故又此令汝說法亦是後文  
之總然十地論釋諸佛遮那皆由先願故加  
則此四段俱是加因以彼經中諸佛但云加  
汝威神遮那則云本願力故加古人便將諸  
佛之加爲得定因下之三級轉爲加因便令  
得定無後三因則又字何用旣結云令汝入  
是三昧何得後三不爲定因非唯違經文理  
亦乃乖論所釋如實義者此之四因通於二  
義一由此四爲得定因如上所辨二由後三

復是加因諸佛即以願力而為加因論主為顯斯旨故云彼佛先作是願今復自加問加之與定何先後耶若先定後加則不應云汝能入此三昧此是十方諸佛共加於汝乃至云及汝善根力故入此三昧若先加後定則不應在三昧分後方說加分又十地論云何故加為說此法故不言為入三昧故又云唯加金剛藏不加餘者以是菩薩得此定故既俱文證如何會通古人答云加定同時謂若未定而加則散心不能勝受若未加而定則

自力不堪入此深定是故同時此解亦違教理現言入三昧竟諸佛方現身稱讚得定及說加所為竟方與三業之加而云同時豈不違文若言同時則不成斯則違理亦不應引俱有因證以此二事容相離故若正釋者加有二種若約內外善根威神願力冥資令其得定則在定前若約與智讚述摩頂勸說三業顯加則居定後二文昭著何其惑哉第二為增長下辨加所為且對加因名加所為然加所為正在說法此十亦即說法所為展



轉相成文分二別初十句別明後一結說前  
中文含二意望加所為即是別說望於說法  
即說法之意謂加為說法說法為何為增佛  
智等然說法所為即加所為於十句中初總  
餘別總謂說十住法今信解諸菩薩修行增  
長性習二性生善提智故又此因智即同佛  
智亦得言增增智何用深入法界等故九句  
五對初二證真了俗對謂入無入相故云深  
入了相了性故云善了次二無障無礙對由  
入法界離煩惱礙由了衆生離所知障次二

圓因趣果對謂巧安真俗無等故因圓入薩  
婆若故云果滿次二識法知根對後一句雖  
非文對而是義對謂內持諸法外說利他所  
謂下總結所說謂若說十住則前所為皆但  
成就第三善男子下正辨加初分三先口加  
勸說以增辨二意加冥被以益智三身加摩  
頂以增成今初可知二是時下意加中先加  
後釋前中與十種智初總謂四無礙解智是  
說法所依故餘皆樂說無礙一無著者論名  
不著辯才於所說法無住著故即七辯中捷

辯須言即言故無著也二無斷智即無斷辯  
謂相續連環終無竭故三無礙者即是迅辯  
明於事理心無礙闇言則迅疾如懸河故四  
無異者即應辯也應時應根無差異故五無  
失者即無錯謬辯凡說契理無差失故六無  
量者即豐義味辯名數事理皆無量故七無  
勝者即一切世間最上妙辯此有五德一甚  
深如雷二清徹遠聞三其聲哀雅如迦陵頻  
伽四能令衆生入心敬愛五其有聞者歡喜  
無厭具斯五義故云無勝上即七辯八無懈

者通策前七無疲倦故九無奪者具前總別  
無能制伏令退屈故後何以故下徵釋先徵  
意云諸佛有力能與有慈能普何故十智唯  
與法慧下釋云法慧得此三昧法爾如是得  
諸佛加三是時下身加一令增威二令起故  
然三加同時隨義為次承前說便故先語加  
為令起定身最居後準地論經有諸佛不離  
本處則去住無礙手又不延則延促無礙同  
時觸頂一多無礙故是奇特要摩頂者楞伽  
云若有不為如來二種神力之所建立而能



永樂北藏

大方廣佛華嚴經疏

第一六九册

大方廣佛華嚴經疏卷第十八

軍八

唐清涼山大華嚴寺沙門 澄觀撰

第四告諸下本分文分為三初總顯體相次  
 標以許說後別陳其名今初然十住體略有  
 三注一約所依即前三昧依此說於十住法  
 故論云三昧軍八即法體故二者約本即下所辨  
 三冠性體若約所緣即真俗二境若約能緣  
 即悲智二行二境既融悲智不別境智冥契  
 同一法界也今約本體若直觀經文則住處  
 二字總示其體廣大已下略顯其相住三世

佛家結示住處今依地論類例以解則住處  
 為總餘皆是別總即示體此云住處十行名  
 行業十向名願十地名願善決定皆當位體  
 也而得名不同者何耶然三賢十聖皆以善  
 提心而為其體菩提心有三一者直心正念  
 真如法故二者深心樂修一切諸善行故三  
 者大慈心救護一切苦衆生故所念真如亦  
 即本智本覺智故後二顯是恒沙性德然此  
 三心有一必兼餘二而三賢互有增微十住  
 直心增故故名為解解為行願本故首而明

之十行深心增故名爲行依於前解以起行  
故十向大悲增故名爲願迴前解行願諸衆  
生離苦得樂故十地三心等證故名決定而  
大悲爲首故舉其願是以論云願善決定者  
如初地中發菩提心即此本分中願十信通  
信此三等覺此三等佛故知菩提心是諸位  
通依今此住位名住處者若從增勝則以深  
般若住於真如即復由此而爲行願之所住  
處若從通說俱住上三菩提心家故往處梵  
本名爲俱羅此云家也家即家族是以舊譯

名爲種性即四種性中習種性也良以此家  
菩薩所居故翻名住處下文還就佛家以結  
別中句乃有二義乃有三一廣大與法界等  
是勝住處然地經總句是於決定不應學彼  
此中廣大即是勝義其法界言合於四義一  
正念真如同理法界深無際限勝諸凡夫亦  
勝二乘偏真理故二普該菩薩無邊行相大  
悲深心同事法界無有邊量勝二乘故三者  
三心無礙同無礙法界事理融故四同圓融  
法界一一塵中無不具故此與第三勝權等

薩二虛空等者是因住處因有二種一無常  
愛果因是因如虛空依是生色色不盡故二  
常果因今是地前故闕此也古德又云一一  
位中如空包含無邊行海又如空周徧非至  
非不至又如空無礙故三住三世諸佛家準  
論此名不怯弱住處謂菩薩所住即佛所住  
故名佛家進住佛家是不怯弱若直釋經文  
即結示也謂向言住處何所住耶謂住佛家  
佛家即是大菩提心諸佛住此生菩薩故真  
如悲願究竟唯佛方能住故言三世者是讚

勝也二彼菩薩下牒以許說可知三諸佛子  
菩薩注有十種下別陳其名文有三別初標  
數引證二依數列名三總結顯勝今初謂三  
世佛果無不由此十住因成如大王路法爾  
常規故同說也二何者下依數列名初發心  
住者瓔珞云是上進分善根人若一劫二劫  
一恒二恒佛所行十信心信三寶常住  
八萬四千般若波羅蜜修一切行一切法門  
乃至始入空界住空性位故名爲住依仁王  
起信即十千劫來修信行滿入位不退創起

大心發心即住名發心住三種發心中即信成就發心也二治地者謂常隨空心淨八萬四千法門清淨潔白故為練治心地使悲智增明名治地住三巧觀空有增修正行故四生佛法家種姓尊貴故五帶真隨俗習無量善巧化無住故六成就般若故聞讚毀真正其心念不動故七入於無生畢竟空性心心常行空無相願止觀雙運緣不能壞故八心不生倒不起邪魔破菩提心故九從法王教生解當紹佛位故十從上九住觀空得無生

心最爲上故諸佛法水灌心頂故然住十住得名有三謂四八九十從喻爲名第七離過受稱餘約功德從其所喻皆持業釋若從能喻或依士釋三是名下總結可知若定位者略有十義一依唯識等五位之中即當初位言五位者一資糧位即是三賢從初發心積習福智爲道資糧爲衆生故修解脫分善二加行位順解脫分既圓滿已爲入見道復修加行亦名順決擇分三通達位即是見道謂初入地二種見道四修習位始從初地第二



住心乃至金剛無間心位名爲修道五究竟  
住金剛心後解脫道中盡未來際皆此位攝  
二依攝論第六說有四位即當初位之初言  
四位者一勝解行位始從十信終於地前餘  
三見修究竟同五中後三三依瑜伽四十七  
說十二住當其第二之初言十二者一種性  
住謂彼菩薩性自仁賢性自成就菩薩功德  
任持一切佛法種子性離羸垢不能現起上  
煩惱纏二勝解行住謂從初發心乃至未得  
清淨意樂所有一切菩薩行是三極喜住四

增上戒五增上心六七八三名增上慧分成  
三種謂六覺分相應增上慧住七諸諦相應  
增上慧住八緣起流轉止息相應增上慧住  
九無相有功用住十無相無功用住十一無  
礙解住十二最上菩薩住十三最上如來住  
前言十二住就菩薩說加後如來爲十三住  
第二即是三賢第三已去如次十地四亦依  
瑜伽及顯揚第七於十三住建立七地一種  
性地二勝解行地三淨勝意樂地即前三住  
四行正行地謂從第四乃至第九住五決定

地即第十住六決定行地即第十一住七以後二住爲到究竟地前六唯菩薩第七菩薩如來雜立爲地五依仁王下卷說十三法師各住一位即當第一言十三者一習種性二性種性三道種性四善覺摩訶衍五德慧六明慧七爾焰八勝達九常現真實十玄達十一等覺即八地十二慧光神變即當九地十三觀佛菩薩義當十地及等覺而佛非十三之數六依仁王上卷五忍之中此當伏忍之下言五忍者謂伏忍信忍順忍無生忍寂滅

忍各有上中下如次配三賢十地等覺妙覺七亦依仁王五十二位當其第二八依瓔珞四十二賢聖位當於下賢十住以不立十信十信攝在十住中故九依瓔珞六種性亦當第一言六性者一習種性二性種性三道種性四聖種性五等覺性六妙覺性若依楞伽等無復地位十依此經說四十二位無別資糧加行等名然所說位依法性立行布圓融二俱無礙如玄文辯十信開合已見賢首品第五佛子云何爲下說分即是行相釋此十

住即爲十段一一段中皆先徵後釋釋中皆  
先明自分後明勝進又前是住位後是起行  
今初發心住先徵可知釋自分中二先明發  
心之緣後正明緣境發心今初文列十緣義  
舍四因謂信悲智及種性也見佛世尊是初  
總相發菩提下結前生後中間十句別顯不  
同一形貌容儀二顯色大相三具隨好故人  
所樂見上三觀外相也四時乃一出出便利  
益故爲難遇此通內外五十力無畏降魔制  
外此明內德六神變難思即神足輪此唯外

用於上六中隨見一事發生淨信欣心上求  
此若可修我定當取七聞授記合於二義一  
聞授記作佛希預其數二聞記當事希得此  
知皆記心輪八聽教誠知惡可斷善可進修  
即教誠輪上皆信智爲因九見受苦起悲心  
未必聞教以種性內具法爾慈恕即悲因也  
十聞廣大法謂佛功德義兼法滅或傳或護  
因通悲智種性之因義通前十此之十緣與  
賢首品所引瑜伽四緣但開合之異耳謂前  
六見佛緣次二聞法緣次一見生受苦緣後

即見法滅也後結前生後者唯證菩提方成  
前事結前也求一切智生後緣難得法而發  
心也第二此菩薩下正明緣境發心前言求  
一切智十種智力即一切智文有標徵列名  
結數而義見初品大同初地為得十力故等  
又此十力於一實智而開為十化生事足義  
含悲智故略舉之非不緣佛餘之功德第二  
勝進文分為三初總標次徵列後徵釋今初  
謂欲求勝位應自勸勵亦勸他學列中有十  
不出悲智供佛為總通財及法下九為別行

下九事真供養故一樂住生死大悲為首故  
智了其空無所懼故二住為主道除惡三即  
能尊理教之法四示果令欣即教之所至五  
學佛德行以為能至六成德依緣故生佛前  
七寂前上求下化之紛動八寂必遠離生死  
輪迴九不失悲故常為物依亦是總結前義  
諸所施為皆為眾生大悲增上故問八遠離  
生死初令樂住此云何通略有三意一勸物  
遠離自處無厭二要自無縛方能攝物三即  
智之悲故樂住生死即悲之智遠離輪迴故

瑜伽云菩薩厭離生死過於二乘百千萬倍  
非不厭也斯則不斷生死而入涅槃不動真  
際常隨流轉成不住道又初既樂住生死六  
復云何生諸佛前亦有三義一為誘物故二  
求攝物之方故三悲智無礙故又十藏約實  
智契捨聞諸佛土不願往生此約權不壞事  
故生諸佛土三何以下徵釋何須學此令得  
通別二種益故別謂增勝廣大此之別益皆  
希後位準下頌文亦令不退轉故有所聞下  
諸位通益以解從內法故不由他他有三種

一他人二者心外三者性外自解亦三一者  
熏習成性故能自解二了唯心三了唯性故  
下云知一切法即心自性若爾云何復言有  
所聞耶謂汎爾聞故或自披尋聞乃約法開  
悟約義必不假人委曲指授故不由他究竟  
則是佛無師智下諸位中並同此釋有云從  
自裡生云不由他但是初意何足可尚又引  
下文雖知諸法悟不由師然求善知識無有  
厭足亦非此意彼據雙行此約自悟故第二  
治地住中亦二先徵可知二釋中自分內文

有四別一標二徵三列四結下諸自分皆做此知列中十心有其二義一於一一衆生各起十心二為辨差別對八種衆生一於怨衆生非直不念加報亦乃授與利益二於貧苦衆生欲令遠離故起悲心三於危懼無樂衆生令得樂具不盡四於惡行衆生令安住善行五於得樂衆生以矜愍心不令放逸六於外道未發心者攝令正信發心七已發心同行者守令不退八於一切攝菩提願衆生取如已身於此開二謂於乘大道集進趣者推

之如師集具足功德者敬之如佛此十大同第二地集義中釋以斯十心治自心地二勝進亦三列中十法有通有別通相可知別依展轉一總求多聞為二利行依二聞已閑靜思修三聞必依友四於友求請言必和悅五問不非時六不怖深法而不能受不怯行法而不能行七以思慧力解達深義非但多聞於義不了八如說修行涅槃經說親近善知識聽聞正法繫念思惟如說修行是大涅槃近因緣故今展為十九成行伏惑故離愚迷

十觀智照理決定究竟故安住不動三徵釋所以修者上十多約智以智道悲令轉增也通益可知第三修行住釋中先明自是護煩惱行後明勝進是護小乘行前中然此十無常大同三地彼論具釋引中邊釋已見問

單八

九

自在由不自在趣入無我此四即苦下四行相也五無作者但緣有故由念念無常故無造作由皆苦故無有樂味但於下苦中橫生樂想即一切世間不可樂想以彼空故萬法無體物無當名之實以無我故無有處所非在色中乃至識中無分別者觀能取也無堅實者觀所取也問涅槃比丘作無常想佛呵倒惑云何入住作無常觀答彼但得名不得其義以無常等該涅槃故故佛呵之今但說生死故無有失又無常者未會法身故苦者

未得涅槃故空者無善有故無我者未得八自在故則前四句自說生死次無作等四自說涅槃常故無作樂故無味我故不如名淨故無處所然二理不偏照與之符猶懸鏡高堂萬像斯鑑又初四句則因緣生滅是無常義等次四則不生不滅是無常義故云無作五受陰洞達空無所起是苦義因起有苦起即無起故無味也諸法畢竟無所有是空義人法二空空亦空故故不如名於我無我而不二是無我義諸佛或說我或說於無我諸

法實相中無我無非我故無處所故菴提遮經說不生不滅是無常義生滅却是常義等瑜伽四十六云云何菩薩觀一切行皆是無常謂觀一切行言說自性於一切時常無所有如是諸行常不可得若得斯意則入中道單八若依中邊論約三性說則初後二性不生不滅是無常義依他起性則生滅是無常義等又無作者非常非無常故無味者非苦非樂故不如名者非空非不空言不及故無處所者非我非無我不在生死及涅槃故無分別



者念想無故無堅實者實與不實相待有故  
後勝進中是護小乘行小乘不求種智不欲  
廣知故十中初三<sub>是作佛事處</sub>衆生是所度  
法界是能度世界是度處次四界是起見處  
外道計大爲諸法本小乘計大爲諸色因又  
成身之體後三界是繫縛處云何觀耶一觀  
其相委細而知二觀其性甚深平等三徵意  
云但總觀無常何用廣知釋意云觀空不礙  
廣有知見性相兼了法智增明故第四生貴  
住自分中有五謂釋名標徵列結也從聖教

生者謂多聞熏習等流無漏教法生其智故  
又下偈云佛子於法如是觀從佛親生名佛  
子此約能說人也又偈云了達諸有無所有  
超過彼法生法界此約理也上三義皆能生  
後一義兼顯所生之處又能說所說能詮所  
詮成此三異從此三生並可尊貴列中十事  
同四地十種法智但有開合耳既從聖教生  
成就四智教化衆生一自住處智不退轉故  
亦所生也二同敬智於佛淨信故亦能生也  
三真如智善觀察法故亦所生處也法即法

界四分別所說智即餘七句謂了衆生空有  
佛土權實世界染淨行業善惡果報苦樂二  
種生死四種涅槃具如常釋後十勝進初三  
解了通於教理行果次三修集行法次三誓  
當滿果後一別了理法後徵釋意欲進後位  
真俗平等故徧觀三世不殊方知平等故第  
五具足方便住者自分十心亦是方便也勝  
進十心亦具足也今自分中即第二住發起  
此心今以所修善根正向所爲例前解釋文  
並可見今別爲一勢謂初是總句救苦護善

故云何護善一授與樂因如經饒益故二今  
得樂果謂安樂故三哀愍妄樂不令著故四  
云何救苦度一切苦得解脫故何者是苦苦  
有二種一三災八難二二種生死云何能離  
一教生淨信二由淨信故授以三學今諸根  
煩惱皆得調伏云何得樂謂咸證涅槃究竟  
滅苦是真常樂初句九字流至於此後勝進  
中前六義含深廣後四唯顯甚深云何廣耶  
一無涯畔二無分限三離筭數四言思莫儔  
五色類非一六非稱量盡所言深者無邊謂

非有非無非斷非常故無量者常一刹那無  
長短故無數者非一非異不墮數故不思議  
者即妄即真言語道斷心行處滅故無量色  
者頓現身器故不可量者出二量故後四中  
七為總句人法空故此云何空八約能成非  
是軍八自他共所作故九約所成十三內外推尋無所  
有故十無自性釋成上義無性故空無性故  
誰能作無性故無所有非斷無也又七八九  
是三脫門三徵釋意云雙明深廣性相交徹  
則轉復增勝形奪兩亡皆無染著成般若故

第六正心住初自分內由成就般若了法性  
相故皆不動名為正心初四約所敬三寶由  
了法平等聲如谷響故於讚毀不生欣感又  
在執應毀就理應讚故故商主天子經云無  
有不毀語言而能至其解脫中故次三約所  
愍眾生有量無量是斷常邊菩薩不墮有垢  
無垢是增減邊菩薩遠離易度難度是苦樂  
邊菩薩不住又有垢者難無垢者易又亦反  
此以不發心不知垢故名之為無後三約所  
知法界有量無量亦是斷常餘二增減已得



言皆有在故佛則色相虛無應機為有法則  
離相離性不壞相性菩薩同佛次二中約事  
行為有入理行為無出離有二一約自行義  
同前文有垢無垢亦約事理二就化他悲故  
不出由智故出次下三句亦論有無何異初  
句初句邪見為無正信言有此三亦非正見  
雖許有佛不徧三世或言過去入滅是故非  
有未來未成安得為有現在生界未盡佛願  
未滿今有佛者皆應現耳俱有可知今知其  
謬說為無正說為有後二句中初智後境佛

智有盡等者一豎約智體以盡智故名為有  
盡窮未來故名為無盡又若入永滅則名為  
盡不永滅度是即無盡約從修生則名為盡  
即同無為故名無盡二橫就所知謂法無盡  
故智亦無盡以無盡智稱無盡法則名為盡  
故法華云唯佛與佛乃能究盡諸法實相智  
度論云如函大蓋亦大還將無盡之智知無  
盡法是故如來名一切智今菩薩窮究知依  
豎義半了半不了知依橫義二俱是了又相  
待說有盡無盡就理而言並非二相後一就

境約性一相約相非一知其隨說皆非偏知  
後勝進中十事五對此大同地中樂無作行  
對治發起十種殊勝行由此知其事理無礙  
至地則得權實雙行初一多對總含三義一  
約權實於一佛乘說無量故雖有衆多皆佛  
因故二約事理能成事說一即多事能顯  
理說多即一三約事事無礙有同體異體義  
如上說二文義對文隨於義轉變密意故即  
如初句一言隨於多義義隨於文顯了直說  
故即下三對但顯事理一無礙義若望下偈

云如是一切展轉成則文義亦通事事無礙  
三徧計理無情有無二四依他幻相性空無  
二五圓成性空與不空二如不異又上三中  
皆以三性三無性相即準思三徵釋中善能  
出離者不沉沒於事理成後位自在也第八  
童真住自分中初三三業無失永離習氣唯  
佛得之任運無功在於八地此中多同八地  
能行無漏故得無失無十不善失亦無錯謬  
失此三自行亦為化體餘皆利他初一能化  
身頓悟菩薩隨願受生貴在利人不揀淨穢

第八

十五

慚悟地前許受變易意生身故次四以能化  
智知所化境即十力智之四智也次一化處  
後一化法正化後明勝進是不動行初六於  
剎自在後四三業自在此同八地若色若土  
皆自在故初一總知分齊次二作用持兼願  
力四十眼智觀五有佛便詣六游以化生後  
四中一意二身三語四通三業下徵釋意爲  
得善巧入於後位辯才自在故第九王子住  
初自分十中一知六趣四生受報差別又知  
九種命終心受生差別故二知現行煩惱三

知種等相續非如現行有間斷故習氣有四  
如九地說四知諸行作業所入法門皆善巧  
故上四多同九地十種稠林彼據入地尤多  
細密故名稠林此但云知五知法藥是智成  
就義六知法師軌儀七知所化處八知化時  
隨根生熟不差失故後二依二諦說皆說成  
就也後勝進十法皆言法王者既言王子倣  
佛之儀合子法度而言處者即是位也如世  
王子之於父王今對辯之一善巧者言辭安  
立及諸伎藝悅可王心今此菩薩學佛法王

說法言辭安立權實善巧方便以悅佛心二  
軌度軌謂坐立動中規矩容止可觀度謂升  
降出入往來進退可度此明無虧戒行住佛  
威儀也三宮殿者父王在宮即行子禮父王  
處殿即行臣禮若處涅槃正殿即令萬行歸  
宗若處慈悲宮室則子愛舍識四趣入者趣  
第八  
者就也謂澤及萬人入者收也謂庭來萬國  
菩薩則無機不就無德不收五觀察者入則  
觀父王察其聲色出則觀羣臣知其賢愚善  
惡入則觀佛教理出則審機可否六灌頂者

十地有文出現法喻雙辨七力持者聚人則  
以財為力慎危則以戒為力降怨則以忍為  
力廣業則以勤為力定亂則以靜為力謀安  
則以智為力固眾則以仁為力制敵則以眾  
為力菩薩六度四等萬行總持皆力義也持  
財以儉持眾以信持安以不憍持力以不奢  
餘可類取皆能持也八無畏者為上無亢則  
無憂悔之畏節儉財色則無病畏居上不憍  
則無亡畏為下不亂則無刑畏在醜不爭則  
無兵畏三不備者永無死畏菩薩修行離老



死五種怖畏得十無畏九宴寢者晝無故  
不內宴夜無故不外寢宴於側室寢於正處  
菩薩入定同佛不過明以就其味不昏沉以  
滯於境無幽不得其味正定不易其心十讚  
歎者樂則歌讚苦則哀歎讚音宜和樂歎音  
宜哀思其情切其辭文菩薩應仰讚佛德哀  
歎衆生情詣於理使令欣厭二徵釋云欲令  
增進得於後位無礙智故第十灌頂住文亦  
分二先徵後釋釋中亦二先自分後勝進前  
中二初有十句所成德用後有十句讚勝難

第八

十七

測以位終故加此一段前中前五了世界無  
礙智後五成就衆生無礙智以智度滿故多  
同大盡分智成就說後十讚勝及後勝進皆  
是神通有上無上分中義今讚勝中前四即  
業自在不可知一身二身用三十通四通用  
後六心智自在不可知初三即三達圓明智  
四知器世間自在智五定心所現之境六大  
智所知之境並深廣故下位不知後勝進中  
三初標即學佛一切智一切種智以當位滿  
灌頂成佛以攝諸位皆此中具故如法界品

海幢處說玄中廣明二徵列中一學佛三達  
 智此是總句二佛法智者覺法自性善出現  
 儀三事理無礙四事法橫廣五大用周徧六  
 身智光照七神力持令不壞法力持令進善  
 八窮盡所化九知化法十了化主三徵釋成  
 十勝智復更學者為欲成佛種智位故然上  
 所釋大依十地第六顯實證成分中二先現  
 瑞顯實後菩薩證成前中先此界有動地雨  
 供一萬佛刹猶劣行故後如此下結通二又  
 以下菩薩證成於中二初能證現前二作如

是下發言讚述於中四一讚其所說二我等  
 下舉同顯證此有四同一能說人二所說處  
 三者會主四所說法初後與此同中二但彼  
 同者法慧表解不可不同法若不同豈名為  
 證中二異此者表人異道同處殊法一方表  
 通方之說成證義也若亦同此將謂餘異名  
 界佛不同說也若爾何故同名法雲妙法不  
 多舉耶為有表故謂所說法該於十地故非  
 麤淺故就所說中眾會約人眷屬兼法文句  
 義理主伴皆同也三佛子下舉因結成四如

單八

十八

於此下結通廣徧謂非唯來此爲汝作證於  
餘處證亦同證此彌顯所說是通方也此是  
彼菩薩結通不俟經家結通也問此經何要  
十方同說答引攝之教隨機不一諸方有殊  
圓實之教法爾常規故十方同說十方如來  
同一道故三賢十聖無異路故問說此經處  
何要徧於十方答能詮如所詮故所詮義理  
無不同故表位優劣證有多少據其所說無  
處不該有云此上瑞應證成應在偈後有四  
因故一未說偈經猶未了不應先瑞先證二

瑞證本爲證經既不證偈則偈應非經三證  
辭不應云文句無有增減四若許瑞證合在  
頌前頌中應頌二分假使梵本如此譯者即  
合迴文此乃靜法佳判今爲一救理或可通  
爲欲表說證同時故然文不累書編之作次  
若全居末則似說竟方證若更居初未說復  
何所證故置於散說偈文之際深有以焉諸  
會文同皆倣此釋第七重頌分中總有一百  
頌分二初九十一頌正頌前法後如是十住  
下九頌結歎勸修前中十住即爲十段初住

中有四十六頌文分爲四初三頌頌發心緣次三十二頌緣境發心次十頌勝進所學後一總結今初尊重即前衆生樂見第三偈即廣大法二中分二初十頌緣十力發心一頌一力初中謂以因感果斯爲是處從我心冥性等生無有是處餘文可見二二十二頌別顯所求長行結前生後云求一切智今偈略顯一切智相此二十二頌一頌一智或有關智了等言者蓋文略耳今以類例相從攝爲十智初一俗諦智次一真諦智三一偈神通

智四五頌解脫智五過去下一頌劫刹智六一頌三乘智七有七頌三密智謂二頌身密三頌語密二頌意密八一頌唯心智九過去下三頌一多無礙智十有一頌權實雙行智三菩薩如是下十頌頌勝進十法一頌一法皆言今其不退轉者顯勸學之意也不退有三一位不退七住已上二證不退初地已上三念不退八地已去今此近希位不退故若約圓教當位從信入住得位不退初發心時成正覺故四一頌總結亦是引證第二住五

頌初二頌自分次二頌勝進後一頌結說第  
 三住五頌前二頌自分後三頌勝進第四住  
 六頌初三自分次二勝進後一結歎第五住  
 五頌初三頌自分次一頌勝進後一結歎第  
 六住四頌初三自分於中後半頌是顯不動  
 之意二一頌勝進第七住四頌初二自分後  
 二勝進第八住五頌初三自分後二勝進第  
 九住五頌初二自分後三勝進第十住六頌  
 初四自分於中三頌頌所成德用一頌頌讚  
 勝難測後二頌勝進第二大段結歎勸修九

頌分三初一頌總歎十住次六別歎發心住  
 後二結歎初心況出修行十住位竟  
 大方廣佛華嚴經疏卷第十八

永樂北藏

大方廣佛華嚴經疏

第一六九册

大方廣佛華嚴經疏卷第十九

軍九

唐清涼山大華嚴寺沙門 澄觀撰

梵行品第十六

從第十七經盡夜  
摩宮中偈讚品

四門之中初來意有六一前是正位今辨位中之行故次來也二前明諸位別行今辨諸

軍九

位通行三前通道俗今別顯出家所行四前明隨相差別今顯會緣入實五為顯入住之因謂自他二種梵行淨故則入初住也六別顯初住成佛則類前諸位位成佛不由他悟之相也具上諸意有此品來二釋名者梵

是西域之音具云勃盭摩此翻為淨揀上淨行立梵行名離染中極故名為梵即梵為行故名梵行持業釋也亦有云真境為梵智契為行或涅槃為梵修因為行此二依主釋梵行以何為體體略有三一者即戒戒能防非故得稱梵二者四等三者是慧涅槃五行中梵行即四無量亦七善知今此品中具含三義然此三各二戒有二者一隨相二離相今文即相無相依如來教染衣出家乞食正命是隨相也於修無所著則戒相如虛空即離

相也四等二者一有緣二無緣生緣法緣皆名爲有今即緣無緣觀察衆生而不捨離是有緣也了知境界如幻如夢即無緣也慧有二者一有分別二無分別今即分別是無分別謂於十法一一推徵是分別也觀無相法了知平等離念契玄即無分別也上三中二義各初義通凡小後義唯大乘此二不二爲實教梵行若一行具一切佛法方是華嚴之梵行也梵即是淨但以性淨故即行淨行淨故則智慧淨智慧淨故則心淨心淨故一切

功德淨乃至成佛功歸於行故云淨行然前信中之淨隨事造修悲智兼導至此純熟了心自性悲智無二故小有不同三宗趣者即以悲智無二事理雙修觀行爲宗疾滿一切佛法爲趣第四釋文文分爲二先問後答今初亦二先叙問答之人正念天子問者天者淨也表所問事理染相絕故梵依天行而得成故念與無念二而不二爲正念也法慧答者表巧慧窮法後佛子下正顯問端於中先舉所問境次云何下述所問相問相有二一



問行淨所因謂隨相持戒之梵行云何得離相之清淨故不應言淨劣梵也二從菩薩下問因所得果第二法慧下答答前二問即為二別先答行淨所因後若諸菩薩下答因所成果斯即觀成利益也今初分二先明自行清淨即離相之戒成後復應修習下明利他之行淨即無緣之四等二種智慧通在兩文為能淨故前中分四一總示所應二所謂下列名略釋三若身是下廣陳修相四如是觀已下顯觀成相今初作意者不墮無記故觀

察者以慧推求故二中初列十法即列上所緣之境後應如是觀下釋上作意觀察所以唯令觀十法者一為成圓數二梵行緣體不離此十謂身口意三是行所依處三業行因三寶行緣戒為行體問以善三業歸於三寶得受隨戒何要觀耶答若不觀察取相堅持同權小故見戒從緣起心持戒為迷倒故云何觀耶廣在下文今略釋之意云十中隨一若是餘九即非明假眾緣以顯無性況十中各十一一推徵相盡理現名真梵行第三廣

陳修相即尋伺觀也十法即爲十段前六通染是故但約染淨相違名非梵行亦不析破彼法自體後四唯淨順於梵行故分析體空何有梵行十中各先總牒觀境後以十事徵顯其非今初身具中一非善者身通不善體非順理梵行善性體能順理二法既殊明身非梵行梵行何在他皆做此當知梵行之言貫通諸句二體是無記非可軌法三飲食資成四自相臭惡五自性不淨六種子住處等皆悉可厭七四蛇違石八業惑所依故九是

身無知又要當死究竟不淨故十八萬戶蟲戶有九億全以蟲聚成其身故今此梵行體是可軌性能澄淨芬馨清潔賢聖所欣順法順教體無雜染與智相應眾善集成彼豈當是於十事求梵行叵得當知梵行離相離性下九準之二身業者身之作用名爲身業語意亦然十中四儀無記餘六通善惡故非梵行三語具十事初一語體次五語緣謂風觸七處而出於聲此略無齋輪牙齒後吐納等四是辨語相十事望茲皆是語體此唯無記

故非梵行四語業十事通善惡故亦非梵行  
安立說者謂假施設隨俗說者隨世名言餘  
可思準第五觀意十事覺是尋求觀是伺察  
覺麤觀細是不定法言分別者以慧揀擇三  
分別中是自性分別七分別中任運分別種  
種分別者三中隨念計度故七中餘六謂有  
相無相尋求伺察染汚不染汚故憶念者追  
憶曾習唯緣過去思惟者以慧籌度通去來  
今並有一多各成二種上六皆別境攝種種  
憶念義兼惡作幻術通思通念眠是不定意

識亦行但取境昧略輕眠有夢亦通善惡覺  
之勢故此十是心所不離心故同名意也微  
破準前第六觀意業十事皆意之用故名爲  
業約徧行五徵之一思二想次四是觸後四  
是受作意一種總徧十段故前云作意觀察  
即上四段亦各一蘊此中思等與意何別但  
思等心所有二義故一扶持心王屬前所攝  
二依心起用屬此位收故多從受境以辨若  
欲破者旣約徧行通於三性故非梵行餘準  
前知第七觀佛十事觀於三身若依小乘初

五法身以無漏戒等及眷屬無漏五蘊為法  
身故次二報身以三祇百劫所修感相好故  
次一化身神通化現故業行通為三身之因  
果報通語三身之果若依大乘前八皆是化  
身後一報身業行通語二身之因涅槃是果  
離繫果故菩提是報報本願故今一一推徵<sup>五</sup>  
若一是佛餘者應非一一皆佛則有多佛和  
合成佛則無自性故中論云非陰不離陰此  
彼不相在如來不有陰何處有如來陰合為  
如來則無有自性進退推求佛體寂滅尚非

是有豈當是無邪見深厚者則說無如來諸  
法性空中思惟亦不可是知真佛既超心境  
依斯成行行豈相耶第八觀法但有八句者  
應梵本脫漏豈餘九皆十此獨八耶若約有  
所表者表除九十八使故加十總觀破百八  
煩惱故然法有教理行果今就後三略能詮  
故八中初一理法次一果法餘六通三約理  
可知約行者謂不善不生妄想不起言語道  
斷智無分別定無行處如智兩冥此六究竟  
即是果相今推徵云若一是法餘則應非

一皆爾若謂總是則和合不實隨得一法即應得餘和合而成則無和合若以無合而爲法者無合之法豈當有耶又此舉法皆舉寂滅不生等者欲明一一自虛法即非法梵行何從第九觀僧十事前八約人後二就德且依小說言預流者始超凡地預聖流故一來者修惑未盡一度來生欲界中故不還者欲界惑盡更不還來生欲界故阿羅漢者此有三義一名殺賊已斷一切諸煩惱故二名不生三界之生永已盡故三名爲應受人天

大供養故有四向者向於果故謂斷三界見惑有十六心至第十五道類忍時名初果向至第十六即入修道名須陀洹果欲界修惑分爲九品斷至五二向斷六一來果斷七或八品名第三果向九品全斷盡即得不還果甲九次斷上二界修惑乃至有頂八品惑盡名阿羅漢向三界見修都盡得阿羅漢果今此欲明梵行粗陳名目若廣引婆沙俱舍雜集瑜伽則清淨梵行有累名數力有餘者付在說時此中觀意謂僧名和合而有八輩一若是

僧餘則應非又一別辨則無衆義集此無衆豈成衆耶況於入流無所入等以無爲法而有差別則其體自虛後二就德德若是僧何須八輩離法無人離人無法一一窮究爲僧者誰僧體既虛梵行安寄第十觀戒戒爲行體亦賴衆緣從緣成戒戒性如空起心持者是謂迷倒無善無威儀不雜二乘心是名持淨戒此戒乃名真梵行也其中十事前八是受後二是隨受中壇場得戒之處問淨教儀並教授師三說羯磨即得戒法和尚得戒

根本阿闍黎者正即二師義兼七證剃髮著衣是戒外相隨中乞食四依之一正命謂離四邪五邪若依菩薩戒類例上文具如善戒經及彌勒菩薩所受菩薩戒羯磨所辨此上十境正約菩薩傍兼聲聞設依小受修觀則爲菩薩即如此方又善戒經欲受菩薩戒單九皆先具受前之三戒故所觀境通於大小其能觀智唯實教大乘上來尋伺觀竟第四如是觀下辨觀成之相望前尋伺即爲觀益望後得正覺果此但如實觀成文分爲三初約

所觀十境如實觀成二此中何法下約所成  
梵行如實觀成三如是觀察下結成梵行清  
淨之相今初有十句初六句明三輪清淨觀  
一不取能持戒衆生言身兼口意也二不著  
所修行事三不住於戒法亦即是事亦通不  
住前法次三句以三時門明不住持戒時兼  
釋上不取等言三世推求不可得故已滅未  
至空理易明現在多滯偏語空寂以剎那不  
住過未分之故空寂也次二句明二空觀成  
作受者人業報是法後二句以不遷理釋成

因果空義此世不移動謂不從今至後彼世  
不改變謂不從後至今是爲因自昔滅無力  
感果果不俱因無力酬因何有報受以物各  
性住性本空故二約所成梵行如實觀成者  
有十一句初句總顯無名十已空故餘句爲  
別一不從十生二非屬身等皆十已空故上  
二句約緣以徵次二句就體以徵初句明離  
前十外無別無作戒體十外有體不假前十  
次句亦無有作作之受隨前已空故次句雙  
非顯中無性防非故次五句約五陰有二意

一就戒體有說無作戒體體即是色有說非色非心五蘊之內初一是色後四是心今言爲是色者顯非是色以其所立無表依表生表色無表色今明觀意表色尚空何有無表爲非色者顯非非色也從色生於戒尚不名爲色從色生於戒豈是非色耶言爲是識者第九意顯非心若言是心者一切皆有心應常有梵行是知非心也若言非心木石應梵行是知非非心也若言非色非心行蘊攝者但是行蘊應皆名戒二就修行梵行不離五蘊若

即蘊者有蘊皆梵行若離蘊者豈是我梵行故後結云皆不可得第三結成梵行清淨之相以無得故文有十一句初句爲總次九句別顯無得一由上三世皆空故二由於身無所取於修無所著故三言心無障礙者即前於法無所住故如風行空無有礙故四作受二念不現行故五雖空不礙涉有故六七涉有不迷於空故受觀無相受謂忍可於心觀謂起用於境八結歸平等大般若曼殊室利分云我不見有一法非佛法者故無法不等



九一收一切方顯具德圓融末後一句總以  
 結酬向上義故名淨梵行上辨自利行淨竟  
 第二復應下明利他行淨文分為二初深觀  
 果智即利他之方後慈念衆生成無緣四等  
 是則自利利他上求下化皆具足也今初文  
 三初舉法應修謂梵行體也緣體宛然一心  
 湛寂梵行用也不思不造萬行沸騰故不但  
 心觀圓明復應廣集佛智二何者下徵起別  
 列可知三於如來下結勸廣學第二聞已下  
 慈念衆生成無緣四等文有四句一雙起慈

永樂北藏

大方廣佛華嚴經疏

第一六九册

悲如犢母隨子二思惟藥病成大法喜三即  
 行無求以成大捨四智了諸境導成無緣此  
 中五喻廣如十忍然釋有通別別者如幻似  
 有不實故似有故假不實故空此二不成  
 中道智如夢者虛妄見故如影者從業緣現  
 故如響者屬諸因緣故如變化者須臾變滅  
 故若如是了境即終日化而無化亦為衆生  
 說如斯法是謂利他梵行清淨也第二大段  
 若諸菩薩下答因所成果問文中分二先牒  
 前因深初總指前文不生二解別舉其要即

所行無二一切下酬其果滿先標後釋今  
初由理觀深玄了性具足萬行齊修故令大  
果無邊德用現證在即一切明其果大疾現  
語其速證後初發心下釋先釋疾現之言後  
釋現前之相今初上言疾得疾在何時故云  
初發心時何法現前謂無上菩提也後知一  
切下釋現前之相亦是出其所因何者夫初  
心為始正覺為終何以初心便成正覺故今  
釋云知一切法即心自性故覺法自性即名  
為佛故下經云佛心豈有他正覺覺世間斯

良證也斯則發者是開發之發非發起之發  
也何謂現前之相夫佛智非深情迷謂遠情  
亡智現則一體非遙既言知一切法即心自  
性則知此心即一切法性今理現自心即心  
之性已備無邊之德矣成就慧身者上觀法  
盡也正法當與今諸見亡也佛智爰起覺心  
則理現理現則智圓若鏡淨明生非前非後  
非新非故寂照湛然不由他悟者成上慧身  
即無師自然智也又不由他悟是自覺也知  
一切法是覺他也成就慧身為覺滿也成就

第九

十

慧身必資理發見夫心性豈更有他若見有他安稱為悟既曰心性自亦不存寂而能知名為正覺豈唯定之方寸不取則於人哉況初後圓融不待言也梵行品竟  
初發心功德品第十七

初來意者謂前二品明位及行今顯勝德舉初況後巧顯深勝故次來也又前品末云初發心時便成正覺未知此心有何功用頓得爾耶今釋此義故次來也二釋名者初有二義一三種發心之初二十住之初發亦二義

一發起上求二三德開發能知三世佛智故永斷一切疑網故得如來一身無量身等故在於信位久已研窮至此位中豁然開悟故得功齊果位攝德無邊受斯稱矣三宗趣者即以初心攝德為宗令物窮究發心為趣然住會發心定是信成就攝解行及證自在後十二文生如來家自約解說不應謂此便是證收若謂久習無明云何頓成大智者豈不聞冥室千年之闇一燈倏忽頓除耶若謂云何能知三世佛法者豈不聞具縛凡夫能知如來

祕藏耶餘義至文當釋夫機差教別聖旨深玄並未證真如同居學地共詳聖智誠曰才難且以淺為深有符理之得以深為淺有謗法之愆以遠為近則有益於行人以近為遠則法非我分諸佛說教貴在俯就物機後輩學人若欲高推聖境儻失大利豈不傷哉且夕鈞礪朝升台輔豈與夫明經常選而語其優劣者哉況纔生王宮貴極臣佐寧同百戰夷項備歷艱辛況十千劫之功高亦非聊爾人耳是以語其智等虛空而非類論其

德碎塵刹而難量極念劫之圓融盡法門之重現初心契於智海豈有邊涯猶微滴入於天池齊無終始故經云發心畢竟二不別如是二心先心難法慧仰推良在此也如或未喻勝鬘有文推佛能知斯言無過餘如賢首品次正釋文長分為七一天王請說分二歎深難說分三約喻校量分四就法略示分五動地興供分六他方證成分七以偈重頌分又釋於中分二初長行後偈頌前中亦二初此界後結通前中亦二初正說後證成前中

亦二先問後答今依前辨初中天帝問者在彼宮故聞前速成生疑念故菩提心是萬行主故問法慧者是會主故初心具後之德唯慧境故下正顯問端雖則正問功德下法慧答功德之量便顯發心之相是爲菩薩善巧

軍九

十三

辯才第二法慧菩薩言下歎深難說所以歎者法體深廣去疑令樂故下寄言顯說未盡其源故於中初句總言甚深者謂約時深徹後際約德深至佛果約理深同法界約行深包萬行並深中之極故云甚深又數廣難量

理玄叵測雖深非甚今即少而多即事而理初心具後是謂甚深下十句別由斯十義故曰甚深於中初四能所對辨各前能後所一離言故難宣示二無相故超心識三非自力辨能分別四非劣慧能信解後六通能所證五非有所得及一慧能證六非起行及一行能行七次第修慧不能通達八九思慧不能思惟籌度十聞慧不能信向趣入此六後後劣於前前巧顯深也所以廣說難者非唯成上甚深正誠今後令信第三雖然下約喻校

量分於中二初結前生後謂約自力則甚深承力則可說二佛子下正顯校量中有十一大喻一利樂衆生喻二速疾步刹喻三知劫成壞喻四善知勝解喻五善知諸根喻六善知欲樂喻七善知方便喻八善知他心喻九善知業相喻十善知煩惱喻十一供佛及生單九喻然此十一喻後後過於前前故皆捨置前十三前更舉後後巧顯深勝又此諸喻合有通別通但通合發心德廣謂如初喻中便合云為悉知一切世界成壞等此不同於喻也別謂

所合同喻但喻有分限法無限耳如初喻合云不但為以一切樂具供養十方等初一具通具別下十略無通合此諸喻文皆應有四一舉喻二徵問三領答四校量初後具四中九略無中二又諸喻內一一皆有十重皆應舉喻問答校量文無者略今初喻十重中初一廣說後九略明初中有四一舉廣事二徵問三答顯廣四辨超過今初有三先與現世益文有三廣為供具田時次然後下與後世樂後南西下類餘九方二徵問三答廣並可

知四超過中云歌羅者此云豎折人身上毛  
為百分中之一分也或曰十六分中之一分  
義譯為校量分優波尼沙陀者此云近少謂  
少許相近比類之分也百千後即云億分者  
中等數也後九略說中文四同前今初併舉  
九事樂具皆同一切所經劫數漸漸增多其  
所教法轉轉增勝據初世界亦合漸增以此  
十前文標一故餘無者略若十方共十則界  
不增第四校量中三初辨超過二何以故者  
徵徵意云前云功德除佛難知何以比此猶

少非類三釋意有二一別翻前喻謂發心無  
限前有限故亦是反釋二為令如來種性不  
斷下通對前十總顯具德亦是順釋於中有  
十二句初三總相對前辨勝一翻前小果二  
翻前限處三翻前有限眾生下九句即下十  
喻之本一即第三知劫成壞喻本二即第四  
善知勝解喻本故下文云乃至垢解淨解等  
三却是第二速疾步刹喻本四即第六及第  
十本五即第九本六即五七本七八皆第八  
喻本九知佛境界平等即第十一供佛喻本

單九

十四

此中九句即佛十力智一知成壞垢淨自性  
即業報智心樂即種種解智知煩惱即漏盡  
智生死即天眼智諸根即根勝劣智方便即  
禪解脫三昧智此及佛境並是一切至處道  
智心行即種種界智三世智即宿命智其處  
非處智以是總故亦是前三總句中攝然此  
所知皆約一切無齊限也下文廣釋其相第  
二佛子復置下明速疾步利喻然次下九喻  
文皆分四初舉廣喻二辨超過三徵四釋釋  
中皆先反釋後順釋今初喻中前三可知四

釋中先反釋彰前不及後爲了知下順釋辨  
此過前於中十一句初句總所謂下別知世  
界相即相入無障礙義前七正明即入八一  
毛端下二對釋上即入所由略舉三門初以  
法性融通門釋謂一切世界差別性與一毛  
端體性無二故是故事隨性融此彼相即事  
攬性起彼此相入各有同體異體準上思之  
九一世界中出生一切世界者此約緣起門  
釋謂諸緣起更互相生有其二義一約體有  
體無體義是故相即二約用有力無力義是



故相入亦有同體異體義並準上思之欲知一切世界無體性者約無自性門以大非定大故能即小等十總結欲以一念盡知如是廣無邊際重重即入無障礙事故發菩提心又此言知偈中亦身往彼第三佛子下知劫成壞喻文亦有四初明喻廣大舉成攝住舉壞兼空二佛子下對辨超過三徵四釋釋中亦二先反釋後順釋順中三初總次所謂下別三是名下結能知智別中言平等者通相即相入就緣就性唯心等殊皆無障礙故云

平等一長短者如娑婆為短安樂為長通傳相望以為長短二三及四文並可知五量無量者如勝蓮華界劫更無有上名為無量已下皆有量六有成壞則有盡無成壞則無盡標中但云成壞從多分說亦麤盡細不盡七念劫相望八劫非劫自有三義一約未經增減縱百千年名為非劫若經增減成壞名劫二如勝蓮華刹既不可校量亦無劫數故名非劫三推妄歸真劫入非劫依真起妄非劫入劫斯則前七事事無礙此乃理事無礙九

一念速知兼總包無盡以斯無限安可比前  
 三結能知智即十通中知盡未來際劫神通  
 也第四佛子下善知勝解喻文四同前初舉  
 廣喻梵云阿地目多此云勝解謂於決定境  
 印持為性不可引轉為業今譯存略耳釋中  
 亦先反後順順中初總後所謂下別別中總  
 有十三句初有八句總相以辨後有五句一  
 一別明前中又二初三解為得方便解智光  
 此光通因通果於中一廣二深約理等故三  
 即能知後五句為得佛十力中勝解智力解

軍九

十六

一切法初一約人謂眾生海解故次一約時  
 及性三約境明似不似上皆明所知廣四事  
 事相即顯所知深上皆所知後一能知即佛  
 十力之一也第二從欲悉知有上下一一別  
 明上但云多未識差別之相今略示之於中  
 五句各是一義初句三對約佛菩薩相望一  
 妙覺無上餘皆有上此約豎論二約橫辨盡  
 未盡故三同位互望為等高下位相望為不  
 等第二句有六對約五乘凡聖相望差別有  
 依無依約自性差別託於根境及稱真故二

約淺深差別甚深般若不共小乘故三約境  
差別佛解無邊餘未盡故四約二諦世諦差  
別勝義無差故五巧拙差別六漏無漏差別  
第三句有四解約佛乘說一深故二廣故三  
無分量故四契真如正位得果解故事理無  
礙故無二礙故第四句三對唯約衆生以辨  
差別於中初能知方便不礙空而知假故後  
悉知下明其所知有三對六解與惑相應名  
染不相應名淨廣略者約境及作意差別麤  
細者約行相差別委悉不委悉故第五句三

第九

十七

對多約知聖教解於中文二先正明二一切  
下通結前文初中深密者開則深約方廣一  
乘密謂密意合則深即是密以秘以妙即事  
而真故二方便者略有三種一進趣方便謂  
見道前方便道是二施為方便即第七波羅  
密依實起權皆善巧故實無此事假施設有  
故三集成方便諸法同體巧相集成如六相  
巧成可名方便今並能解言分別者凡於一  
法多門決擇故言自然者法爾本覺內熏發  
故隨因所起者過去聞熏之所發故或於現

在正思惟等而能知故言隨緣所起者謂得善友增上緣力所開悟故二一切下總結廣多交終故如網也為此無限而起大心豈同前喻第五知根智第六知欲樂欲謂於所樂境希望為性勤依為業即勝解智所攝會釋如前第七知方便者即禪善巧及至處道智方便三種如向所辨所望別故無相濫失第八知心義兼王所即他心智第九知業即業報智上皆文四同前可知辨其名體具如初會十力章中廣顯差別如第九地第十佛子

復置下明知煩惱差別喻文亦分四前三可知第四釋中亦先反後順順中初總後所謂下別別有六門各先惑後治謂非但空知意在斷故初門總明後一義兼總別中間四門別舉其重今初門中輕重眠起通下諸惑故名為總就中輕重總中之總以品言之一切煩惱各有輕重約起惑者心有異故據難易斷現行為輕種子為重即眠起是又分別為輕俱生為重若據破壞三寶焚燒善根則邪見最重餘悉名輕若據損惱自他障菩薩道

單九

十六

瞋恚最重餘悉名輕若據發潤生死流轉無  
明愛取為重若依為諸惑根則三毒為重若  
依障初聖道不受聖教見慢為重若據速隨  
現行障無等道我愛慢為重餘可名輕若煩  
惱當體相望十大煩惱為重隨惑為輕隨煩  
惱中大小隨展轉輕重又正使為重習氣  
為輕更有異門可略言也言眠起者眠即種  
子眠伏藏識起即對境發起現行言一一衆  
生無量煩惱總結多端種種差別如後略說  
廣唯佛知種種覺觀通能所治有染淨故染

為所治煩惱依故如欲害覺能生貪等無  
量煩惱涅槃加五說有八覺一欲覺求可意  
事二瞋覺念欲瞋他三惱覺念欲惱他四親  
里覺憶念親緣五國土覺念世安危六不死  
覺積財資養七族姓覺念族高下八輕侮覺  
侮即是慢念自恃欺人此等非一故云種種  
皆能引起一切煩惱對上一一衆生無量煩  
惱亦名引起分別言淨治者欲以不淨觀治  
瞋以慈治惱害以悲治次四以無常觀治後  
一以無我我所觀治故云種種覺觀淨治一

切雜染第二依流轉門於所治中即癡愛發  
潤斷一切下明治由癡愛故諸趣流轉從癡  
有愛菩薩病生故一切衆生三有五趣三結  
要當斷盡一欲界諸愛別名欲結二上二界  
愛合名有結三三界無明名無明結三結亦  
名三漏即上癡愛斷已永盡生死流故第三  
依病行門四分別分是性義各據偏多受  
貪等名名爲不等三分俱多名爲等分然不  
出三此三別名三不善根故治中云斷根本  
也第四依通諸識門明我我所謂第七識恒

執第八爲內我故惑謂爲我所染之起慢故  
云我慢通至第六內執我身外執資具恃已  
陵人又此我者亦兼法我若盡此惑則諸惑  
皆盡故治中云盡無餘也第五約相生門以  
利鈍分別先鈍後利故淨各推身以欲貪爲  
本欲貪以虛妄分別爲本虛妄分別以顛倒  
想爲本顛倒想以無住爲本今以無住非煩  
惱故略不言耳而順明之從顛倒虛妄分別  
生貪等惑依貪等惑有諸隨惑展轉相生顛  
倒想者不淨計淨等故利中即身見爲本生

六十二見此有二說一依三世五蘊至下當明二依異道邪見具如瑜伽八十七說第六約出家修行門以障蓋分別蓋謂五蓋已見上文障即二障此亦總結前諸惑不離二障發大悲下明能治道謂救有障者護修行者

單九

子

此言在末義兼總結謂菩薩發心不自為已但以大悲救護一切今斷上來諸惑之網斷之何為今本智清淨然能治道雖復衆多不出二種一通二別別如上來隨分開示如不能斷應宜轉治謂如起貪以不淨觀治之不

去當起慈悲緣於前境應以淨法與之云何出家無慈悲心反更染汚如是隨便種種迴轉皆以無得而為方便所言通者但當深觀第一義諦謂當觀諸惑即是本覺菩提故無行云貪欲即是道患癡亦復然如是三法中具一切佛法故惑性智性皆本淨故但由虛妄分別凡夫不了如大富盲人動轉為寶所傷二乘熱狂謂為蟲蛇驚走遠避權菩薩輩猶謂有之可斷今乘一切智乘以淨慧眼觀惑即真則煩惱自虛智性常淨是為開佛知

見使得清淨不斷煩惱而入涅槃有斯悲智  
如是知斷發菩提心豈與夫前喻同年而語  
哉第十一明供佛及生喻文三初舉喻校量  
二徵三釋今初分二前廣明一人後略辨九  
人初中有四一舉廣喻二問三答四校量顯  
勝初中有二初廣說東方後南西下略例九  
方初中又二先明佛在供養後至佛滅下明  
滅後供養前中又二先自行後又勸下化他  
前中有四深勝一供具廣妙二供田廣勝謂  
無數界悲敬田故三供心勝恭敬等故四供

時勝相續無數劫故此自行已勝況於教他  
況復滅後況於餘方餘並可知後略辨九人  
中二先舉廣喻二佛子下校量顯勝前中九  
人展轉遞望念敵多劫數量復增此中如第  
一人一念以無數供至第二人皆增至無量  
乃至第十增至不可說不可說皆積當位之  
念以至當位極時也後校量可知二徵意云  
其第十人供福已至不可說不可說全比容  
許不齊何以不及少分第三釋中分二先反  
顯不為齊限明前不及此後為供養盡法界



下順釋以無限故辨此過前略申十種一時  
過謂窮三際念劫重重時故二處過謂該十  
方相即入故三供過謂盡法界稱理之供故  
四田過謂盡虛空界塵毛等處諸如來身各  
充法界故五心過謂一一念中各以無盡供  
供無盡佛經無盡劫心猶不足故六悲過自  
作教他以此善根唯為衆生令先成佛我亦  
供養故七智過了達三事隨其一稱法界  
故如海一滴則具百川之味芥子之空已無  
分限八善巧過能以一事為多攝多為一善

巧成就融攝諸位真實行故九所求過唯為  
菩提不為餘趣故十平等過謂生佛自他供  
與不供皆平等故束上十義總不出三一無  
齊限故二稱法性故三事事無礙故無此三  
意設更重重廣喻亦不及少分第九第四發是心  
已下就法略示分前喻顯大心三三因廣此明攝  
德深勝亦是讚勝勸學文中有二一發是心  
已者牒前諸喻所校量心二能知下明此大  
心所攝功德於中有五一解行圓滿二妙果  
當成三與佛平等四能作佛事五大智現前

初中三一總舉所知現佛正覺但云智慧通  
佛示滅故加涅槃當佛在因云善根也過現  
已從緣應可得云知未來未有但可云信亦  
信一切皆當佛也二彼諸下攝以修證有為  
能得無為能知能證使智身成就法身等佛  
古德判此一段為攝位修成謂於諸佛功德  
智慧能信是十信信成就故後攝初故能受  
是十住能修是十行能知是十向得證是十  
地謂本智證後智得能成就是結因究竟能  
與佛等是果滿平等謂與諸佛能證所證平

等無二故初心即攝諸位乃至佛果亦是一  
理三徵釋所以何以初心即滿因位釋意云  
以等真性所為無齊限故有十一句初總餘  
別文並同前初喻中辨第二以發心故下妙  
果當成分二初標因得果二徵釋所由今初  
得於八事一解契佛心故為憶念二入正定  
聚故當得菩提三真器已成故佛授妙法妙  
法者即如來知見也四知心性故與佛平等  
五圓修助道六度四攝六力等未證亦定無  
疑故云成就七十八不共修習莊嚴八得四

單九

三三

無礙辯名說法智慧上七皆言三母明其豎  
該今云法界辨其橫攝前後影略二微釋所  
由中初徵意云何以發心即得果法釋云以  
是發心爲因決定當得佛故望圓極之果故  
定當成約見性成智身上品云即得故晉經  
梵本此中皆云即是佛故者當此義也第三  
應知下與佛平等者見性均故發心畢竟二  
不別也文有四句初總餘別總言等佛何所  
等耶有三種等一所緣境界及分齊境界等  
二大悲大定力無畏等皆悉平等三得知身

無從亦無積聚隨物分別見種種身如是者  
慧與佛平等第四纔發心時下能作佛事有  
十一句皆是纔發即得言即得者有二意故  
一約法圓融初心攝諸位故通說諸位相攝  
總有三類一以行攝位如十信中具一切位  
賢首品說二以位攝位如十住滿即得成佛  
如十住品及法界品海幢比丘處說其十行  
十向十地皆爾各如自品說三初心攝終如  
十住初心即攝諸位如此品說並就因位滿  
說如普賢作用大分同佛猶未是佛此中亦

爾二約見性齊故說與佛等具諸佛法豎論  
位次優劣非無若爾此與歷別何異請以喻  
顯若彼虛室置之一燈光周室內加二加三  
乃至百千各各重重徧於室內雖同周徧不  
妨後後益明初心等佛若彼一燈妙覺等初  
同第百千若器中盛燈雖復百千共置一室  
互不相見歷別修行類同此也依於此義故  
初心即云振動光照一切世界登地已上却  
說百剎千剎如理思之又即由此義廢高就  
下十住之中即齊地故第五此初發下明大

智現前此文二意一別是一段謂以無著大  
智求菩提故二通釋上四段謂由於一切無  
所著故稱性圓融能成能攝一切功德文中  
分二初正明無著後釋其所由前中初總所  
謂下別謂從三世門見佛法僧非佛法僧同  
三世攝於中三位初八清淨次四通染淨後  
二唯染後唯求下釋不著所由文含多意一  
云唯為菩提故云求一切智不餘趣向故於  
法界佛等無著此雖有理不順今文以佛及  
佛法豈非一切智耶二云求之於已不求佛

等求之於已尚未免求今釋有二一只為求一切智故求而無著以有所著非真求故故淨名云夫求法者於一切法應無所求了法無求順一切智二者言求者不壞相也不著者稱法性也性相雙鑑終日求而無所求經云無所求中吾故求之矣第五爾時下動地興供分全同上文第六是時十方下十方證成分望於上文有同有異同義可知異有三種即為三段一佛現證成異前菩薩二顯益證成前文所無三結通無盡前略此廣加說

第九

三五

因故今初也先現身次讚說後引已同以初心攝德深廣恐難信受故佛自證二汝說此法時下顯益證成益通二世初益現在後我等悉當護持已下顯及當來今初清淨心者以聞菩提心見心性故而經多劫者然餘教說定三僧祇此宗所明劫數不定略有四類一或展則無量不可說不可說剎塵如法界品說二或千不可說或減或增如威光太子及此中說三或一生二生如善財童子兜率天子四初心即得如前所說所乘之法既自

在圓融能乘之人亦遲速不定念劫融故故彌勒云一切菩薩無量劫修善財一生皆得起信則以若遲若速皆為方便此宗則以措定為權並有聖言無煩固執不以長時而生退怯不以速證而起輕心若遲若疾誓要當剋是佛意也後益末世令信仰故今之聞者皆由佛力願深愧信行三如此下結通無盡是證佛結通非經家也先明說徧後其說法下示所說同文中有一說人同二說儀同謂神力本願故三說意同為欲下是此文大

旨同前十住並顯可知第七爾時下以偈重頌分先辨偈意有十一句初一後一是說偈儀而離開者欲顯中九皆承佛力該十方故中九正明所為初總餘別別中四對一淨業顯理二除惑開信妄想分別為雜染根三知病識藥四觀果淨因即由利他自業便淨第二正顯偈辭有一百二十一頌文分三段初八十二偈超頌就法略示二有三十四偈却頌就喻校量三有五偈結德勸讚令景慕發心歎深難說徧於三段又歎為長行偈頌之

第九

二十六

本故略不頌之初中文亦分五初有十七偈  
頌第一解行圓滿二菩薩始發下十七頌超  
頌第四能作佛事三菩薩所住下十八偈却  
頌第三得佛平等四趣向菩提下六偈半頌  
第五六智現前五恒勸衆生下二十三偈半  
頌第二妙果當成文不次者顯德無前後故  
又長行明先因果體後因果用偈頌明用可  
在今果明當得大智通徧故前後互明初中  
文分爲二初一偈明前正明解行圓滿然初  
句是總舉發心爲因餘十六偈頌前徵釋於

中有七初一偈頌充徧一切世界二有二偈  
頌爲欲度脫一切世界衆生三有一偈頌知  
世界成壞知者意在往化覲佛故四一偈半  
頌爲悉知一切衆生垢淨故及一切世界三  
有清淨知垢意在令淨故五趣三有名左右  
耳五紹隆下兩偈半却頌爲不斷如來種性  
故初半摧邪顯正即紹隆義次句示佛種之  
體性次二句即起佛種緣餘是種起之相化  
化不絕是報佛恩心如金剛是種性義照佛  
所行修菩提行則佛種不斷也六五偈頌知

衆生心樂煩惱習氣下四種發心於中初偈  
總明所知事想是妄想即煩惱也業即習氣  
果即死此生彼心即心行根性即諸根次二  
偈顯知之體相皆即事入玄次偈非唯知病  
亦識法藥故如世尊後偈非唯空知行願相  
符能爲實益七有三偈頌知一切衆生三世  
智謂離三世障故障有十種一煩惱雜染障  
二觸境迷倒障三長時懈怠障四取著因果  
障五邪教邪師引轉障六趣下乘障七麤相  
現前障八於徧趣行無堪能障九隨言生解

障十不亡能所障如次十句各一對治末後  
二句總結通達第二菩薩始發下有十七偈  
頌上能作佛事總分爲十初二偈頌即能說  
法教化調伏一切衆生以悲智相導故二有  
一偈頌諸佛讚歎歎必加故三有一偈頌即  
能振動一切世界動入互舉四菩薩具足下  
六偈頌即能息滅一切諸惡道苦於中具悲  
智之德故能拔因果之苦而無我人五有一  
偈頌即能光照一切世界照世意在照諸衆  
生六一偈頌即能嚴淨一切國土毛孔現刹



即神通嚴也七有一偈半頌上即令一切衆  
生歡喜供佛問法但爲益物故八一偈半頌  
上即能入一切法界性初半聞而通達次半  
思而兼說後半修而無著九有半偈依修而  
證頌即能持一切佛種性也十有一偈半頌  
即能示現成佛第三菩薩所住下十八偈頌  
得佛平等於中分四初三偈半頌佛境界平  
等初偈分齊境次偈兼所證所緣境後一偈  
半舉況顯勝二善知下四偈半頌功德平等  
三有一偈頌前文得如來一身無量身平等

四於諸下九偈頌真實智慧於中有四初四  
頌發離一切妄想廣大心二有二頌發窮三  
際廣大心三有二頌發順涅槃菩提廣大心  
四一偈結勸可知第四趣向菩提下六偈半  
頌大智現前於中初一結前生後餘正頌大  
智現前初偈於佛無著次偈即若衆生若衆  
生法次偈即若佛若佛法次偈若世間若世  
間法次偈若菩薩若菩薩法二乘文略後半  
偈頌上結文念十方佛即求一切智無依無  
取即於諸法界心無所著第五有二十三偈

半頌前妙果當成於中有九初三偈半頌常  
 為一切諸佛護念以具德故二半偈頌當得  
 無上菩提三半偈頌與其妙法大人法者八  
 大人覺也四有一偈頌佛體平等時處平等  
 即佛體故五有一偈頌已修三世諸佛助道  
偈九  
 之法六有六偈頌成就三世諸佛力無所畏  
二十九  
 廣十力之別名略無畏之都號於中五偈半  
 別明十力後半偈顯得分齊七有五偈頌已  
 莊嚴三世諸佛不共佛法三世間圓融不共  
 權小故八五偈頌悉得諸佛說法智慧力九

一偈結德無盡並屬初心說前諸段大文第  
 二十方國土下三十四頌頌前約喻校量於  
 中分二生十四頌正頌前喻可知後二十偈  
 通釋諸喻不及所由前雖略釋今此廣辨又  
 長行中多隨喻別明今此總辨亦總相頌前  
 歎深難說若將別配則今難證等互有所局  
 於中分三初半偈結前生後次十七偈半正  
 釋所由後二偈結德無盡就正釋中分三初  
 一偈標章次十二偈半別釋三四偈顯德圓  
 滿今初也謂標出生無盡體相無限二章二

別釋中初四偈釋無齊限或一句是一義後一偈半頌六度義可以意得後八偈半釋出生無盡於中分三初二偈半結前生後以體無限故出生無盡也次菩提心是下四偈正顯出生為本出生乃一義耳後二偈略釋為本所由由修六度為菩薩乘本由勸正行為八天乘本由闡妙業通為三乘涅槃之本三四偈顯德圓滿中初偈總顯次二偈別顯願滿後一偈別明智圓第三二偈結德無盡可知大文第三欲知下結勸發心於中三初半

偈正勸次三偈半釋勸所由總舉具足一切德故後一偈結勸速發

大方廣佛華嚴經疏卷第十九

軍九

三十一

音釋

噍呼覽切 羯磨羯居切 羯居此云作法 儻他朗切 或  
 磻蒲官切 磻溪名 髮莫班切

永樂北藏

大方廣佛華嚴經疏

第一六九册

大方廣佛華嚴經疏卷第二十

軍十

唐清涼山大華嚴寺沙門澄觀撰

明法品第十八

入第十卷經

初來意者前明當位所成之德今辨趣後勝進之行故次來也又前明發心之勝德今辨所具之行相故次來也二釋名者準梵本具翻應云法光明品統有四義一法慧智慧於能所詮進趣行法分明照了故即明所知法二明是能詮以能顯行故法是所詮可軌則故此則詮旨合目明有法故法之明故通二

釋也三明是智用法是理行及果境智合說俱是所詮法之明明之法依主名也四所修行法體離無明亦唯所詮有明之法法即是明通有財持業也三宗趣者明法不同略有四種謂教理行果尋教悟理觀理起行行成得果皆初宗後趣又此四皆宗為成後位及成勝德為趣第四釋文文有三分一請說分二正說分三結說分今初分二先長行後祇夜前中亦二初敘問答之人勝進趣後非勤不能故精進慧問二佛子下正申所問亦分

爲二初領前自分勝德後請說勝進之行前  
中先總後具大莊嚴下別別有七句一領德  
即領前莊嚴一切諸佛不共之法二領乘即  
上已住究竟一乘道三領位位不退故即上  
已住如來平等性三世諸佛家中生此下晉  
云離生道者即是領道圓教初住離生因故  
今四五二句成此一句以捨世間得出世法  
入住正位即上於諸世間不分別等六去來  
現在諸佛攝受領得勝緣即上佛護佛讚等  
也七決定至於菩提領其當果即上云當得

三世諸佛無上菩提德雖無量不出於此故  
略舉耳此約當住位釋若約攝於上位理無  
不通而於求勝進義非愜當二彼諸菩薩下  
請後勝進中亦二先問所成行體後問行成  
德用以破癡等爲德用故前中先正問後結  
請前中十句爲三初五自利兼他二一問云何  
修習順佛令喜其修習言亦總亦別總徧諸  
句別謂策勸即下答中明不放逸一問順法  
入位三順行四順願五順德積德成藏故次  
四利他兼自束爲二對初常說法而不捨自

行後下念四生上弘三寶末後一句總結二利不虛二佛子下結請可知第二復次下問行成德用文亦分二初正問後結請前中分二初問行所成因德二問結因成果德今初有十二事初十一字貫下諸句一能滅無明未審修何行法而能滅耶諸句皆爾意在微因無明有體黑闇為用非明無之處即名無明故別有惑體由無明故事理皆昧名為黑闇二問降魔三問制外四問究竟斷道心垢即是所知亦名習氣五善根以何而成六三

惡八難云何可出七智境何由淨治八地等七種淨德云何成就九依正三業功德云何莊嚴滿足十以何觀力知佛功德十一一切智境復云何知十二何法能成就衆生乃至作大佛事第二及餘下結因成果於中二先單十正結等謂結所不說及等如來第二於諸如來下顯等佛之用護持正法便等佛故故偏明之文有十句初總餘別總謂開示演說教理行果皆有護義諸魔下別一異敵不侵二攝持修行三十五外助四舉世同欽五諸佛

灌頂準梵本云一切如來共所守護同灌其頂故應迴文六菩薩愛敬七得衆善根八能演深法九攝德自嚴若得此九方名護法二一切下結請可知第二爾時下偈文分二初一讚說者餘十頌上文於中亦二初一頌領前餘頌請後於中亦二前四頌所修行體後五頌行所成德於中亦二前三頌行所成德後二頌結因成果德大文第二正說分中分二先長行後偈頌前中亦二先讚問許說後正答所問前中三初讚所問利益二佛子

下讚能問具德三諦聽下誠聽許說第二正答中二先答所成行體後答行成德用前中答前十問即爲十段今初段中有五十句前二十句答前修習後三十句答今佛歡喜前修習言亦總亦別今不放逸亦通總別總則徧下十段皆由不放逸成別則屬於修習在文分二先牒前標後勤智守心不犯塵境名不放逸是修習相不守根門則名放逸涅槃云不放逸根深固難拔因不放逸一切善根皆得增長故首明之即精進三根於所斷修



防非為性對治放逸成滿一切世出世間善  
事為業二別辨中有二十句前十始修後十  
終成今初有四一總標二徵數三別列四總  
結他皆做此列中一對治破戒放逸三聚非  
一故名為眾即三德三身之因故首明也寧  
捨身命不犯小罪故名護持二離癡智顯故  
善提心淨三四可知五恐負自心故思本發  
六遠離惡緣七修善無住八離小行大寧起  
亦癩野干之心不起二乘之心難反復故九  
積善無替十亦愛亦策不令過分使不相續

若不續者當令相續故須觀察二終成十中  
一行清淨由不放逸得無違教失故名清淨  
二念智清淨念則明記智則決斷念有智故  
念即無念智有念故常得現前此二相資故  
名成就三等持清淨不沈不掉故名為等然  
此沈掉乃含多意如始學者不昏沈不惡作  
亦名為等未是深定今稱性寂然故能不掉  
智照不昧所以不沈如此深定非深非淺四  
勤聞清淨五思修清淨六等引清淨七妙慧  
清淨稱理平等故八攝受清淨等利益故如

大地者勝鬘云譬如大地負四重擔一者大海二者諸山三者草木四者衆生菩薩大地荷負四種重任者謂離善知識無聞非法衆生以人天善根而成熟之及三乘人隨機攝攝名等作利益九同行清淨單謂如彌伽讚敬善財十承事清淨單離雜心故次答令佛喜有三十句初十結前生後次十正成行相後十純熟究竟今初此即牒前十種清淨如次配屬前八可知九攝二句以菩提心佛法無邊誓願知故既敬此心及事於師故能順了上

九結前第十生後故令佛喜次十正成行相者前明即前修習故令佛喜今更別明於中一勤而不退成上精進二內不惜身正念方成三外絕異求故唯有勝進四加行觀空方能不息五正證入理故無所依六窮得法印方順深法法印多種或五或四或三或一但廣略之異耳言五印者即五非常觀謂無常苦空無我寂靜言四印者合空入於無我空即我所故或名優陀那菩薩藏經第二中名法鄔陀南鄔陀南者此名標相涅槃寂靜是

無爲法標相印即決定義如說有爲決定無常等善戒第七地持第八瑜伽四十六廣有分別言三印者四中合苦入於無常或除涅槃寂靜有爲印故今以諸印印於一切亦無能印故云不著則入唯一實相印矣後四依理起行七願護小心故增廣大八智護凡見方順佛法九自無法愛十無作而修故入無諍門矣後十純熟究竟中行修成熟故云安住初二入理行一加行離逸二正證捨相次二救生行次二隨緣行十度別修諸行總攝

後四願智行即十度後四也亦可前十如次成此十種但生熟之異耳思之第二答入菩薩所住處問文分爲三初有十法起入地行次住地觀修後明地要勝今初列中初三自分行一具資糧二成加行一度具十名大莊嚴三智契實相故不隨他後七起勝進行謂四外近良緣五內須自策六能安果用七不獸修因八雙遊定慧深心契寂利智貫達以斯二法嚴於法身故法華云佛自住大乘如其所得法定慧力莊嚴以此度衆生也九不

住法門住有二失一不契地智二不能進趣  
不住反此十善窮地體謂依一佛智方便多  
門更無異體二復次下住地觀修有十一句  
初一是總一切法門是成地之法次九爲別  
二諸地證智三修加行因四攝報等果五所  
知分齊及所化境六進德修業斷障力用七  
示百身等八分別諸願十善等法九所證法  
界皆言隨其者諸地非一故十悉善下辨成  
觀相皆自心者智與心相應故因由心學果  
是心成境由心現力用是心分位神通是心

現起分別是心決擇所得是心造詣並心外  
無得何所著耶十一如是下結觀成益三佛  
子下顯地要勝標徵釋結文並可知第三答  
大行清淨問有二十句初十是因後十是果  
今初行成出障故云清淨雖數名小異大同  
十行亦通十度第十十行所行即是十度欲勝進  
彼故此前行又下文由爲物說法自增諸度  
故復廣明所望處別互有影略前七可知八  
於惡衆生修菩薩行心不傾動是難得中義  
本願誓化故九善法行中與衆生爲清涼法

池大悲堅固普攝衆生爲舍爲歸是廣度衆  
生如橋梁義有力能故十真實行中文云此  
菩薩入三世諸佛體性與三世諸佛善根同  
等智決體同故第二菩薩旣得下由行淨因  
得勝法果一他力勝二自善勝三深定勝四  
同行勝五助道勝六眞智勝七意樂勝八觀  
慧勝九修行勝十增進勝第四答大願問有  
二十句初十起勝淨願後十勵志令滿今初  
全同初地十願一成熟衆生願二淨佛國土  
願三供養四護法五承事六同善根七攝法

上首法通至佛名如來門八三業不空九具  
修諸行十現成正覺但彼文廣依彼次者五  
七一二六八三九四十爲今之次二佛子菩  
薩下令願成滿者由斯十句能滿前十及餘  
多願於中五深心則可久六悉成則可大可  
久則菩薩之德可大則菩薩之業餘並可知  
第五佛子已下答護菩薩藏問文亦有四初  
是結前生後謂以前行願蘊積成藏故唯十  
句更無成熟等異文有五對並顯可知第六  
菩薩得是下答隨所應化常爲說法問文分

為三初結前生後謂蘊積福智用以攝生二  
佛子下微以標起三所謂下正解其義於中  
分二前知器投法二具德成益初中先知器  
有四一識習氣所作如金師之子應教數息  
等二知種性甲十因緣聞法發心為因隨因成性  
遇師聞法為緣甲十隨緣成種三知心行之病謂  
多貪等四知希望差別二貪欲下投法文有  
十句初二可知三癡有二種一迷於事理教  
觀法相二惡邪推求不信業因令其觀察十  
二因緣能離邪執自性等計上三唯對治四

等分者等謂相似三觀不可並施若等重者  
教觀勝義謂姪欲即道等等若等輕者可以生  
善為人化之釋此四分具如雜集十三五求  
人天樂為樂生死說三苦者乃至非想行苦  
所隨故次四可知十樂事寂者令成理寂若  
沈空寂令成事用菩薩已下總結隨宜二為  
說法時下明具德成益有十句十對一文連  
義正二法智無差即依法不依人依智不依  
識三審定無違即依了義經不依不了義經  
四立法義故能徧斷疑五了物根故入於佛

教六寂契真際照法性源七斷真法愛除人  
法執八念佛了音九亡言巧說雖無說無示  
善順宗因十令悟隨宜終歸平等即說之益  
第七菩薩如是下答恒不捨離諸波羅蜜問  
於中二先結前生後則正說法時便具十度  
設自修此亦為利他一向大悲了平等故通  
至佛果故皆名道二是時下正示不捨度相  
十度即為十段皆先辨相後是則下結名前  
四辨相中先辨施等相後無著等辨波羅蜜  
相檀戒可知三忍中諸惡通於內外其心下

契理平等成波羅蜜四進中普發眾業是無  
餘修亦利樂勤常修靡懈是長時修恒不退  
轉是無間修上即加行勤也勇猛莫制是勇  
捍修亦被甲勤於諸已下是顯度相五禪定  
中文有十一句一訶五欲所以訶者夫禪定  
虛凝湛猶滄海高攀聖境尚曰妄情馳想五  
塵豈當為道云何訶之色如熱金丸執之則  
燒聲如毒塗鼓聞之必死香如弊龍氣嗅之  
則病味如沸熱蜜舐之則爛傷觸如卧師子  
近之則嚙此五欲者得之無厭如火益薪亡

國敗家世世為害過於怨賊故不應著況菩薩體此即如復何所著二入次第定謂四禪四空及滅受想為九次第定下十地離世間品具明即一切門禪三安住理定寂愛味住智契不出名正思惟以見心性故亦善士相上二定體即定自性餘六定用四消滅煩惱通愛見慢等故云一切即清淨相五出生諸定如起信云得此真如三昧能生無量諸三昧門上文云一三昧生塵等定是也即難行相六引發神通謂精義入神以致用也亦遂

求相七逆順自在亦難行相從滅定出入非非想乃至初禪是名為逆從初禪出入第二禪乃至滅定是名為順此中逆順應各有超間謂超一超二乃至全超文無者略此亦名為師子遊步三昧八一多自在攝一切定應有四句謂在一入一在一入一切在一切入一在一切入一切得其源故九悉知定境定境有三一諸定所緣二諸定分齊三諸定境用皆能知之十者總結體用無違言三昧者此云等持唯局有心而通散心三摩鉢底此



云等至通於有心及與無心唯諸位定體此  
二功德名為等引上二句定體通於此三六  
句定用即是所引言智印者即一實相故智  
論釋百八三昧中第二名寶印三昧謂與實  
相般若相應故上二是定此一是智合即雙  
運今菩薩隨在一定即與一切三昧此三無  
違十一速入智地亦即定果以菩薩之定事  
窮無邊理極無際故能速至一切智地亦難  
行相亦二世樂相又上二三四即現法樂住  
禪次五引生功德禪五亦饒益有情禪後二

通三又通十種清淨一由世間淨離諸愛味  
故即第三句二出世間淨亦此句攝三加行  
淨即是初句四得根本淨即第二句五根本  
勝進淨即第五句六入住出自在清淨七捨  
靜慮已復還證入自在清淨上二即第七句  
八神通變現自在清淨即第六句九離一切  
見趣清淨十一切煩惱所知障清淨此二共  
是第四句攝餘如瑜伽四十三九大釋說十  
行之中當顯其相六般若中句亦有十前之  
三句聞法近友即聞所成慧初句正明二近

友不倦是聞慧緣三樂聞無厭是聞慧因暫聞則已慧不生故四即思慧學而後思故云隨所聽也內正作意故云如理五亦思擇慧又於無煩惱中善決擇故捨煩惱故六善觀下皆是修慧此句悟入於如七宿習思量故了無功用道八周備悟入一中一切等名爲普門九入二智門十總結已圓故云休息後三連環此中亦有九門之相恐繁不配其中雖定慧互有互相嚴故而爲門不同若全雙運故起信論合於六度以爲五門後之方便

義亦準此涉有不迷於空則名方便不厭有而觀空便稱般若豈令般若不能知有耶方便若不觀空何名方便非唯此三萬行皆爾況般若能行萬行何法而不用之寂照盡於理極不得一行無此君耳所以開則萬行森然泯則一不爲一得意則無所不通耳七方便中亦有十種一巧智現世爲方便二悲非愛見故化而無厭即悲智相導爲方便三依體起用四非捨非受故一切無染五凡聖雙行由雙非故六行無住道七觀察進趣八現

相不著九徧入諸趣即無生現生十度脫眾  
生是無化現化初九技濟餘皆迴向依瓔珞  
因果品後之四度亦各有三方便三者一進  
趣方便即第七句二巧會有無除第四句皆  
此所攝三不捨不受即第四句八願中亦有  
十願前五後三盡字為初六身恒住盡劫海  
七智盡心海八窮盡有支九盡現國土十窮  
佛果智此求菩提前九利樂若依三願二三  
四五為自行願六七為神通初及八九為外  
化十通二利皆云盡者窮彼源故九力中十

句各二謂標名釋義一契理深心是思擇力  
染則無力翻此故有也餘可準知皆修習力  
瓔珞有三皆名通力一報通力二修通力三  
變化通力觀彼似當九十二句耳十智度中  
識病知根順理授法名為智度亦有十句初  
四知病輕重次三知根欲樂一位二行三心  
後三知法樂一知理法二知果法三普覺法  
界前七成就有情後三現法樂住瓔珞三智  
一無相智即知法真實三變化智即如來力  
餘皆第二一切種智餘義如初會說第八佛

子下答前所念衆生成令得度問於中分三  
初結前起後二正明化度三結如本誓前  
中初結前清淨約離障圓滿具事理不捨謂  
常相應住大莊嚴者總結十度爲嚴是大乘  
體後隨其所念下生後由且前故二墮惡道  
下正明化度文有十句約爲四類初二令離  
惡果三塗除無間皆容發心如慈童女二令  
勤修則脫八難值佛聞法次三令離惡因貪  
有二種上偏語色貪教修不淨今通語貪財  
名等故但云示無貪法無貪法者謂不淨觀

空少欲知足二瞋亦二種上偏語能爲違害  
故令修慈今通瞋情非情故觀同體不應自  
瞋三癡亦二種已如上明此約邪癡令觀緣  
起次三令離流轉三界循環皆可歇故初欲  
恚害等義見三地二色界雖定慧似均然是  
定地恐其滯寂故爲說觀又無生正觀令得  
無漏三無色定多故爲說妙慧又示諦觀方  
得永出後二示以三乘隨機爲說又引權經  
實令知本寂三如其往昔下結如本誓故能  
真度師子吼者決定度故第九佛子下答前

結三寶種使不斷絕問文分為二初仍前總標二所以下徵釋所以由化衆生入三寶海故能紹前令不斷也文有四番為成十句前九別明後一總結就初三番釋通總別然皆後後轉深前前通者通在諸位別者初在十

成佛智謂證真如成無漏故上約別顯通者發菩提心總有三心謂即大悲大願大智初番為總已含大悲次番是願後番是智謂示妙理令暫見心性成金剛種三番法種差別相者初開法藏令教不斷次說因緣令義不斷後具四種護令教理行證皆悉不斷復次初雖領教未發真解次具解行未能證故三番僧種有何差別初受法無乖始墮僧數次修六和敬僧行已成後統理大眾令僧清淨復次初雖奉教解行未具未是真和次雖具

解行未離衆怖不能控御言六和者三業為  
三及戒見利謂身和同集口和無諍意和無  
違見和同解戒和同奉利和同均又約菩薩  
三業同慈六皆同體真實和也一切恭敬令  
僧久住後總句者弘法奉戒三學兼修則不  
斷三寶化化不絕第十菩薩如是下答前善  
根方便皆悉不空問先略後廣略中分三初  
結前生後謂由能紹三寶故所行無失二隨  
有下由不空故三業無瑕謂所作迴向是不  
空業三無瑕玷故下由無瑕故不空所作反

覆相成玉之內病曰瑕瑕謂體破外病曰玷  
玷謂色汗以顯三業內外無失故白珪之玷  
尚可磨也三業之玷不可為也初句牒前次  
所作下示無瑕相後皆與下顯不空相方便  
有慧方便不空慧有方便慧亦不空此辨所  
行不空迴向智智辨趣果不空第二菩薩如  
是下廣明有二初明自業不空後辨利他不  
空初中雖明不空義兼無失以一切清淨離  
煩惱故又此無失即自業不空順止寂故文  
有標徵釋結釋中皆先標後釋初四依正莊

第十

十五

嚴次六攝化莊嚴言涅槃地者以涅槃嚴地也謂隨有成道入涅槃處當知其地即是金剛今於一切處成則無非金剛也標云涅槃釋云成道文影略耳四菩薩成就下結文可知二若有衆生下利他不空於中有法喻合文則可知佛與菩薩俱益不空今不見者不宜見故見不益者無行力故亦遠益故上來並答所成之行問竟第二佛子菩薩摩訶薩住此下答行所成德問前文有二今亦二段第一答以行成因德二答以因成果德今初

具答十二問各有二句上句答下句上云修何滅癡今答以智他皆倣此二用慈降魔夫欲害人反招自害苟欲安人則物我俱安故柔勝剛弱勝強以慈安一切惡魔無以施害慈善根力其功叵量三福則怖之以威智則屈之以辯次四後四文並可知八以方便智慧出生是答一切菩薩已下即是所問準上文中此有七事今波羅蜜下欠總持句然方便有二若加行方便出生地度若善巧方便亦生諸度及餘五法智亦有二若根本智即

成內證若後得智即成業用是故此二出生  
此七言清淨者治彼障故二佛子下答以因  
成果問於中亦二先結因成果謂但勤修上  
來諸行則能次第從因得果二於無邊世界  
下正答所成之德謂護持正法但當勤修上  
來以行成第十因之德自當成後護持法等諸德  
故乘前結因成德明之答上十句文分九段  
第一答初總句如來法藏守護開演二佛所  
護念故則答衆魔外道無能沮壞以佛護故  
三守護受持下答攝持正法無有窮盡四於

無邊下答於一切世界中演說法時十王敬  
護謂身勝音巧令聞者入智故五知諸衆生  
下答舉世同欽稱機令喜故六其身端正下  
答菩薩愛敬端正有德故其佛灌頂在前第  
二佛護之中七善知衆心下答得善根力增  
長白法於中先總明三業後得心下別顯十  
種自在皆是善根其十自在之能並是增長  
白法八菩薩如是下答開演如來甚深法藏  
九佛子菩薩得如是下答攝持正法以自莊  
嚴於中初明自嚴次徵後釋以攝正法故有



十句德亦即是前所成之德可思準之第二  
重頌分十頌分二初六偈頌前十種所成行  
體後四偈頌行所成德前中初二偈頌佛喜  
於中初半頌不放逸餘頌佛喜二有一頌頌  
入地及大行大願三一頌頌菩薩藏及所應  
化而為說法四一頌頌不捨自行諸度及所  
念衆生皆令得度五半頌頌不斷三寶六半  
頌頌善根方便皆悉不空二菩薩所修下頌  
行所成德初一頌初行所成因德後有三偈  
頌以因成果德於中初二頌通頌前之八段

後一頌別頌第九答攝持正法以自莊嚴以  
喻而顯一身儀安諦頌前現身次辨德威猛  
頌前以無畏辯三心定不動頌安其怯弱四  
智深如海頌以深智慧五法兩滅障頌前而  
為說法第三時法慧下明結說分謂契理合  
機故佛喜衆奉也第三會竟

大方廣佛華嚴經疏卷第二十

永樂北藏

大方廣佛華嚴經疏

第一六九册

音釋

闇烏紺切 掉徒弔切 滄澄音 弊毗祭切 竅  
許救切 與暗同 鼻搖也 玷也 玷瑕也 都何加切  
檻氣曰歟 齒倪結切 也也 切

大方廣佛華嚴經疏卷第二十一 最一

唐清涼山大華嚴寺沙門 澄觀撰

升夜摩天宮品第十九

第十經自下第三中賢十行會初來意者酬前十行問故匪知之艱行之為艱前解此行若膏明相賴目足更資故次來也次品來者此會四品分三初二品當會由致次一品當會正宗後一品勝進趣後於由致中後品明讚德顯體此品先明感應道交前會已終將陳後說故次來也二釋名者會名有三一約處名

夜摩天宮會夜摩此云時分即空居之首表十行涉有化物宜適其時時而後言聞者悅伏時而後動見者敬從涉有依空即事入玄託此而說約人名功德林約法名十行會並如後釋三皆依主次品名者大同於會然梵本中上無升字下有神變譯者以升為神變升為神變略有四義一不離前三而升此故二升一處即升一切處故三升已廣其處故四前後同時無障礙故謂佛以圓徧之身不起而升時分天宮升屬如來夜摩約處相違

釋也前升須彌後升兜率準此可知三宗趣者會品之宗並如名說意趣可知四釋文者一品長分為十第一本會圓徧謂前會不散而說後會故初句徧因十方下徧相亦有主伴等並如上說但處加須彌則而演說法通上三會第二爾時世尊下不離而升第三時夜摩下天王見佛並如前會第四即以下各嚴殿座初一句總依空起行故云化作無著導行故曰蓮華一行舍多所以稱藏餘如上說百萬已下別顯嚴相於中四初明座體備

德嚴皆云百萬位漸增故次百萬夜摩下明座旁圍繞嚴三從百萬下法門行德嚴文有八句攝為四對一因緣二福智深心契理故三願行四體用無生法體之所起故四末後一句法教流通嚴第五時彼下請佛居殿第六時佛下如來受請第七爾時下各念昔因然晉經亦有樂音止息今略無者譯人之意謂不如十解會事歸理不云樂音止息不及迴向事理無礙不云熾然退可同前進可齊後故並略之第八偈讚十佛此十佛是前會

十佛之前如次十佛明位漸高念昔亦遠理實三世諸佛皆同此說餘如前會文亦有二先明此界後辨結通前中十偈亦各有四初句標名讚別德次句通顯具吉祥三憶曾入此殿四結處成勝極亦初一句諸頌不同初二字別名次二字通號下三字別德亦皆以下別德釋上別名一以聞十方釋成名稱二以世間燈釋寶王義珠有夜光可代燈者為寶中王佛有智光照無明夜故曰寶王三四五六義並可知七以世燈釋勝天者身智光

照勝於天故八以論雄釋無去者具勇智辯不可動故九十可知又此中殿各舉別名初一嚴體下皆寶之別德謂此寶清淨以用莊嚴殊勝無垢此寶發香是香必妙能嚴之寶無所不見可謂普眼如是嚴者是善莊嚴無處不嚴名普嚴也又善嚴者善因生故第九爾時世尊入下佛同升殿第十此殿下處忽寬容並如前會夜摩宮中偈讚品第二十初來意者助化讚揚故說行體性故行所依

故然三天偈讚來意宗趣大旨是同但解行願以為異耳釋名宗趣亦不異前約處約行少有別耳四釋文者文亦有三一集衆二放光三偈讚初中有十一明集因亦即各隨其類為現神通也二十方下主菩薩三一一下眷屬數四從十萬下來處分量然顯數隨位增信十住百迴向是萬此合當千而云十萬或譯人之誤或是十百則傳寫之誤五其名下列菩薩字同名林者表十行建立故行類廣多故聚集顯發故深密無間故扶踈庇暎

故此十菩薩表行之體也可以意消息之六此諸菩薩下來處刹名同名慧者十解之慧行所依故七此諸菩薩各於下明所事諸佛同名眼者以智導行了了分明成有目之足故斯即十行當位之果佛於此位顯者皆名報故宜以當界之佛與當界菩薩共相屬對想而釋之八是諸下至已設敬九隨所下參而不雜十如此下結通無盡第二爾時下放光足上謂跌背行必動故背依輪指得有用故表行依信解而成用故餘同前會第三爾

時功德林下明說偈讚十菩薩說即爲十段亦以東方爲始上方爲終各有說偈所依謂承佛力等今初菩薩且就能說積行在躬功德圓滿故名功德若就所歎歎佛勝德故云功德林有十二頌以是會主總叙此會普徧之事於中二初八述讚奇特後四舉德釋成一依一前中四初一偈叙此品放光次二叙前品感應次三叙此品衆集後二明自在普周後四舉德釋成中二前二舉因顯用後二辨果用深廣於中一體用自在上半不去徧至下半

卷舒相盡謂一身即多則一相不可得多即是一則多相不可得是故恒一恒多恒非一多由此自在一塵內身無不周于十方徧十方身並潛一塵之內皆悉圓徧非分徧故難思議也後一深廣相成上半牒廣辨深下半釋深顯廣謂不住故無處不至不去故不離本位此釋深也塵毛等處無不普入廣無邊也第二上明功德此辨智慧悟此除冥難遇之慧故名慧林偈中歎此十頌分三初一明佛難遇次六別釋難遇於中亦三初二益廣

難遇次一因圓難遇後三果深難遇三有三  
偈校量顯勝於中初一長時大行校量次一  
長時供佛校量後一勝物供佛校量第三勝  
林悟勝義甚深之法故偈歎深廣無涯之德  
十頌分二初三明佛德廣博後七顯法體甚  
深橫豎互顯前中初二喻況後一法合喻言  
孟夏月者取意譯也梵本敵對翻云後熱月  
西域如來聖教一歲立為三際謂熱兩寒西  
域記云從正月十六日至五月十五日為熱  
時則後熱月言兼得此方孟夏後半餘之二

際各有四月準釋可知赫日之言但取陽光  
時長難窮其際耳彼方或為四時與此名同  
但以正月黑半為首耳不見此文妄為異解  
後七中令於依他修三無性觀以餘之二性  
不離依他故由於二性成依他故謂圓成是  
依他體性徧計但橫執依他又迷真似現故  
即依三性說三無性三性尚一豈有三無三  
無但是即有之無三性但是即無之有有無  
不二為一實性有無形奪性亦非性故於一  
依他中具修諸觀文即分三初三作生無自



性性觀次二兼修勝義無自性性觀後二修相無自性性觀今初即分爲三初偈正觀無生初句果空謂緣生果法非先有體從世性微塵及未來藏因緣心識中來若有來處即先已有如鳥來棲樹何得言生次句因空既無有果對何說因又世性等亦是妄計因緣有故次句雙遣所從是因所生是果又初句不自生次句不他生次句不共生又初句非先有而生次句非先無而生次句非未有半無三義各以末句息妄成觀次偈以無生釋

無滅略有三義一無生可滅故二無待對故三例生從緣故後偈觀成利益經云無生即是佛故論云若見因緣法則爲能見佛依他因緣即無生故次二偈約依他兼修勝義無自性性觀中前偈遣所觀上半辨觀下半明益各含二義故致兼言一者成前謂非唯能相之生生即無生所生法體從緣無性即無所有此顯依他無生是圓成性益云深者即事而真故二云無生真性亦無所有即彼勝義無自性性益云深者真性不立故後偈遣

能觀然有二義一或前所觀謂以無性故無有能了如無有人能了龜毛長短大小知無所了是究竟了二是正遣能了既無所了亦無能了能所兩亡為究竟解後二偈明相無自性性觀中初偈正明後偈總結前中上半顯執不了國等依他謂為現見妄計為生故晉經云所言有生者當知由所生下半明觀若知無性則離徧計故後偈總結稱於事理之實以觀世等故善說也第四以信樂力聞深不畏名無畏林偈歎信向益深德故十頌

分二初一所信之境謂法身體即法界智身證極法界致令應用之身不動而徧後九聞信之益分五初一聞信離惡次二辨其難聞次三明聞信成佛將過去已成證現未當成四有一偈明聞必有由勵物起願五有二頌顯起行益第五拒妄崇真拒迷崇智七名為慙愧林偈讚如來大智勝益十頌分三初三法說難思次六以喻並決後一結德歸佛今初初偈明聞生勝益令物希聞自在法者即佛智也次偈佛窮種智故下位難思後偈顯智

從生此文反顯然有二意一者成前謂欲生智慧當於佛求佛無不知故不應求之於凡凡暗冥故猶舉芙蓉必於深水而於木末安可得耶二者成後智從熏習自種而生不從煩惱無智所生是故下言二心不同時屬自愚智故故應慎所習也若爾何以經言煩惱泥中有佛法矣此說在纏如來藏故然此大智從藏德生非從迷起若爾煩惱即菩提復云何通約體性故從所迷故如波與濕然實義者真妄愚智若約相成二門峙立若約相

奪二相寂然雙照二門非即非離若說一者離之令異如此章中若云異者合之令同如後章是善須得意勿滯於言若準晉經云非從智慧生亦非無智生了達一切法滅除世間闇則顯智體絕於愚智不稱實了則名無智此偈雙明性相後喻但顯二相不同二並泐中二先五明二性相違後一辨功能不等今初唯第二偈三句是喻餘偈喻合各有半偈一約色非色者非色謂心緣慮質礙體性不同故二中有二喻相無相者理事相反生

死涅槃真妄相反雖同一體分別義門不相  
是故三成之與壞約相別故四初心後心時  
不同故五諸識身所用別故緣會不同故眼  
無耳用又此眼識不合餘根識身同識尚不  
相合愚智性異安得相生二功能不等者非  
唯二性各別然智能滅愚愚不滅智樂能去  
毒毒不去藥亦猶明能滅闇闇不滅明三一  
偈結歸如來迥出世表故難值遇第六勤觀  
理事同無差別離身心相故名精進十頌總  
相顯佛此德前即無差之差此乃差之無差

二章相接顯非即離亦互相成十頌分二初  
一約法雙標後九就喻雙釋合初也初句標  
其所知五類之法皆無有差餘三句對人以  
顯次句揀非餘境下半唯佛究盡後九釋中  
前五釋所知後四釋能知前中初四正釋後  
一遣疑前中皆上半喻下半法無差所由在  
於末句然其能喻不離諸法取其所易喻其  
所難耳一體色無別喻此喻為總喻雖是一  
法合有二該橫豎故豎約理事交徹法者事  
也非法理也色即空故亦可法真法也非法

妄法也取文雖異義旨乃同謂如金之黃色與金體斤兩性無差別隨取互收合中金是所依喻其真法色是能依喻妄非法以妄無體攬真而起則真無不隱唯妄現也以真體實妄無不盡唯真現也是則無體之妄不異體實之真故云無有異也亦同密嚴如金與指環展轉無差別橫者異法相望法者可軌之法也非法者不可軌之法也又法謂有法非法謂無故中論釋法不生非法云有不生無故體性無異者謂同如故然前義正順於

喻後義乃順標中諸法之言要由初義性相無差方得顯於後義事事無差若但用後義未顯相全同性那得顯於事事同於一性第二偈假名不實喻以真奪俗是故無差攬緣成衆生即虛非衆生所遣既無能遣安有故俱無實以喻諸法皆無實義並從緣故若以正報爲衆生依報非衆生乃全是所喻非實之相尚難顯了三三世互無喻喻無相故無別謂若未來有過去者應名過去何名未來故知定無過現之相文舉一隅應反餘二諸

法無相如彼互無此以差別喻無差別四四相非實喻喻無性故無差別生等四相離所相法無別自性一切諸法離所依理無別自性此以相無喻於性無後遣疑者疑云若都無別云何見有性相等殊故此釋云亦如涅槃體離有無百非斯絕而強立名字曰餘無餘諸法亦然真俗並虛分別成異若離分別則無一切境界之相第二四偈喻能知者皆展轉遣疑初偈疑云既有分別則有能知故釋云離所數物無能數數既所知無性何有

能知無知之知是真了法次復疑云若依向喻能數喻能知能知雖無所知猶有故復用能數法以喻所知智慧差別以喻能知反覆相遣顯無差理謂一上加一名之為二乃至百千皆是諸一由能數智作百千解故晉譯中第三句云皆悉是本數今譯明一多相待故無體性喻彼妄想於無性中計為有無耳次又疑云都無能所何名佛智故釋云能所雙亡佛智斯顯故所知妄法如世成壞能知真智湛若虛空尚不初成況當有敗如出現

品又權智照俗同世成壞權即是實如不離  
空末偈疑云佛智既等應用何殊釋云隨心  
妄取佛無異相又謂常無常如各取空佛智  
雙非如空無別第七智了三種世間性相諸  
邊不動故名力林十頌顯佛離相真智於中  
分三初四徧明世間次五變遣世及出世後  
一觀成利益今初略有二觀初二偈攝末歸  
本觀顯衆生世間空後二緣生無作觀兼顯  
器世間空今初也初二句推假名衆生不出  
三世顯是無常次二句推三世衆生不出於

蘊顯無有我次句蘊由業生以明果空顯非  
邪因次句推業唯心明心外無法次句體心  
如幻不離性空及與中道如幻無性故非有  
非無故末句以本例末則上五一如皆展轉  
緣生故二緣生無作觀中初偈無作故緣成  
後偈緣成即無作最今初言不自他上作者通遣  
諸非一約外道非自性等作亦非梵天等他  
作但以虛妄無業報故廣如三論破二約小  
乘非同類因自作亦非異熟因他作以皆相  
待無自性故三約因緣相待如十地論及對

法所明四約以因望果中論云自作及他作  
共作無因作如是說諸苦於果則不然此自  
他言舍於二意一以果爲自以因爲他論云  
果法不能自作已體故二以因爲自以緣爲  
他此明不從因緣無果待對故離既不合成  
亦不成故論云若彼此共成應有共作若彼  
此尚無作何況無因作彼此即自他也下半  
二意一不礙緣成以遣無因二非但不礙幻  
有亦由有空義故能成因果是則不動實際  
建立諸法又非但說於苦四種義不成一切

外萬物四義皆不成成壞之言顯兼器界後  
偈緣成即無作者向約幻有雖言成壞幻有  
即空故不應說是則不壞假名而說實相第  
二五頌變遣中初半偈假徵次半標答次偈  
出體釋成蘊是世間緣成寂滅即出世間故  
淨名經云世間性空即是出世間一體說二  
故云假名次二句徵蘊名體世以蘊爲體蘊  
以何爲體次二句標答上句答體下句答名  
應名無生五蘊既云性不可滅則顯前非事  
滅次一偈釋成空故不滅亦非事在不滅則



知本自不生是無生義後一偈例出世間顯  
智正覺世間亦應緣無性又證無性之理爲  
自體故末後一偈明觀益者佛以實法爲其  
體故見法則常見佛也第八照理觀佛而起  
正修故名行林十頌觀佛體相普周德於中  
分二前七約喻顯修後三見實成益前中復  
二初二地種無性普周喻佛無生徧應德  
後五業相無依成事喻佛難思現用德於  
中二三偈喻二偈合前中初一明業果互依  
次偈明相依無性業不離生故業性空因業

有生故生無來處後偈雙結難思顯成真觀  
若逆推其本業復有因卒至無住無住無本  
故無所見無見之見方了業空二頌合中初  
偈難思普應合上業果互依次二句以互不  
相是合互依無性身若是佛轉輪王等即是  
如來佛若是身正覺之心應同色相後二句  
結示真體唯如唯智合第三偈難思達本二  
有三偈明見實中初頌見佛即了法以見佛  
稱性不疑同體故次偈見法即見佛了法即  
性淨知佛不住性相故後偈明了正修行照

了無相心寂分別寂照雙流故名正念則從  
 佛法生是法王子故又上三偈初知離名為  
 法次知法名為佛後知無名為僧窮見三寶  
 之實體也第九照心本末名為覺林十頌顯  
 於具分唯識大分為二前五約喻顯法後五  
 法合成觀前中二前二約事後三約心乍觀  
 此喻似前喻所作後喻能作細尋喻意前喻  
 却親故喻真妄依持後喻心境依持然依生  
 滅八識但有心境依持而即如來藏心故有  
 真妄依持以會緣入實差別相盡唯真如門

即前喻所顯攝境從心不壞相故是生滅門  
 即後喻所明存壞不二唯一緣起二門無礙  
 唯是一心故下合中但明心造欲分義別喻  
 顯二門是名具分唯識今初二偈真妄依持  
 即真如門攝一切法也初偈初句總喻一心  
 次句喻隨緣熏變成依他也次句不了依他  
 故成徧計第四句喻依他相盡體即圓成後  
 偈喻依圓真妄非即離義上半不即能所異  
 故大種中無色身所觸故色中無大種眼所  
 見故又能造無異畫色差別故喻妄依真能

所異故性無差別相不同故下半不離義謂所造青等離能造地等無別體故假必依實同聚現故喻妄必依真性相交徹故然大必能造色非色能造大喻妄必依真起真不依妄生故不云也然不離於色有大種可得後

三約心者喻於唯識心生滅門於中初一亦明心境不即離義上半不即心中無彩畫不可見故彩畫中無心無慮知故喻能變所變見相別故下半不離隨心安布故喻離心則無境界相故要由心變於境非是境能變心故云唯識不

言唯境但云然不離於心有彩畫可得不言然不離於畫而有心得次一偈喻能所變之行相明畫師巧思不住變態多端所畫非心誰相知者法合彼心者真妄和合心也恒言遮斷不住遮常如瀑流故舍一切種故云十四無量相甚深細名難思議次句頓現萬境下句喻所變境離心無體又常不住者無住為本故無量難思總標深廣下二句釋示現一切廣故難思各不相知深故難思三一偈重喻上來不相知義謂非唯所畫之法自不相

知喻所變之境無有體性能畫之心念念生滅自不相知故亦不能知於所畫雙喻心境皆無自性各不相知故言不能知自心而由心故畫又雖不知畫心而由心能畫喻衆生雖迷心現量而心變於境又由不能知所畫但畫於自心故能成所畫喻衆生由迷境唯心方能現妄境又喻正由無性方成萬境故云諸法性如是第二五偈合中分四初一偈合初二句初句合最初句心者即總相之心也下三句合第二句諸世間者即諸彩色此

句爲總下出諸相即蘊界處故云無法不造故晉譯云造種種五蘊正法念云心如畫師手畫出五彩黑青赤黃白及白白故上文云布諸彩色畫手譬心六色如次喻地獄鬼畜脩羅人天若言種種則十法界五蘊等法皆心所造次二頌合前初偈下半於中二初一舉例以合由成前諸言謂如世五蘊從心而造諸佛五蘊亦然如佛五蘊餘一切衆生亦然皆從心造然心是總相悟之名佛成淨緣起迷作衆生成染緣起緣起雖有染淨心體

不殊佛果契心同真無盡妄法有極故不言  
之若依舊譯云心佛與衆生是三無差別則  
三皆無盡無盡即是無別之相應云心佛與  
衆生體性皆無盡以妄體本真故亦無盡是  
以如來不斷性惡亦猶闡提不斷性善又上  
三各有二義總心二義者一染二淨佛二義  
者一應機隨染二平等違染衆生二者一隨  
流背佛二機熟感佛各以初義成順流無差  
各以後義爲反流無差則無差之言合盡無  
盡又三中二義各全體相收此三無差成一

緣起上約橫論若約一人心即總相佛即本  
覺衆生即不覺乃本覺隨緣而成此二爲生  
滅門下半此二體性無盡即真如門隨緣不  
失自真性故正合前文大種無差若謂心佛  
衆生三有異者即是虛妄取異色也後一偈  
反勢合謂妄取異色則不知心行若知心行  
普造世間則無虛妄便了真實即正合大種  
無差兼明觀益三一偈有二義一雙合前真  
妄心境不即離義上半合前二三偈之上半  
即前互無不即之義心即能變及心體故身

即所變謂有根身是識相分及性之相故下半雙合前兩偈下半不離之義謂雖不相住而依心現境依體起用作諸佛事體用不礙為未曾有二又將合前第四偈謂上半合前恒不住義及各不相知而能作佛事合示現一切色自在未曾有合無量難思議為兼此且義不以互無言之而言不住譯之妙也晉經但云心亦非是身但得前文互無之義末後一偈結勸即反合前畫師不知心喻若不知心常畫妄境觀唯心造則了真佛上半有機

下半示觀然有二釋一云若欲了佛者應觀法界性上一切差別皆唯心作以見法即見佛故二觀法界性是真如門觀唯心造即生滅門是雙結也又一是真如實觀一是唯心識觀大乘觀要不出此二觀此二門唯是一心皆各總攝一切法盡二諦雙融無礙一味三世諸佛證此為體故欲知彼者應當觀此既為妙極是以暫持能破地獄第十鑒達諸佛迥超色聲心言路絕故云智林頌顯此德十頌分二初一標章後九解釋今初若準晉

本第四句云所思不可思則四句皆標章今  
經則上三句標章第四句總結謂標章遮過  
今不依識明佛三業非凡境故第四總結顯  
德示智入門謂若了唯一真心言思斯絕則  
合菩提之體故梵本第四句云於不思何思  
即是以一真心而成三業三業不離一真形  
奪相融不可以一多思也又非唯佛之三業  
同一真心亦與觀者真心非異非一故難思  
議若能離於思議則終日見聞亦無所見聞  
矣後九別釋中即分三別初二釋不可取次

四釋不可見後三釋不可聞今初也初半偈  
奪以正釋後一偈半縱以生過然有量等實  
通三業為對下二且就智明有如理智不可  
言量有如量智不可言無又一智即是一切  
智故眾智所用不相雜故後縱中初半縱其  
令取必無果利後一偈顯取之失夫說法者  
當如法說法無所得而欲取得心計有說執  
石為寶是謂自欺理無謂有是為自誑終不  
契理故云已事不成汗他心識故不令眾喜  
又以量無量取則墮斷常自損損他故皆不

可第二有四偈歎佛色身深奧釋不可見章  
文分爲二初一法說後三喻況今初非色現  
色故稱爲妙物感斯現是曰無邊又色即空  
故邊即無邊又淨識所現空色相融故身分  
總別乃至一毛皆無邊量攝德無盡具上三  
義豈可以盡言次三喻中分二初一摩尼隨  
映喻喻佛地實無異色隨感便現故言無色  
而現色喻全似法故但合云佛亦如是後二  
偈淨空現色喻喻佛法身體非是色能現麤  
妙一切諸色初偈喻後偈合四句對前但二

三前却此是分喻故委合之以空但不可眼  
見而可心知佛所現色心行處絕故爲分喻  
心眼尚不能見況肉眼哉此即見中絕思議  
也問二喻豈不違經上云有無邊妙色今云  
非色無色耶亦違諸論佛有妙色爲增上緣  
古德云若約初教大乘義如前說若實教大  
乘佛地無此色聲麤相功德但有<sup>異</sup>大智大悲  
大定大願諸功德等然諸功德等並同證真  
如若衆生機感即現色無盡既無不應機時  
故所現色亦無斷絕此以隨他爲自更無別他



自約此為有故云無邊妙色今約自說不約隨他故云無色非色也亦可前喻初教後喻實教有云若爾彼能現體為有無耶十蓮華藏塵數之相皆示現耶八地七勸言佛色聲皆無有量寧不違耶若執佛果唯有如如及如如智獨存者無漏蘊界窮未來際徧因陀羅網皆非實事亦違涅槃滅無常色而獲常色此義具如智慧莊嚴經說然上二解各是一理並符經論今當會之攝末從本唯如如智自受用色智所現故攝相從性但有如如既所

現即如何妨妙色故有亦無失然如外無法何要須現萬法即如如即法身更何所現故云唯如如及如如智獨存於理未失如色相即有無交徹若定執有無恐傷聖旨故今二喻前後相成摩尼現色採一但云無色無即但是無他非無自體淨空現色十九既云非色非即非其自體不獨無他前喻自受用身後喻法身此二不二為佛真身故下經云佛以法為身清淨如虛空所現衆色形今入此法中第三三偈釋所聞不可咀中初約應聲緣感便應

離相離性故聲非如來應不差機非聲之聲  
故云不離故以聲取是行邪道若離聲取未  
免斷無次頌約體釋湛然不遷心離分別尚  
非心見安可耳聞猶如天鼓無心出故此即  
聞中不思議也後偈釋疑疑云為是有法不  
可聞耶為是無法無可說耶上半順理後句  
答次疑云若爾何以現聞教法下半釋云但  
自心變非佛說也若依權教此約有影無本  
然本影相望通有四句若依此宗果海離言  
故無有說用隨機現謂如是說而此本質亦

是自心餘如懸談中說

大方廣佛華嚴經疏卷第二十一

大方廣佛華嚴經疏卷第二十二 最二

唐清涼山大華嚴寺沙門 澄觀撰

十行品第二十一 從第十九經半盡第二十一經

來意有二一前序此正故二前辨所依佛智此辨能依之行故二釋名者隨緣順理造修名行數越塵沙寄圓辨十仁王名為十止就三學中定心增故梵網名為長養長道根故若具梵本應云功德華聚菩薩說十行品則兼能說人今文略耳宗趣可知四釋文者此品不同前二有行德者以行為主故略無之

又行德已純熟進趣中收故唯一品義當行中之解品有七分一三昧分二加分三起分四本分五說分六現證分七重頌分今初三昧分功德林入者為眾首故表說十行眾德建立故承佛神力是入定因入菩薩善思惟者顯定別名揀因異果故名菩薩巧順事理揀擇無礙無心成事名善思惟二入是已下明加分有三初總辨作加因緣二辨加所為三正顯加相初中四一總標加因二十方下加緣顯現三告功德林下讚有加因四善男

子下雙顯加定因緣於中二初別顯所因二  
 令汝入下結因所屬今初亦有四因一伴佛  
 同加準十住會即是神力加也二主佛宿願  
 三主佛現威四大眾機感略無助化善根或  
 是諸字中攝故餘義具於前會二為增長下辨  
 加所為有十一句前十別明後所謂下一句  
 總結乃至起分皆同前會但住行之殊第三  
 善男子下正辨加相中三初語業加命其說  
 故二是時諸佛下意業加與智慧故有別顯  
 徵釋別顯中初總餘別別中一捷辯二無斷

辯三無師智前後二會並無此智即是本覺  
 之智了因自得悟不由師假佛緣顯故得云  
 與及無癡智並是迅辯四應辯五無謬錯辯  
 六豐義味辯七一切世間最上妙辯八總策  
 前七九此七無勝三爾時下身業加增威力  
 故第三時功德林下起分可知第四告諸下  
 本分文二初行體後行相前中若約所依即  
 前善思三昧為體若約所觀即二諦雙融若  
 約能觀悲智無礙今從教相即下四行為體  
 若約十行別體即以十波羅蜜為體義見初

會今就教相中若直就經文六分爲二初標顯二何以下徵釋初中先標行體難思行即深心所修行海也與法界下顯難思之相深等法界廣齊虛空故心言罔及也又超下位名不思議又即理之事行同事法界之無量等虛空之無邊即事之理行同理法界之寂寥等虛空之絕相此二俱非言之表詮心之顯詮故難思議況二交徹能令一行攝一切行一位攝一切位純雜無礙故第十行云入因陀羅網法界成就如來無礙解脫人中雄

猛大師子吼乃至到一切法實相源底故又若唯遮者則凡聖絕分故非但遮常心言亦應融常心言是則於中思議不可盡也遮融無二則思與非思體俱寂滅方曰真不思議從徵釋中何以因人之行使三思耶釋云同佛果故佛窮事行之邊極理行之際斷一切障證一切理因圓果滿融無障礙菩薩同彼寧可思議若取論勢菩薩行爲總句餘皆是別不可思議即真實行也彼約地前不見此約凡愚叵思亦名真實行布位中無真如觀

故無觀相行二與法界等即是勝行亦是佛  
本故三與虛空等即因行也是無常因亦未  
得地智缺常果因也四學三世佛而修行者  
是不怯弱行未能順理真實救護故無大行  
餘同前會第二佛子何等下辨行相文分爲  
三初總徵其名二佛子下標數顯勝故云三  
世諸佛同說三何等下徵數列名先徵次列  
後結列中然與本業名雖小異而義意大同  
一施悅自他故名歡喜約三施說在因皆悅  
故下經云爲令衆生生歡喜故若就果說時

獲富饒無畏身心安泰法施當獲法喜皆歡  
喜義此約隨相本業云始入法空不爲外道  
邪論所倒入正位故名歡喜行此約離相二  
三聚淨戒亦益自他故名饒益或以後攝前  
本業云得常化一切衆生法皆利衆生故此  
唯據利他三忍順物理名無違逆彼云得實  
法忍無我我所名無瞋恨此約以後攝初晉  
云無恚恨亦是以初攝後而實二忍順物法  
忍順理以後遵前皆順事理四勤無怠退名  
無屈撓亦通三勤彼云常住功德現化衆生

故名無盡謂若有息退斯則有盡而攝論三  
精進中三名無弱無退無喜足則是以後攝  
初五以慧資定離沉掉故名無癡亂彼云命  
終之時無明之鬼不亂不濁住正念故名離  
癡亂此但從一義故下經云於死此生彼心  
無癡亂六慧能顯發三諦之理般若現前故  
名善現彼云生生常在佛國中生此但據得  
報謂即空照有而能現生七不滯事理故名  
無著彼云於我無我乃至一切法空故此即涉  
有不迷於空謂於我而無有我也若於我無

我皆不著者則雙不滯也以有不捨不受方  
便智故八大願可尊故又成大行願乃能得故  
故名難得彼云三世佛法中常敬順故名尊  
重行彼約修心此約難勝九善巧說法名善  
法行彼經云說法授人動成物則故同於九  
地法師位故十言行不虛故名真實又稱二  
諦故故彼經云二諦非如非相非非相故名  
真實然上約十度釋名度各有三並見初會  
第五佛子何等為下說分十行則為十段一  
一各三謂一徵名二釋相三結名今初歡喜

行即是檀度初徵名中已如前釋第二佛子  
此菩薩下釋相分二先略辨體相後修此行  
時下廣顯名相今初瑜伽菩薩地菩薩六度  
各有九門一者自性謂出行體二者一切謂  
能具行三者難行謂就中別顯四者一切門  
謂行差別五者善士謂作饒益六者一切種  
謂偏攝聖教七者遂求謂隨所須八者與二  
世樂謂於現在作大饒益令得未來廣大安  
樂九者清淨謂勝離相成波羅蜜今文分三  
以攝於九一總標施主二其心下離所不應

三但為下彰其意樂今初合攝前四及與六  
七謂一者施主惠施顯施自性惠有二義一  
惠即是施二謂巧惠籌量可不凡所有物悉  
能施者攝餘五門謂一若內若外二若難若  
易三財法無畏四一切種門五隨求與故二  
離所不應即清淨施文有五句以攝十義心  
平等者略有四義一無執取離妄見故二不  
積聚施觀漸與頓皆平等故三不高舉但行  
謙下不與他競離憍慢故四無向背不朋黨  
故言無有悔恪者此有三義一不退弱施已



無悔故二不下劣勝物無恪故三不留滯速  
與無恪故言不望果報者不求異熟果故不  
求名稱者無所依故不貪利養者不望報恩  
故三彰其意樂中有十二句攝上二門謂前  
十一句明善士施此有五相一但為救護者  
不損惱故二攝受者自手授與故三饒益者  
應其時故上三下益次有八句明其上攀不  
出二意一淨信故二恭敬故八中一創起習  
學二憶持不忘三愛樂不捨四淨治其障五  
更修增廣六住持不斷七令不隱沒八演以

示人後令諸眾生離苦得樂結歸慈悲即二  
世樂上但為之言流下諸句又上救護是無  
畏施攝受是財饒益是法第二廣顯名相中  
廣前一切施也亦具諸施恐繁不配文中二  
先現行財施後願行法施財中復二一隨相  
二離相前中亦二一明施行二迴向行前中  
亦二初願受勝生行施二示異類身行施前  
中依無著論有六意樂一方便二歡喜三恩  
德四廣大五善好六清淨下並具之於中文  
四一願具施緣即方便意樂先作意故亦即

廣前爲大施主二假使下難求能求三爾時  
菩薩下明難捨能捨舉難況易即便施者無  
留滯也四如是下明一切無違有三意樂初  
即廣大意樂能廣行故二但更下即歡喜意  
樂也三作如是念下恩德意樂也我今應下  
是隨順心第二又作下明示異類身而行布  
施迴現施善未來受身以悲深故亦廣大心  
也第二以此下迴向行初自期大果亦廣大  
意樂也後願施田亦得二果是善好意樂第  
二菩薩如是下明離相施即清淨意樂也隨

相離相行必同時言不並彰故分前後應將  
離相別別貫前如大般若不欲繁文故併居  
一處前後體勢類此可知文分爲三初人空  
觀次法空觀後二觀之益即成彼岸智今初  
也如是利益衆生者牒前事行欲顯正利益  
時即無我想等故所無之法略有十句我謂  
主宰諸蘊假者也故智論三十五云於五蘊中  
我我所心起故瑜伽大同此說此句爲總但  
是一我隨事立下別名然由迷緣生實性計  
有即蘊異蘊之我旣了性空迷想斯寂故云

無也若別別觀無之所以如十定品第二定辨二衆生者智論云五蘊和合中生故瑜伽名爲有情謂諸賢聖如實了知唯有此法更無餘故三有想者智論瑜伽俱名生者謂計有我人能起衆事如父生子故有即所起諸趣生也四命者謂命根成就故瑜伽云壽命和合現存活故五種種者智論名爲衆數謂陰界入等諸因緣是衆數法故新譯名異生能受異趣生故六補特伽羅者此云數取趣瑜伽云計有我人數數往取諸趣無厭故此

永樂北藏

大方廣佛華嚴經疏

第一六九册

名依一聲中呼一人若依多聲中呼多人即云補特伽羅七人者有靈於土木之稱智論云行人法故大般若名士夫瑜伽釋云能作一切士夫用故八摩訶婆此云儒童謂計有我人爲少年有學之者此名依一聲中但呼一人若呼多人多聲中呼應云摩訶婆嚩迦也九作者者作諸業故智論云手足能有所作故十受者者智論云計後世受罪福果報故大般若第三四大品第二及金剛般若中說數有增減名或小異大意不殊迴向十定

準斯會釋二但觀下明法空觀菩薩既了法  
空安有我耶故上云人空非如二乘人空法  
有故此直云但觀法界空等法界衆生界總  
舉所觀法體不出此二菩薩了之究竟無差  
橫則無邊等虛空故豎則無際離始終故空  
法者此二皆空也空亦總句何以知空但有  
名字無實所有故無何所有一外無自共之  
相狀二內無有爲無爲之體性三無所住之  
處所謂不在內外中間有中住故四無二法  
之相依有去不留空故五無造作之功用故

無所有無所有故空空故衆生界即法界也  
第三作是下觀益九句皆云不見者窮於法  
性到彼岸故初三即是三輪福田者施所生  
也業約成因而招當果剋獲爲果酬因曰報  
習因習續於前習果剋獲爲後習因習果通  
名爲因能牽後報此報酬因此則果通現得  
又報謂有漏果謂無漏同是當果漏無漏殊  
小施小果大施大果第二願行法施文分爲  
二初觀悲境爲起願由二我當盡學下起願  
利益不壞法性是堅固因安隱快樂是堅固

果第二饒益行釋相之中先略後廣皆顯三聚舍於九戒今初略中文三初明持相次彰離過後顯持意今初初句為總總該三聚即戒自性於色聲下別釋淨義意地無著是真律義亦為生說即饒益有情戒也二不求下彰其離過亦是於果無依顯清淨義九三但堅持下顯持戒意初句為總盡壽堅持作如是下以誓自要成上堅相謂一切利養恭敬他論本隨煩惱不能伏故一切惡止得佛正法是真善行纏謂八纏即無慙無愧掉舉惡作

昏睡慳嫉初二障戒正障律儀次二障止次二障觀後二障捨即障善法饒益於相修中纏繞身心所以偏說或說十纏謂加忿覆於被舉時為重障故此即隨惑縛謂四縛即貪欲瞋恚戒取我見貪利不遂熱惱生瞋梵行命難則生毀謗謗則戒取我則濁亂不毀不持方為平等第三佛子菩薩如是下廣顯三聚即分為三初攝律儀二攝衆生三攝善法今初即堅持不犯為第一難持文中亦二先顯難持之境謂多而且麗加以惑心日日長

時故為難也後爾時菩薩下起觀對治即能持於難持也言乃至者大品云貪著五欲障礙生天況復菩提勝事皆障故云乃至第二唯除下攝眾生戒於中初明忘犯濟物如祇陀末利唯酒唯戒唯除教化即行於非道不捨智心即通達佛道二佛子下輕身益物為第二難持乃至捨命亦無缺故三菩薩自得下彰持分齊是第三難持謂恒住正念無誤失故即以難況易以誤況故本性慣習故分齊者初發心住了見心性成正覺故解法無

生常見佛故觸境皆佛豈容佛所生欲想耶四爾時菩薩下明深起大悲是善士相在文分三初悲物著欲二生勸持心三徵釋所以今初七句初二為總無時不起是長夜中想念下別一想念未得二趣向可得三貪著已得四決謂為淨五躄染無厭六迷醉沈溺七隨境流轉八欲罷不能二我今下生勸持心初勸他持戒次住淨戒下兼讚戒功德三徵釋者大悲益他菩薩家業故第三作是學已下明攝善法戒文分為二初明自分現攝後

辨勝進當攝今初善法雖多不出悲智故文中略舉於中分三初雙標悲智二然知已下雙釋二相三如是解者已下雙明二果今初也先智後悲智中先明離過謂離惡行無明後以智下明其成德為衆生下即是攝悲二雙釋二相中悲智雙運文分為二先以智導悲自成正觀二一切諸法下通明入法顯彼倒因今初文有四對前三二互相望後一當體以辨前三對中前二不離後一不即即顯生之與倒非即離也衆生即能起顛倒之人

乃染分依他顛倒即所起之妄是徧計所執初對明不離者謂依似執實故離生無倒依執似起離倒無生第二對明不相在重釋前義言不離者明因果相待緣成非先有體二物相在因中無果故倒內無生若必有者則應徧計是依他最起果中無因故生內無倒若要令有者則應無有不倒衆生第三對明不即不壞因果能所徧計之二相故由前三對則知生倒非一非異非即非離第四對當體以辨倒心託境方生故非內法若是內者無

境應有境由情計故非外法若是外者智者於境不應不染既非內外寧在中間則知心境當體自虛將何對也以明即離衆生亦爾即蘊求無故非內法離蘊亦無故非外法既非內外亦絕中間本性自空何能起倒將何對他明非即離既如是知則自無倒爲物說此倒惑自除二一切下通明入法顯彼倒因謂由不達緣成不堅妄生徧計故云誑惑愚夫實則愚夫自誑若獼猴執月三如是已下雙明二果即前悲智所成之果也亦九戒中

二世樂戒也先總後別總中由解諸法不實幻化即是覺了諸行了行相虛名達生死知行體寂是了涅槃了之究竟即得菩提自得度下別有九對一度苦二脫集以了生死故三調之以道四寂之以滅以了涅槃故次四即證四諦之德如次配上謂由斷苦故得安樂等九即證佛菩提之樂第二佛子已下勝進當攝於中有二十句前十具勝德一順佛二離世三行勝法四住等理五等慈六明智七離過八忘緣九捨執十不斷煩惱而入涅



槃後十住深智末句為總即是佛智餘別顯  
 深廣之義一上無過二言不及三離依著四  
 無變動五超數量六無邊畔七無終盡八絕  
 色相由上故深第三無違逆行即是忍度於  
 釋相中文分二別初略辨行相後對境正修  
 今初分三一修忍行二離忍過三修忍意今  
 初常修忍法即標行所屬謙下等言彰忍之  
 相文有十句初總顯自性謙尊而光卑而不  
 可踰若海之下百川歸焉恭敬崇彼安敢不  
 忍不自害下九句別明通有三釋一約三毒

二就三業三據三忍初云前三治瞋行忍瞋  
 必害故一無如前境而自刑害二力及害他  
 三以死相敵無論先後及與一時但取兩害  
 次三治貪成忍故梁攝論云取是貪愛別名  
 一自貪名利二使彼令取或隨喜彼取三兼  
 行上二後三治癡修忍癡故執著一著已德  
 能云何毀我二彼人若是云何辱我三俱染  
 可知此九皆過菩薩正觀以不不之能治之  
 觀下文自辨二約三業者害必加身著必由  
 意自他讚舉名為取也苟心讚他尚為諂媚

況自稱舉故並安忍之三約二忍者害即怨  
害取即不能安受飢寒等若妄受取故著則  
不見諦理由見諦理三忍皆成故思益云諸  
法念念滅其性常不住於中無罵辱亦無有  
恭敬若節節解身其心常不動等又上三即  
約違順中庸之境故成三毒餘可準思二亦  
不下離忍過也名引中人利誘下士菩薩上  
士故不貪求三但作下修忍之意也所以修  
者先自忍已後爲生說今修忍行離惡斷惑  
是內安忍惑亡智現則住法忍既去煩惱鑛

穢則身心柔和堪任法器如彼鍊金上來皆  
是清淨忍也第二佛子下對境修忍廣顯行  
相文中分二先明修忍行後明修忍意前中  
有三初耐冤害次安受苦三諦察法今初分  
二先彰難忍之境後明能忍之行此亦難行  
忍也今初分三初明口加毀辱故梁攝論以  
耐冤害亦名他毀辱忍略顯十種一觸忌諱  
故二惡軌則故三令憂厭故四無風雅故五  
極庸賤故六詮邪惡故七不入人心故八詮  
猥雜故九極鄙惡故十極麤獷故以是言下

總結所作多人多口各多惡言二又此下身  
加逼害上二事廣三如是經下總辨長時是  
謂難忍之境也二菩薩遭此下明能忍行先  
結前生後謂遭前極苦二作是念下正顯忍  
相以失自要文有十句初一假設不忍失念  
易志故云動亂餘九明失一則不調瞋恚二  
則不護根門三迷忍法門四不修忍行五隨  
風外轉六動亂内生七不惜善根八未忘彼  
此上八自損由此不能利他今能忍故以不  
不之便成八行自他俱利自他俱調若說此

勝利成善士行二菩薩爾時下安受苦忍雖仍  
前文義當安受故引往所受苦以況今苦而欲  
安受所以引者無始顯昔苦時長諸苦明其事  
廣雖事廣時長而空無二利今時促苦少能成  
忍度自利利他安不忍哉故練磨頌云汝已惡  
道經多劫無益受苦尚能超十四今行少善得善  
提大利不應生退屈由斯重自勸勉誠勵令  
淨而無亂喜不憂感調其瞋敵攝護根門是  
自住忍法令物同忍第三復更已下諦察法  
忍亦仍前起故云復更斯則一忍之中便具

三忍表非全異故一境具明文分三別一自成法忍文有五句初句總標無我已下釋成空義以苦空無常無我四行釋之倒為其次又約大乘故苦樂等雙遣一人我法我兩亡二常與無常非實相待有故三空有俱寂故云無二四苦樂皆遣云無所有二諸法空下令他成忍衆生迷空故應為說皆清淨忍也三是故下結行應修然莊嚴論中由三思五想則能忍受一思他毀辱我是我自業二思彼我俱是行苦三思聲聞自利尚不以苦加

人此三文在安受忍中思昔諸苦自他調攝故言五想者一本親想衆生無始無非親屬故二修法想打罵不可得故三修無常想四修苦想五修攝取想即此文攝對前可思第二為慈念下明修忍意文有十句義兼通別最二通則三忍皆為此十在義可知別則為初五十五故修耐冤害慈念為總次但欲饒益於他不懼他不饒益本欲安人豈當加報愍彼淪倒寧懷恨心以忍調行攝諸恚怒次一安受苦忍隨逐衆生無疲苦故次二句為覺自他修

諦察法後二通於前三上一為言下流至此  
斯即九中二世樂也第四無屈撓行撓者曲  
也弱也即牢強精進也釋相中二先總顯其  
相後隨難別釋前中文三初正顯精進二性  
無下明離過失三但為下辨進所為此之三  
段初即總舉次是釋精謂無雜故三是釋進  
趣所為故今初正顯中初句標行所屬所謂  
已下顯勝列名精進多名望業用故初第一  
者亦是首義此義有三一大故第一謂為大  
菩提故二勝故第一光明功德故三殊勝故

第一謂超出故第二大亦三義一最勝故大  
勝中極故如世大王二最妙故大事理融通  
故如世大德三上故大行體高上如世尊長  
第三勝者亦有三義一無上故勝不可加故  
二無等故勝不可匹故三普徧故勝體周法  
界無可勝故二離過中即難行精進性無間  
雜最為難故先離自惱之過謂本隨煩惱任  
運不起故曰性無圓融教中地前得爾後終  
不為下明離惱他三辨精進所為中有二十  
句具含三種精進但為是被甲四弘願故而

行即是方便加行所爲之法是所攝善文分爲四初三斷惑次七度生次四知法後六求佛即四弘也今初初斷現行次斷種子後斷餘習二度衆生中爲成十力智故煩惱是漏意令其盡境界即徧趣行心行義兼於業生死義兼宿住處第六非處力總故不明三有四句知法中初總餘別別中一事法界若自入法則以淨信爲根本若約利他則以慈悲爲根本等二即理法界云平等性三事理無礙法界三世之事即平等理性也事隨理融義合

事事無礙四有六句求佛中初二即智初句教智光明後句證智次二知境先真後俗後二皆權智前句知機識藥後句四辯宣陳分別演說即是樂說說於法義句即是辭上之四弘初二知苦斷集後二修道證滅即無作四諦之境也第二佛子菩薩下隨難別釋於中二先明被甲精進後明利樂精進今初全同瑜伽之文但論以被甲爲初約先心自誓故本業三進之中初名大誓今居攝善之後就假設遇緣耳文有兩番問答初番可知後

設復有下第二番中更難於前得大善利者  
我本發心願代物苦但慮不容相代今聞苦  
身能遂順本悲心不慮時長但增喜慶長劫  
不懈沉盡壽耶一念不悔即忘身無間自慶  
得利即平等通達有深功德為難行也第二  
菩薩以此下利樂精進即用前加行攝善以  
利衆生令彼涅槃真安樂也第五離癡亂行  
釋相中二先總顯無癡亂後別明無癡亂今  
初句雖有六義乃有十初總餘別總云成就  
正念者然通三義皆名正念一就奢摩他品

名為正念正念即定以彼定心離妄念之亂  
故名為正此從業用立名亦隣近立稱故八  
正道中正念定攝起信論云心若馳散即當  
攝來令住正念二就毗鉢舍那品亦名正念  
謂不偏鑒達明了於緣故下經云正念諸法  
未曾忘失三雙運道名為正念次下經云以  
正念故善解世間等謂於緣明了是無癡義  
不異所緣名無亂義即雙運也又下經云禪  
定持心常一緣智慧了境同三昧雖有毗鉢  
舍那及雙運道皆就心一境辨名禪自性別

中初句復是無亂之總謂不隨境轉故無散亂三障不能壞名為堅固四緣不能牽故云不動五超劣顯勝故云最上六異世無染故云清淨上五釋無亂也下四義釋無礙謂七稱法界故云廣八趣一切智故云大九引發難量故云無量十不捨大悲名無迷惑上九別句攝為三禪前六現法樂住次二引生功德後一饒益有情第二以是下別顯無礙亂如次釋前十義即為十段亦初一為總釋前正念於中分二初結前生後後善解已下顯

正念之能文曲分二先雙標後雙釋今初也正念有觀故能善解正念有止所以能持世言無益但須善解出世有益偏語憶持出世不解應不持義世言不持應無記憶故文雖影略義必兩兼解事解理故名善解二所謂下雙釋分二先通就諸境明無礙亂後此菩薩下別約所持明無礙亂今初也據無礙亂文但有九開初為二句亦有十謂法義別故初句即法無礙合蘊成二謂色與心非色謂心即餘四蘊二能持建立下義無礙也義有



二種自性亦二一事二理事即質礙為色性  
等理即無性為色等性皆無名相中施設建  
立持言及義即文義二持今正覺理事離妄  
分別名無癡亂此二釋上能持下八釋上善  
解義必兼具故癡亂雙舉三於五蘊生滅得  
無癡亂十地品云死有二種業一能壞諸行  
二不覺知故相續不絕今此菩薩於二事理  
靜無遺照故無癡亂四偏語胎生明無癡亂  
瑜伽第二說四種入胎一正知入而不知住  
出所謂輪王二正知入住不正知出所謂獨

覺三俱能正知所謂菩薩四俱不正知謂餘  
有情前之二人尚有癡亂也凡夫癡亂相者  
謂下者見所生處在於廁穢中者見在舍宇  
上者見處華林若男於女生愛於父生瞋謂  
競母故女則反上大集二十七涅槃十八二  
十九俱舍第九皆具說之次三及十文並可  
知八九各有通別別謂四魔十魔及業如離  
世間品及如大品魔事品起信論說若依智  
論除諸法實相皆菩薩魔事起心動念悉是  
魔業今以智覺察不隨其轉如人覺賊及偷

狗故知魔界如與佛界如如無二故既覺其事即不造其業第二此菩薩下別約所持法門明無癡亂文有二別先正明後徵釋前中三初結前標後次所謂下正顯所持三菩薩下結無癡亂二正顯中有十五法一所證理體大分深義所謂空故即事真故二即體業用之法三具德相故四一具一切故云種種上四即所詮理法五即能詮教法義見初卷六行法以因嚴果故七果法上七通明四法下八唯約地位亦果行收謂八即初地大願

已證理故名正希望決定解斷二障故云清淨九即根本智十即後得此二通至七地十一甚廣大法即八地法證深法忍如法界故十二九地是法師位了物機故十三地知世間集共不共等故苦無常等通色心故名之為共色心類殊名為不共又器世間名共共業感故衆生世間名不共自業成故此二唯約所知又隨他意行名共隨自意行名不共又靜慮無色四等五通雖共凡小菩薩無漏大悲故名不共十四等覺智十五如來智

上豎明諸位若約橫配者初一唯因後一唯  
果中間六智通於因果而別義相顯三結無  
癡亂者不忘不癡不失無亂心常憶下通結  
相續第二何以故下微釋釋中以因深故不  
亂衆生得無亂果不壞正法增廣大智得無  
癡果不斷善根得相續身因果影響孱然無  
差第二復次下別釋上九攝為三禪初六釋  
前現法樂住即為六段今初釋前心無散亂  
文二初標二所謂下釋釋中又二前釋種種  
音聲略列七種言沮壞六根者非唯引奪耳

根亦令餘根不能緣境故名沮壞根以見等  
而為義故又沮壞者如治禪病經云因於外  
聲動六情根心脉顛倒五種惡風從心脉入  
風動心故或歌或舞作種種變此即破壞之  
義既壞意身餘皆隨壞然色可冥目觸味合  
知香少詮顯為禪定刺唯在於聲故偏語之  
明無癡亂非餘四塵不能亂也故上忍中遇  
身加害心無散亂二此菩薩下釋不能惑亂  
文亦分二先總明長時不亂後所謂下別顯  
不亂之相句有十一初總餘別別為五對一

境審心定二教達行成三憶因念緣四觀真起用五外淨他惑自沈義門雖遇惡聲此皆無損上皆一切種禪謂通名義止觀及二利故第三不作下釋前堅固謂四障不壞是知正念堅固亦是出前不亂之因言法障者於法不了如彼牛羊此即所知障也十一三障爲言攝在煩惱體即無明故斯亦清淨靜慮也第四佛子如上下釋前不動謂諸惡緣不能牽故悉能壞亂衆生身心彰聲之過不能壞此菩薩心對顯難思第五菩薩入下釋前最上謂超劣

顯勝故此下三段亦即出前無癡亂緣正示現法樂住之相言超勝者初標入揀禪云菩薩入異凡小故住於已下舉法以揀聖法即是無漏揀於凡夫思惟觀察揀於二乘二乘入禪不能緣境故身子不覺刑害之手迦葉不聞涅槃之音善知已下正顯勝相了性相故相則念念不住取不可得性則三相性空固無所得不得性相違順何依第六如是聞已下釋前清淨即清淨禪順違中境不生三毒不染善取有定慧故了相無相故名善取

有斯正念大地為鼓妙高為推豈能亂哉第七知一切下釋廣謂稱法界如虛空故亦近釋前文有六句初總餘別別中無得相空無作人空無際性空此三相盡故法界理現與法界等事如理故無有差別理即事故第八菩薩如是下釋前大義此下二段釋引生功德今云大者趣一切智不退轉故即難行禪也第九善入下釋前無量謂能引發難量德故文分為三初引自利德文有六句初標一切門禪次四別顯後一類結多門則何定不

攝復云門者三昧無量數如虛空今一中攝多故名為門如牽衣一角如蠶王來次增長下引利他德後是時下結不為亂非唯不亂本定更增如豬揩金山風熾於火第十作如是下釋無迷惑謂耽著禪味不起大悲是為迷惑今悲以導禪故無迷也此即饒益有情禪也住清淨念即現世樂得智斷果即後世樂是謂與二世樂也第六善現行體即般若瑜伽一切般若亦有三種一能於所知真實隨覺通達慧二能於如所說五明處及三聚

中決定善巧慧三能作一切有情義利慧攝  
論以加行根本後得爲三皆六度明義唯識  
以生法俱空本業以照於三諦皆十度明義  
經有十度應依本業今爲順文且依瑜伽則  
權實無礙皆名善現雖彼依六度今圓行善  
隆則十度齊修據行布分兼正不同亦不相  
濫就釋相中古人亦依本業三慧分三初明  
中道次念生無性等以爲照無普入已下明  
其照有此得次第三諦失於圓融又照無經  
中佛法世法二互不異亦不雜亂豈獨是無

今約圓融依於瑜伽兼正以辨各具三諦故  
彼論釋初慧云於一切法悟平等性入大總  
相究達一切所知邊際遠離增益損減二邊  
順入中道故文分二別先明行相後顯成益  
前中亦二先略後廣前中又二先總標後能  
知下解釋今初也三三業清淨是能示體示於  
三業正是現義住無得現現即無得寂用無  
礙斯即中道可稱善現若異後有無而說中  
者相待中也二釋中能知三業皆無所有是  
住無得義不妄取有離二邊縛是清淨義凡

所示現無性無依釋示無得義以境無定性  
心無所依皆不可得也三業皆示故致凡言  
二住如實下廣辨行相中三初如實隨覺慧  
二佛子此菩薩作如是下於五明等善巧慧  
三菩薩爾時下能作有情義利慧今初如實  
覺於三業而現三業於中先別明後總結前  
中三業即爲三段今初意業是二本故首而  
明之如實心者用所依也住者心冥體也知  
無量心等者不礙用也即所示意業多心多  
法皆有諦也境既無相心何所得即無諦也

有無不二故曰甚深即中道義也不可以次  
第三觀而觀故名難入唯圓機方能入故何者  
若偏觀三諦是常是斷是相待故若總觀者  
一則壞於三諦異則迷於一實故即一而三  
即三而一非三非一雙照三一在境則三諦  
圓融在心則三觀俱運住之與知即是觀也  
古德以凡所下至於難入明唯識觀非無所  
以然且唯識之義不彰又有釋云心非境外  
故無得境非心外故無相即心是境故甚深  
即境是心故難入亦是一理二住於正位下

釋示身業正位等三即示所依方便已下依體起用由非惑業之生故生滅即無生滅此中正位即真如異名非約見道以智契會故稱為住無住住者即住真如三住涅槃下釋示語業前之三句示之所依言語道斷顯示而無相即言亡言是斷言道故晉經云非有說有言語道斷然上之所住總有七種體一名異異從義別一如實心者即自性清淨心是為總相次正位等三即心之體性正位者法所住故真如語其自體是實是常法性約

為諸法之本迷此真如有諸法故成諸法已不失自性故名法性亦即因相涅槃等三即是果相住涅槃界即是真如體圓寂故出二礙故故智論云有菩薩發心即觀涅槃行道恐此涅槃濫唯在果故云住寂靜性謂約真如體無妄動即是涅槃如此之性體為有無故云無性無性之性即是實性非謂斷無故舉多名方顯所住之深奧依此示現方明所現之為善二入離下總結三業中初句結心故無縛著次句結身即所住真如等三結前



語即超諸世間等末句總結三業皆寂用無礙故名善巧善現之名從斯而立第二佛子下辨五明處三聚中決定善巧慧故於文中解世間法於中分三初以理會事二菩薩如是下事理無礙三永不<sup>下</sup>順理起悲今初文有六句一衆生緣生故說無性二法依真起故會歸無爲三國是心之相分故四時依法以假言故五名無得物之功故若名在法中見義應知名故六物無當名之實故若法在名中聞名則應識義召火應當燒口故二善

薩如是下明事理無礙文有七句初一總顯甚深餘句別顯深相然世法與佛法實無二體假約事理以分其二故以五句顯非一異一世相即空故云寂靜二佛法平等故無增益三以理無不事故佛法不異世法事無不理故世法不異佛法四此全理之事與全事之理而事理不雜五各全收盡互無所遺故云亦無差別末句了前諸法同法界體故得鎔融普入三世橫豎該攝若約漏無漏說爲世法佛法各具事理釋者一生死即涅槃故云

世間寂靜二無有一法非佛法故更何所增  
三二法染淨雖殊同一真性故不相異四不  
壞相故無有雜亂五皆是即理之事而各互  
收無遺即無差也六同一法界總顯所因三  
求不下順理起悲謂無緣之悲以導前亡機  
之智入假化物初句為總謂雖深入智慧不  
忘本心非如八地心欲放捨下三句別一不  
捨願炷二增大悲油三兼前智光故堪為依  
處第三菩薩爾時下作一切有情義利慧於  
中二先建攝生志二先人後已今初文有五

句成熟是總或因成果熟故或始末勸獎故  
餘句是別一折伏二攝化三令悟本性成大  
菩提四斷惑清淨得涅槃果二復作下先人  
後已文分為四一假設自度二而諸衆生下  
觀物輪迴具業惑苦三菩薩如是下結所不  
應有二過故一違本誓心二墮慳貪失此為  
不可四我當下決志先拔第二是菩薩下顯  
行成益於中三業不空是為徧益終至菩提  
是究竟益此下入  
二十經

大方廣佛華嚴經疏卷第二十二

音釋

巨音大切鑛古猛切獷音惡切也  
鑛也撓切巧逢距乎容切與  
蜂者與猪於同鎔餘封也

永樂北藏

大方廣佛華嚴經疏

第一六九册

永樂北藏

大方廣佛華嚴經疏

第一六九冊

大方廣佛華嚴經疏卷第二十三此下入三十經最三

唐清涼山大華嚴寺沙門 澄觀撰

第七無著行體即方便依二方便由迴向故不住生死由拔濟故不住涅槃俱無住故名爲無著本業後四亦各有三方便三者一進趣向果二巧會有無三一切法不捨不受初即迴向二由巧會故方能拔濟不捨不受相同般若唯識唯明後得故不立之本業約兼正不同不妨此一三皆善巧故俱無住著則不二而二之悲智即二不二之一心是無著也

有是幻有無是真空幻有是不有有故即真空真空是不空空故即幻有此二無礙故名巧會如是相融故無所著有能起用空可觀察故皆不捨若受有同凡夫受無同趣證故俱不受二釋相中大分爲二前明自分無著第後明勝進無著於自分中已舍前說二三方便在文分三初唯明自行無著二何以下徵釋所由後菩薩如是下類顯萬行前中又二先明淨境無著後見不淨下染境不嫌前中三一明嚴利無著二往詣下於三寶無著於

中初敬事供佛次如是下顯供所為後於念  
念下別示無著之相義兼三寶及自進修皆  
無所著言念念者顯速而且多三此菩薩下  
長時無著二明染境不嫌唯一句者染易捨  
故第二徵釋中徵意云欣淨惡穢人之常情  
菩薩如何不嫌不著釋意云不依佛慧淨穢  
是生順法而觀二相安在故云如諸佛法而  
觀察故佛法即法界佛慧也第三類顯萬行  
若自若他皆無所著於中初句結前生後教  
化已下廣列所行言佛所住者即聖天梵等

餘並可知第二菩薩摩訶薩下勝進無著文  
分為三初明自行二得授記已下利他三菩  
薩如是觀身下結行成滿今初分二先牒前  
自分後於佛法下正顯勝進有十一句初總  
餘別總謂了達教理行果之法故別中一了  
果法謂佛菩提二了理法謂證法毗尼毗尼  
梵音具云毗奈耶此稱為滅若律藏受名義  
兼調伏今云法滅通四種法皆有滅義謂教  
詮滅故行滅惑故果證滅故理本寂滅故今  
又上下既有餘三故此滅者即理滅也又與

證義相應圓融教中此容證故三住佛正教  
即了教法如所教住故四修菩薩行下皆行  
法也三句隨相行行即萬行心謂四等解脫  
即諸解脫門次二句無相行住處即前教理  
及果所行即前萬行等皆無染著也由此故  
能淨菩薩道堪受記別第二大悲利他中二  
先增長大悲後要心救濟前中又二先觀其  
所悲後增悲無著前中又二先觀迷四諦故  
入於險道後觀迷勝義故入於險道今初也  
初二句標起念時凡夫已下辨所念境有十

三句初總餘別總謂迷於四諦皆曰愚癡別  
中前五彰迷後七顯過前中一不知苦諦二  
不見集過三不信性本寂滅四五不能修道  
一解二行後七顯過一不見集過故頑嚚貪  
著即癡愛也二由貪愛故受生死苦次不求  
見下四句釋不修道初三缺道緣四由不信  
故迷正道失本解以邪為正名為錯誤後一  
由前不修故入險失滅上一向是凡二不敬  
下明迷勝義故入於險道通於凡小初二句  
離勝緣次二句缺勝因三有生空皆為住處

怖法空者謂斷滅故故大般若諸會之末善  
現皆愍眾生怖畏法空而興問言云何令諸  
眾生悟諸法空佛言非先有法後說為無既  
非先有後亦非無自性常空勿生驚怖遠離  
已下覆疏上義由著處怖空故遠正住邪捨  
夷入險由離勝緣故背佛隨魔執有不捨魔  
樂生死佛住空故二菩薩如是下增長悲心  
結成無著第二菩薩爾時下要心拔濟以大  
悲心長劫隨逐文分二別先起行後乃至下  
顯無著前中亦二先明心無疲厭以無著故

即大悲堅固不以難化而厭捨之後又以下  
明其心廣大謂一毛量處化多眾生法界皆  
爾是為廣大二顯無著中三初舉少況多次  
於一一下廣顯無著後何以下徵釋所以所  
以不著者後釋有二意一稱深無相而與念  
故二廣徧虛空起加行故前中無相難明寄  
以喻顯然此諸喻通喻諸法如下本品今取  
義便各舉其一則明前所見皆無相也初句  
為總觀事法界從緣如幻無實體故是以不  
著餘句為別一佛隨機現如影隨質故又現



心水故二菩薩行想念生故未大覺故三緣成之聲故隨感有說故餘句經文自釋一切法如實際者總結也又前明法界如幻即體從緣後結一切法如實際即事而寂世人皆謂實際不變而謂諸法無常以其所知喻所不知故置如言理實圓融世間之相即是常住然古德以後七喻展轉釋疑一疑云世間幻火不成燒用佛現益物豈同幻耶釋云如影亦有應質蔭覆等義豈是實耶然諸法喻各有三義一緣成義二無實義三有用義意

永樂北藏

大方廣佛華嚴經疏

第一六九册

取無實故不著也二疑云若佛如影菩薩何以起行往求因既不虛果寧非實釋云如夢夢亦三義無體現實與覺為緣謂有夢走而驚覺故菩薩起行亦爾證理故空無明未盡故似實能與佛果為緣勤勇不已豁然覺悟如夢渡河三疑云若菩薩行如夢者何以經說此是菩薩行此是二乘行釋云如響緣成無本稱聲大小聖教亦爾機感無本隨機異聞四疑云果行可然世間未悟此應是實釋云如化心業神力所持無實有用五疑云若

皆如化何有差別之身釋云如幻六疑云身若如幻何有報類不同釋云如心此二三義如前影說七總結可知上來古德之釋既二經小異略加添改然其所解似過穿鑿亦是一塗二又作下徧周虛空起加行故所以不著初明處廣念念明達彰其解廣正念現前五是不著因第三結行成滿中分三初結自行成二爲化下結利他行成三何以下徵釋雙結二行成就利他中三初總顯教化無疲次無疲馱故下別示無馱之

相其中施設者隨方儀式異故和合者善惡緣會故餘可知後不令下結成無著三徵釋雙結可知第八難得行體即是願就釋相中文分二別前明自分行後明勝進行然此二行各攝上求下化之願略無神通今初分四初明自行次辨利他第三雙結二行動寂無礙第四雙非二行拂迹入玄初中分三明明修成善根二顯善根行相三行成利益今初也斯即起行所依善謂順理益物根謂增上生長獲之在已故名成就文有十句初總餘

別總具後九受難得名二此菩薩下顯善根  
行相亦有十句如次對前謂由得最勝解故  
受難得名等亦可有難得根能有勝解又亦  
以後一行成前十善隨前一善具後十行而  
別配分明三是菩薩下行成利益文中先結  
前後於念念下顯益於中初自益能轉生死  
成大智益不捨大願成大悲益若有已下顯  
能益他由前自行成此能益未正利他第二  
此菩薩下辨利他行文分為三謂法喻合今  
初謂有大智故了衆生非有則不住生死有

大悲故不捨衆生界則不住涅槃大悲般若  
互相輔翼成無住道二喻中初句喻能化人  
次三句喻悲智不住之行相後而能下三句  
喻不住之功能初二句正喻功能以往返不  
息一句結能度所以三法合中二先正合後  
徵釋前中具合三段生死即此岸涅槃合彼  
岸合上中流亦言生死者以發心之後成佛  
之前十地三賢尚居二死是以中流即是生  
死故云生死中流非生死涅槃之中間名生  
死中也文旨顯然晉譯失旨不應廣引有以

煩惱為中流約其漂溺從因說也有以聖賢為中流約受生死之人也有以中道為中流約觀行說並不應住安隱已下涅槃之德常故安隱樂故無畏我故無憂淨則無惱亦不已下廣明以智導悲合前往返無休息義謂由不住著故所以往返運濟無休及顯法中非有不捨之義謂非唯悲故不捨亦由了其非有無可捨故則終日度而無度也初句總明不捨下別有五對十句初一多對已化未化俱有捨著二義思之二增減對化之成道生界

不減不從化者生界不增此約多人相望三約一人果起不生惑盡非滅四謂空為盡謂有為長五一對總結四對不亡並名為二今無分別契本不二第二徵釋中文有兩番前番正徵不著後番重徵前義今初也先徵意云現化衆生有增有減而言不著其故何耶釋意云以菩薩深觀生界同於法界無增等故所以不著文中初二句總上句是不異義故云如也下句是相即義故云無二後無二法中下別彰無二之相即屬對上文無取依

著釋不分別餘文相顯此文昭著而未學之徒但謂一分衆生不成佛故名不滅生界深可悲哉第二番重徵意云何以生界即同法界釋云一切諸法皆同法界豈獨衆生而不同也第三菩薩如是下雙結二行動寂無礙亦名無盡心行有法喻合法中十句初二牒前起後既方便深入故性相無礙住於下餘有八對正顯行相一約起行之身二了法藥三識根緣四遊佛刹五達佛法六深契離言不捨言說七無求離欲而萬行爰修前七明

即寂之用八常勤下一對明即用之寂亦通顯所由由勤修故涉權入法界故常寂二喻中木喻法界火喻所成身智火事喻悲化無邊本火不滅喻身智常湛三合可知第四非究竟下雙非二行拂迹入玄者然初自行云能轉生死而不捨大願已有權實雙行而謂多明照體大智次利他之中既云無住運濟則悲智相導而多似起用大悲次復以導悲之智遣彼著心復似悲智二心行有前後故第三段辨動寂雙行則理無不盡而猶息物

謂二事不融故此明形奪兩亡權實無寄豈  
唯十行菩薩修行善巧彌顯功德林悲濟之  
深文有五對十句然其所非之法即前權實  
二行且如究竟即實不究竟即權今乃雙非  
者實即權故非究竟權即實故非不究竟又  
但言非究竟非謂有不究竟故亦非之是則  
借權以遣實實去而權亡借實以破權權亡  
實不立言窮慮絕何實何權體本寂寥孰非  
孰是唯蕭然無寄理自玄會故辨雙非非有  
雙非可立然雙非是遮雙是為照即遮而照

故雙非即是雙行即照而遮雙行即為雙遣  
總前諸段理極於斯下諸句中皆做於此二  
對所化能所取寂故非是取了知心行故非  
不取三約化處不著世界故非是依依剎現  
身故非無依亦約所證智無分別而善入故  
四約化法深達義理故非世法隨世語言故  
非佛法五證離欲際故非凡夫不斷菩薩行  
故非得果第二菩薩成就下明勝進行文分  
為二初明慧行後菩薩如是下辨慧行今初  
分二先牒前自行後不說已下正辨勝進

行相皆即事入玄分四初總明離相無說二  
徵釋以顯雙非釋意云所以不說者一無法  
可說故二菩薩於如是不明無心說謂不  
起念故三何以故下轉釋無念所以無念者  
稱法界故故不說聲聞法等四假徵以顯雙  
運徵意云既無所著何以復修二利之行釋  
意云性相雙非故能雙運文有法喻合法中  
諸法無二故無說無著無不二故不妨起行  
二喻可知三合中皆顯性不礙相於中二先  
正明後普與下辨功成德立勝進之相故晉

經此初有此菩薩言第二辨悲行中分三一  
牒智顯悲悲假智深所以先牒二於三惡下  
正顯悲相三復作是下偏語化惡顯勝進相  
文中三初明惡是所悲次明善非化境後徵  
釋所由今初所悲中先明有違教之惑後貪  
愛下明總具塵勞惑病既深方假醫救前中  
不知恩報者必無敬養更相酬對則難以訶  
責邪見執著則不受正教迷惑顛倒所領不  
真愚癡無智為說不知無有信心絕於希向  
隨逐惡友必遠善人起諸惡慧無由正解故

難化也二設有下善非化境可知三微釋中初微次釋後轉微釋初微意云菩薩化生理宜平等偏惡棄善其故何耶次釋意云菩薩於物無主定於親踈就於感重偏是化境如毋矜病子豈不等耶又若求名利應化知思本為淨他理應隨惡若棄惡從善魔攝持故三轉微釋微云菩薩衆生本不相預何為長劫悲救無求釋意云諸佛菩薩法爾同遵不爾不名為明導故第九善法行體即力度就文分三初微名二釋相三結歎今初唯識有

二一思擇力二修習力本業有三一報通力二修定通力三變化通力唯識約修本業約用互舉一邊由前二力為機說法則成語意二業之善法有本業三力則成身意二業之善法以修定通即意業故依梁攝論由思擇力能伏一切正行等所對治障令不起故由修習力能令一切善行堅固決定既言一切善行此則二力通三業善此位大同九地是法師位善說法故釋相中二前自分後勝進然此二段各具二力至文當知亦有三力謂



善知根緣一音普應成就十身義該三通初  
自分中先總明後別顯前中作清涼法池標  
也言舍法喻謂如無熱惱池清淨無濁下二  
句釋上句如池舍於德水故云攝持正法下  
句以四辨才出願智等饒人衆生相續無盡  
究竟入於一切智海名不斷佛種如彼大池  
流出四河相續入海二得清淨下別顯文分  
爲二初廣攝持正法二此菩薩大悲下廣不  
斷佛種今初也具十總持是攝持義十持爲  
體十辯爲用初句爲總寂障鑒法名淨光明

餘九爲別初四即四辯才四持即池之德水  
四辯即池之四口五即外力加辯智水灌心  
故稱根令喜此即得辯之緣六即內力自證  
之辯謂道契內心光明外徹此乃得辯之因  
也七同類音辯此約順機八訓釋辯此約窮  
法前四辯中但明通相文句此明曲盡其源  
義身即當名身名所詮故體是名境義即境  
義梵云得種種名身故九總顯深廣持辯無  
邊旋有入空旋空入有等故無有邊皆言無  
盡者稱法界故第二廣前不斷佛種中文分

三別初總明三業利生二假使下假設深勝  
三以得一切下總釋所以前二舍於四河今  
初即大悲河大悲堅固標其體也悲紹佛種  
故首明之普攝衆生正明不斷於三千下示  
其攝相二假設深勝於中有三即爲三河一  
大會斷疑明問答成就處多大衆頓領頓酬  
由具諸度故即波羅蜜河二復次下微細斷  
疑前直明大會異問能答今乃云於一毛端  
處有不可說如前大會多劫殊問一念能答  
不怖大衆不怯文義決斷揀擇顯轉超勝是

三昧力即三昧河故下經云菩薩住此三昧  
能於自身一一毛孔中見不可說不可說佛  
刹微塵數諸佛如來亦見彼佛所有國土道  
場衆會聽法乃至云其諸衆生亦無迫隘何  
以故入不思議三昧境界故彼約聽法此約  
答問以之爲異餘義大同此約圓教普賢位  
中故於地前有斯自在非三乘中得斯作用  
三而作是念下周徧斷疑上舉毛端多衆猶  
有量故今明一切衆各具多言悉能答故即  
願智河願智相導悲救無休故云作念文中

先顯多象後假使下復顯多言第三總釋所以者所以得此四河廣利者略舉四因此之四因或以一因成前四河或以四因成其一河一他佛外加故二自藏離礙故三所照法圓故四能照智具故或各配屬一同體悲加故二見心性故三諸度圓故四十二智滿故第二佛子此菩薩下明勝進行亦即是前四河之相文分爲二初牒自分行成二能自下正顯勝進文分爲四一辯四河清淨之義二如於此下辯四河入海無能障義於多象中化

無障故三佛子下辯此四河旋遶池義四菩薩成就下辨累劫入海無疲厭義三旋遶中謂成就隨順身語意業智爲先導身語意業四方流注入智海故隨順即是旋遶之義文中二先總標二所謂下列釋皆上句標名下句釋相勸此十身以爲五對一證滅示生對二不生不滅對三非實非虛對四不遷不壞對五一相無相對東此五對不出體用一一對中體用對辨第一對體用自體第二對體用之相第三對體用之力第四對體用之性

第五對體用之德今初理無不證名入無邊法界世無不超名為非趣下釋中但釋非趣者謂若入法界必滅世間若滅世間即入法界標釋相成此即體之自體也二用無不徧故入無邊法界隨類受身故云諸趣此言入者應往之入不同上來證入之入釋文可知此即用之自體也第二對初不生身即前應用之身生而不生言住無生平等法者有二義一依體起用用不離體故二體之與用平等無生故此即用之相也後不滅身即前體

滅離言說故一因滅顯理理非滅故二寂滅之理離滅相故此即體之相也故上體滅現生之身即以不生不滅為相第三對體有何力得如實理離世俗之實也用有何力隨應而現不同塵也第四對用以何為性隨流應而不遷體以何為性即法界而無壞第五對體有何德過去無始未來無終現在非有故三世言斷用有何德體即無相能照法相故此十身不離體用用有聚義體具體依皆得名身體外無用用即是體用外無體體即是

用體即法性用即智應二既不二理智圓融  
唯一無礙法界之身隨相顯十以表無盡一  
乘圓融地前能爾更有餘義如十地離世間  
品明此略舉成就隨順之身言身兼語意也  
四顯無疲厭謂四河入海累劫無疲菩薩亦  
爾以普賢行願盡未來劫修菩薩行入如來  
海不生疲厭是以廣顯與生為歸為救等文  
中先牒前所成之身為益他之本為一切下  
正顯成益句別有十在文可見十地又明今  
略其要俗須委示故名為燈真但高明故目

為炬甚深則能所不二如光合空為照為明  
但約入地示德為異第三佛子已下結歎分  
二先結名後菩薩安住下歎勝盡法源故以  
清涼法池即是行體故標結皆舉顯中是其  
相第十真實行文三同前初徵名者如本分  
釋體即智度今更略釋若約二智受用法樂  
成熟有情並如行能說如說能行即是真實  
本業有三一無相智即受用法樂二一切種  
智三變化智皆成熟有情下文云入一切三  
昧真實相即受用法樂智知衆生種種想等

即成熟有情知十力智是一切種不著一切世間解衆生無際即無相智我爲善變化及示現如來自在神通即變化智就釋相中文分三別第一總顯名體二別顯行相三結住行益今初初句總標後如說下解釋謂言行相符故名誠諦誠實審諦即真實義此有二義一約先誓自他二利決志具修今如昔說決能行之亦如此行以爲他說故下文云我若先成則違本願等二約現修自他二行如所演說決定能行非數他實故云如說能行

亦如所證宣示於人不昧所知名如行能說第二此菩薩學三世下別顯行相文分二別先標章後依章別釋今初文有五句一稱實演法師子吼故二深住實相契一性故三二利善根等同佛故四得如說行同本誓故五出三學佛十力智已成故第二此菩薩成就下依十五章別釋從後倒釋即分五段第一釋智慧成就文中三初顯所成十力言時非時者垢淨之時不同化不化時別故次而不捨下得果不捨因後何以下徵釋所以十力化生之智

故須得之令物清淨故須不捨因行第二此菩薩復生下釋得三世諸佛無二語文中三初反舉違誓自誠不應次是故下順釋要當先人後已後何以下徵釋所由徵有二意一云何以違誓是所不應二云何以要須先人後已釋此二徵即分二別初釋前徵云由先許故不與則違先誓不請強許今之不與豈是所應後是故下釋第二徵菩薩之道必先人後已不爾豈得名最勝耶文有六句當句自釋不俟繁文第三此菩薩摩訶薩不捨下

釋同佛善根本誓智慧皆究竟故文中二先標德成滿二於一切下別顯同相一意業智慧同二念念下身業神通同第四此菩薩現無量身下釋入佛種性於中二一約身明入世無依又身中現刹皆得性融故二此菩薩知衆生下智入種性於中二初入悲種性知根善化故二觀諸菩薩下入智種性窮實相故故結句云住一性無二地以此智性導前悲性成無住道是爲如來無二之性文中初會緣入實次得義身下依實了相後智慧

最勝下性相無二文有三句初句約智則雙  
照性相次句約定動寂契真後句釋成並由  
住無二性第五菩薩摩訶薩以諸下釋學三  
世諸佛真實語文中二先牒前起後衆生著  
二不能悲智雙遊菩薩即寂修悲故得不二  
後得佛十力下成果起用顯實語相能師子  
乳轉法輪故結云知實相源方爲實語也文  
中大同十地窮佛所得圓融教中位位果滿  
故窮法實相謂如是性相體力等皆盡源故  
餘句可知第三菩薩住此下結行成益第三

結名並如文顯說分已竟大文第六爾時已  
下顯瑞證成分文分二別一瑞證二人證前  
中先此會後如此下結通二復以下人證亦  
先此界十住一萬此云十萬表位增故前現  
瑞中亦應云十方各有十萬文無者略餘義  
已見十住之末後佛子我等下結通第七重  
頌分中分二初說偈儀意先彰說儀後欲令  
下說意意有九句初總餘別別中一淨治因  
性二不退願性三行性續願四以真性導行  
五上攝果性六開已修性即十行所習七觀



所化性八照當果性二正說偈辭總有一百  
一頌大分爲三初之一頌總申歸敬次九十  
六頌正頌前文三有四頌結歎深廣今初也  
將申偈頌再展敬心初四字申敬十力下顯  
佛三德十力智德次句斷德次句恩德衆生  
爲境故末句通喻三德智廣十七惑淨悲深遠故  
第二正頌前文大分爲二初十一偈頌前本  
分後八十五偈頌前說分然十住頌文則舉  
其次第今沒其次第直云行斯道者略有四  
意一前則約位始終行布而說今將融會前

說今無始終欲顯一位之中具行諸行一行  
之中具一切故二前約別行今約普行普別  
無礙二文互顯三前約同教今約別教同別  
無礙爲一圓教故四前約不雜辯才此約任  
放辯才說不待次言辭不斷故又前多約因  
此多就果或廣略綺互體用更陳總別遮明  
互相影發顯菩薩行深廣難思下文雖依次  
第既沒本名一同離世間圓融之行也今初  
亦可總歎行深不頌前文頌亦無失今頌本  
分曲分爲二前四頌前學三世佛而修行故

後七頌前行體不可思議今初分二初三別明後一總說各初三句辨德後句結德所行下諸文行斯道言皆做於此後七頌行體中然文旨包含略為二解一頌行體二頌加之所為然所為正為十行義旨不殊故得同頌配文少異分為二解先配行體文分為四初一頌總顯不可思議故云心無分別彼無動故二一頌頌前與法界等等法界有三義所有皆明了等事法界次句等理法界此二無二等無礙法界由此等故能破惑成德三有

二偈頌等虛空界等空五義初偈顯二謂空無分別而顯萬像菩薩亦爾入實自悟則無分別不礙分別於諸眾生故結云等空由入法界故等虛空二界相成故舉入法界後偈顯三義一等空廣大初二句顯示二等空清淨三等空不可壞第三句顯由等虛空是勝寂靜名曰牟尼四有三偈頌前菩薩行初偈總舉自分之行後二即勝進之行二以此文頌加所為雖開合不同依次不亂初偈頌前為增長佛智前半所觀後半能觀次偈頌深

入法界餘如前釋三中初句頌了知衆生界  
次二句頌所入無礙四中頌所行無障往諸  
國土則身無障說法清淨則自行無障異論  
不壞則外無障第五偈頌得無量方便以願  
行等皆善修故六中頌攝取一切智性無邊  
一切地即智地故十地之智同佛智故歎勝  
可知七中初句頌覺悟一切法次句知一切  
諸根隨宜摧伏次句即持說一切法也第二  
遠離下頌前說分十行即爲十段第一六偈  
頌歡喜行文分四別初一財施財去慳過安

隱他故次二偈無畏施前偈修因後偈得果  
次二偈法施後一頌總結因圓果滿言百福  
者涅槃二十四云五品心修十善謂下中上  
上中上上各十善成五十始修終修故成百  
福然十善之中不殺不瞋是無畏施不盜不  
貪是財施離口四過不姪不癡九是法施故具  
上三施成百福果第二智地下頌饒益行五  
偈分四初偈律儀謂有智能護心不動故是  
菩薩律儀次二攝善三有一偈饒益有情舉  
處攝人後偈總結三聚第三智慧下無違逆

行四頌中三初一諦察法忍次二安受苦忍  
一引他勵已以策修二引所成德以進道後  
一頌耐怨害忍遇害無惱但增救心第四於  
諸下無屈撓行五偈分三初二頌前攝善精  
進亦名加行初半偈即頌第一精進等十句  
次句即頌前離過十句後偈頌前所為次一  
頌被甲精進為物受苦心無厭等後二偈頌  
利樂精進第五善解下頌離癡亂行二頌中  
三初一頌現法樂住於中前半頌能持色法  
言說等後半通頌前無癡亂等七句次半偈

頌引生功德禪了一切法無有邊際得一切  
法真實智慧故云得究竟也後半偈頌饒益  
有情中我當令一切衆生乃至究竟無餘涅  
槃即無盡地也第六功德下二頌頌善現行  
第七四偈頌無著行對前思之第八安住下  
八偈頌難得行分五初一偈即自行之願次  
四神通次一外化次一求菩提後一成熟有  
情若屬經文初四偈頌前於佛法中得最勝  
解等十句二無量下三偈頌自行成益第三  
一偈頌前利他不捨一衆生著多衆生等第

九修習下六頌頌善法行初一修習力次一  
思擇力次二修定通次一報得通後一變化  
通若屬經文初偈頌釋名前半攝持正法後  
半不斷佛種亦大悲河次偈即波羅蜜河問  
答成就次偈即三昧河前舉三昧之用此約  
三昧之體次一即願智河次一十身體用後  
一即示現如來自在第十了達下四十三偈  
頌真實行文分為六第一三偈頌得十力二  
善守下三偈頌得三世諸佛無二語初偈正  
明依法修行即無二語餘二偈頌我為最勝

等三六偈頌同佛善根四法界下十一偈頌  
入佛種性於中分二初三偈頌身入餘頌意  
入於中初四頌入悲種性後智眼下四頌頌  
入智種性五成就下十八偈頌學三世諸佛  
真實語得佛十力等如文思之六一光下二  
頌頌益物不空第三大段四偈結歎深廣文  
顯可知

大方廣佛華嚴經疏卷第二十三

永樂北藏

大方廣佛華嚴經疏

第一六九册

大方廣佛華嚴經疏卷第二十四 最四

唐清涼山大華嚴寺沙門 澄觀撰

十無盡藏品第二十二 此下當第  
二十二經

初來意者總有五義一為答前第二會初十  
藏問故二前明正位今依位起行故同梵行  
品三前約位別行今辨始終通行故四前明  
成位行今辨淨治彼行故同十地中信等十  
行五前明自分究竟今辨勝進趣後同上明  
法準問應在十迴向後今此辨者略有二義  
一云藏有二義約蘊攝義在十行後約出生

義在十地前義通二處問答互顯一云迴向  
無別自體但以能迴前行為其自體今十藏  
既為十行勝進亦為迴向勝進故迴向後無  
別勝進此即前後互舉顯義方備然明法品  
及第五迴向皆有十藏隨三賢異故不相滯  
又前是勝進所成後是一位之果今通為勝  
進故意旨不同二釋名者藏是出生蘊積之  
義謂一藏內體舍法界故攝德出用一一無  
盡寄圓顯十即帶數釋也三宗趣者十藏為  
宗攝前生後得果為趣四釋文中大分四別

第一唱數顯同二徵名列異三依名廣釋四  
總歎勝能今初三世同說顯勝今遵二何等  
下徵名列異藏如前解信等對藏皆持業釋  
心淨名信制止名戒崇重賢善為慙輕拒暴  
惡為愧餐教廣轉為聞輟已惠人為施決擇  
諸法名慧令心明記為念任持所記為持巧  
宣所持為辯各有業用然念慧及信慙愧等  
五皆當體為性餘五行用立名此約隨相若  
就融通皆順法界之行良以法界性自清淨  
離過等故隨義說十然約隨相前九自利後

一利他通皆具二信為行本故首明之依信  
離過慙愧莊嚴戒行光潔上三離過之行餘  
皆進善進善之首必藉多聞如聞而行唯福  
與慧念使增明持令經久辯以利他故前七  
即七聖財慧為正導故終辨之次二守護後  
一積而能散法四第三依名廣釋十藏即為十段  
信中有四謂徵名釋相結名辨益辨益一種  
唯初七十餘之七段文但有二今初段中初  
徵可知釋中分三初明信相次若菩薩下明  
信力三此菩薩入佛下總結信成今初也十



句爲四初三三空信所執無相謂情有理無  
名空空亦無相空無相故無所願求次三信  
依他無生一緣起無作二不實故無能所分  
別三無體故無所依次三信圓成無性一廣  
無邊量二勝故無上三深不可越後一總信  
三性無生如初會辨則十皆無生並通三性  
如一無生觀但信依他無徧計人法自然之  
生性則是無性圓成餘例此知第二明信力  
中二先正顯業用後徵釋所由今初文有十  
句徧從前十前十並成此十若類例辨初二

於勝上法不怯次四廣多法不怯一所化衆  
生二即化法三是化處四化之所歸後四寬  
遠法不怯若剋文取義以後十句逆配前十  
謂由信法無生故於佛法不怯佛法以無生  
爲體故佛難超故衆生無盡故法界無邊故  
虛空無依故涅槃無分別故過去之因不作  
果故未來之法無可願故現在之法即無相  
故入劫無障礙以即空故此十皆深廣難思  
二徵釋中先徵意云何以深廣難思菩薩聞  
而不怯釋意云以於深廣皆堅信故文分爲

二初總後別總云一向信者無猶豫故堅者異說不壞故所信謂何即佛智慧智慧何相無邊無盡然通二義一廣無邊涯豎不可盡二無二邊之偏同真性之無盡二十方下別釋初釋前意十方無量是無邊義已現當入是無盡義言得菩提是自證義出世入滅是應現義法無邊故佛智無邊一佛之智尚不可盡況橫徧十方豎該三際菩薩於斯廣遠堅信不移寧有怯耶二彼諸下釋第二意聞深不怯謂已得今得菩提而不增當得未得

而不滅已出今出而不生已入今入而不滅當出而不進當入而不退現得出入而不近在於已當而不遠照窮萬法而無知頓寂諸相而不捨以寂照之體如如超戲論故但以世俗文字數故說有三世非菩提涅槃有去來今菩薩既堅信於此寧聞深而怯耶此二段釋文具前十句難思之法如文詳之第三總結信成於中二初一句總牒信成謂由明達佛智無邊無盡故稱此成信二得此信下顯成信之益亦是正顯成相有十一句前七

行體堅牢初句為總二內心不雜故不退三  
外緣不沮故四不染相故五有正慧故無慧  
之信長無明故靜法云梵云阿慕羅匿陀此  
云不從根生謂無生之信無根生故經本云  
常有根本者譯人不審阿字沒在上句翻無  
為有於理背也此或應爾今以理通二義無  
違無根語慧之體根本約慧之用亦猶從無  
住本立一切法故無本者即是根本六順同  
古聖故七安住菩提心故後四攝德無盡一  
護已成性二復長新解三順如生善四不滯

有無三是名下結四菩薩住此下辨益易知  
第二戒藏文三釋相中二初列十名後隨牒  
釋初中十戒皆通三聚取其相顯初但饒益  
有情後一律儀中八通三約遮過罪皆菩薩  
律儀但為救護等即是饒益攝善可知為顯  
此十皆通三聚故釋後一復顯三聚二牒釋  
中十戒為十皆先牒後釋初饒益者菩薩本  
意故首明之二不受中文有二意一不受邪  
戒謂雞狗等二三聚宿成動不踰矩三中唯  
為菩提及衆生故非如難陀之類四中涅槃

云何故持戒為不悔故何故不悔為歡喜故  
乃至為得大涅槃故五中有四非者違也一  
不違制立不同調達二不違涅槃不取相故  
三不違律儀具足持故四不違利物不惱他  
故六有二意一非為欲惱眾生先須持戒二  
非為欲成淨戒兼四逼惱眾生如殺馬祀等七中  
戒正見邪故名為雜定有定無為斷常雜觀  
緣性離非有非無則名為持又無煩惱之雜  
真出離矣八中不現異相彰已有德五邪之  
一已見淨行又如十住論說一者矯異二者

自親三者激動四者抑揚五者因利求利大  
同前引智度論說今文即矯異也九中不輕  
毀者無行經云見破戒人不說其過惡應念  
彼人久久亦當得道問涅槃云見破戒人應  
當擯黜訶責舉處當知是人得福無量豈不  
違於無行此經答略有三義一此經約自行  
涅槃據攝眾二此經約根未熟護恐增惡故  
且攝受涅槃約根熟者慈心拔濟故應折伏  
三彼約慈心此約輕毀故不同也十中釋內  
分二初明律儀十善眾戒之本故偏明之廣

如二地二菩薩持此下雙明二聚攝菩提善益衆生故第三慙藏釋相中二先標章二謂彼下別釋今初然慙愧相別諸說不同涅槃云慙者羞天愧者羞人慙者自不作惡愧者不教他作慙者內自羞恥愧者發露向人瑜伽四十四亦云內生羞恥為慙外生羞恥為愧大同涅槃後解成唯識云依自法力崇重賢善為慙依世間力輕拒暴惡為愧俱舍亦同若無慙愧但翻上慙愧謂不羞天則是無慙餘可例知若說羞恥為慙愧者是二通相

今經多同唯識而以不相恭敬為二通相二別釋中分二先釋過去作惡即無慙行二自惟下釋而生於慙前中亦二初自念無慙後一切下悲他亦爾第二正顯慙相中初自念昔非恥佛知見現修慙相自惟即是內自羞恥是故已下決志斷證文言去來現在行無慙者言總意別菩薩自惟昔過愍物三世常行故專心斷除防已伏之再起為衆生說則物我之兼亡第四愧藏釋相中三初自念無愧而修愧行故云我今不應復行是事即愧

行也二又作下傷物無愧不覺苦集故云無  
知無見三於母人下依顧世間而修愧行誓  
益自他於中初所愧境有智慧下顧他生愧  
即外羞也初因人後諸佛是故已下決志斷  
證言不淨之法者從姪欲生即種子不淨母  
人腹中即住處不淨成垢穢身即自相自性  
究竟髮白意舍究竟不淨又垢穢形是內汙  
穢不淨處胎受生有苦觸不淨從姪欲生下  
劣不淨若觀待涅槃三界並為不淨其五取  
蘊體是違壞不淨上來煩惱亦是不淨言誰

三世佛者違本四弘誓斷惑故餘文易了第  
五闡藏釋相中二初明所知之法後菩薩摩  
訶薩下顯多聞之意今初標稱聞藏釋云知  
者聞為本故實則多知耳文亦分二先標章  
後牒釋今初句雖有十義束為七初之四句  
但是緣生故謂一緣生二有漏五蘊三無漏  
五蘊四有為五無為六有記七無記二何等  
下牒釋即為七段初緣起中依生引二門開  
為四重徵釋謂十二支初二能引次五所引  
次三能生後二所生故為四也然依雜集第

四云十二有支皆具此有彼有等義故彼論  
文釋支相云相者謂無作緣生故無常緣生  
故勢用緣生故此有彼有者顯無作緣生義  
唯有緣故果法得有非緣有無作用能生果  
法此生故彼生者顯無常緣生義非無生法  
爲因故少有法生而得成立無明緣行等者  
顯勢用緣生義雖復諸法無作無常然不隨  
一法爲緣故一切果生以諸法功能差別故  
然今經中欲顯緣起無性舉前二門勢用一  
門六地廣辨就二門中從增勝說前後互舉

前七許同因位故名能引所引後五要因果  
相望云能生所生由此能所引中但云此有  
彼有後文則云此起彼起起即生也故集論  
云謂於因時有能引所引於果時有能生所  
生然文有染淨二觀初於能引中明染觀故  
云無明有故行有第二約所引亦通能所相  
對以明淨觀故云識無故名色無以識通能  
引有二種業一持諸有情所有業縛謂與行  
所引習氣俱生滅故二與名色作緣謂由識  
入母胎名色得增長今言識無者即不爲業

熏不持業縛故不入胎增長名色故云識無  
故名色無第三能生所生相對以明染觀故  
云愛起故苦起苦即當果愛即能生能生有  
三舉初攝末下明淨觀舉末攝初蓋巧辨影  
略耳第四亦能所生相對以明淨觀謂因亡  
果喪耳後之三門皆能所相望何以無明與  
行唯約能引而相望耶答欲顯十二支皆有  
無作無常二門故於初一位相次以明不爾  
則謂要四位相望方得此有彼有故下之三  
門欲顯四位不同故能所相望又為顯能引

支中或二或三故於前二別為一段蓋說者  
之妙也第二有漏五蘊蘊者積聚義雜集第  
一云藏果重擔義而標名世間者世即隱覆  
義隱覆勝義故又可破壞義三世所遷故間  
者墮虛偽中故隱覆之法即墮虛偽故世即  
是間然色等蘊通於無漏出世之義欲訶毀  
故略舉一分云何知之應知三種一知其相  
謂色以變礙為相受以領納為義想者取像  
行謂遷流識以了別二知其生滅謂生無所  
從來滅無所至三知其不生不滅謂法本不



生今則無滅故力林菩薩云分別此諸蘊其性本空寂空故不可滅此是無生義況知一切法趣蘊蘊即法界無礙方名真實多聞然諸蘊性性皆遷流隨勝立名行之一種雖標總稱即受別名又攝法多故第三無漏五蘊亦名無取五蘊最四然無漏蘊亦有二類一仍本名亦名色等不與漏相應故名爲無漏二從已轉立名即五分法身如今文是欲顯戒等德是可欣故從極果標以出世理實亦有世間戒等戒定慧三上來頻釋解脫即是離繫

爲名解脫知見由離繫縛於境自在觀求覺了智論八十八云戒衆者攝一切戒和合成衆衆即蘊也餘皆準之然即轉前五蘊成此五分謂轉色蘊成於戒身表無表戒皆色蘊故轉受蘊而成定身定名正受入四靜慮出四受故轉想成慧凡所有相皆是虛妄見相非相見法身故轉行爲解脫無貪等行名心解脫求斷無知慧解脫故又轉識成解脫知見若與邪受妄想相應謂識依根了別諸境若與正受智慧相應即是現量如實知故仁

王觀空品云觀色識受想行得戒忍知見忍  
定忍慧忍解脫忍即斯義也知見與慧此二  
何別佛地論第四總有三說略舉其一謂無  
漏淨戒名為戒蘊無漏定慧名定慧蘊無學  
勝解名解脫蘊無學正見名解脫知見蘊前  
三是因後二是果此五別說四法為性謂定  
慧勝解及無表色然此五分法身不覆勝義  
不為相遷不隨虛偽故名出世雜集云謂能  
對治三界無顛倒無戲論無分別故是出世  
間義問無取五纏即有為無漏何以言不為

相遷答約教異故前是權小所明若實教定  
說非為無為同真性故但似蘊相現立以蘊  
名故涅槃純陀云善覆如來有為之相應言  
如來同於無為況一一融攝若如是知名為  
多聞第四有為者瑜伽一百云有生滅繫屬  
因緣是名有為法四智論云有所得故是名有為  
二論心境為異今略舉四事三界即所依處  
衆生即能依之者然所依處隨心成異故論  
云欲所屬界名欲界等第五無為為者作也  
即前生滅今虛空等寂寞冲虛湛然常住無

彼造作故名無為。瑜伽云：無生滅不繫屬，因緣是名無為。智論云：無所得故名無為。淨名云：不墮數，故然。諸論總名大旨無別。然其名數開合不同。小乘多說三種，即此中初及三四諸大乘中，掌珍說四，謂加真如法相論中，或說有六，復加不動及想受滅，謂於擇滅中滅惑障，故名為擇滅。滅定障，故復加後二，或開為八，於真如中開出三性，謂善法、真如等，漸欲展此真如，徧諸法，故此經說六於擇滅中，開出涅槃二道，別故復加緣起，顯無一

事不即真，故略無二定，未究竟，故言虛空者，離諸障礙，無物所顯，故二涅槃者，古有二釋：一云性寂滅，故此即性淨涅槃；三十四亦同，此說此與擇滅顯未顯殊。一云即性淨之果，此即解脫道後擇滅，乃在無間道中，然大乘非擇滅，既約性淨，又下說法性，則後解為正。三數緣滅者，數謂慧數，由慧為緣，揀擇諸惑，能顯滅理，故唐三藏譯為擇滅，謂擇力所得滅，名為擇滅。然此滅言有其二義：一理性寂滅，此從所顯得名；二因滅惑顯名，理為

滅則從能顯得名四非數緣滅者非由慧數滅惑所得但以性淨及於緣缺之所顯故五緣起者有別有通別謂十二因緣故分別論者大眾一說難胤化地說出世部皆立十二緣起以為無為彼意以其次第作緣恒無雜亂故說為常有佛無佛此法自爾名曰無為故智論三十二云聲聞法中亦說法性實際故雜阿舍中說有一比丘問佛十二因緣為是佛作為是餘人作佛告比丘我不作十二因緣亦非餘人作有佛無佛諸法皆如法相

法位一切常有所謂是事有故是事有等涅槃亦說即是無為遠公云就人論法三世流轉是其有為廢人談法法相常定故曰無為望今經意緣起無性故曰無為大品云菩薩觀十二因緣如虛空不可盡涅槃云十二因緣即是佛性雖舉十二因緣即已攝陰界諸法六法性住者即真如也謂非妄倒故名真如又真實如常揀妄揀事於一切位恒如其性而云住者離遷變故與法為性是隨緣義復云住者是不變義即妄即真事皆如矣若

準智論法性法住各是一義云即為七法然  
小乘說三虛空則就外空復計三皆實有若  
大乘說非唯數增義亦有異唯識論中二義  
建立一唯心變故二依法性假施設有謂此  
諸義但一真如隨義假設一無相義二所證  
義五三感盡義四四性淨義五隨緣義六隨緣即  
不變義此中法性即是真如然法性真如亦  
假施設遮撥為無故說為有遮執為有故說  
為空勿謂虛幻故說為實理非妄倒故名真  
如為法之性名為法性非離色心別有實體

今多聞之人不唯知名而已應如是知第六  
有記法者有釋云謂能招愛非愛果故名有  
記此乃通說餘處辨記即是善惡今唯舉善  
應云順理善法可記錄故下出所記法體句  
有十一義攝唯五四聖諦如前本品已辨四  
沙門果如梵行品四辨如第九地三十七品  
如第四地四無所畏今當略明謂外難無怯  
故名無畏瑜伽云如來於此謗難都不見有  
如實因相由是因緣能自了知坦然無畏無  
畏有四一切智無畏二漏盡無畏三者障

道四出苦道此之四段各有難答初外難云若佛是一切智者有諸比丘從他方來何須問言安樂住不言一切智無所不知今問於他一切相反佛自唱言我是一切智人但為攝受來者隨順世間師弟人事故二有難云若佛自言漏求盡者何以愛語羅睺訶罵調達佛於此難正見無由安隱無怯自唱德號我實漏盡但為隨根而調伏故三有難云若佛說欲能障道者何故預流一來尚有妻子之愛佛於此難心無怯懼謂自唱德號我說欲能

障道但障不還羅漢非初二果四有難云若佛說諸聖道能盡苦者何故羅漢受瘡潰蛇螫之苦佛於此難心無怯懼自唱德號我說聖道實能盡苦邊際但說未來非現在故四中初一離所知障次離煩惱障三是出離道障四即出離之道初二自利後二利他所以自歎此四者初一為菩薩第二為聲聞後二通為智論二十八瑜伽五十對法十四廣辨其相第七無記中分二先徵名後謂世間下辨相今初無記二義一非善非惡不能招感

愛非愛果名為無記可釋餘文今此正謂虛妄推度非理問難不可記錄故名無記非對善惡故俱舍第十九云諸契經說十四無記即其義也亦名置記記即答也不應答故所以不答者何謂此乃無義語也知之不免生死不知不障涅槃前說有記則反於此智論第三云所以不答十四難者此事無實故諸法有常無此理故言斷亦爾如有人問犖於牛角得幾升乳豈曰問耶復次世界無窮猶如車輪復次無利有失墮惡邪中覆於四諦

諸法實相復次人不能知復次稱法說故第十七云有一比丘思惟十四難不能解辭佛不為弟子佛言我為老病死入說法濟度此是鬪諍法如中毒箭不應推尋楞伽亦云皆是世論非我所說言十四者即此中前四句其第四句十四但合為二謂身與神一身與神異然諸經論多說十四難而相或同異不繁會釋今經委論不出我法二執文分五段第一有四四句就我明無記第二過去下就三世橫論凡聖數之多少三何等下約凡聖

豎論初後四世間從何下徵三世間所從五何者下約生死際畔以辨無記今初句雖十六其過不出斷常二見言世間者準大品中通三世間謂衆生世間五蘊世間及器世間今此文意正顯衆生世間兼明五蘊世間以衆生是總主假者外道計以爲我故有邊等諸見初有邊四句約未來世常等四句約過去世如來有無依涅槃起故中論邪見品云我於過去世爲有爲是無世間常等見皆依過去世我於未來世爲作爲無作有邊等諸

見皆依未來世涅槃品云如來滅後有無等依涅槃起我及衆生有無四句約現在說既知起見之本次隨文別釋即爲四段第一四句言有邊者即斷見外道計我於後世更不復作則與此身俱盡無邊者謂我於後世更有所作三俱句者身盡故有邊我不異故無邊四俱非句者亦以我存身盡見上有過故立此句謂身盡故非無邊我存故非有邊既皆邪見故不答之若欲破者初之二句墮無後世過謂有邊則與陰同盡無邊則是今身

果四

十五



故皆無後世無後世者修道苦行為何益耶  
第三句亦有邊無邊者若身盡我存身我為  
一為異一則不應有盡不盡異則離蘊何相  
知有我耶若謂捨人生天人分猶在天分更  
增則半天半人故皆不可第四句非有邊未  
免於無非無邊未免於有云何於此強分別  
耶二常等四句約過去者過去世我即是今  
我名之為常若常即有大過破壞因果涅槃  
等故若謂我今始生名為無常若爾我是作  
法亦墮無因無因則亦無涅槃等第三見上

二過便謂我常身無常離身何處有我又成  
上二過第四謂我不異故非無常身有異故  
非常破同第三句又中論云一切法空故何  
有邊無邊及常等見餘義廣如彼論三如來  
滅後等四句釋有二義一明如來者非是佛  
也如即相似來謂從前際來謂一有執云如  
從前世來生此間去向後世亦復如是故云  
如來滅後有謂如前際來時有故此由計我  
異陰故二云如從前世來此間死後斷滅故  
云如來滅後無謂不如來時去故此計陰我

一故三由計我有麤細故謂麤我與身俱盡  
故云不如去細我異陰不同滅故亦如來時  
而去故云如來滅後亦有亦無四云我如虛  
空體無來去故晉經云如來滅後如去不如  
去等此則通望三世以辨若依中論附涅槃  
起四句如來即佛也最順此經文亦是外道自  
立已師而為如來有謂如來滅後定有不變  
或謂入無餘依同於太虛或謂法有應無或  
謂約應非有約法非無以其四句皆成戲論  
不見如來寂滅相故亦為邪見此則權小之

徒未能免也瑜伽八十七云依二道理如實  
隨觀俱不可記如來滅後若有若無所以者  
何且依勝義彼不可得況其滅後或有或無  
若依世俗為於諸行假立如來為於涅槃若  
於諸行如來滅後無有一行流轉可得爾時  
何處假立如來既無如來何有無等若於涅  
槃涅槃唯是無行所顯絕諸戲論自內所證  
絕戲論故施設為有不應道理亦復不應施  
設非有勿當損毀施設妙有寂靜涅槃又此  
涅槃極難知故最微細故說名甚深種種非

一諸行煩惱斷所顯故說名廣大現量比量  
及正教量所不量故說名無量四我及衆生  
有無等四句此並雙立衆生即是五蘊非約  
總主有即定有定有著常無即定無定無著  
斷三遠上二過雙立有無即墮相違四避此  
相違立俱非句又成戲論然此四句亦有單  
計我有所無所有我無亦不離初之二句又  
合上成第三互奪成第四亦不出初之二句  
第二門明三乘凡聖數之多少者以橫無邊  
故不可記也第三門豎無際故不可記也有

人答問云有初佛言自然悟引類祭天亦為  
應機寧加置記若有初佛如來應知則可說  
名言何法者染淨等一切法也第四門徵世  
間所從有六句初二句問衆生及蘊世間次  
四句約器世間以外道計衆生有最初生故  
或謂從冥諦中來還至冥故或謂世界皆微  
塵成謂至妙之色常恒不變聚則為身器散  
則成微塵故此皆邪見之源故不應答有情  
世間不言成壞者瑜伽云有情望器有五不  
同一謂器界生死共因所生有情生死但由

不共故是因不同二謂器有除斷有情流轉不斷故是時不同三謂三災壞不壞故名法不同四謂器界因無求斷有情不爾名斷不同五謂器則斷而復續有情斷已無續名續不同以斯義故略無成壞也第五約生死初後際唯有二句問初際無始聖教所明生死有終豈非正理答略有三義一約一人則可云終通望一切則無終極二以彼定執長邪見故亦不應答謂若許有終必有始故常法無始亦無終故三約法性皆不可說故中論

云大聖之所說本際不可得生死無有始亦復無有終若無有始終中當云何有是故於此中先後共亦無既言本際不可得亦不應定謂無始無終況有始終之見耶又有偈云真法及說者聽者難得故是故則生死非有邊無邊上諸邪見多是外道亦參小乘菩薩善知則問答無滯便舉破者令自他造中故也第二菩薩下顯多聞之意謂悲物無聞長淪生死故誓持聞藏自證利他第六施藏文三同前釋相中二第一標列十章第二佛子

下依章牒釋釋中十段一一各三謂標釋結  
然此十施前六事捨謂身命財次三心捨謂  
不取著後一俱捨名為究竟第一分滅施釋  
中三初明分減之相二若自食下明施善巧  
外無施境而不捨施心三復作下對治施障  
第二竭盡施者不顧活命傾竭所有也然施  
心須成施行須量若彼為成大利則身命無  
悞若彼但為貪求無厭或惡心欲行大害應  
以方便勿成人惡如月光王施頭與怨奪萬  
姓之歡施二人之死怨王喜死乞者恨死雖

有賢行未全可準今言竭盡者以彰菩薩施  
心已成有應施境終無悞也內施內外準此  
可知若不爾者菩薩能雨七珍充足一切何  
不施耶亦見衆生所不宜故釋相中三初明  
難施之物二或時下乞境現前三菩薩自念  
下正修施行下之四施皆有此三第三內施  
謂內身也四營者單也玉篇云無兄曰營無子  
曰獨頓者損也異者望也第四外施即王位  
也寔者無財備禮也第五內外施者王位為  
外兼身作役為內也第六一切施者凡所有

物也此與竭盡及內外施異者竭盡揀異分減但約資生內外合前二門空言作役五位今云一切通前諸門又是事捨之終故總該收舉難攝易略列數條廣則無邊如第六迴向所辨第七過去施者然三世之施通相皆明不著別則過去不生追戀未來預止貪求現在心無染著今過去釋中分二先明於佛法無著後又復下於一切法無著前中初二句總明次不起分別下別顯先顯不著之相不分別者稱法性故次不貪染不愛味亦不

方便求取以爲已德亦不依此而起修行次見法下廣上了達釋不著所由次但爲下釋疑疑云既俱無著云何而說釋云爲化衆生令無著故二於一切法無著者以般若智求不可得觸目現境尚了性空過往法中寧當計有第八未來施釋中分二先正顯後釋疑前中不著修行之因不願淨土之果不味其好不厭其事不迴向者釋上不味不自安處求勝樂故不退已下釋上不厭修彼行故二但欲下釋疑云既於淨不味修行何爲釋

有二意一者約悲但為攝物故二然此下約  
智智非有故生即非生故不著不礙事故  
非生之生故修行非有處所者與理冥故非  
無處所者事像形故非內者相分境故非外  
者心所淨故非近者十萬等殊故非遠者我  
淨土不毀故此約淨國以說若通論未來法  
者可以意知復作已下更約性空結成捨義  
又目擊尚捨況於未形第九現在施釋中有  
三初明所捨之境二聞已下正明捨心三為  
令下釋道外難今初先列諸天後列二乘功

德上二世中舉佛菩薩今舉諸天二乘者文  
影略耳天中初六欲界已如初會梵天已下  
明色界天然色界攝天多少諸說小異俱舍  
正理皆說十七故頌云三靜慮各三第四靜  
慮八長行之中建立十六以梵王梵輔同一  
天故瑜伽云處有十八謂色究竟外說大自  
在不言無想意在廣果中收今此即文而數  
有二十二然四禪初一皆是總標則初靜慮  
四二三各三第四有八還成十八正理初說  
有三今加梵身晉經梵眾名梵眷屬若然身

亦眾義則梵身是外所領之眾梵眾則為內眷屬眾梵輔即大梵前行列侍御大梵即彼天王獲中間定初生後歿威德等勝故名為大次光天下即二禪三天一自地天内光明最少故二光明轉勝量難測故三光音者口出淨光故次淨天下即三禪三天意地受樂廿一總名為淨一於自地中此淨最劣故名少淨二淨增難量故三此淨周普故次廣天下明四禪八天初三是凡離八災患皆稱福廣於自地中此福猶劣故名少廣二福難量故三

異生果中此最勝故無煩已上名五淨居謂離欲諸聖以聖道水濯煩惱垢故名為淨淨身所止故名淨居或此天中無異生雜純聖所止故名淨居一無煩者煩謂繁雜或謂繁廣無繁雜中此最初故繁廣天中此最劣故此依正理若順今經皆作此煩則無廣義二無熱者已善伏除雜修靜慮上中品障意樂調柔離熱惱故或熱者熾盛為義謂上品修靜慮及果此猶未證故三善現者已得上品雜修靜慮果德易彰故名善現四善見者雜



修定障餘品至微見極清徹故名善見經本  
先見後現或恐誤也五色究竟者更無有處  
於有色中能過於此故或此已到衆苦所依  
身最後邊故言乃至二乘功德者中間越於  
四空等故二正明捨心中聞上世出世境已  
不迷爲實不沈沒於貪不聚集其善因不散  
動以分別但觀下釋其所以可知三釋難者  
疑云旣言不聚善因何以說五乘因果釋云  
拯三塗之劇苦示人天以蘇息止劣見之妄  
情說二乘以引攝爲物然耳非自不捨也第

十究竟施文三同前徵名者略有五義得究  
竟名一前六捨財命次三捨著心今則兼上  
二門故二又發大願令物無著故三令物得  
究竟果故四不生一念愛著則微細無著故  
五究竟能令物實益故如無眼等而施之者  
如世凡人豈能將他之目安之於己廿二今菩薩  
福力令彼還得以慈善根力故如五百群賊  
平復如故故云究竟益釋相中三初施境現  
前二菩薩聞下正明施行三如我下迴向衆  
生二中分二初正施無悞二但自下釋成行

之由由入觀故此觀即是念處觀也皆言身者觀有通別別觀五蘊一一名身故淨名云是身如泡不得久立等通觀五陰皆無常等故智論云五陰即無常無常即苦苦即無我等今此不淨偏語色身餘之三觀皆通五蘊第一苦觀謂始從入胎皆生苦攝老等可知二又觀下明無我觀謂無真實主宰故無有慙愧者雖假以澡浴衣食一旦背恩如小兒故非賢聖物者是世間故故智論云由無我故令捨世間三臭穢下明不淨觀四復作下

明無常觀觀危脆故三迴向者揀小乘故然菩薩修此觀時以無所得而為方便故同法界故已不共小況迴向耶第七慧藏中分四一徵名二釋相三結名四歎益就釋相中二初明慧藏後釋無盡前中三初明如實知境次云何下釋如實知義三菩薩成就下總結多門以彰善巧今初以四諦慧照十種法攝十為五類前五五蘊次二有支後三三乘故收此五類不出二門初二凡境後三聖境又若後三就果則初二有作四諦後一無作四

諦界內界外因果異故此就所觀若約菩薩能觀皆無作也又初二流轉後三還滅前有滅道是流轉始修之還滅後有苦集是還滅未盡之流轉又前是所知之法後是能知之人人中有法即是前法歷於四諦是聲聞法所緣有支是緣覺法五蘊即是三乘共法皆如實知是菩薩法皆言如實知者下經總釋今當略辨一如事實二如理實十中前七當相是苦無明與愛有漏性故行苦隨故行蘊攝故緣成是集無性是滅顯滅為道從詮顯

故此則總說及就理滅若別說者不了無常不淨等過而生愛著名為色集若滅癡愛名為色滅唯止與觀是色滅道由止離愛由觀離癡若兼助道即有戒學及道品等受想行識例此可知無明集者由他言說不如理引由自妄想不正思惟滅此名滅言愛集者謂無明觸為緣所生受故亦滅此名滅癡愛之道皆同蘊說十二支中唯舉二者發業潤業唯此二故能引能生各舉初故從癡有愛病之源故涅槃三十四云從無明生愛當知是

愛即是無明從愛生取當知是取即無明愛等亦似斯義又約三際無明為本愛取為際此二中間有識等五及生老死今悟無明由迷過去有識等五現在之愛即是無明若不斷者輪轉不息今思斷之將來無復生死矣後三約淨聲聞是人四諦為法所行道品為集所成果為涅槃十二因緣是緣覺法無邊法界是菩薩法又知聲聞即是知苦以聲聞苦是已知故但舉其位法即是彼所行之法即是道諦集即是彼惑集未盡是為集諦已

有斷故法後說之涅槃即是滅諦已證滅故改名涅槃緣覺菩薩準斯可見前釋通因後釋就果若定以前二為分段後三為變易則小乘三果已前應受變易直往七地已下非此所知故不可也第二釋如實知義非唯能知行相亦顯所知之相也先徵後釋徵意云為隨相知為無相知若隨相知寧異凡小若無相知無相無知故言云何知後釋意云相知知性無有障礙是菩薩所知無知之知是菩薩知文分二別先約自利明知苦集後約

利他彰知滅道二文影略應各具四又二段  
中舍前五類具顯三乘今初段中知從業報  
是五蘊相業集報苦是二諦相言諸行因緣  
之所造作十二支相諸行因緣即是集相之  
所造作是苦諦相上辨知相一切已下顯知  
無相通於苦集初有二句共三乘相非我已  
下釋成上文揀二別相由非我故空無有實  
但假五陰是聲聞相以非堅固空無有實但  
緣成假是緣覺相若無少法可得空無有實  
但虛假幻相是菩薩相非安立諦無可成故

二欲今已下次約利他彰知滅道能知實性  
是道諦相法不可壞及所知性即滅諦相廣  
為宣說唯菩薩相文中二初標說意二為說  
下展轉徵釋總有三重初徵意云說何等法  
令知實性釋云說不可壞此略示其宗次徵  
云此不可壞為性為相此尋說處釋云非即  
性故五類等法皆不可壞依般若中自色已  
上種智已還悉皆徧歷後徵云現見諸法猶  
如聚沫泡焰芭蕉幻夢不實那言不壞下釋  
所由略由三義一色等性空無可壞故若壞

方空非本空故二由空即真同法性故若壞  
方真事在理外故三由即空不待壞故壞則  
斷滅文中十句五對初無我無造故不可壞  
二離能所詮故三能生不生所生不起故四  
因不取果果不與因故五體無動轉用無作  
相故第三總結多門以彰善巧者更有多門  
皆以無所得等為少方便則色空見盡壞與  
不壞兩亡不隨境轉名不由他悟第二釋無  
盡義有標徵釋結釋亦十事五對一因緣二  
教理三福智四持辨五智通福智中云一味

者百華異色共成一陰萬法雖殊貫之一智  
亦如上酥無不入也三結四歎文可知第八  
念藏釋相中有四一總標念體二所念差別  
三能念勝相四明念益相二憶念下所念差  
別中唯依宿住以辨明記略舉十事以顯無  
盡一生二劫三佛名四授記五演教六衆會  
七說義八根性九所治十能治文並可知十  
二分教今當略說舊名十二部經恐濫部帙  
改名分教各有二相唯修多羅或二或三修  
多羅者此云契經廣如初卷言二相者一是

總相謂涅槃十五云始從如是我聞終至歡  
喜奉行皆修多羅二者別相雜集十一云謂  
長行綴緝略說所應說義然更有異名異名  
有四一法本二但名經三直說四聖教言法  
本者遠公以五義釋之一教爲理本二經爲  
論本三總爲別本四初爲後本五略爲廣本  
以彼立三修多羅故一總相二別相三本相  
亦名略相總不異前別謂就前總相分出十  
一餘不收者還復攝在修多羅中名爲別相  
用斯別相望祇夜等爲其本故名初爲後本

言本相者於彼別相十二部中初略標舉名  
修多羅後廣釋者隨別名之如言色者即是  
根本略相復云青黃等者是名廣相故云略  
爲廣本然其後二不違雜集長行綴緝等言  
綴緝即是十一所不攝者如賢首品云爾時  
文殊師利說無濁亂清淨行大功德廿七已等類  
此是結集綴緝非佛正說故云十一所不攝  
者其略說所應說義即是略爲廣本如欲顯  
示菩提心功德故即其類也此第三略相亦  
順成實成實名直說語言總相而言名爲直

說一一語言多義分別名非直說斯則通十  
二分教皆有此一若十二分中修多羅並通  
前三若三藏修多羅唯局總相但開雜集別  
義以成後二有不曉者妄非先賢而云修多  
羅但依總相業用則違諸論長行綴緝等言  
二祇夜者此云應頌一與長行相應之頌由  
於長行說未盡故雜集云不了義經應更頌  
釋如十住品發心住頌即其類也二為後來  
應更頌故涅槃云佛昔為諸比丘說契經竟  
爾時復有利根衆生為聽法故後至佛所即

便問人如來向者為說何事佛時知已即因  
本經以偈頌曰我昔與汝等不識四真諦是  
故久流轉生死大苦海等三授記者梵云和  
伽羅那亦云記別記者錄也別謂分別一記  
弟子生死因果其文非一二記菩薩當成佛  
事如記彌勒此發心品及出現品並有其文  
四伽陀者此云諷頌諷即是頌謂孤起偈一  
為易誦持故二為樂偈者故三天偈讚皆是  
其流五尼陀那此云因緣一因請方說為重  
法故如三家五請等二因事方說知本末故



如觀善財又雜集云又有因緣制立學處即  
因事制戒亦第二攝六優陀那此云自說一  
為令知而請法故如十地本分等二為令所  
化生殷重故念佛慈悲為不請友如普賢行  
品等七本事者梵云伊帝目多伽一說佛往  
事如說威光太子等二說弟子往事如說諸  
善友因緣等八本生者梵云闍陀伽謂說音  
受身一說如來如說威光數數轉身值諸佛  
等二說弟子如諸善友等然其本事但云其  
事除所生事本生要說受身耳九方廣者梵

云毗佛略一廣大利樂故二正法廣陳故此  
經一部全受斯稱涅槃云所謂大乘方等經  
典其義廣大猶如虛空雜集開為五義云方  
廣者謂菩薩藏相應言說亦名廣破以能廣  
破一切障故亦名無比法無有諸法能比類  
故一切有情利益安樂所依處故宣說廣大  
甚深義故十未曾有者梵云阿浮達磨亦云  
希法一德業殊異故如佛初生即行七步斯  
經不起而升四天等二法體希奇故謂說佛  
菩薩不共功德經文非一十一譬喻者梵云

阿波陀那一為深智說似令解真故如法華云諸有智者以譬喻得解如出現品一一喻明二為淺識就彼取類誘令信故如為擔人說二蘊等此經所無雜集通說為令本義得明了故十二論義者梵云優波提舍一以理深故二義不了故並須循環研覈廿九或佛自說或菩薩相論如問明品等此之十二於大於小為局為通若皆大者則違涅槃等文涅槃第三云護大乘者受持九部法華第一云我此九部法隨順衆生說瑜伽等論說聲聞藏

無有方廣然諸經論且約一相故作是說如實說者大小皆具如深密中菩薩依十二分教修奢摩他瑜伽二十一云佛為聲聞一一具演十二分教而涅槃說大但有九者依三部中之小相故謂因緣中因事制戒於譬喻中依為誘引於論議中約非了義法華九部小者三相大故於記別中取記作佛自說之內依不請友方廣之中依廣大利樂其正法廣陳通大通小然契經望餘總相略相則許通有別相則無應頌諷頌本事本生互望

並無本事本生望於記別亦是互無自說因緣容得互有如因事說不由請故除上所除餘皆互有此經之中具足十二已如上引十二分教義已略周有欲廣知如涅槃十五雜集十一瑜伽八十一等說言一三昧種種性者如一定中凡小權實多差別故又多即入故三此念下明能念勝相於中十句一靜慮相應故二無漏俱轉故三淨信俱故四了知故五不取相故六離分別故七離所知故八與慧俱故九具上諸德故十離上諸過

故四菩薩住此下明念益相亦有十句既世與出世皆念故能離過成德並顯可知第九持藏釋相中三初別舉文義顯長時持二持一佛下徧舉諸法顯能廣持所持即前所念之法三佛子下辨能持德量文有十句一大之無外二廣能虛受三深難至底四四邊絕相五外無能制六體無分量七用無窮盡八內含眾德九因徹果源十餘無能究第十辯藏文有四別謂徵釋結歎釋相中四初總舉體用雙照事理二種實相名深智慧二說一

品下顯能廣演三或一日下明長時演二先  
正明後徵釋以是十藏之終故說具前十藏  
近接總持復舉陀羅尼門四其說法下彰辯  
之德亦有正明徵釋可知四歎勝中文有十  
句義該七辯一無窮盡是豐義味辯一一句  
中出多事理故二即捷辯欲言即言無分段  
故三無踈謬辯不以邪錯間深理故四無斷  
辯相續連環故五應辯應時應機無變異故  
六迅辯迅若懸河無隔礙故已下四句即一  
切世間最上妙辯此辯有五德一甚深如雷

即第八句二清徹遠聞故不退轉即第七句  
三其聲哀雅如迦陵頻伽故能普入一切佛  
法即第十句四能令衆生入心敬愛五其有  
聞者歡喜無厭故難可得入上二即第九句  
上來第三依章別釋竟第四佛子下總歎十  
藏勝能分三初標歎二徵釋釋有十句攝為  
五對一下化上求二賢窮橫徧三捨相契實  
四無變善攝五外護內明三是為下結歎此  
後應有偈等或是略無多是經來未盡第四  
會竟

大方廣佛華嚴經疏卷第二十四

音釋

矯舉夫切 擯黜擯必刃切 螻施隻切  
 詐也 尺律切 也也  
 擊居候切 榮渠管切 窶郡羽切

永樂北藏

大方廣佛華嚴經疏

第一六九册

永樂北藏

大方廣佛華嚴經疏

第一六九册

大方廣佛華嚴經疏卷第二十五 最五

唐清涼山大華嚴寺沙門澄觀撰

升兜率天宮品第二十三 從二十二經至二十五經一半

自下第五會明上賢十向四門同前初來意中先會來者正為答前迴向問故迴前解行以向真證廣益自他令行彌綸無不周故菩薩大乘藏經云以少善根引無量果者謂迴向心以迴向心為大利故故行後明之又前解行既著今悲願彌博後品來者前會既終將陳後說先明說處表法故來二釋名者先

會得名亦有二義同前二會二釋品名兜率是處佛以法界之身不起而應故名為升處此說者表位超勝是次第故又上下放逸此天知足表世間行滿故居喜足之天又以彼有一生補處表菩提之心功行滿故又積功累勲知階未足迴勲授子乃知有餘菩薩亦爾勤苦積行未見有餘迴向眾生乃知自足又欲界六天此居其中表悲智均平處於中故又生此天而修三福謂施戒定自餘不具偏多不均故處此說也第三宗趣者會以十

向大願為宗得地為趣品以升天赴感為宗說向為趣第四釋文此會有三品經初二當會由致後一正說所以無勝進者由二義故一以此會是三賢位終攝前解行總為趣地方便迴向當體自是勝進是故無也此經上下其例有四一約行滿入位之際如賢首品信滿總為入住方便二約願滿入證之際如此迴向初僧祇滿總為入地方便三約功用滿入無功用之際如第八地初總攝前七地以為方便此第二僧祇滿四約因位成滿之

際如第十地初攝前九地為入方便此約三僧祇滿處攝也餘同位相接即別有方便故非一例二方欲入地必離進趣相與無分別為方便故就初二品前一化主赴機後品助化讚佛今初品中大分十段一本會齊現二不離而升三見佛嚴處四迎佛興供五覩佛勝德六請佛處殿七如來受請八天王獲益九承力偈讚十如來就坐今初也初言神力即是徧因未必起神境通但是修成心自在力十方已下辨所現相於中亦有化主助化



望第四會既加及須彌頂此亦應云坐於樹下及須彌頂夜摩天宮文無者略以第二段中帶前升後既全舉前四則影顯前四皆圓徧也而演說者亦通四會之所說也第二爾時下明不離而升謂前十方一切處四會皆儼然不散而升此說意明橫徧十方豎該九會佛法界身徧時處故餘義具如第三會初第三時兜率下見佛嚴處中二初明感應緣會二即於已下正顯嚴處於中分二先明一方嚴處後結通十方今初初雖標座下列樓

帳等皆兼處嚴文分爲二初總顯體德後有百萬下別明體用今初有十一句初總餘別總中無盡大願隨意出生悲智必俱生死無染名摩尼藏展行彌布故有敷言別有十種圓滿勝相以斯妙座實德成故初一自體相以實成故次六因相一深遠相二勝妙相三廣大相四同體相五具德相六堅固相後三總顯殊特即座之德用一端嚴故二離染故三無極故二別明體用中通有三百二種百萬億廣上三段即爲三別初廣自體次有百

萬億初發心下廣前殊特三百萬億善根下廣前因相初一多明器世間嚴後二顯衆生世間嚴皆智正覺世間之力也皆言百萬億者位增十行之百萬故初中長分爲十前九色相嚴後一音聲嚴其一嚴事皆即法門可以意得第一有十句座體嚴於中初句辨座層級後九覆座之嚴雖四面行列執蓋亦爲覆座第二樓閣下十句復於殿內建立樓閣繞座莊嚴亦是嚴處於中初句總下九句別顯嚴閣第三寶鈴帳下十句辨帳嚴亦是

繞座前已辨覆故若重辨者帳上建樓樓上覆帳重重無盡耳第四妙寶華下有十二句辨嚴座身其頻婆帳應在寶華之前類例穩便亦可十二句辨帳九句嚴座身頻婆者此云身影質謂帳莊嚴具中現外質之影故第五因陀羅金剛寶下有十七句亦嚴座四周皆明妙寶以爲窻門及覆亦嚴座體以莊嚴其藏是蓮華藏故標中表法有異住行不言蓮華理實應有或是座身之龕名藏第六真珠瓔珞下十二句瓔珞周垂嚴其摩尼身下

二句文似缺略謂因陀羅妙色寶下無所結屬又非下之香類不可別為一段第七黑梅檀下有十六句以香為嚴阿樓那者此云紅赤色第八兩百萬下二十句兩雲為嚴第九建百萬下四十八句座外四面嚴於中有四初二十句雜雜莊嚴羅列座側言樓閣延表者靜法云梵云蒲莫迦此云帳舉若是樓閣應云微麼囊既不爾者譯之誤也此或應爾前文已有樓閣故若重辯者亦無大失寶悉底迦者具云塞縛悉底迦此云有樂若見此

相必獲安樂其形如萬字具於音義今寶形似此二光明寶下九句光明嚴言網覆者若世之燈以護夕蟲成隱暎故三天寶衣下九句寶衣敷布嚴四天鈴幢下十句寶幢行列嚴第十天蠶出妙音下辨音聲嚴於中二初十句樂音嚴後悅意音下二十句法音嚴前中云牟陀羅者此云鋒鼓謂天樂初奏此鼓先作故後法音嚴中初十一句讚歎三寶後隨順音下九句說法益物大文第二廣前殊特者前文略云見者無厭亦已略明益相今

廣顯之即座之德用恭敬供養復顯為嚴文  
分為二初明獲益後申供養前中有三十九  
句曲分為四初十約位辨益二得自在下有  
十二句雜辨得益三得檀下十句約行辨益  
四入一切佛刹下七句約大用辨益後三並  
通諸位或可第二段明迴向第三段明十行  
第四段明十地或唯約十住通別無礙二諸  
天恭敬下明供養文分為五初十七句雜明  
八部人天菩薩三業設敬其中所作各隨類  
所宜二天女專心下二十六句唯明諸天三

業敬養初之三句即欲界天色究竟後復言  
種種天者或通無色或總上諸類善思惟天  
亦通諸類三菩薩天下有十二句明菩薩事  
供養四諸天子從天宮出下四句諸天身供  
養五思惟菩薩下十句菩薩修法供養亦明  
得益菩薩多明得益諸天但說供養者諸天  
供養是益因故諸天侍益即菩薩故第三百  
萬億善根下廣前因深十句可知所以此會  
嚴事偏多者一此天多以補處為王故二賢  
位已極大悲普周故所以十住無菩薩嚴表

凡入位故夜摩即有已入位故然亦未廣而此勝相皆是如來海印所現法界差別自在實德人法無礙依正混融之嚴事也第二如此世界下結通十方于知第四爾時下迎佛興供於中二先將迎六供二爾時如來威神力下見佛興供前中二初奉迎二以清淨下興供於中先諸天興供皆從身出者非唯顯諸天福力亦表身為供具供自心生後兜率宮下菩薩興供可如第二見佛興供中二先諸天後百千億那由他先住下明菩薩前中

三初明承力見佛一現佛神力二宿善力三法門力二同興下慶遇奉迎三各以下正明興供於中三初十句衣盛供以散佛表修寂滅以趣果故二百千億下十句明起心雨供嚴空顯所修萬行第五稱法性空空有無礙是嚴空義三百千億那由他阿僧祇六天子下九句雜中供養表萬行雜修故調順寂靜無放逸心應分為二則有十句第二菩薩興供中二先明行成依報供後其諸菩薩下身出正報供前中二十七句文分為三初十句多因成

多果之供次八句一因成一果供後九句一因成多果供應有四句由多因成一果攝在初段以多因能一一成故又初段即一切中有一及一切中有一切次段即一中一後段即一中一切也今初十句一時併舉多因後通成諸供出過諸天者勝故多故餘可知第一二因一果中皆因果相似一蓋以障塵若度能除蔽二帳以庇蔭若悲為佛境華以開敷如覺解清淨三法忍和悅用嚴法身四演教網則震金剛之妙音觀教網則不礙文而

見理五香氣聞而不可見見而不可攬猶幻法見而不可取取而不可得知幻無堅以成堅法六周徧法空是佛智身所依之境座之義也七摧懈慢幢樹法勝幢故八諸法如夢是佛棲託之所也第三無著下一因多果供無著無生但是長五一義無生約理無著約智此二契合方成一因文中九句可知第二身出正報供中文有十句初二明現身德量謂一量周法界德齊佛故次以從下三句明勝辯之因次具足下四句顯勝辯所依後以不

可下一句正申辯讚皆從總持辯藏之所流  
故情動於中故形於言言猶不足敬之至也  
第五爾時一切下觀佛勝德中分二先明觀  
佛身雲勝德後爾時如來大悲下明現勝德  
意前中分二初觀佛勝德後爾時大衆咸見  
下見佛光用前通十眼所見後約天眼所見  
今初也然此經文次第具顯如來二十一種  
殊勝功德以文言浩汗致古釋同迷然離世  
間品雖具二十一而此文義兼廣故隨便  
引於諸論文分爲三初總觀如來次別觀德

相三結成觀解今初略舉三德以顯一雄一  
者如來二言應者即是應供三正等覺即正  
徧知此一應字亦通屬下隨應覺故此即總  
句離世間品名妙悟皆滿佛地攝論皆名最  
清淨覺親光釋云謂佛世尊普於一切有爲  
無爲所應覺境正開覺故此釋正義揀異邪  
覺又於一切所應覺境淨妙圓滿正開覺故  
此釋最清淨義亦明覺滿揀異菩薩又於一  
切如所有性盡所有性正開覺故此釋符今  
等字謂雙照二諦平等覺故亦是徧義故云

正徧知彼經無正等言此經缺最清淨上妙  
巖品則有最言故云於一切法成最正覺下  
離世間中復有妙悟妙者微妙離覺相故悟  
覺及知名異義同妙正徧最名義俱別所揀  
異故若世親無性不解總句但以下別德成  
斯一覺故清淨覺句皆徧第二其身下別  
觀德相二十一德分二十段後二合故然攝  
論中二十一德通有三節一先列經二十一  
句二無著菩薩立功德名以為解釋三無注  
等但釋論名以符經旨今各句句配屬其佛

地論釋有同攝論有異攝論異者引之今初  
明不二現行經也即觀察如來一向無障礙  
轉功德此是無著立名他皆做此無性二釋  
一云謂佛一向無障礙智於一切事品類差  
別無著無疑故非如聲聞等有處有障有處  
無障二種此約離所知障智德滿故非如聲  
聞有處有障者謂於極遠時方無邊差別諸  
佛法中有無智轉第二釋云或二處現行此  
中無有如是所說二種現行此釋二處亦前  
有障無障但前釋約表為一智轉此釋約遮



故無彼二正同下經二行永絕世親同於後  
釋親光云凡夫二乘現行二障世尊無故凡  
夫現行生死起諸雜染二乘現行涅槃棄利  
樂事世尊無彼現行二事故名不二現行無  
性生起云云何而得此最勝覺故次說此諸  
聲聞等於所知境有二現行所謂正智不染  
無知佛無此故文中分二初廣顯利樂明離  
所知故不同二乘二住於下結成所住彰離  
煩惱不同凡夫前中三初明應廣順機令喜  
二普徧下明其徧應定慧莊嚴生物善根三

示現下彰應用深雖超語言而無遺曲濟二  
結成所住者初句明智住法身能住所住二  
俱廣大下句心無煩惱善根清淨色相超倫  
具上二義名清淨覺他皆做此第二智慧已  
下明趣無相法即觀察如來於有無無二相  
真如最清淨能入功德無性云為明斷德故  
次說之不住生死涅槃相故即無住涅槃然  
無相法即是清淨真如趣謂趣入謂此真如  
諸法無性以為相故非是有相體即圓成自  
相有故非是無相此二不相離名無二相諸

法中勝故名最勝遠離客塵故名清淨既自能入亦令他入為最清淨自入則不住生死他入則不住涅槃文中先明自入後明他入今初先明不住生死智稱如境皆不可盡無比三昧令智出生又令真如出二障故二其身下明不住涅槃同體大悲徧住物身心真如性物徧故二令無量下辨令他入一則大悲冥熏二則大智為說令於身中見如來性成一切智故種性不斷是入義也此用常寂名為涅槃第三住於諸佛究竟已下明住

於佛住即觀察如來無功用佛事不休息功德為欲得上無住涅槃故次明之文中初明所住後彰住益今初言住佛住者謂聖天梵等皆佛所住而於空大悲徧善安住大悲性空即是佛家故能不住生死涅槃為究竟住此即恩德是以親光亦名為觀所調化功德常住大悲晝夜六時觀世間故後令不可下彰住家益初明由住大悲故能益物無遺是不休息義由住性空自無功用故能令物住無分別出過眾生總顯勝也第四獲一切下

明逮得一切佛平等性下云得佛平等即觀察如來於法身中所依意樂作事無差別功德如上佛住為共不共故次明之此一切諸佛展轉和雜而同住故一切諸佛三事無差非如聲聞但有所依文即分三初明所依無差別謂一切智以一切諸佛皆依真如清淨智故放大光下顯智之用二普使已下明意樂無差謂同有利樂勝意樂故普使之言即意樂也不可壞智即如來藏普賢菩薩自體徧故染而不染名不可壞反源照極故名安

住三徧住下作業無差一切皆作受用變化利他事故於中先明作業周徧次從於下作業所依即自受用身一受不失名為不退謂得法性即念不退此後親生佛智此智生已還住法界次明了已下正顯作業初觀機後現不可說下作業受用變化各有多類名不十一可說差別之身能令已下彰業之益一能益他二隨初下滿本所願亦令於物能現色身此上四段明其自利後十七段明其利他第五等觀衆生下明到無障處即觀察如來修

一切障對治功德利他之中先明化障對治故次明之謂已慣習一切煩惱及所知障對治聖道即一切智及定自在性故論名爲修治又已到永離一切習氣所依趣處經名到無障處二文互顯以有治必無障無障由有治故文中心無所著是無煩惱障住無礙住明無所知障得佛十力即是種智是所知障治心常寂定住一切智即煩惱障治第六善能開演下明不可轉法即觀察如來降伏一切外道功德由有上能治故他不能轉利有

情事故次明之謂教證二法皆不爲他所動轉故無有餘法勝過此故文中初明教道能悉已下證道出生已下二道之益第七恒以佛日下明所行無礙觀察如來生在世間不爲世法所礙功德顯示如來所化之中無高下礙故次明之謂世八風不能拘礙故親光名降魔功德謂色等境不能亂故文中以佛身日普照法界則橫無礙常現不沒則豎無礙不以無信生盲等而不現故正顯八風不礙恒住已下顯無礙因無有變異示無礙相如摩尼珠不隨物變

不著我所於內無礙世法不染於外無礙由  
住出世如蓮華故如有頌云諸佛常游於世  
間利樂一切有情類八法勢風邪分別不能  
傾動不拘礙第八於一切下明其所安立不  
可思議即觀察如來安立正法功德由依前  
方便能作饒益之事第十次明之謂十二分教  
名所安立由深廣故不可思議文中分二初  
約所詮以辨深廣後約能詮以明深廣今初  
初句總顯建即安立其智下釋超世廣大即  
是幢義拔置智地即是建義所有已下福智

相對明高廣義二以大慈下現身說法約能  
詮教以明安立第九於去來今下明遊於三  
世平等法性即觀察如來授記功德以上加  
行利有情事三世諸佛皆悉平等故次明之  
謂於三世平等性中能隨解了過去未來曾  
當轉事皆如現在而授記故故下經云普見  
三世文中初明三世平等之義故云心常清  
淨自得平等令物不著使他平等恒與已下  
正明授記授記未來令同過去種性亦名平  
等第十常遊十方下明其身流布一切世間

即觀察如來於一切世界示現受用變化身  
功德顯上利益一時頓徧非次第作故次明  
之文中初通辨二身常約豎窮徧約橫廣十  
方法界綺互其文後諸衆生心下總顯現相  
德無不淨故不住生死機無不鑒故普現世

果

十三

間第十一以智慧月下明於一切法智無疑  
滯即觀察如來斷疑功德以於上十方彼彼  
之處作斷疑事故次明之謂於諸境善決定  
故故下經云智恒明達一切諸法文中初自  
斷疑非不自決能斷他疑故智月普照總明

了境了達無得是了真境非不證真能了俗  
故恒以智下明了俗境一切皆以心為自性  
義通二境攝境為心是世俗勝義心之自性  
即是真如是勝義勝義如是而住以無所得  
而為方便雙照真俗無住住故菩薩智光月  
法界以為輪遊於畢竟空世間靡不現亦可  
屬上現受用身二隨諸已下能斷他疑初明  
隨機現身如來已下所斷疑境為說緣起是  
斷疑法深入緣起疑見亡故知緣起無性故  
知法無相無相無異故名一相智體理成故

爲其本後欲令下正明斷疑若離相著開示  
菩提疑方斷故第十二爲欲救下明於一切  
行成就大覺即觀察如來令入種種行功德  
由所化生性有差別故次明之謂入種種行  
皆成大覺下經但云了一切行文中初約說  
法令入開示佛道者令悟入故後令其下約  
現身令入攀緣修習是進善行除滅已下是  
離惡行修善提行總舉萬行心不散動即是  
入義既萬行齊修則因無不滿果無不成第  
十三悉能觀察下明於諸法智無有疑惑即

觀察如來當來法生妙智功德由即於前所  
化有能無能善巧別知故次明之謂聖聲聞  
言此人全無少分善根如來知彼善法當生  
現證過去微少善根種子所隨故故文云悉  
能觀察下經云盡一切疑如求度者速劫採  
薪興一善念佛便知故觀已便化故不壞其  
清淨業報智慧已下釋其所以以智普入無  
不知故故親光名爲能隨所應恒正教誨功  
德謂於諸法懷疑惑者無有堪能隨應教誨  
唯佛能故名智慧明了則第十一是自斷疑

此斷他疑第十四求離一切下明凡所現身不可分別下經但云無能測身即觀察如來如其勝解示現功德由上云善巧別知故此云於前所化邪正及俱行中無有分別文中初二句明無分別義世虛妄解種現俱亡故云求離由自無分別故餘不可以分別知故觀光名為能正攝受無染自體殊勝功德謂佛身功德非是雜染分別所起無煩惱業生之雜染故不可分別而無性云隨機現身如摩尼珠無分別者則順今文佛無分別不

順彼經不可之言次放光明下彰所示現皆無分別見無厭足而顯衆生不能分別如瞿波觀佛毛孔念念無厭不能窮究故以大功德下辨能現德出生已下明所現益諸根已下辨所現相謂諸根圓滿境界自在作諸佛事總彰現意作已便沒明現時分十五既隨勝解現則感謝應移第十五善能開示下明一切菩薩等所求智即觀察如來無量所依調伏有情加行功德為欲引發任持不定種性聲聞菩薩唯讚大乘故次明之言等所求者無



不求故佛地名爲正所求智謂唯菩薩正能  
求故文中初明所求即一切智此所求智即  
是無量菩薩所依而言道者通因果也爲諸  
已下即成所依義謂由無量菩薩爲欲調伏  
諸有情故發起加行要以佛增上力故聞法  
爲先獲得妙智而爲所依令其發起廣大欲  
樂者即是調伏有情加行受持修習者即成  
智之因第十六成就一切下明得佛無二住  
勝彼岸即觀察如來平等法身波羅蜜多成  
滿功德爲遮所化於大師所疑一切智非一

切智故次明之由滿諸度是一切智言無二  
者即平等也平等有二一法身平等於法身  
中滿諸度故二果位諸度無增減故名爲平  
等親光則以住於法身即是彼岸不說諸度  
故云法身無差別相名爲無二緣彼勝定常  
住其中故名爲住即無二住名勝彼岸佛已  
窮到故名爲得文中初滿諸度故云熾盛次  
無邊下以度滿故莊嚴法身故法華云微妙  
淨法身具相三十二以八十種好用莊嚴法  
身以十身圓融不相離故言一切世間者不

隔凡聖靡不現觀雙觀受用變化之身未離  
已下無二礙故和合識破相續心滅故於一  
切下顯現法身智純淨故於功德下諸度滿  
故第十七為大法王下明不相間雜如來解  
脫妙智究竟即觀察如來隨其勝解示現差  
別佛土功德以外人聞上平等謂同一性故  
次說言不相間雜謂一切如來十身體用各  
各別故猶如冥室千光但經云如來解脫無  
著釋云隨其勝解世親無性皆云此中勝解  
名為解脫又勝解者通機及佛故無性云謂

觀衆生勝解差別現金銀等工不相間雜如  
來勝解現在前時隨衆生樂皆悉顯現無不  
了知名如來解脫等親光又為一釋即離障  
解脫故云如來妙智令衆生解脫名如來解  
脫妙智佛於此智已得究竟觀今經中諸論  
各得一意復應加佛自得離障及作用解脫  
謂文云離諸障翳故具無邊德故令其入道  
故明見善惡是如來勝解其心所樂即衆生  
勝解是以不可偏取下經但云具足如來平  
等解脫在文分二初明變化身土不雜二明

受用身土不雜無著但云差別佛土略舉一  
邊親光則雙明身土合今文意今初變化中  
先身後土初中先總顯化身超勝次普現者  
通十法界身放智慧光合如日義欲令已下  
彰所化意能爲多化方顯佛德無邊所以名  
不間雜者以於一切世間普化一佛既爾餘  
何所化故知所屬不同重重皆徧是不間雜  
義後以無礙下別化因圓果滿之身初明因  
圓爲大醫下現果滿身二一切世下明現化  
土初明非唯能化亦能徧往清淨慧下明佛

觀機即是如來勝解現前於作不善下隨機  
現土等隨諸衆生應以何國起調伏心入佛  
智慧而取佛土故云善取時宜無適淨穢故  
云種種欲該餘化略無土言義必含有又對  
後平等但言不善亦應含有有漏之善二若  
諸衆生下現受用身土先土後身已證真如  
名平等心觀受用土是平等報上則心有高  
下此則依於佛慧後隨其心樂下現受用身  
故親光云於淨佛土現受用身亦不相雜令  
其已下明現之益親光云大集會中現種種

身與諸菩薩受用法樂亦不相雜得智心喜等皆法樂也又心大歡喜即是初地見諸佛故生歡喜等以證生信故名深重以證不退故得末言第十八一切衆生下明證無中邊佛平等地即觀察如來三種佛身方處無限功德由疑上如來妙智究竟非一非異其相云何故次明此無中邊等常無常等皆二邊相言方處者謂諸世界無分限者釋無中邊此無中邊略有四義一世界無中邊佛德如彼無有分限二世界無邊諸佛十身即於

其中稱世界量平等徧滿三此法身等於佛地中平等徧滿無中無邊無有分限四此法身等徧一切處為諸衆生現作饒益然非自性無中無邊親光復名此為真如相殊勝功德謂真如相無有中邊如此真如即是佛地四五平等法性證此性故徧知一切於中不染今此文中總顯十身皆無分限文中分二先別顯四智十身後無數下總結因果今初先就覺他翻明自覺成就法身於中先明覺他即妙觀察智及成所作智之所利樂若得見下

彰其所益無依義智即大圓鏡是無中邊佛  
平等地以無礙智身無所依故則證真如為  
佛地性轉昔染依為智所依即是如如及如  
如智既令他證顯自己證也次智慧下二句  
即妙觀察智莊嚴無奪顯圓鏡智所現之影  
智山清淨即平等性智平等高出所以名山  
四惑已亡故云清淨因惑為種生必待時今  
能生自在故種受芽稱或現已下即平等性  
所現之影兼顯十身不唯此二故復言或令  
諸眾生至無患地者即成佛地以遠離微細

念故名為無患後總結中初總明謂十力四  
智等莊嚴法身業行所成即是報佛現於世  
間結他受用及變化身總上諸義則有十身  
一切已下總結異因同歸一智謂智導萬行  
故能證此佛平等地若報若化無不清淨第  
十九常守本願下明極於法界即觀察如來  
窮生死際常現利益安樂一切有情功德以  
上言無中邊相云何無相故次云極於法界  
謂此法界最清淨故離諸戲論是法界相能  
起等流利益之事極此法界無有盡期親光

亦名此德為證得果相殊勝功德謂得窮極清淨法界如是法界修道得故以斯則極法界言有於二義一同法界常故二同法界清淨故文中先明常利樂二廣利樂今初常守本願者謂本發心法界生界若有盡者我願乃盡今生界未窮故常現利樂作善友者世之善友略有七事一遭苦不捨二貧賤不輕三密事相告四遮相覆藏五難作能作六難與能與七難忍能忍如來亦爾為物隨於六趣苦而不捨貧無法財而不見輕本性客塵

無不相告善根未熟則以權覆實堪真實化則以實覆虛著弊垢衣執除糞器為難作能作解髻明珠為難與能與生違佛化乃至多劫心無退動為難忍能忍無不究竟方名堅固次清淨已下明同法界清淨雖復常化離能所相故名第一次六趣下廣多不捨次若有已下不捨昔緣次而於下通顯不捨若暫不隨則捨本願如願能作名不欺誑次悉以下彰攝巧益令同法界清淨摧魔惑故第二十從無礙際下顯於二句謂盡虛空性窮未

來際即觀察如來無盡等功德謂上利樂皆  
無盡故深密佛地具斯二句開則別中自有  
二十一句下離世間但云等虛空界而無窮  
未來際欲顯圓數故親光亦云次後二句顯  
示世尊無盡功德初句自利後句利他故云  
謂如虛空經成壞劫性常無盡如來一切真  
實功德亦復如是如未來際無有盡期利他  
功德亦復如是而無著釋但云無盡功德等  
不言開合世親無性開此等字為究竟功德  
故皆云等言等取究竟功德則以無盡功德

釋初句究竟功德釋後句而無性意後句是  
究竟無盡與前無盡異者前則橫論無盡故  
云盡一切界徧作有情諸饒益事後句則豎  
顯無盡故云顯佛功德求無窮盡所化有情  
求無盡故同顯無盡故二句合自他等異二  
句則開今文意合欲顯二利不相離故窮未  
來際通在極於法界及盡虛空故前段中已  
顯常隨不捨為順二論文分為兩初唯橫論  
無盡正明盡虛空性二為上福田下雙約橫  
豎以顯無盡兼明窮未來際今初先二句總

言無礙際者即法身智身如彼虛空無有障礙無邊無際無盡無滅無生無滅無有變易名無礙際而能現前作諸利樂如彼虛空容受質礙故云出廣大力次最勝日下別顯依空無礙之用略舉一日而有四德一蘊藏千光二百川現影三有目皆覩四生成萬差名種種施上一段文言舍法喻佛是已下唯就法說初光明藏即上日藏身智光明含攝出生故諸力已下如日無缺恒以大下如日舒光離諸魔敵降老死怨如日大明衆景奪耀

不獨合上故文有影略二雙約橫豎論無盡者但云一切通於十方及來際故文中先明爲生福智之田上福田者具前德故凡所以下釋上田義三義名上一令清淨如無荒穢二因少果多如涅槃說純陀施福三入無盡智如田隨種隨生如穀展轉無盡成金剛種終不銷故具斯三義稱曰上田次爲一切下顯爲田主次爲一切衆生發生下明體即是田後智慧下明能爲田義具悲智故初權實無二總爲一智對下能救悲智無礙合爲一



心則是如來最清淨覺上所引功德之名全  
依無著其所解釋多依無性有不同者亦已  
對決與世間品小有同異大旨無違至下品  
中當更顯示依上所釋文旨有據德相可分  
若列宿羅空粲然不雜豈得寬文廣申辭句  
於佛勝德蔑然略陳幸諸後學不咎其繁而  
不要也第三如是下結成觀解謂前諸德不  
出內德及與外相今初二句總明能觀信解  
約於仰推觀察通於諸眼後之八句就所顯  
德以辨能觀前四內德後四外相前中謂佛

內德無量不出福智前二福智之體智慧之  
淵略語其深功德之海義兼深廣淵宜趣入  
海宜遊涉次二句福智之用智廣虛空福無  
不益稱此而了名普至知後四外相中初一  
句重舉能觀揀內外故言正念者明非散心  
了佛德相唯心無性靜而能聖復云觀察後  
三句亦就所觀以辨能觀初一句總後二句  
別身雲普現即是相好神通自在即前業用  
前二十一德中或一句之內言兼福智一德  
之內體用雙明若別配屬義成偏近第二時

彼大衆下明見佛光用前雖有用乃觀如來常所具德今現目觀故不同也文中三初觀常光二觀放光三顯光意今初雖云毛出意取常出有十一句初總餘別前三光相後七光益二爾時下觀放光中先舉體相後以佛下辨光業用文有五現一說法二現嚴此二皆先現後因三現佛則先現後意令成教證二甚深故四現神變五現寶焰光皆先現後因第三爲顯下現光意並顯可知第二爾時如來下明現勝德之意文分二別先牒前現

慈悲爲能現智爲所現者影略其文應以依二嚴體現二嚴德二欲令下正明現意分二先明下益衆生二開示如來下明上弘佛道今初分二先彰現益後世尊下辨現益之因今初先舉所益後未信下辨益不同然此益中文舍多勢且依一判先約行布初世三五十信始自初信令心調伏信位滿故次觀下七句皆十住益謂初二句是住中觀慧次二句下化上求之心後三句住中證入知心自性故曰不違不退二乘故不怖實際不由他悟是

證實理圓教十住許入證故三滿足下三句  
十行益初句位中之行後二句位中之德四  
離魔下三句十向益初句起行一向利他離  
二乘等魔迴向菩提故入佛境次句得法隨  
相離相無礙難思後句行成五常見諸下盡  
明十地初四句皆歡喜地一見受用身故稱  
曰常二根本證真後得證無量法又證徧行  
真如亦名無量三則僧祇積福證理出生名  
福藏力四發歡喜心是此位名入見道故名  
無疑地離惡清淨是第二地根一切智見法

不動是三四地得入一切菩薩衆會是五六  
七地常生佛家八地已上念無有間故曰常  
生若約圓融初之五句信中攝位句各一位  
如理思之從觀甚深下義通諸位以圓教中  
位位攝德故二辨現因既積善所成故爲益  
深大爲欲調伏諸衆生故一文含二勢一  
結前謂結因所屬二生後生後開示亦是爲  
生第二明上弘佛道中分二先別彰所爲二  
自在已下舉因結歎前中有十七句爲欲顯  
前二十一種殊勝功德初句爲總餘皆是別

於中前五各攝二德餘句各一第一照明無礙智慧藏句顯二德者一顯不二現行故云無礙無二礙故二顯趣無相法故云照智慧藏慧為能照藏即所照無相真如照明趣達眼目殊稱第二句一顯住於佛住謂住空大悲任運利樂無休息時名曰熾然二顯逮得一切佛平等住謂依清淨智起利樂意作二身業皆熾然故第三句一顯到無障處二顯不可轉法謂此二是降魔伏外功德前由有對治則不為他動今由有神變乃能轉他第

四句一為顯所行無礙今徧趣現身即是所行有漏盡通八風不染又神通力即能徧因二顯其所安立不可思議謂佛威神所建立故第五句初顯遊於三世平等法性約記三世事亦是神通無邊際言即平等性二顯其身流布一切世間此言甚顯下皆各攝一德六顯於一切法智無疑滯本願已滿故七顯於一切行成最正覺名智徧往八顯於諸法智無有疑惑名於法自在九顯一切菩薩等所求智十顯凡所現身不可分別十一為顯

得佛無二住勝彼岸彼岸已圓十身殊妙故  
十二顯不相間雜如來解脫妙智究竟功德  
又諸佛平等皆徧而不相雜故十三顯證無  
中邊佛平等地平等之地即清淨藏十四顯  
極同法界故云上妙十五有十力世五既能盡虛  
空見者無厭世五十六窮未來際故照三世第二  
舉因結歎前舉積因後歎無盡第六爾時完  
率下天王請佛處殿亦稱五號並曰善來及  
下文意皆如第三會說第七爾時世尊下如  
來受請分二先受請入殿二爾時一切下入

已現嚴前中光明此界後辨結通前中初一  
句明能應之德次明所為之意三正受請並  
顯可知第二現嚴顯是佛力故出過諸天第  
八時兜率宮下天王獲益文中初得定益往  
昔已下是進善益佛神力言通此二益十住  
位劣攝散歸靜故樂音止息此位超勝得動  
實性故動寂無二熾然音樂心不動也第九  
爾時下承力偈讚然憶念昔因亦是益相取  
文便故為說偈依文中二先明此處偈讚後  
結通十方前中先說偈所依後正陳偈讚十

頌頌各一佛佛名有異略無別德餘同前會  
 此佛即前會十佛次前十佛寄位漸深憶念  
 漸遠耳第十爾時世尊下如來就座文分四  
 別一明就座二法身下顯德亦大同前二十  
 一德恐厭繁文不能具釋三不可說下眾集  
 即眷屬圓滿然後品眾集有所表故但云一  
 萬理實徧集故此但云不可說眾未必但是  
 後品之人四坐此座下現嚴初此界後結通  
 有云此升座一段宜置入殿之後歎處之前  
 迴文不曉者未必然也謂初請入殿讚為請

坐於理何違

兜率宮中偈讚品第二十四二下三經初來  
 意者前明化主赴感今明助化讚揚及顯位  
 體所依故次來也二釋名者謂十方菩薩於  
 此宮中讚佛實德故受斯名通二種釋如第  
 三會三宗趣者集眾放光偈讚為宗為說迴  
 向為趣四釋文亦三初集眾二放光三偈讚  
 初中二先明集因謂佛神力二十方下眾集  
 於中文二先明此會後如此世界下結通今  
 初長分十段一總舉上首二眷屬數三來處

遠近位增數增故各一萬四主菩薩名同名  
幢者略有五義一高出義表三賢位極故二  
建立義大悲大智建立衆生及菩提故三歸  
向義謂大悲攝生智願攝善歸向菩提及實  
際故四摧殄義如猛將幢降伏一切諸魔軍  
故五滅怖畏義如帝釋幢不怖惑業故異名  
即表十向行體至偈當明五所從來刹皆稱  
妙者迴向之力微善彌於法界故其別名即  
表十向所修法門一救護衆生離衆生相最  
可貴故二得不壞信常樂因故三等佛白淨

故四如金徧至諸色像故五出用無盡如摩  
尼故六善根堅固如金剛故七隨順衆生不  
染塵故八真如之因如水生華最爲勝故九  
如白栴檀能去熱惱之縛著故十如彼香氣  
能普周故故下文慈氏座前燒最五一九香彌滿廿七  
法界即其事也六本所事佛同名幢義不異  
菩薩別名即表修十向智亦表當位之果謂  
一救護之心不可盡故成無盡佛二如空中  
風不住不壞故三等佛解脫故四四威儀中  
無不至故五明了功德相故六常能隨順善

根故七隨順衆生善最勝故八同於真如得自在故九淨無垢染不縛著故十觀察即是入法界故七其諸已下至已修敬八以佛神力下善住威儀座體云妙寶者十住以慧光徧照故以毗盧遮那藏爲體十行以行淨離垢故以摩尼藏爲體今十向大悲處於生死普該萬法不拘手一故座體直云妙寶不限色類以教行徧周籠攝衆生加以寶網彌覆其上九其身悉放下放光利物此位多辨悲智救物故復辨此於中初光體次此無量下

辨光因即圓淨迴向心後顯示下略示光業一智敬上業二悲救下業十其菩薩衆下略讚勝德有十一句初總餘別別中十門一神通門二入證門三以智下依智修福四入於下上入果用五住於下住善決擇六於諸下四辯無盡七智開總持八慧眼見性九智慧徧知十究竟離障結通可知第二爾時世尊下放光文分四別一放光處言膝輪者位漸高故又表迴因向果等有屈申進趣之相故又悲智相導屈申無住故二放百千下光數



三普照下光照分齊四彼諸下光所作業謂  
令彼此互相見故於中分三初正明彼此相  
見二如是下釋見所由三如是等下結德所  
屬二中由二因故見一宿因同行故二悉已  
下現德圓滿故文有二十句束為十對一離  
障成身對二入刹近佛對三用速心淨對四  
外護內證對五能覺所覺對謂一切智處是  
所覺故六用廣證深對身即智身同住法界  
及大悲故七得智生身對身即應身八行深  
解廣對九智極定深對此位中顯名金剛幢

對金剛定即菩提智十得通立法對由得通  
故調化無數由離數故而能安立數有二種  
一數量數二色心有為皆名為數今文具二  
謂由不著一多能立一切故不著於有能安  
立故即真俗鎔融謂世俗幻有之相相本自  
空勝義真空之理理常自有有是空有非常  
有斯有未嘗不空空是有空非斷空此空何  
嘗不有有空空有體一名殊名殊故真俗互  
乖迢然不雜體一故空有相順冥然不二一  
與不一不即不離鎔融無礙菩薩智契其源

所以雖迴絕無寄而善修安立三結德所屬  
謂無盡德屬於此會菩薩及光中所見也第  
三偈讚中十菩薩即爲十段亦十方如次皆  
先標說人及說儀式今初東方金剛幢者此  
是會主名舍總別總顯迴向不出悲智金剛  
者堅利也即悲之智二乘實際不能壞堅也  
斷難斷惑利也故文云智慧到彼岸即智之  
悲愛見不能動堅也無所不救利也故文中  
徧刹利生七十八云譬如金剛唯從金剛處  
及金處生非餘寶處生菩提心金剛亦復如

是唯從大悲救護衆生金剛處一切智智殊  
勝境界金處而生非餘衆生善根處生故知  
金剛不獨喻智攻般若者不得此意但以標  
名獨將金剛喻於般若不觀文中悲濟九類  
而無所度悲智相導方爲真實不共般若智  
者應知別名即是救護衆生悲也離衆生相  
智也義不殊總說頌儀式頻見上文正顯頌  
文十頌歎佛寂用無礙德大分爲二初八讚  
佛勝德後二結勸修行今初分三初五偈寂  
而常用次一偈用而常寂後二無礙自在今

初分三初二偈無生滅而示生滅於中前偈  
就法正顯後偈寄對顯深以依體起用體用  
無礙故難思議又心有心想動不能行故難  
思議智無智相名到彼岸方見佛境次二偈  
非色聲而現色聲亦前偈就法正顯後偈寄  
對顯深少智謂權小久修謂圓機素習見聞  
故能了實後一頌明無來去而示來去覺處  
即現不從方來迷處自無不從此去以神力  
故示有來去然從神力中來即無來矣二用  
常寂中三句用末句寂三無礙自在中初偈

了事理無礙起用自在後偈了生法無礙起  
用自在可知後二偈結勸中初偈勸修智進  
行後偈勸修福斷疑第二南方堅固者表不  
壞迴向故菩提心堅故觀佛無厭故十頌多  
明如來為物所依德於中分二初三讚佛勝  
德後七勸修辨益前中初頌明佛體離言次  
偈無相現相後偈現相所因後七中舉修有  
益即顯佛德深玄文中分三初偈指德勸依  
即結前生後次三示能入者令物思齊各先  
舉行後彰行益後三正勸進修然夫進修略

有五法謂欲精進念巧慧一心初偈明欲次  
偈辨念後偈巧慧前二正明後一反顯一心  
精進攝在志求之中又慈氏論引醍醐喻經  
共說九善謂一切法欲為根本作意所生觸  
所集起受所引攝以念為主定為上首慧為  
最勝解脫為堅固出離為後邊有前未必有  
後有後定須有前是故先說欲為其本下二  
句揀非惡欲為勝希望次偈上半念主下半  
作意後偈反釋初句慧勝次句觸集及受次  
句定及解脫後句出離第三西方菩薩淨心

智力見佛盡源等一切佛故名勇猛十頌分  
二前六明感應道交見佛聞法後四令捨偽  
求真拂見聞相故此一段總顯如來見聞弘  
益之德前中前五各上半喻下半合通分為  
二初二見佛後四聞法前中初偈雙明感應  
淨心如淨眼為見之因佛力如日為見之緣<sup>世</sup>  
如來如色為見之境如人入闇則無所見斯  
則獨因不見也如明淨日瞽者莫見獨緣不  
見也此辨因緣和合方能見也後偈偏舉於  
感以因奪緣如出現品云此非如來威神之

力等後聞法中四偈分三初偈顯因能生法  
次二顯得法之益前偈得權智能離所知心  
垢後偈有根本智能除煩惱之患三一偈顯  
緣令聞法故上文云佛法無人說雖慧莫能  
了後四令捨偽求真中二前一示偽令捨住  
相施故以色見佛行邪道故後三顯真令求  
初二偈顯真佛前偈即相非相故非色能見  
後偈即寂而應故不可以寂取末偈顯真法  
真法無生亦無滅故第四北方菩薩以大悲  
力運智慧光朗彼重昏無所不至名光明幢

又以智慧令諸善根無所不至故此頌中多  
顯如來即體化用周普之德十頌分三初一  
化用廣亦明化處次七化用深亦明化依後  
二雙結釋化依中分四初四雙明能所依次  
一拂其能化心次一拂其所依體後一雙融  
自在亦拂能依今初初偈總明一多無礙依  
一總心變多王所於一實佛應化多端故無  
礙也次一相二無礙無相現相無二現二體  
絕能所故云無二相依身有是即二也然相  
二相對應成四句略舉其一無二現二即於

一現多乃至百千亦名二故次偈顯依性起  
起不異性故如幻無盡後偈從法身流舉三  
世佛以顯道同二拂能化心中謂如摩尼珠  
無私成事故三一偈拂所依謂上無二無相  
法性法身即是法界法界本自無差亦無定  
有為化依止由無依無別故為依為別故下  
文云虛空雖無所依能令三千世界而得安  
住如空無色而能顯現一切諸色四一偈雙  
融自在言非非化者此有二義一假非化以  
遣化非謂是非化則上半約體絕待下半依

體起用二不礙化故然真化無二融為一身  
不壞體用名依真起依真起者則報亦依真  
非謂三身獨一是化且依真起化略有二門  
開義二融合初中真應各有二義真中一  
不變義謂雖化而常湛然初句顯之二隨緣  
義謂不守自性無不現故故云亦復非非化  
二約化中一無體即空義謂攬緣無性故云  
於無化法中二從緣幻有義故云示有變化  
形二融合中亦二義一真化別合二真化融  
通初中由真中隨緣即不變故是故亦真亦

非真非真非不真名真法身化中體空即幻  
有故是故亦化亦非化非不化名為佛  
化身二融通者謂由真不變顯化體空此真  
不無化不有以為法身而不無化用以有化  
中空義故又由真隨緣顯化幻有此是化不  
無真不有以為化身而不無真理以有真中  
隨緣義故又由隨緣幻有不異不變體空故  
是故現化紛然未嘗不寂真性湛然未曾不  
化真化鎔融為一無礙清淨法界宜審思之  
第三二偈雙結釋中前偈結歸於體謂智冥

真境等法界故深無底等虛空故廣無涯皆  
絕言道為不可量後偈舉因釋成所以法界  
無礙者智行徧故第五東北方於佛寂用之  
境決斷無礙故又智導萬行出生無盡故名  
智幢故頌中多歎如來應現出生無盡無礙  
之德十頌分二初一標章勸信信有修行之  
益後九所信勝德於中分二初一總餘八別  
總中上半用而無盡下半寂而無住不著應  
處不住法體即本末雙寂也通為寂用無礙  
別中二初二明無盡一一衆生前能現無盡

身故衆生可知佛不可數後六明無礙於中  
三初四一異無礙亦是本末無礙一法二喻  
三合四釋次一偈延促無礙後一偈性相無  
礙第六東南方菩薩以圓淨智照平等理不  
礙應現隨順一切如摩尼寶故名寶幢頌中  
多顯平等超世之德十頌分二前五總顯難  
思後五迥超時數前中初二正明前一超量  
現量後一起處徧處故出現品云譬如虛空  
徧至一切色非色處等如是難思雙結上二  
後三展轉釋成初云何以難思若身若處非

生滅心行之境故何以非心境佛自不起心  
故何以不起體無生滅故若爾何以現見次  
偈釋云病眼所觀取色分齊勿謂爲實次疑  
云若爾豈無如來出現世耶次偈釋云自機  
見耳上三句以應就感衆生謂出末句旣因  
物感出即非出名實不出故諸法無行經云  
如來不出世亦不度衆生衆生強分別作佛  
度衆生旣無有出安有沒耶上三亦初一超  
心行次一起內外後一起出沒後五偈迥超  
時數而現時數於中初一偈結前標後國土



結前處故後四別顯超時初偈立宗上半牒  
妄情下半正立菩提是有法定不繫時是宗  
法次偈立三因一智無分別故二三世不遷  
故三體非有為之數故次偈舉同喻謂日體  
常明故不合昏夜後偈合結上半合下半結  
合中語倒若順應云一切諸如來不與三世  
合又若以超時現時為宗者則上宗中四句  
皆宗應云菩提是有法定不繫日隨機說日  
是宗法因云體非三世等不礙三世等故同  
喻云如日輪不合昏夜以山暎故說有日夜

合云佛無三世以不應見機之所暎故而說  
三世是則上三句皆合下一句結第七西南  
方勤觀如來真應皆同故能平等隨順一切  
眾生名精進幢十頌顯此同義文分為二初  
一總標餘九別釋前中上半正標下半略顯  
世五  
同相言身同者三身十身皆悉同故義亦然  
者此舍多意一旦約三身體依聚義無不同  
以所覺能覺覺他同故又義名所以所以得  
名佛者正覺真智力無畏等無不具故得名  
心佛佛佛皆然故義同也又應用利樂無不

同故故攝論第十云諸佛法身應知恒時能作五業等二十一種功德之中名為逮得一切佛平等性所依意樂作業無差別故二約十身釋義同者皆通三世間彼此互望無差別故種種利樂居然是同此有三因一行海齊滿二大願齊具三同一法性故非唯相似亦一即一切互相融故餘如問明品說下半同相略舉應用同以應即真故非應之外別明法身是同然普有二義一約諸佛謂無有佛不徧十方故二約一佛謂無一方而不現

故後九別釋中分二先四頌正釋後五頌轉釋前中初偈釋前普於十方無餘二義一無處不徧故二一切皆佛身故諸佛本師二頌影略次偈釋前現義謂有感方現故云非內神力能現故云非外次偈釋前隨應種種義一隨物類則十法界等萬類殊應二於一類中隨其先業各見不同如金色塗灰等後偈釋前身同之義結成難思佛身皆同無數量故唯除大覺者佛佛同證故後五轉釋中從後向前釋上四偈前四兼喻後一唯法於中

初二釋第四無能思義一以我為喻謂如妄計之我本無所有故不可思此以妄計情有理無非聖智境以況法身理有情無非下位測後偈以剎為喻喻雖絕相難思而不礙相次一偈釋第三隨業異現所以要隨業者同第五一切法必假緣故此以總喻別次一偈釋第第六二非內外義如珠現物雖非內外能滿物心後偈釋充滿法界義所以能滿者本願普周故第八西北方菩薩真如體淨能成白法復淨世間故名離垢十頌多歎如來淨德前六

淨他後四自淨前中前二總明後四別釋今初前偈智淨妄惑既寂真智不無開示無我知見性相故名為法後偈身淨謂拂應顯真後別釋中前二釋第二偈後二釋初偈前中初偈正明欲見諸佛應專佛境隨念隨現故名心等又了心境即佛真性迷則不知念則便現次偈轉釋專念之義無漏具德故能專念後二中前偈釋普淨世間說法現身而能淨故後偈釋開示佛法示其所悟二無我故後四自淨中初一已淨差別之用後三內淨

三德一見性成佛自開法身稱性現應次偈  
無得成佛自開般若佛法所覺菩提能覺必  
能所相因故俱得無所得者則得菩提後  
偈雜妄成佛自開解脫不動無住故妄倒斯  
寂名真解脫第九下方菩薩解佛徧應法界  
之身而不離法性若彼星宿粲然羅空不可  
縛著故以為名十頌顯佛此德分為三別初  
三總顯即體之應次六別釋體應自在後一  
拂去自在之迹前中初偈約處顯身之徧謂  
法性身則無所住約自受用則無所不住名

為善住約他受用及變化身有感則往故云  
一切土皆往若約十身無處非佛故云一切  
處咸見次偈約機顯身之多故云一切及八  
相事皆由物感後偈結歎難思初句總標下  
三句顯相二句約感不能思思惟約心見通  
心眼下句約應難思云誰能現次六別釋中  
初三順釋後三反釋今初初偈釋前誰能現  
義謂現即同如無生滅故次偈釋前誰能思  
義謂起心而思是妄分別有依有正法性之  
中能所斯寂後偈釋前誰能見義謂能應隨

緣體本自無能感之機竟何所見後三反釋  
中謂由無思見等方能思等則反顯前有思  
見等不了佛境於中初偈無思思要無著無  
礙故次偈無現現神力之現體即虛故後偈  
明無見見躡前無所有為見則稱實之見非  
唯見佛亦得疾成三一偈拂自在之迹者上  
明自在尚假言詮正覺超言故拂言迹超言  
亦假應忘言契之第十上方菩薩知真實之  
法普入法界則所修行皆無分量故名法懂  
知法名佛故先讚見佛之益十頌雙顯佛法

難聞於中分二前四讚佛勸人聞見後六讚  
法勸物聞求前中初一正令甘苦近佛後三  
釋其所以略舉三事初偈聞名益次偈發心  
益後偈生信益既受苦得聞成斯勝益受樂  
不覩不免長淪故應甘苦而近佛也後六中  
已遇良醫復須法藥於中初二由聞實法能  
成行法前反後順次二由聞理智成於果法  
前順後反後二以感應釋成前偈佛興由生  
迷實後偈說法示於真實不動真際建立諸  
法則性不可壞不壞假名而說實相則相不

可壞斯則天魔外道等皆法印故無能壞餘  
 如十藏品上十菩薩之偈應以六相圓融所  
 以偈後無結通者為顯法界兜率讚德異故  
 猶彼處處文殊偈各別顯佛德無盡故  
 大方廣佛華嚴經疏卷第二十五

音釋

衰莫侯切 延巨也 虱盧戈切 蚌屬 遞大計切 更迭也 殄徒典切 滅也

大方廣佛華嚴經疏卷第二十六 最六

唐清涼山大華嚴寺沙門澄觀撰

十回向品第二十五

初來意者當會序分已彰正宗宜顯故又已  
總示所依佛智次別顯能依行位故次來也  
二釋名者回者轉也向者趣也轉自萬行趣  
向三處故名回向回向不同有其十種然十  
之別名本分當釋回向通稱今當重明隨境  
所向義有衆多以義通收不出三處謂衆生  
菩提及以實際上二皆隨相實際即離相開

三為十一回自向他故初回向云若有善根  
不欲饒益一切衆生不名回向二回少向多  
故下文云善根雖少普攝衆生以歡喜心廣  
大回向又云隨一善根普以衆生而為所緣  
乃名回向三回自因行向他因行故第三回  
向云菩薩以諸善根回向佛已復即以此善  
根回向一切菩薩所謂願未滿者令得願滿  
心未淨者令得清淨四回因向果此復二種  
一向自果下文云修諸善根回向阿耨菩提  
故深密瑜伽梁攝論等大同此說二回向他

果第三回向云願以我今所種善根今諸佛樂轉更增勝故五回劣向勝謂隨喜凡夫二乘之福回向無上菩提故六回比向證經文非一七回事向理故不壞回向云與諸法性相應回向入無作法成所作回向第十回向云永離依處到於彼岸故名回向永絕所作至於彼岸故名回向八向差別行向圓融行故如第九回向廣說九回世向出世故下文云所有善根皆悉隨順出世間法教云成熟一切衆生心常回向出世之道第六回向云

永出諸蘊到於彼岸故名回向等十回順理事行向理所成事故廣如第八回向所說前十義中初三皆回向衆生次三皆回向菩提次二回向實際后二義通於果及與實際若依總云十回向即帶數釋若準梵本晉經皆云金剛幢菩薩十回向品則人法雙舉或人之法法之人人有法通二釋也三宗趣者以無邊行海順無盡大願為宗成就普賢法界德用為趣四釋文者文有十分一三昧分二加分三起分四本分五說分六瑞應分七結



通分八證成分九偈贊勸修分十校量功德  
分初中金剛幢入者是衆首故表歸向高出  
等義故不异名說承佛神力彰入定緣入菩  
薩智光三昧者顯所入名檢异果定故云菩  
薩智即是體謂根本智光有三義一是證智  
前相如明得定等此約寄位在賢終故二光  
即根本智用對治無明故如大乘光明定等  
三光即后得了所緣故二智無礙朗照法界  
此約剛幢自體釋也第二入是下加分有三  
一總顯能加二辨加所為三正顯加相今初

有二一明佛現二明贊善今初有五標所  
因謂入是三昧已故十住中云以三昧力二  
十方下佛來近遠三有十下佛數多少上二  
顯位過行故云十萬四皆同下顯佛名同五  
而現下正明佛至餘如前說二咸稱贊下明  
佛贊善於中初標稱善次別嘆得定后顯得  
定所因先別顯五因一伴佛神力二主佛宿  
願三主佛現威四說者智淨五聽者善根十  
住無聽者善根十行缺說者自力此則具二  
理應遍具而影略者表住初自悟行則舍已

利他今則悲兼自他俱無障礙故也所以要此五力者因果主伴皆具足故謂法因久遠願遂將化故主伴加威非器不傳明因主自力非感不應顯因伴善根餘之差當如第三會后令汝下結前生后第二為令下辨加所為有二十二句分二前二十一別明所為后一結為所屬前中初十標所成后十一明所作亦猶十地前十自利后十利他前中初九內德后一外加謂得佛護持信等根故前中前八橫具諸德后一豎繼不斷從前所成明

記決斷故前中前七法體后一大用佛神力者非神境通離世間品神力神通義有异故通謂無擁力謂干能通多就外力多約內就前七中前六別明后一總說謂一門之中具於多門總攝福智重重無盡名普門法界故就前六中五所具后一離過謂所具福智不與二礙有漏相應故前五中前四智慧后一福德就智慧中前三自分后一勝進住佛智故就自分中前二說教后一入證謂入緣起法界相即自在智故前中無畏則於緣無懼

辯才常說不斷上來從后褶疊已釋所成二以無量下明其所作於中初一總謂廣說故后十別於中初一約法次三約位一攝地前二安地上三照佛果次三約修一令開發十向大願二令解實際三令知回向廣大與法界等后三約人一稱根令喜二喜故學三世佛回向三救護一切衆生故不斷佛種后一總結所屬者謂若說十向前益皆成故加所加所為即說所為六相融攝如理應思然約行布地約說地此為回向故與下不同况彼

義皆次第今復反此第三佛子下正顯加相於中三初語業勸說以增辯二意業冥加以益智三身業摩頂以增威今初口加承語便故文有十句初總餘別總云說此法者有二種力一者他力如經得佛護念故此亦名果力亦名增上緣力二者自力即下八句亦名因位力亦是因緣力是故此法要自他因果親疏融合方得有說自力八中初三明有作淨法力一總謂既住佛家理宜宣法以行家業下二別一長無漏功德二入總持智慧故

在佛家次二句無作淨法力一離所淨障謂無二障礙二得所淨智謂事理普照后三顯身淨力即三蓋一二乘不同盡謂雙集悲智離於舍悲入寂過失故二菩薩盡謂離心意識唯依大智法身境故三者佛盡無障礙智是佛法故此是地前有三盡者一圓教普賢位融攝故二約金剛幢內德位已極故又前加所為中住行但有十句正口加中唯有一句今并過前者表位增故鄰於地故多同地經二爾時下意加中二先正明加相二何以

下釋遍加所以前中十句初總餘別然此十句大同地經唯五六前卻餘如彼次后別中一不著辯才說法不斷無留礙故二堪辯才以善淨堪智有四種謂緣法作成故法分別句義三任放辯才說不待次言辭不斷處處隨意不忘名義故云無礙法光忘不隨意則有礙故四即第五不雜辯才三種同智常現在前者慧身平等知三相故故彼云與遍至一切處智五即第四能說辯才有淨音故六教出辯才靜鑒雙流故七不畏辯才智不可

壞何有畏哉或七前卻思之八即無量辯才  
謂一切法智隨順宣說修多羅等六種正見  
故九即同化辯才得一切佛無畏身等三種  
教化隨所度者顯示殊勝三業神變化故次  
釋偏加及爾時下身加并第三金剛幢下起  
分并如前后說第四告諸菩薩下本分中分  
二先總顯禮體相后佛子菩薩摩訶薩回向  
有幾下別示名相今初若直就經文應分為  
三初句總標願體難思希求名願即具攝普  
賢無盡願海深廣難思二充滿下顯難思相

謂體充法界故難思議用普救護故稱為大  
又約體深不思議約用廣不思議又深廣無  
礙名不思議又體相用三并充法界隨所遍  
處無不救護實難思議三所謂下釋成難思  
以行同佛故然總論品內一一難思別示其  
相略申十種一體深二用廣如上已辨三攝  
德無盡四出生衆行五餘不能壞此三充滿  
法界中攝六都不自為七忍苦無倦八背恩  
不轉九逆順端十盡窮來際此五普能救護  
中攝此之十句一一超於言念皆不思議故

收前后有三種體一所依體即智光三昧二約克性即上大願三約總含通有六法一定二智三願四悲五所依法界六通慧作用即不思議解脫以為體性而圓融無礙為回向體若取論勢亦初句是總下三句別一充滿法界即是勝願以是一切佛根本故二普救一切即是大願順作利益故三所謂學佛回向是不怯弱願決定入佛大願故亦未入地故無觀相及真實願大悲增故加前行性住大願利益而住行中有無常愛果因今此缺

者大悲既增惟願救護不欲自求菩提果故第二別示名相文分四別一舉名徵數二佛子下標數顯勝諸佛共說故三何等下徵數列名四佛子是為下結數引證三中先徵后列十回向義略以五門分別一釋名二義相三體性四定位五行法差別初中先總名已見品初后別名今當略釋然通相而辨有其二意一回向二字皆是能回之願救護等名皆是所回之行故皆依主受名二救護等名皆回向之別相回向二字皆別相之通名當

名相望救護等即回向若互相檢是救護之  
回向非不壞之回向則通依主隨其義便不  
可局定第一救護等者大悲廣濟名為救護  
一切衆生大智無著故云離衆生相即是廣  
大不顛倒心回向是行謂以善根回成救生  
離相之行故名回向從所向立名故下文云  
願此善根普能饒益一切衆生明知救護非  
是所回自以十度為所回向耳又唯以離衆  
生相為回者則回向中無隨相也將墜者護  
已墜者救救令脫苦護令息惡并以善根願

能成此二於三寶等得不壞信以此善根用  
將回向三學三世佛所作回向名等諸佛四  
菩薩令其善根至一切處五由回向故能成  
無盡功德之藏六順理修善事理無違入於  
平等七以善根等心順益衆生八善根合如  
以成回向九不為相縛不於見著作用自在  
故名解脫如不思議解脫等十稱性起用謂  
以法界善根回向法界故至隨文中當更開  
顯第二顯義相者先別后通別中前七隨事  
行后三稱理行前中初一悲智不住明行本

次四明行相於中一者起行心堅二約佛辨廣三約法顯遍四約德顯多下二行成一智行成二悲行成后三中一正與理合顯體深廣二明依體起無方大用三顯體用無礙圓明自在二通論一一中皆有三種回向謂以善根回向衆生菩提實際此三各有二義故成回向一以菩薩善根必由衆生而成是衆生之分故還向彼由餘二成餘二流故菩提分故稱實際故法爾向彼二凡是菩薩必為度生不爾同二乘故必求無上菩提是家法

故不爾同凡小故必證實際背無明故照二空故所以要須三者義乃無邊略申十意謂依三法故滅三道故淨三聚戒顯三佛性成二寶會三身具三德得三菩提證三涅槃安住三種秘密藏故一依三法者謂真性觀照及與資成即起信論體相用也實際依體菩提依相衆生依用二滅三道者見苦實際方能滅苦照煩惱空即得菩提回結縛業為利生業三淨三聚者謂向實際故律儀離過向菩提故廣攝衆善向衆生者即是攝生也四



顯三佛性者實際正因菩提了因向眾生者  
即是緣因五成三寶者實際成法菩提成佛  
向彼眾生成同體僧六會三身者謂法報化  
七具三德謂斷智恩八得三菩提謂實相菩  
提實智菩提方便菩提菩提樹下示成佛故  
九證三涅槃者謂性淨涅槃圓淨涅槃方便  
淨涅槃謂薪盡火滅若依地論唯有上二者  
則真極之成寧殊示滅菩提亦爾上四皆如  
次配回向實際菩提眾生可以意得十安住  
三種秘密藏者由向實際則住法身佛以法

為身清淨如虛空故由向菩提能成般若菩  
提朗鑒居極照故由向眾生能成解脫自既  
無累令他解脫隨機應現亦無礙解脫也以  
斯十義立三回向若立三種菩提之心亦依  
此十又此十內舉一為首展轉相由又此三  
者成二行故向實自利向生利他菩提通二  
又向實護煩惱向生護小乘菩提通二護又  
為成悲智智照理事故有三也又隨舉悲智  
亦具此三悲中三者令彼眾生知其實際同  
證菩提故智中三者照生相盡即同實際證

菩提故又此三者其必相資一即具三方成  
其一為證實際故回向衆生以化衆生成  
其自利斷障證實故亦向菩提速證菩提具  
一切智斷於二障方窮實故二為救衆生故  
回向實際速尊實際於感自在方能化故故  
淨名云若自有縛能解彼縛無有是處亦向  
菩提速證菩提方能廣利故地經云欲度衆  
生不離無障礙解脫智三為得菩提故回向  
衆生不化衆生不證果故亦向實際不證實  
際豈得菩提故此三事相資成立非唯三事

自互相資隨一一事具攝法界德用即入無  
礙方名真實回向三事第三體性者有總有  
別總如前說謂大願等別在說分隨位顯之  
第四定位者若約資糧等五諸說不同一云  
此回向位是修大乘順解脫分資糧位終從  
十信來皆資糧故十回向后別立加行故莊  
嚴論說行盡一僧祇長養信令增上增上修  
達分善根又成唯識第九云初無數劫福智  
資糧順解脫分既圓滿已為入見道住唯識  
性復修加行雜依十一亦同此說有云此十

回向是加行立復有二說一云四順決擇分中是后二攝謂十解為暖十行為頂前九回向為忍第十回向為世第一法成唯識云此四善根亦勝解行攝此文為證雖不分明玄奘三藏意存此釋一云四加行中世第一攝故真諦翻攝大乘云如須陀洹道前有四方便菩薩亦爾有四方便謂四十心若依此釋則無五位地前四十心皆加行故餘約四位十三等并如十住品明上來多是大乘初門接引二乘擬議彼立四善根故有說三賢總

為趣聖方便不分資糧加行遠近此據終說有言一切行位都不可說此約頓顯真性而說若依當部一位之中頓攝諸位不礙前后而位滿處即是因圓約圓教說然與前教相參應成四句一唯約相如前諸教二唯約自體如前頓說三以體從相四以性融相此二即當今文謂以性隨相性不差而位歷然以性融相相不壞而常相即故下一一位中具一切非但融因亦常融果融果之因方是真因第五行法差別者行隨位別亦有圓融及

寄法差別若對前教亦成四句準位應知有以十向配於十度隨勝受名雖位位所回皆具諸度以名收之亦有理在四結數引證可知第五佛子云何下說分說十回向即為十段中一一段中皆先長行后明偈頌長行中各二初位行后位果有不具者至文當知位行中各三初牒名徵起二依徵廣釋三依釋結名文處可見今初回向文缺位果於位行中先牒名者具如本分又本業云常以無相心中常行六道而入果報不受而受諸受回

易轉化故名救護等二廣釋中二先明所回善根后修善根時下正明回向今初古人名此以為行體若順前名救護衆生是悲離衆生相為智則以悲智為其行體以是初行故將總體以為別體若以為欲回向故修諸善根即彼善根亦得稱體古義依此后正明回向中二先明隨相回向后我應如日下明離相回向前即回向衆生及與菩提釋救護衆生后即回向實際釋離衆生相前中二先總明令物離苦至究竟菩提即雙明慈悲及二

回向后菩薩訶摩薩下別顯文分為四一利  
樂救護二佛子菩薩於非親友下受惱救護  
三佛子菩薩見諸衆生下代苦救護四佛子  
菩薩以諸善根正回向下迴拔救護初中三  
一總標二我當下別顯三佛子下總結今初  
晉無菩薩等言而有復作是念之語彌顯前  
已回向別顯中文有十句初離苦果二離苦  
因三通因果五怖畏中含三道故上三通於  
深淺后七唯約究竟四得菩提五得涅槃六  
滅煩惱之源根本不覺若滅此者如天之大

明七滅所知之暗故云一切無明即觸事不  
了者若滅於此如人執炬委悉而照八令得  
解脫故涅槃云澄淨清淨即真解脫已脫重  
昏故云燈也九令證法身故言真法十令成  
般若無二礙智亦是權實無礙之智三結中  
以前十句有通淺深故令究竟得一大事第  
二受惱救護中二先明受惱之相后佛子菩  
薩摩訶薩以諸佛法下明回向之相前中亦  
二先法后喻法中有標徵釋可知后喻中有  
二喻先大海不變喻喻遇惡緣不變本心海

喻菩薩器量大故衆毒喻惡衆生不變喻菩薩不亂二日輪普照喻喻遇惡不息利益於中三初喻次合后徵釋喻中略有其二先日輪具德后遇緣不息有十一惡緣合中具合先合具德舉其十德以合於目影顯於日亦十德二福德之輪已圓二智用深廣難測三正念游空無有高下四慈風運用不退不疲五圓福智輪顯照空法六三乘山谷普照無私七使目睹萬像了真俗之義八使居自乘業以智成辦九常為利益晝夜無休十無器

生盲亦不語舍后不以衆生下合非緣不阻於中有四不以具合十一事初一不以通合生盲先正合后但以下反合故出現品云無信無解毀戒毀見等皆名生盲若別合者弊惡合生盲邪見合乾城令人妄謂為實故瞋濁合修羅手日為帝釋先鋒彼瞋故覆障次不知思合閻浮樹崇岩遠谷次不以凡愚下合前塵霧烟雲以彼能遍空猶彼凡愚同一處住后不以衆生數起下合前時節改變謂頻起過惑乍善乍惡如彼晝夜陰陽失度等

三何以徵釋中先徵意云何以惡不厭舍釋意云悲智均故文中二初喻后合中二初總合后不但下別合於中二初以大悲合日惡是其境本為一切豈獨檢於惡人如日普益寧復弃於槁木二如是已下以智合日善惡均照故第二明回向之相中二先辨回向之心后佛子下辨回向之願前中依悲智心行回向故於中二先緣境廣大上等佛心即以圓覺因果之法為所緣境圓明可貴所以稱寶后菩薩如是下悲成利樂下救物心

於中先牒前起后生二種心一於上等佛得淨信心二下與眾生同大悲體由依此二成甚深等十心一契理故二自慶慶他故三離過故四超二乘故五定樂相應故餘五可知普為已下結其所用心順口故名為真實第二正辨回向之願文中二先願眾生令成法器二又作下令得法圓滿於中四一總舉遇緣得法二於諸佛下成自分德滿七財者即十藏前七三於諸佛所常隨下勝進德圓四令一切下明得果滿先標佛樂下二句釋故

第三回向略明十種樂謂不可思議佛所住樂等又不思議法品略明十種無量住謂常住大悲等第三代苦救護中文分為三初總明代苦回向二復作是念我所修行下別明回向之心三佛子菩薩摩訶薩以諸善根如是回向所謂隨宜下總結成益今初分二初明先救重苦后菩薩爾時作是念言下念遍救諸苦今初有二先見苦與悲心堅不退堅有七相謂不舍所行不避苦事不驚忽至不怖迷倒不退大悲多苦不怯長苦無厭二何

以下徵以釋成徵有二意一云生自造苦何干菩薩而欲代之二云劇苦難堪何為不厭釋意云本願荷故逢苦若厭焉能荷負二念遍救諸苦中二先救八苦八難等苦故有諸言隨業流轉是業系苦邪見無智是愚痴苦我應已下起救之心二又諸衆生下救迷四諦苦文中分二初念苦境二菩薩見下正興悲救今初於中先不知集謂痴愛為本是煩惱道染著已下明其業道為有造行故名染著隨業入苦如彼鳥獸因食愛故入於籠檻



作魔業行明有惡業福智都盡明無善業次常懷疑惑無生道見滅之因故不見安隱圓寂不知出離道諦在於生死苦諦二興悲救中起大悲心者令脫苦集故大饒益心者令得清淨滅道故故用善根回向大回向經者賢首云如圓教所說普賢回向故然藏內有大回向經此教最初不應指彼若結集從簡於理可然第二別明代苦回向之心中有五復念前三明代苦之心后二明回向之心今初即分為三初明一向普救無自為心次衆

苦備受無懈怠心三決志保護無虛妄心初文可知二中復二先正明后徵釋今初言大壑者如尾閭壑飲縮衆生無暫已故后徵釋中先徵意云何以獨為衆生備受衆苦復勤修耶釋云一身之苦令多解脫故願自受顯悲之深問衆生之苦自業所招自心所變云何菩薩而能代耶答通論代苦有其七義一以苦自要增悲念故瑜伽四十九問云菩薩從勝解行地隨入淨勝意樂地時云何超過諸惡趣等此問菩薩云何自難惡趣下答文

廣意云謂菩薩於世間清淨靜慮已善積資糧於多苦有情修習哀愍無餘思惟由此修習故得哀愍意樂及悲意樂為利惡趣有情誓處惡趣如已舍宅設住惡趣能證菩提亦能忍受為除物苦願身代受令彼惡業永不現行一切善業常得現行由此悲願力故一切惡趣諸煩惱品所有粗重於自所依皆得除遣得入初地釋曰約此但有悲願意樂身不能代由悲決定自獲勝益二約菩薩本為生求法苦行已名為代后能為物為增上緣

亦名代受三約菩薩留惑同事受有苦身為生說法令不造苦因因亡果喪亦名代受四設有眾生欲造無間等業菩薩化止不后遂斷其命菩薩自受惡趣苦報令彼得免無間大苦名為代受此依梁攝論第十一說涅槃仙預國王亦同此義非唯意樂而已五由菩薩初修正願為生受苦至究竟位願成自在常在惡趣救代眾生如地藏菩薩及現莊嚴王等乃至饑世身為大魚皆其類也或以光明照觸或神力冥加其事非一六由菩薩此

願契同真如彼衆生苦即同如性以同如之  
願還潛至即真之苦依此融通亦名代也七  
由普賢以法界為身一切衆生皆是法界即  
衆生受苦常是菩薩故名為代上來七義初  
但意樂次二但約為增上緣四五二義實能  
身代六七二義理觀融通問若依四五二義  
應能普代何故猶有衆生受苦答此有三義  
一有緣無緣故與菩薩有緣則可代也二業  
有定不定故不定者可代三若受苦有益菩  
薩令受方能究竟得離苦故如父母教子付

嚴師令治如是密益非凡小所知第三決志  
保護中二先正明后徵釋徵意云云何不捨  
何名不虛釋有二意一异小乘不自為故二  
亦不為下明异凡夫著欲過故文中三初正  
明不求二徵釋所以所以不求者見多過故  
文中體即是苦復能生苦近障天樂况大苦  
提惑習雙亡今言淫欲即是道者善須得意  
三菩薩如是下結成前義第二有二復念明  
回向之心即分為二初念令彼得樂后念身  
為保護今初乘前欲苦故令得樂文有十句

初總餘別別中前八涅槃后一菩提於涅槃  
中一住涅槃能建大事名為利益二滅心數  
三證無為四無能所五相不能遷六廣無分  
量七生死真性即是涅槃故無所舍智冥真  
理是以不退八一得永常湛然不滅依解節  
經說有五樂一出家樂脫家難故二遠離樂  
以斷欲得初禪故三寂靜樂二禪為首覺觀  
息故四菩提樂於法如實覺故五涅槃樂息  
化入無餘故彼通人天今唯究竟會釋可知  
二保護中初示安隱道令得菩提名知實義

后又於下令度生死海得大涅槃名到彼岸  
第三總結成益中初總標所謂下加顯別中  
初句救護餘皆成益第四回拔救護謂孤標  
大志普為衆生而無冀望文中二先喻后合  
喻中有二一獨照喻二又諸下成益喻法合  
亦二先合獨照后修習下合前成益即正顯  
回向初之一句通其二勢一成前二標后所  
謂下別顯文有十句初總餘別照謂照機顧  
復之義見於毛詩餘文可知第二大段我應  
如日普照一切下離相回向於中二先以忘

機之智導前大悲令成無緣后安置下正明  
大智離衆生相今初功高二儀而不仁明逾  
日月而彌昏故於中先正明無私不求恩故  
能容受惡為普照故不以一惡而舍衆多設  
盡背恩尚無嫌恨豈况一耶后善根雖少下  
顯成廣大智導悲能普緣故如聲入角小  
亦遠聞第二正明離相回向謂向實際然一  
一隨相皆具如下諸句離相說有前后行在  
一心文分為二先正明離相后菩薩如是下  
總結成益前中義雖總通且取文便略分為

二先會前回向衆生明入實際后以如是等  
下會前回向菩提明入實際然入實際即事  
理無礙故前段亦明不離蘊等后段亦明離  
我我所前中二先廣明離善根回向之相二  
解一切下雙結二相前中有二十一回向分  
四初十四句離所取相次二句離能取想三  
一句離能詮名言四有四句顯如如理由離  
妄想成正智故令前名相皆即如如今初初  
總餘別總謂令所向衆生契同所向實際故  
名安置實際即法性性自無著別中二前十

入理后三離過今初初句遣所向衆生了自性故不著凝然不動隨緣不變二遣能回悲願不依於悲不取願相三遣所回善根四遣所獲果報五六二句雙明起行之身及所向衆生之相即真故不著即俗故不壞七遣所成業行八遣所得報相上四遣體九總顯諸事能成因緣十總明前事從緣所起明上回向不出前十由后二句故無性無性故即法性故無所著后三離過一不著虛名二不著報處三敬養等名虛妄法二離能取想中初

句對所說能后句別無三倒謂於前諸事起心分別常無常等名為心倒於常等境取分齊相名為想倒於相執實名為見倒翻背正信立以倒名翻上名為不起三倒故大品十七彌勒語須菩提言新發意菩薩隨喜諸佛及佛弟子善根已回向善提云何不墮想心見倒須菩提言於彼善根心不生想用此心回向善提於此回向心亦不生心想如是回向則非想倒心倒見倒若取相回向為想心見倒光明覺品云若於一切智發生回向心

見心無有生當獲大名稱此亦無三倒也若依大般若第二會隨喜回向品意則上諸事皆盡滅離變此中何者是諸事耶若菩薩知此一切乃至菩提皆無所有而復能行隨喜回向則非想心見倒以無所得為方便故然小乘或說想心見三次第而起或說一時義分前后心想非倒由見亂故立以倒名雖諸說不同皆六識建立若大乘中亦有多說一云依七識心義分三倒謂七識妄心性乖理顛倒之法名為心倒依是心故便有一切

取其相說為想倒於所取法執實分明說為見倒依此三倒於為無為境起常無常等八種顛倒諸宗異說恐厭繁文三離能詮名四有四句顯如如者前明妄空一切皆空此彰實有一切妙有又即前之空是此之實二義不二為真法印是即妄取回向善薩不有真實回向善薩不無文有四句初總顯實性次別約衆生三印諸事善四心絕貪求第二雙結者一句結所回善根善根可以獨修但云種植一句結回向行回向必有能所故觀無

二如此則德本不生惑本不滅又惑累寂然  
不生真德湛然不滅第二會前回向善提入  
實際者又前明隨相次辨離相欲顯此二同  
時故雙非即離文中三初結前生后二非即  
下法喻釋成三離我下結成回向今初由前

離相所行清淨故順出世無上菩提而言二  
者善根回向世與世世若有若無若即若離  
皆名為二今并無之二釋成中先法后喻法  
中二對初以所回善根對能回行願辨非即  
離明因中無二初句業非回向能所別故次

句不離離業無可回故亦同淨名布施回向  
一切智為二布施性即是回向一切智性故  
不離斯為不二非即故無不二也后對因果  
相望初句果不即因后句離因無果文影略  
耳理應因果各有非即離義后喻中乘光發

影及水月之影皆緣生無性非即非離故云  
清淨初二句以因對報報通十地故后二句  
以報對果三結成回向者能回之我所回我  
所若隨若離并稱動亂今照而常寂故離斯  
分別而不壞相故名方便第二總結成益者



由隨離不二故成無礙離過之益及第三結  
名文并可知第二爾時下重頌分二先叙儀  
意於中初后二句說儀入深句義者說依以  
無量下亦是說依依此說故亦說所為為此  
說故后正陳偈詞二十八偈分二前八偈半  
頌所回善根前六四等一慈二悲一偈半喜  
一偈半舍如地無心故一偈結其普遍后二  
偈半明六度后如是下十九偈半頌回向行  
分二前七偈半頌隨相初一偈半頌利樂回  
向后六頌代苦回向餘略不頌未曾下十二

偈頌前離相於中二前五頌正明離相后十  
方下七偈頌前成益文并可知第二不壞回  
向長行中二先位行后位果位行中三謂牒  
釋結今初牒名徵起謂於諦寶等十種勝境  
深信堅固得不壞名然十表無盡信通事理  
故本業云觀一切法但有用但有名念念不  
住故名不壞是知善根回向皆通事事無礙  
方真不壞耳第二佛子下依徵廣釋中三初  
舉所回善根二辨回向之行三明回向所為  
今初分二先明起不壞信后佛子下依信種

善今初十句不出三寶四信初句佛寶次句  
僧寶餘皆法寶於中初句是總兼含理法意  
欲總包其中初一教法次四行法一大悲行  
二惡止善行行亦攝於戒三回向行四近友  
行次一果法后一重舉行法意欲總包其中  
理法即信真如第二依信種善根中二先種  
善根后令菩提下長菩薩道有十句初總餘  
別可知第二菩薩摩訶薩以如是等善根下  
明回向行中二先將善根回向后將勝報回  
向前中即雙向衆生菩提文中又二初正明

回向后菩薩如是積集下結成今初先總明  
回向善提之果願常下別明回向成得果之  
因文有十句初三行緣次二行因后五所成  
之行初成利他行即回向衆生意次三自利  
后一通二利二結成中九句前三通顯收攝  
亦是聞慧一積一至多二令至究竟三隨一  
使增次四皆思慧后二修慧起行為修習相  
應為安住二菩薩摩訶薩如是積集諸善根  
已下將勝報回向謂依回向得報復將回向  
通向三處文中二先明所回善根二如是修

習無量功德下顯回向行今初又二先結前  
生后后於念念下正明供佛善根於中又二  
先總標后以阿僧祇下廣顯今初言如其所  
應者有二義一隨何所要如應即供二稱佛  
境界所應之供謂不以稱法界之供不能供  
稱法界之佛故二廣顯中四一廣列供事二  
明供佛三顯供意四結分齊今初廣列供事  
有六十七句為六初二十句雜門明內外之  
供下皆純門二座三經行處四宮殿五樹嚴  
六嚴宮殿亦純雜無礙可知二佛子下明供

佛中二先供現佛后一一下明供舍利三為  
令一切下明供意有十一句可知四如是供  
養現在下結供分齊謂非唯如上所列故云  
不可盡第二如是修集下顯回向行中三初  
回向之心二回向之相三回向行成前中有  
三初不離大悲兼回向眾生之意無有執著  
下離妄契真即離相之意后諸佛下結前生  
后二與諸法性下回向之相兼顯回向菩提  
於中有十一句前六離相后五隨相三佛子  
下回向行成於中三初隨相行成二以清淨

下離相行成三菩薩如是善巧下雙結二行  
無礙今初有三初牒前由前離相非唯不礙  
隨相亦能成此隨相次雖隨下正顯文有十  
句一由前法性相應故隨生死而不變二以  
入無作成所作故求一切智未曾退轉三由  
舍離想著故諸有不動四住多善巧能度衆  
生五永出諸有故不染有為六修行不住相  
故不失無礙智七普攝善根故因緣無盡八  
普淨大願故世法不動九發菩提心故具修  
諸度十由善根同住故具足十力如次配上  
后菩薩如是下結前生后即由前最上信解

心生二明離相行成由前事不礙理故觸境  
了如於中初一句總了一切下別別中初唯  
心觀成次如業下緣生無性觀成次出生下  
法眼了真具菩薩下妙行無著亦如次配前  
一了心性故二業無作故三不起想故四行  
善巧故五諸有緣生故六行無住故七普攝  
無著故八諸行廣大故九了菩提性無有二  
唯一實故十由與善根同住故能具菩薩行  
十一由最上信解故於無漏白法無有廢舍  
若通由前則易可知三雙結二行無礙以成

回向中初總明不迷理惑事故名善巧思惟  
后不違下別皆事理無礙可知第三菩薩摩  
訶薩以諸善根如是回向下回向所為初句  
總明后不斷下別顯於中前離魔業通一切  
惡后魔事業通一切相但違法印皆魔事故  
故下釋云以平等印普印諸業則離魔也餘  
句可知第二位果亦如十地調柔等果文中  
初牒得時次得見下正辨果相后菩薩下結  
所屬第二偈頌二十五偈分三初二頌所回  
善根及第一節回向次十八偈頌所成供行

復將回向后五偈頌回向所為二中亦二前  
八頌所回善根后十頌回向之行文中三初  
四頌回向之心次二頌回向之相后四頌回  
向行成所為可知  
大方廣佛華嚴經疏卷第二十六

永樂北藏

大方廣佛華嚴經疏

第一六九册

大方廣佛華嚴經疏卷第二十七 最七

唐清涼山大華嚴寺沙門 澄觀撰

第三等一切佛迴向長行亦二先位行後位  
果前中亦三初標名者若準次文但等三世  
諸佛迴向之道準下亦等善根故文云如過  
去佛所行一切善根我亦如是故本業亦云  
三世諸佛法一切時行兼顯無間故下文云  
與妻子俱未曾暫捨菩提之心此從所等立  
名即等一切佛之迴向以深入法性行普門  
善而為其性二依徵廣釋中二先總標舉即

釋名也後如是下廣釋亦二先顯迴向後明  
成益前中又二先等隨相後等離相前中復  
二先明對境善根以將迴向後總攝萬善以  
將迴向前中又二初所迴善根後佛子下正  
顯迴向今初謂學佛修時於六境違順成四  
淨心一於順違成就行捨不為境牽名心自  
在二異於凡小以悲智廣大淨諸惑故三離  
憂過故有喜樂捨無憂苦惱四禪定輕安故  
心意柔軟不妄取境故諸根清涼第二正迴  
向中迴向五乘之境文分五段一佛二菩薩

三有善衆生四二乘五有惡衆生初中二先  
牒前起後後願以我下正顯所願初總願樂  
增然佛德已圓今願增者尊重荷恩展誠敬  
故亦猶獻芹於上香華奉佛非彼須待所謂  
下別文有十句初句望九亦是總句具下諸  
住故由此名不思議二即天住謂海印等三  
即梵住四即聖住謂無邊解脫等五種類俱  
生無作行通六十自在樂或八自在我七智  
用無邊八離覺圓寂九大用恒湛十二行求  
亡二佛子下迴向善薩亦二初結前生後後

所謂下正顯有十前六自行後四利他前中  
通有三義一通相辨隨願行等而滿故二究  
竟滿故三從次滿初信中隨緣之願如淨行  
品二淨十住解心故晉經云未淨直心者三  
成十行四成十向故善薩戒名十金剛五得  
初地已上證不退故六得八地已上無功用  
行名大精進任運了一切法名護菩提門善  
根後四利他中初令證發心離二我故二徧  
安諸地三通得地中之德四令證佛果三佛  
子下迴向有善衆生亦是迷真實義愚衆生



有於少善但爲求有處人天乘今令住佛乘  
以成十益初三念三寶次三念已成德後  
三由德成益各如次配佛法僧寶念佛三昧  
能發通故四如爲下迴向二乘然衆生於佛  
法易反復故先迴向之二乘終竟迴心故亦  
不捨例前成益五又願下爲於有惡謂不遺  
闡提亦是迷異熟愚衆生不見苦果故初令  
離苦果成善因後求不下令離惡因成當果  
上來五段初一迴向善提餘四迴向衆生第  
二佛子菩薩摩訶薩所有善根下總攝萬善

迴向中二先總顯其相後佛子下歷事別陳  
今初所有善根即所發起等也皆以大願即  
能發起等也別有三句一未生善根以大願  
方便發起令生故晉經以發起爲行二亦以  
大願積集令多三隨已生善一一增勝令充  
佛地而皆有重句云正發起等者謂隨發起  
積集增進必向三處不餘趣求離諸過失名  
之爲正悉令已下總結成益由正發等故令  
稱悲智故名廣大由發起積集故諸善具足  
由增長故一二充滿法界等於如來無善不

爾故云悉令而晉經譯正爲等以梵本云三通正及等然等有二義一者等佛謂以菩薩之行等佛之行二者等餘謂以一行等餘諸行然古德將爲結上雖穿鑿非一並未會下文若以等爲平等與正相近亦攝義不周並非今用第二歷事別陳諸善非一略舉一兩以顯隨緣攝善皆成迴向文中二初顯增長迴向後佛子菩薩爾時下明積集迴向其發起迴向通在二處前段亦是大悲隨順後段以明大悲深重此約善根若據迴向前明迴

向善提爲衆生故後迴向衆生令得菩提皆是綺互欲顯一時迴向三處耳今初增長中分二先別明後菩薩如是下總結前中三初明隨染無汙迴向以慈故隨染以智故居清淨道念薩婆若二菩薩摩訶薩下動與道合迴向徧而無間三爲欲下總顯迴向之相正顯前文大願發起增長之義文中二先總明初句標意安住下即能發起願攝取下所起所增善根普救一切即結成正義二未離下別顯文有十句一離惑故二正趣向故三不

取餘道故四正觀故五捨雜染故六具修因  
故七於菩提因捨二障故八持誦智地九以  
智集善十不染世行受出世法十皆自德能  
向善提若以上普救一切貫之則十皆爲生  
令得此善二總結中以此文證釋增長義理  
甚分明第二明積集迴向中二初別明後  
菩薩摩訶薩如是下總結前中二初明微細  
積集後菩薩初發下長時積集前中亦二先  
明所積善根下至一搏一粒其福至微施與  
畜生其田至劣積此微善亦以大願令正發

起成迴向行二咸作下明迴向行先總明離  
苦得樂次末度已下別彰離苦文有九句初  
總顯深廣次八別明苦相受即苦之自性蘊  
即苦依謂五盛陰苦覺謂苦相亦攝怨會愛  
離等覺聚謂生老病死三苦八苦行即罪業  
因即諸惑本即貪欲處即三塗乃至變易所  
依皆得捨離通後五句後菩薩如是下總結  
令得菩提第二長時積集者從初發心即積  
集故文中二先總標善根迴向後欲令下明  
迴向意即是迴向之相以欲令之言是心願

故文有十三句前十二為六對得隨相益後一句入平等理益前中一離苦果得滅樂二出集因修正道三具悲智成上修道四護善近佛則出煩惱海餘二對共成初對第二總結中一搏一粒等即現集也初發心來即已集也當集之善雖則未起願力逆要起必任五運注向三處況依此教九世圓融第二復作是念如過去下等佛離相迴向者即向實際統於前二說有前後行在一心文中二初等過去後佛子下等於現未前中二先舉所等

後如彼下顯於能等前中三以標隨相即有離相故末句云而無所著次所謂下別顯離相之相三如是深入下結其無礙二中先離妄契止初蘊次處不住世法即十八界有根境識是世間故不依不著即是出世次知一切下釋前不著所以不著者由見實成觀故初句是喻無所從下文舍法喻但觀所喻能喻可知皆由從緣無性故無來等五句展轉相釋故上文云一切法無來是故無有生等遠離已下結其成觀心無分別故寂然不動

外緣不轉不失於照不壞於止故與實際相應實際謂何即是無相何名無相體離十相唯是一相一相謂何即是無相又無相約理本自無故離相約智離取相故唯是一相心境冥故三結無礙者既稱法性修隨相故一攝一切名普門善悉見諸佛略辨成益二顯能等中二先牒所等總顯能等二解如是下別顯等相初二句願等佛解證次二句依之修行不違已下顯修行相至究竟地即是修果第二等現未中分三初牒所等即舉過去

例於現未次我今下總顯能等三第一下別明等相通能所等前過去章中已廣顯離相今此文內直歎殊勝義存影略不欲繁文有十九句晉經具二十句謂廣大下有明淨迴向今譯謂同清淨故缺此一於中初九形對辨勝初總明首出故名第一二越母七凡小故三超因位故四獨出故五無加過故六無與齊故七唯至極無二者可齊等故八無匹故九無敵故後十約自體顯勝一尊可貴重故二妙者言思不及故三稱理無差故四不餘趣

向故五攝德故六周法界故舊云大願七離  
無記故八離垢染故九自無惡行故十不隨  
惡緣故上來正顯迴向竟第二明迴向成益  
文顯可知第二位果略辨十種勝德一因修  
佛業以等佛迴向故迴向衆生是佛業故又  
如離世間品十種佛業二趣佛果德向菩提  
故三智入深理向實際故餘可知第二偈頌  
二十四偈分三初二十一頌頌前位行次二  
位果後一結歎前中二初一頌總標釋名後  
二十偈頌上廣釋亦二先十九頌正明迴向

後一頌成益前中隨相離相雙頌文中亦二  
初六頌對境所生善根迴向於中初二偈頌  
所迴善根兼迴向佛樂後四頌迴向衆生令  
得佛安樂二有十三偈頌總攝萬善迴向分  
三初四頌增長迴向二有三偈頌積集迴向  
三六偈却頌上對境善根迴向菩薩迴文前  
却初四隨相後二離相於中初偈達法際二  
與不二相待皆寂後偈了妄源以想遣境境  
盡想亡非想遣想相待俱寂寂而常照方名  
了想其成益位果結歎可知第四至一切處

迴向長行亦二先位行後位果前中亦三謂  
牒釋結今初牒名徵起至是能至善根及其  
供具一切處即所至供境謂以大願令此善  
根供具徧至一切時處隨所應供供諸福田  
本業云以大願力入一切佛國中供養一切  
佛故然準下文若因若果皆至一切略舉十  
事一法身至一切處如來藏身普周徧故二  
法身至故智身至三智身至故大願至四大  
願至故供具善根至五則見佛聽聞至六則  
現身開悟至七則無來無去至八則不出一

毛孔而能至九則一身一毛等一切身毛至  
十則一念等一切劫至若尅陳別體則以供  
佛善根及勝解心為體通則該於法界第二  
依徵廣釋中三初迴向衆生菩提二迴向實  
際三結歎成益前中二初略明後廣顯前中  
三謂法喻合法中謂以願力及善根力此二  
相資故能徧至次譬如下喻況中實際者即  
一切法真實之際故無不在一切物者謂凡  
是有形故晉經中名一切有餘並可知此與  
如相及法界迴向有差別者此據善根迴向

成供具至一切處第八約善根迴向同如體  
相業用第十約所迴向行廣多無量故無滯  
也第三願此善下以法合中先總後過去下  
別明於中二先舉三世合所至處能事已畢  
過云願滿修因已圓未云具足現成正化故  
云國土道場後願以信下明能至供於中先  
成供因因有三種一以勝解則隨心轉變二  
以大智了無障礙三以善根迴向稱願而成  
以如諸下辨所成供可知第二佛子菩薩摩  
訶薩復作是念下廣明於中二先約十方佛

明其徧至後約常住佛明其徧至前中分三  
初總明供處二如是一切下別明供養三以  
此善根下通顯迴向之心今初先約處顯多  
次種種業所起約因顯多十方已下約數顯  
多種種世界約形類顯多義通受用及變化  
土二別明供養中二初供現在佛後若佛形  
像下供住持佛前中二先所供田後佛子下  
明能供行前中二初實報田二彼有下辨權  
應田於中三初現身次說法言以至一切處  
智者意明今此位菩薩亦能爾也此即本下



迹高若佛爲菩薩則本高迹下或俱高俱下  
因果交徹思之三法身下釋權佛所由初之  
三句顯與果佛平等同性起故一得法性身  
同徧往故二等有智身入法界故三普賢自  
體如來藏身不生滅故由上三義故能善巧  
普現世間若爾衆生豈無如來藏身九故下三  
句復釋成前義一證法實故得同法身二有  
無礙智力故普入法界三佛種中生故得如  
來藏身之用謂絕二障權實無礙是如來見  
廣大威德是如來用菩薩隨順悟入是生彼

種性之中故出現品云若得聞此如來無量  
不思議無障礙智慧法門聞已信解隨順悟  
入當知此人生如來家廣如彼說得斯後三  
因位尚即爲果況應現耶上亦供行所因二  
明供行及供住持佛等文並可知三通顯迴  
向之心中初句總牒善根迴向後所謂下別  
顯行相謂前以善根迴向成供供諸田時如  
是用心文有十句一不生妄念二專注正境  
三不由他悟四於田殷重五違順不動六不  
住於法七不依於境八知我空九心行安審

十正順涅槃第二約常住佛明徧至者謂三世住壽盡未來際應亦常也三身十身融無礙故不同前文有塔廟等文中有三初以善根迴向供佛二願令一切下以供佛善迴向眾生三譬如下總願善根普攝迴向初中二先所供境後如是一切下顯能供行今初盡空法界明處無不徧去來現劫時無不窮諸佛世尊總該真應得一切下明真極之成於種種時下明應現成成即有始應乃無終故皆住壽盡未來際真應無二故一一各以法

界莊嚴主伴圓通故道場衆會皆周法界出非在我故曰隨時興必利生名作佛事二顯能供行中三初結前生後二願以下所成供具三以如是下結成供行二中二初以香爲蓋等二十事次無量華蓋下以華鬘等九例於前香各具二十香等離蓋等更無別體故有二百後如是一一隨彼蓋幢等中若總相說皆有楯等九事成一千八百并前本門總有二千是則香等成蓋等蓋等有楯等從無數無量如是漸增且至不可說理實皆等

法界難可稱也然一一諸言定通香等不全通於蓋等以衣及光明何有門闥樓閣等耶是則都數未必二千但通相言一一諸境界也三結成供行可知第二以供佛善根迴向衆生者正顯迴向之願然前段供後有不亂等心今此供後明清淨等願者文有影略義實相通文分爲二初總顯所爲謂令得果感淨智明後令一切下別顯願得因圓果滿初明二利因圓成就已下智用果滿第三總願善根普攝迴向者以上來三段別明善根但

說成供供佛今欲顯此善根無所不成故復明此於中二初喻謂二無我理普攝理事無不周故二我諸下法合有二十句前十二句攝成自利德後八成利他並顯可知第二佛子至以諸善根如下實際迴向中二初總標二不於下別顯今初用無所得爲方便者略有二義一以無所得導前隨相則涉有不迷於空爲入有之方便二假無得以入有不存無得即此無得亦是方便此爲入空之方便也今文正用前意義兼於後欲顯隨相離相

無前後故然略云無得準大般若亦以無生無滅無住等皆為涉有之方便也二別顯中三初正顯觀心二菩薩如是了達下明觀成之相三菩薩如是觀一切下明觀成益初中十句義有四節初一會事歸理謂事法既虛相無不盡理無不現故業果皆空業空故無體可能招報況謂因中而有果耶報空故無體可以酬因況謂果中而有因耶若約觀心名會用歸寂次五句明理不礙事約心則寂不礙用於中初句理無能所分別而不礙有

能入之智所入法界次句無作而造作次句無起而修起次句無能所信而能即事入玄此與初句但事理之異大般若云若信一切法則不信一切法以不信一切法名信一切法此約不信是真信今約不信不礙信末句不有能所見而不礙能所見三有二句事理雙絕約心則止觀兩亡初句正釋作事也不作理也待對假言故皆不可得下句釋成法從緣起不能不生諸緣離散不能不滅從緣生滅不能不有緣生無性不能不空故諸法

性無暫自在何有性相而可得耶四有二句  
明事理無礙約心則寂照雙流良以事虛攬  
理無不理之事理實應緣無不事之理所以  
寂而常照照而常寂故終日知見而無知見  
也上四句初則會有歸空有未曾損次依空  
立有有未始存次空有兩亡無隱無顯後空  
有無礙存沒同時四句鎔融方名離相實際  
觀也二觀成之相然此段文更有二意一前  
是即觀之止後明即止之觀前雖云知意明  
無知二以後段釋成前文由知因緣等故不

於業中分別報等雖有此二觀成相顯於中  
分二初句結前生後由依如前了達心境故  
能成下如是知見後知一切下正顯其相文  
有八句初總餘別總中由上觀故能知因緣  
何等因緣謂一切法若漏無漏為無為等皆  
以因緣而為其本云何為本謂因緣故有因  
緣故空因緣故不有因緣故不空因緣故流  
轉因緣故還滅乃至一切皆由因緣故中論  
云未曾有一法不從因緣生有為緣生無為  
緣顯因有有為則有無為又形奪相盡是真

無為下別有七句釋成上義由觀因緣得見佛等是故因緣為諸法本一見法身因緣無住無住之本即是法身經云佛以法為身故論云若見因緣法則為能見佛二見法實際因緣性離為法實故三無性緣生故如化似有四理外無事故唯一法皆如來藏事事皆虛故無二性尚無有二何況有五五緣性無礙故於業境皆得善巧以業攝報境必對心則內外因果皆善巧也六即事顯理而不壞事故云於有為等七即理成事而不隱

云於無為等若滅壞有為則失有為本空若分別無為即壞無為之性是以若約相即為即無為無可滅壞無為即為亦無可分別若約無礙則事能顯理而非理理能成事而非事事理相即性相歷然故為無為體非一異示謂顯示有為界分無為界性三觀成之益文顯可知第三佛子至稱可下結歎成益上來近明離相之益今則通辨一迴向益文中二先明自分二利益初向上稱佛心餘句自成二利二佛子下勝進二利益文兼體用並

顯可知第二大段菩薩下位果中三初牒得時二得至下正顯所得文有十句初三三業體徧次三三業用徧後四顯用自在三佛子下結第二重頌有十一偈分三初七頌迴向衆生及菩提次三偈半頌迴向實際後半頌成益前中二初一偈頌前略明至一切處但頌法說所修善根後六頌前廣明於中初半偈通頌前所至處次一偈半頌前迴向衆生後四頌前普攝迴向餘可知自下入第五經第五無盡功德藏迴向長行中亦二先明位行中

亦三今初牒名徵起由緣無盡境行迴向故成無盡善根功德之行得十無盡藏之果從能迴及果行受名或無盡功德之藏或即藏通二釋以迴向望行迴向為能藏無盡功德是所藏以因望果亦然並有財釋本業云常以三寶授與前人故名無盡功德藏此義亦通所迴善根即以五門善根迴向而為其性第二依徵廣釋中三初明所迴善根二明迴向之行三結行成德今初文有八句初三可知四聞法修證屬於勸請以對佛親請必

聞法故後四皆隨喜然依離垢慧所問禮佛法經總有八重一供養佛二讚佛德三禮佛餘即五悔或合禮讚或略供養或但為五以發願迴向但總別之異如十住婆沙今文依此迴向在於下文故此有四或但為三故智論云菩薩晝夜三時各行三事謂懺悔勸請隨喜行此三事功德無量轉近得佛若依善戒經但有二事謂懺悔迴向皆隨時廣略然懺名陳露先罪悔名改往修來除惡業障故須懺也然懺有二種若犯遮罪先當依教作

法悔之若犯性罪應須起行此復二種一事行如方等經及禮佛名等二依理觀謂觀諸法空如淨名說當直除滅勿擾其心等若依普賢觀及下隨好品皆具事理無礙之懺至下廣明言禮敬者除我慢障起信敬善故勸那三藏說七種禮第七今加後三以成圓十五十一我慢禮謂依次位立無敬心故二唱和禮高聲喧雜故此二非儀三恭敬禮五輪著地捧足殷重故四無相禮入深法性離能所故五起用禮雖無能所而禮不可禮之三寶一一佛



前皆影現故六內觀禮但禮身中法身佛故  
七實相禮無內無外同一實故八大悲禮前  
雖有觀未顯爲生今一一禮普代衆生故九  
總攝禮總攝前六爲一觀故十無盡禮入帝  
網境若佛若禮重重無盡故言勸請者名爲  
祈求除謗法障起慈善根故聲聞自度但懺  
已罪菩薩愍衆故須勸請但勸如來普雨法  
雨則自必霑洽此文略云勸佛說法智論復  
加請佛住世占察經中亦請菩薩速成正覺  
次句因聞法故起悟入善言修習者瑜伽八

十三云修者了相作意習者勝解作意故又  
修者於所知事而發趣故習者無間殷重修  
加行故言隨喜者爲慶悅彼故除嫉妬障起  
平等善然十住智論皆有三位一諸佛善二  
二乘善三人天善今文四句初一總明具於  
三善二乘正是所訶故不別舉而含在一切  
衆生之中後三句別其第二句別明三善結  
一隨喜後一隨喜諸佛因果大品隨喜品明  
大千海水一毛破爲百分滴取海水可知其  
數隨喜之福不可知數法華展轉第五十人

尚難校量況初隨喜此據隨喜如來權實功德其福更多然佛是除罪勝緣故與懺悔前後無在既淨身器次希法雨復攝他同已迴向三處不墮三界及與二乘然禮等五果通得菩提別則懺得依正具足禮則尊貴身器具足勸請得慧隨喜得大眷屬并大財福迴五七向離邪常遇佛世常能修行約教不同可以十六思準第二菩薩如是下明迴向前中二先結前善根後悉以下正明迴向前中二初橫結上來及不說者後凡所下豎結前善謂隨前

一善皆有積集等故具足為圓滿學成為成就證入為獲得了性為覺知餘文並顯二正明迴向於中二先迴向菩提後迴向眾生前中二先明隨相後明離相前中亦二先正起行願後結行成益前中又二先迴向淨土後總攝迴向前中亦二先明眾寶莊嚴後明人寶為嚴汎論嚴淨有其三種一處所淨二住處眾淨即前二段三法門流布淨亦名受用淨徧上二段又此二段之中具足十八圓滿今初有二初總標所成二如過去下別顯

嚴相於中亦二先舉三世土嚴二願成彼嚴  
今初亦二先別明二總結前中三世即爲三  
別謂過未現在而爲其次今初分二先總明  
後別顯今初先舉時辨處次所謂下總標世  
界種者即方處間列如初會說無量者無分  
量故無數者數多故佛智所知者淨識所現  
唯佛窮故菩薩所識者登地分見故大心所  
受者地前能受故莊嚴佛刹者即正顯示此  
雖義當形色意是總該二清淨下別明有二  
圓滿初辨因圓滿謂出過三界淨土亦有出

過之因然上世界成就品中起具因緣總有  
十種生佛兼說有淨穢故今此唯五欲同佛  
淨故略衆生初句亦總亦別總明三土之因  
皆無漏業故云清淨自受用土淨行所流萬  
行生故他受用土及變化土淨業所引隨業  
現故別則唯約受用因緣所流增上緣所引  
故佛地論云如來藏識中無漏善根爲因而  
生有義但是增上緣生以外法故有義亦是  
因緣而生親能生故若不爾者應無因緣外  
法相望非因緣故意以後義爲正言亦是者

通三緣故有云感報淨土以四塵種子而為  
正因親感土故六度萬行而為緣因助成土  
故或以自利後得而為緣因依此經宗以  
一切波羅蜜行隨其所應依正二果互為二因  
互相資辨以皆是法性相應善根成故常融  
常別餘如世界成就品下四唯別初二變化  
土因初句約為緣義後句約為因義次句是  
自受用因故云出世淨業後句義兼自他受  
用土因登地已上皆修普賢之妙行故又此  
妙行即圓融因融上諸土無障礙故二一切

下事業圓滿自能現作一切有情一切義利  
故如來雖即是主意取義利第二盡未來下  
舉未來土嚴文中二初總標二盡法界下別  
顯有九圓滿文分為五一分量圓滿此通二  
土謂約自受用從初得佛盡未來際相續無  
變橫周法界故無邊際約他受用十六為於地上  
隨宜而現勝劣大小改變不定但地前不測  
言無邊際登地常見亦無斷盡此文兼明方  
所圓滿以方所有二一自受用周徧法界於  
三界處不即不離故二他受用處下文當辨

二皆從如來智慧生者即果圓滿自受用土  
圓鏡智生他受用土平等智生三無量下依  
持圓滿故佛地經云無量功德衆所莊嚴大  
寶華王是爲依持今文中先總標妙寶所謂  
下別列初三事嚴中有蓮華次二德嚴初即  
無量功德佛力即是能持後一即是所持之  
國佛地唯據於事但云蓮華今通事理故云  
佛力功德莊嚴亦通事理四如來所都明主  
圓滿五不可思下輔翼圓滿復兼四種文中  
分二初總顯則兼眷屬圓滿眷屬謂人天八

部然皆菩薩化作示淨土不空故今但云諸  
清淨衆則兼之矣後未來下別顯勝德兼三  
圓滿初明方所圓滿佛地經云超過三界所  
行之處今云一切諸佛之所成就通於自他  
受用非世所觀即是超過菩薩能見是他受  
用受用方所或說淨居或說西方等是二此  
諸菩薩具大威下皆門圓滿以三三昧爲所  
入門此中初句顯門之因知一切下是空門  
相行菩薩業是無相門相善巧方便下是無  
作門相入不思議三昧通該前後三又此淨

業即攝益圓滿以離煩惱纏垢等為攝益故名為清淨第三現在下舉現在嚴中亦二初總標類同過未云亦如是二無量下別顯有三圓滿一者形相即形色圓滿二無量光色即顯色圓滿悉是已下總以因結三無量香下住處圓滿於中有三初總明住處次隨順下別顯處因即他受用因故云示現後所謂下廣顯處嚴以超過一切菩薩及餘住處名處圓滿第二如是等下總結三世嚴具及土於中二初總結能所嚴後所謂下別顯所嚴

有二十九種隨體德用立名不同亦可并前總標通結上來十八圓滿隨勝立土如理應思第二如是過去下願成彼嚴於中二先嚴一界後如一世界下例嚴普周顯嚴分齊令法界土皆具三世一切莊嚴既一佛土即具無盡莊嚴則一嚴一切嚴亦顯一圓滿即一切圓滿重重無盡方是華嚴淨土圓滿第二佛子菩薩至復以善根下人寶為嚴同十大願中第七願也亦即是前輔翼圓滿文中三初總願所成二其諸下別顯願相三願令如

是下結以嚴刹二中文二先願德高後願業  
廣前中亦二先正顯德後結德嚴土前中有  
二十句初二總明體實智圓後善能下十八  
句別顯於中先明智圓後深入下明體實今  
初即路圓滿大念慧行為所游路路即道之  
異名文中初明大慧分別長是權深入是實此二十  
是慧體離癡慧業成就念下即大念也七念  
之中略舉前四七念如離世間品後法日下  
即是大行行即修慧故後釋體實亦是行攝  
二結德嚴土中初句總次生如是處指前淨

土有如是德即指向文第二常作佛事下願  
業廣中分四即四圓滿初明事業圓滿上辨  
佛業今菩薩業二得大智下即乘圓滿大止  
妙觀以為乘故三趣薩婆下無畏圓滿內無  
災患外無畏故四隨順三世下即任持圓滿  
論云諸佛菩薩後得無漏能說能受大乘法  
味生喜樂故文中二前明能受後知阿僧祇  
下能說第三結以嚴刹中初總彰人徧次熏  
修下結行德深謂以止以觀唯智唯悲熏修  
身心無有間斷名極熏修現惑不生故云純

淨種習不起名極純淨恬和也宴安也恬和  
安寂即照寂之相也亦一乘也後於一佛刹  
下別示徧相兼顯數多於中三節一刹中一  
方有多數量次以方例刹後以刹例法界一  
方所言義兼大小準下僧祇品於一微細毛  
端處則有不可說諸普賢也言如是者如前  
具德也第二佛子菩薩摩訶薩以諸善根方  
便迴向下總攝迴向非唯但向佛淨土故文  
有十句初三結前已說後七辨所未明言出  
要者小乘出要唯有四種謂進念定慧三十

七品不離此故今亦兼有大乘出要唯有三  
科謂四攝四等及與十度三乘切要唯止與  
觀大乘切要唯智與悲故十地皆云大悲爲  
首智慧增上餘並可知第二佛子菩薩摩訶  
薩如是迴向下結行成益總收三種世間第  
二佛子至以如是等下離相迴向即向實際  
文中二先明見實智冥實際後彰離妄德合  
實際此之二段反覆相成今初初句牒前迴  
向善提其心已下正顯離相寂然無涯爲入  
不思議即事契真故常平等由此故能徧入



若事若理無礙法界名爲一切二佛子下彰其離妄文有十對初六遮妄執有以緣成無性故皆前迴向之法思所起者謂身語業餘文可知次一對遮妄執空以即空故不礙存故不壞假名說實相故不壞因果後三對雙遮空有初遮事理法即理法五相即故不可定取次遮生死涅槃離向背相通有二義一約離相謂生死涅槃相待而有俱空叵得二約體融以緣就實生死即涅槃故無妄分別以實從緣涅槃即生死故非真寂靜故中論

云涅槃之實際及與世間除如是二際者無毫釐差別而晉經云生死非雜亂涅槃非寂靜言異義同後對即遮能所證既二際無差唯佛能證故復拂之上句標下句釋亦通二意一約離相能證相離不能證於佛境所證體空故無少法與能證智同止相契故楞伽云遠離覺所覺二約體融佛即法界不應以法界更證法界故文殊問經云若以法界證法界則是諍競如智一體如外無少智爲能證智外無少如爲所證故無可同止次下文

云無有少法爲智所入亦無少智而入於法  
影公云法性不並真聖賢無異道即斯意也  
上來三節皆約遮邊前來契實已辨雙照則  
四門備矣第二佛子下迴向衆生中初總明  
謂即前迴向菩提時便以善根迴向衆生故  
云如是迴向時也次決定下別顯行相有七  
句二句隨相一無放捨心二無怨親相五句  
離相一不見衆生相二不取化緣三不稱量  
根性四無能度我人末句總結第三菩薩至  
如是迴向已下結行成德有四佛子兼此爲

五一成無盡善根德二成二空智慧德三成  
境界清淨德四成福智無盡德五成福智廣  
大德就此五中初一雙明次二離相後二隨  
相今初由隨一一行發無盡心故成無盡德  
文有十句初總所謂下別於中前四隨相所  
成初二因果後二依正次二離相所成顯其  
深廣次二解行通於隨相及與離相後二通  
顯上來迴向同三世故第二佛子下成二空  
智慧蓋中十句初四我空一無衆生離衆生  
垢故二無壽命離生死故三無作者亦名無

我難我垢故四無數取趣前後際斷故餘如  
十行說後六法空文亦可知第三佛子成境  
界清淨德一刹淨者略有三義一了穢即空  
故二如螺髻等穢處見淨故三雖覩淨穢無  
見相故二衆生淨同一空故同如來藏故無  
見相故三法淨對法辨智義便故來此亦二  
義一空無能所故二同一如故舉一全收智  
外無如爲智所入如外無智而入於如法性  
寂然故名爲如寂而常照故名爲智何有異  
耶亦同上來無法同住後一佛海爲破執有

說佛如空若同空無此見非淨今明二利德  
圓非如虛空一向無也第四佛子福智無盡  
德初土攝佛智謂十力智地有不可說用故  
念念得多福次具足下自爲福田此菩薩下福  
智無盡第五佛子福智超勝德中初句總顯  
福智之因次福德下正顯勝相初明福勝其  
心已下顯智超勝第二菩薩下辨位果中四  
謂標徵釋結三中有十句皆先標名後釋義  
於中初六自利初一見佛約微細門一毛之  
義前文頻釋今重發揮請心性本無大小悟

之成智身上皆為智影智淨影明故大小無礙一多即入次五見法即相入門一證理法二持教法三慧知容意謂以實履權等四義窮意趣謂四意趣等亦是窮於性相五聞藏義兼修證次三利他一福滿他意二智滅他志感三辯教平等後一攝行成果此上多有同十藏品可以意得四結可知第二應頌二十五偈分二初一頌所迴善根文並具舍餘二志十四偈雙頌前迴向善根及結行成益於中二先有十一偈頌二段隨相後十三偈頌二

段離相今初分三初八頌向菩提於中亦三初四頌上嚴刹次三偈半頌入寶嚴後半偈頌總攝迴向二菩薩如是下一偈頌迴向眾生三十方下二偈頌結行成德五段通頌第二菩薩善觀下頌二段離相中三初七頌前菩提離相與前見實及離妄相參而頌顯此二相成故次二頌眾生離相後四頌結行成德離相中初二偈頌境界清淨德後二頌一空智慧德第五迴向竟大方廣佛華嚴經疏卷第二十七